

清名家詞

共
讀樓校輯

夏敬觀題



玉壺山房

詞

連



改琦（乾隆三九——道光九）

字伯蘊。號香白。又號七薌。其先本西域人。祖爲松江參將。遂爲江蘇華亭人。柔弱多病。工詩詞。善書畫。所作仕女折枝花卉。妙絕一時。著有玉壺山房集。

引

古之稱三絕者，有鄭虔。虔之書畫，今已不可得。唯詩僅存。夫畫之工者，必通於書。而書畫出自能詩之人，亦自異於凡手。閱時既久，則書與畫不免零落。詩或單篇隻句，不至盡泯。是故三絕之兼擅最難。而其傳之難與易，又較有間也。三絕固不易見，乃竊聞今時之能兼擅如古鄭虔者，吳越間推兩壺焉。越爲松壺叟，吳卽玉壺先生也。先生習於先詞馬，兩世交情，蹤跡最稔。當嘉慶中，泉石長夏無事，輒邀先生至園中。池館追涼，竹露荷風，宵盡晝息。故先生書畫，皆識者所復圖者。多時，偉方學詩，過庭暇，聞先生緒論，嘗以所業試之。爲點易一二字，雖使人豁然心明，然後知先生之學之不僅畫也。近歲來，嘗索筆出遊，往來江館湖亭，每每其則具於酒邊，或畫中，或出遊草跡二三。老友偉亦與畫自爲，蓋亦知畫之可與詩並高。問其求畫者，長箋短幅，盈篋堆几。日夕從事於腕，生細畫中，先生初嗜詩，後專力於畫，厥作甚夥。部中同人刻海東近課，曾刻畫一卷。先生意不自足，後以金匱揭其文，郭君麟選存若干首。

又復自爲刪定。未及付梓。遽歸道山。偉以通家子。少承一字之師。感舊傷情。無由追慰。求遺稿於苦次。壽諸棗梨。使讀者知先生爲今時之鄭虔也。至其詞之工。則有當世能文之士。序而傳之。偉何人哉。豈敢復贅。聊綴數語。識校刊之緣起云。道光戊子七月既望。後學沈文偉謹書。

玉壺山房詞

華亭改琦伯蘊

法駕導引 聖姑廟神絃曲

桃花水。桃花水。玉洞曉烟紅。滿地流雲仙鶴語。紫簫吹軟夜東風。春夢忒匆匆。
花鬢結。花鬢結。樓閣化爲雲。舞罷山香過。羯鼓落梅飛上月華裙。烟海碧氤氳。
秋風起。秋風起。采采白蘋香。一簇菱花栖蛺蝶。幾莖藕葉罩鴛鴦。暮雨太淒涼。

風入松 蕝雲禪院

好山闌醉。蕝雲深。幽鳥喚登臨。半空紫翠烟霏散。蕩魚天。巒影浮沈。騎火茶分顧渚。
乞花書。仿來禽。巖屏習靜。晝眠琴。石磴古苔侵。誰知桑下經三宿。嘆人間。駒隙光陰。
陶寫豪絲叢竹。消磨雨屐風襟。

菩薩蠻

檀衣素佩風飄靡。綠莎庭院行香也。縹緲步虛聲。初繙纓珞經。一枝畫眉筆。學寫

玉壺山房詞

簪花格。玉女字蘭修。幽居杜若洲。

一行炙暖瑤笙字。春窗月好眠還起。指冷袖輕籠。山茶映雪紅。冰苔印雙屐。半晌花留立。黛色點眉心。不知愁淺深。

轉轡金井 翠峯寺

夾輿空翠喜松聲。導入寺門幽徑。薄日朧明。繪滿庭藻荇。香林晝靜。認老衲、古時禪定。雪竇橫經。天衣折擔。龍吟枯井。僧雛汲泉煮茗。拓僧窗看水。帆影端正。半嶺風篴。問冷泠疏磬。澄波萬頃。只一晌、雨昏烟暝。鏡翳青銅。圖開粉墨。佛樓閒凭。

徵招 古雪庵小休酌悟道泉而返

幽棲不放斜陽入。濛濛四山深翠。曲澗繞軒窗。漾流雲如水。素濤生椀底。莫孤負、竹鑪風味。滿耳松言。半房茶夢。一襟涼吹。移屐轉峯陰。烟苔古、難摹井眉題字。天遠餉空餅。語西來禪意。心塵清更洗。漸林外、疏鐘聲遞。待留補、壞色袈裟。緝野塘荷芰。

浣溪沙 花隱園

池上日華慵起早。黃磁斗小栽瑤草。分付修微添畫稿。雀梅葉底青蟲裊。玉桂花
間紅蝶繞。滿地殘英愁未掃。

醉公子 午日坐雨真適園聽非石吹笛

何處尋烟語。坐聽松間雨。新茗碧螺春。舊書白練裙。酒半吹銅笛。閣外雲如墨。醉
插帽簷斜。一枝紅蕙花。

思佳客 放船查灣訪懶漁不值

柳岸蒲塘綠已齊。烟艸浮動碧琉璃。雲開蕩嶺通樵語。日出查灣露釣磯。懷一刺。
款雙扉。溪聲樹色草堂西。洪厓北江醉後方乎。鐵夫去。仙笛吹殘又落梅。

臨江仙 石公

一水盈盈誰語。空山寂寂無人。蒼茫獨立太湖濱。白鷗相對。隔斷軟紅塵。撈月醉
遊碧落。撻雲飛夢青雲。夕陽影借醉顏醺。素波如練。雁字看書裙。

踏莎行 歸雲洞

似水縈洄。因風舒卷。洞天遮黑繙經眼。無心冉冉出巖屏。吳根越角都行遍。素練橫空。千絲擘繭。拖殘雨腳隨帆轉。只留一朵伴僧歸。輕陰移過斜陽院。

瑞雲濃 林屋

洞天古地。幽探遙叩瓊宇。窈窕芝房渺何許。鈿函綠字。記甚時。赤烏銜去。有客弄瑤笙。倚梅花那樹。夢想尋真。休負了。烟霞伴侶。草沒鞋痕露如雨。仙人舊館。又飛徧。落英殘絮。隔院松風。一鈴自語。

生查子 角庵

縹緲一峯青。三面松雲繞。結箇小團焦。花落無人掃。不見採芝尋。露綴明珠。石上生瑤草。

醉太平 松瀆

風聲雨聲。天高氣清。松光十里深青。閃斜陽半明。峯圍繡屏。苔鋪翠榻。山家縛箇荊亭。枕谿流臥聽。

水龍吟 由消夏灣入蔡仙鄉而至龍渚游石佛寺小憩水上亭居僧以盧橘
作供憑眺久之已見隔湖弁山隱隱列几席間也

曉霞散入微茫。五湖樹色開青嶂。灣頭雨過。荷錢千點。烟波搖蕩。越網牽來。鴟夷載去。老漁惆悵。指白雲鄉裏。日長山靜。林花落。聞樵唱。遙覩靈鷲。踏浪護珠龕。紛拏龍象。風搏水激。石欄斜靠。摩空飛響。小摘枇杷。金丸初綻。堆盤相餉。對清光似鏡。一痕遠黛。畫新眉樣。

醉江月 石湖

玉虹橫臥放湖山。開了春風詞筆。花影吹笙無覓處。何況梅邊吹笛。鶴磯煙消。馬塍雨黯。根觸今猶昔。舊家亭館。舊時魚鳥相識。還念譜出新聲。蛾眉愁絕。醉把闌干拍。萬頃清光流皓月。飛下一雙鸕鶿。西望羣峯。飄然引去。森森澄波白。人間天上。不知今夕何夕。

浪淘沙 橫塘

梅雨晚來晴。新水生萍。孤篷搖曳月中行。七十二峯漁夢遠。棹入空明。帆影卸烟汀。綠野雲停。好風吹起踏歌聲。我有江南腸斷句。吟與誰聽。

生查子 湖上尋詩圖師竹屬題

香月逐人來。茶夢清如許。何處覓鞋痕。九里松花雨。最憶斷橋西。一鶴烟中語。我亦小勾留。拾得逋仙句。

浣溪紗

曼生畫莫釐縹緲兩峯贈非石乙亥五月予至山中屬題此句

一笑逢君卸片帆。涼雲似水畫漁衫。具區風月石橋南。眼底遙青如舊友。袖中冷翠出巉巖。紫溪題墨酒初酣。

虞美人

明妝秀鬢紅酥手。人似當時否。酒邊伴醉意知無。笑問十年前事只模糊。雲萍易散人難聚。且聽瀟瀟雨。花深月黑莫還家。今夜落梅風起太寒些。

減字木蘭花 青海道人虬書眉廣屬賦

仙人游戲。墨氣淋漓。紙能貴。神似雲麾。抵得追魂北海碑。金剛不壞。手壁溪藤挂。龍怪。劍佩珊瑚。下筆靈風滿石壇。

又 書子冶夢影集後

畫紗苔格。涼韻珊瑚盪。詩魄。竹影燈痕。仙夢如烟。餞綠春。望湘人老。同是愁春惜芳草。一段春情。雨細於絲。織不成。

憶蘿月 風屋補蘿圖

黃茆蓋就。臥聽風如吼。倚翠牽蘿。秋影瘦。依約暮寒時候。打頭屋。只三間。支撐月地花天。知否晴多雨少。漏痕溼了紅箋。

阿那曲

素面洗妝妝閣裏。傾脂河上。傾脂水。藕絲衫子颺輕風。紅玉淺斟猶未醉。

滿江紅 輓高庭香丈

鐵骨冰鬚。漸消盡。人間熱惱。分明是。殘棋一劫。仙心難料。慘澹寒窗燈味苦。飄零長

缺兒時少。聽隔籬、相向哭西風。傷懷抱。書滿架、閒來較。酒滿盞、愁來倒。但披裘危坐。閉門學道。百歲團圓能有幾。一家福慧修難到。汲清泉、一盞薦梅花。驚山鳥。

曲游春 陪漚翁游雲峯寺爲設伊蒲供於賢首堂觀居僧所藏趙文敏公中

峯禪師書畫合卷試古毫泉同人各有題記因譜此詞丙子三月十九日

幾度尋烟語。指香林深處。纔點雙屐。撥酒搖豪。趁冷廚燒筍。慢酬寒食。醉掃僧廊壁。許再乞、鷗波題墨。溯前游、五百餘春。磨滅畫圖金碧。憶昔梅花吟席。伴月麓枯禪。文山殘客。欲薦寒泉。冑杖頭紅雨。帽簷微側。纖柳和愁織。映斜照、一絲無力。漸看帆影燈痕。又催暝色。是日星橋入都。

望梅 伯治屬題采蘅圖

滿身蘭雪。笑花花絮絮。亂飄粉蝶。看素面、背立湖山。恰新製春衣。密縫雲葉。石上青苔。早黏住。留仙裙褶。是吳宮舞罷。昔昔采香。又試芳屨。娟娟美人是月。定傳言玉女。前事休說。念遠道、欲贈芳馨。儘懷袖三年。不教磨滅。一撲溫香。怕蘅夢、者番飄瞥。

恁雀微綠鬢翠。畫成活脫。

翦湘雲。余重來滬上。適琴甫偕非石至。同集南園。過酒花來倚簫雲。破相見。甚懽琴甫復出。同岑冊相屬得雲衣之詞。展翫不已。余亦醉拈此調兼送非

石還山

醉捻檀痕涼歎翠瑄。共譜出山香。海水清淺。誰把眞珠排密字。絲繡輕紈兩面。趁雙鷗嫩約。泛橫塘。送斜陽歸燕。可憶半臂風泉。訪秋池館。味莊觀察有南園雅集圖賸碧閃疏螢。藕葉零亂。歌到竹枝須痛飲。坐我莎陰。摘阮羨詩人。一舸看雲眠。任帆隨峯轉。

惜紅衣

翠水涼生。紅香露裊。曉風無力。盪漾其間。烟光炫朱碧。灣頭打漿。嘗夢與鴛鴦爲客。相憶。纖手摘新泣。珠房輕擘。亭亭玉立。濃笑嫣然。嬌姿更誰惜。琉璃砌地。月影穿花壁。點破一箇幽淥。半脫舞衣狼藉。喚那時菱角。吹出小江秋笛。

沁園春 和龔瑟人原韻

一昔南園客散花飛。仙臈小留。恰璫枝相映。攜來璧月。銀河倒捲。瀉入香甌。燕市譚禪。馬塍弔古。說與飛鴻感舊游。無卿鄰。嘆王郎仲壘。捫虱各有千秋。羨君搖筆滄洲。直壓倒元龍百尺樓。看珠槃翠斗。醉餘可摘。珊瑚鐵網。釣罷都收。水上雲蘋。庭中竹柏。忽下西風雙白鷗。題糕懶笑同簪黃菊。鬢已星稠。

賣花聲 題紅蕉館圖爲琴甫屬

露葉石闌遮。碧玉枝斜。黛痕朱暈畫衣紗。隱約烟中人小語。今夜涼些。亭午月初華。雙臉明霞。欲裁秀句寄誰家。瞥見淒迷仙蝶影。扶上蕉花。

又 嶧園賞菊分得陶字

紫靨暈霜豪。淡墨誰描。共拌泥飲擗雙螯。燈影背人移入鏡。插架花高。秋鬢已蕭騷。且醉陶陶。酒香和墨染吟袍。鈿笛吹殘扶夢去。篷點瀟瀟。

臺城路 馬

神安氣逸跑空立。驚看是何靈瑞。塞笛嘶紅水。錢飲淥。嘗控飛仙游戲。笙歌隊裏笑。叱撥無才。換他癡婢。舞罷登牀。障泥洗淨。付流水。生來駿異可喜。算三花照夜。龍種堪擬。佶栗騰虬。蒙茸逐鹿。瞥眼黃塵吹起。烟韁霧轡。便自造青雲。下疑無地。一躍崑崙。長鳴猶未已。

憶蘿月 寫桐月懷人圖寄穹窿山補樵道人

碧華飛去。照見山中樹。墨葉篩空涼欲雨。畫出方壺深處。春來結伴山行。莫孤明月多情。遲我半牀花影。瑤臺清露吹笙。

南樓令 南園池上見新月

秋雪冒烟絲。輕柔水面吹。浣清愁。小浸寒漪。似與么蟾同照影。猶想見。少年時。柳葉颭風枝。歸雅聲轉悽。湖前游。門逕先迷。伴我雕闌渾一霎。惹新恨。斂修眉。

清平樂 貞石摘亦擬村南買烟舍臥房階下插漁竿之句作圖玩其天趣在

雲溪石谷之間因題此句以志贊賞

魚天欲暝。蕩漾溪山影。縛個香茆塵夢冷。臥看流雲無定。一枝鐵笛摩挲。釣竿斜拂珊瑚。招手千秋漁父。買春欲當烟蓑。石田詩云：幾回欲脫蓑衣當。又恐明朝是雨天。

一萼紅 白鷗池觀梅圖成主客各有題詠因吟慢詞一闋以紀勝遊

水如天。有紅闌搖影。雪霽聳吟肩。鶴鷺行空。筇枝曳翠。劍佩來又珊珊。舊游處、涼堂采綠。寫鷗心、林下一琴眠。醉拂魚箋。臥吹龍笛。閒倚琅玕。依約西溪溪上。欠篷捎黃月。屐響蒼山。東閣酬春。斜川賦韻。難得仙骨高寒。漸引入、梨雲夢境。惹飛花、催放總宜船。想見風流白傅。只住三年。謂蔡諧堂刺史

青玉案 宣窰蟋蟀盆筍蕪屬賦

凝花祕翠銀鉤鏤。定捧出、宮娥手。蟬翼拓來斂股瘦。剔紅質美。餞金製巧。不信人間有。新涼前殿蟲兵鬥。問進了、幽風否。鈿盒瑤箱吟賞後。烟雲過眼。秋聲滿袖。金冬心有九十九子。瓷合見樊榭集。我家舊藏脂粉箱。亦前朝宮中物。

蹋莎行 畫梅寄文蘭戲拈此句

林下無人香中有韻。撫絃半蹕。仙鬢影斜陽紅上合懽窗。倚窗聽理飛鴻陣。銅井烟蒼。石湖水嫩。醉眠一舸橫塘近。夢尋芳。屣采香行。拖雲曳月來無定。

杏花天 題顧西梅花影吹笙圖

瑤臺天影寒於水。正滿地。花陰如繪。露香浮動鬢雲翠。人在澹黃月底。把銀字、一行炙未。引蘭氣。一絲吹細。百寶闌干仙鶴睡。闌外牡丹開矣。

又 曉窗點黛圖爲卿常賦

瓊屏露浥香蘭笑。詩語寂。畫屏寒峭。鸚哥起比春人早。猶道蛾眉未掃。潘郎鬢、傷春易老。崔徽卷惜花生小。啼鴉屋底殘紅少。纖柳一絲月曉。

清平樂 冬夜同人集水雲舫送周南橋歸甬東

送君歸去。行李寒如許。蘆月烟江聞雁櫓。今夜酒醒何處。酒人都半天涯。酒闌我。便思家。一任冷吟淺醉。催開數點梅花。

摸魚子 榕皋農部有桐江之游屬汪浣雲繪春渚烟帆圖吳中徐懶雲戴竹

友諸子以此調賦詞紀事余亦繼作

彈烟鬢。一匿幽淥。畫眉啼澈花底。峯如錦繡波如染。越女嫩於春水。船並艤。惹舞絮飛英。亂點風前袂。香熏翠被。問敲枕雲。假。褰幃月墮。誰與共吟醉。瀧中好。倒瀉松光無際。魚天帆影搖曳。淺斟不唱瀟瀟曲。恰唱我儂歡喜。漁夢裏。配紫笛紅衫。著箇人雙髻。風情未已。儘詩鬢星稠。酒燈雪豔。陶寫付歌吹。

生查子

紅蕖曉夢涼。苔格湘烟綠。側帽是何人。小注滄桑錄。會心十憶詞。密字迴環讀。一樣卷中人。可惜顏如玉。

月下笛 丁丑十二月聞漚翁化去放棹吳下悼之楞伽山憶自九月初旬相

見於芳草堂留連話舊不知此別遂成千古歸舟風雪中因述此闕所謂長

歌之哀過於痛哭

一笛吳雲梅華已放。老仙何處。孤亭夢遠。難覓荒波舊鷗侶。江潭搖落無多柳。猶念

我飄零倦旅。痛人琴俱往。長歌當哭。此心良苦。歸路寒如許。正風雪漫天。短篷來去。茫茫太古。曲終愁共誰語。暗香沁入詩脾冷。但拾得、廉夫贖句。算此別、隔千秋。同話巴山夜雨。

蝶戀花

馬晚香校書有紅妝季布之風吳門畫舫錄中所未載適董君竺雲

自杭來松晚香亦至錫履相訪於黑橋寓樓聽歌暮雨瀟瀟之曲曲終竺雲歎曰此遺珠也余因述此卽以錄別

非霧非花留不住。習靜窗櫺。昔昔迷藏處。紗碧如烟籠翠羽。玉梅花底銀箏語。潭水深深深幾許。且唱瀟瀟。牽引雲蘋聚。料爾匆匆搖櫓去。也應倦聽歌樓雨。

齊天樂

松壺畫眠琴綠陰圖卷子爲子木題

竹光搖几冰絲綠。惜惜落花庭宇。匝地濃陰。篩空墨葉。清到一眠琴處。蕭閒聽雨。等嘯樹人來。碧壺涼聚。絃外冷然。亂泉飛過草樓去。拂牀殘響斷續。好山都繞屋。蒼翠如許。百柄棲烟。孤心抱月。揮手洞天鶴舞。悠悠太古。擬譜出松風。樵歌能和。夢訪

玉

成連懶

生

石氣曉

鶴懶梳

菩

春人不

相思子

齊

雙瞳翦

缺月誰

風人去

搔首霜空酒旗搖夜午。

浣溪紗

玉骨冰姿怯嫩寒。滿身疏影冒輕烟。最高枝上舉頭看。酥手半籠蝴蝶袖。磁瓶疑聳美人肩。梅花插了過新年。

菊花新 元日鶴壺看梅

花放壺天同鶴壽。香並玉梅黃似柳。相映萬年枝。妝點出、頰椒人瘦。寒簷松竹成三友。向東籬且澆春酒。看過上元燈。猶未是、落英時候。

生查子 夜集春帆齋中與蓉老話舊有懷湘人之作

窗網縹緗紅。屏畫圍湘綠。泄漏一分春。小鳳釵頭玉。石帚譜新詞。金谷吹橫竹。和酒嚙梅花。雪夢今宵續。

壺中天 李白樓小星宿海遺硯陳生屬題

女媧鍊石把東南。補牘填平銀漢。翠水蓬瀛清淺後。巧匠琢成真硯。珠玉揮毫。雲烟

落紙。織句弓衣滿。墨磨人老。出門隨帶行卷。尤羨作賦摩空。蛾眉能讀湖海留題。遍頭白鴛鴦雙載去。白樓有鷺湖雙載圖。情似紅絲難翦。曉露研薇。寒泉薦菊。根觸晨星散。蟾蜍淚滴。爲誰愁濺花片。

巫山一段雲

明月今何夕。梅花合一家。不知是月是梅花。人影隔窗紗。酒暈團紅玉。衣痕點碧華。繡鞋橋外路周遮。新柳冒棲鴉。

憶蘿月 題黃鶴山樵停琴圖

翠濤風捲。絃外秋聲遠。隔樹峯陰雲束斷。獨自眠琴石畔。道人詩鬢飄蕭。山中黃鶴誰招。手弄一丸涼月。清光斜出松梢。

柳梢青 題童二樹畫梅

幾點疏香。霏霏剡雪。冷射溪光。想見幽姿。暮寒修竹。背倚落牆。所思渺隔南江。看瘦影移來紙窗。芋火茶烟。綺琴銅笛。月下吟商。

憶舊游 己卯上巳日竹籬水榭招集揆翁南橋小林修禊事也酒酣過敵廬
觀僕射山樵遺墨偕予同行出游蓮生庵庵中新葺竹間閣子極清曠愛茲
溪聲山色憑眺久之不覺粥鼓催人歸已薄暮憶丁丑三月同游蓮花庵者
有學泚鶴岑伯治三人而竹籬南橋不與焉小林譜此調以紀屬余和韻

倩花迎步屨。鳥喚提壺。及此芳辰。鶴放開籠舞。趁疏香過酒。吹墮梨雲。且招舊時鷗
侶。薄醉看書裙。嘆雪點春泥。三生鴻爪。一昔留痕。離羣。溯前度。記桃雨方濃。風日
猶新。依約青蓮字。劃二分水竹。綠野無人。竹肌又鐫詩翠。返照碧苔溫。倘祓禊重來。
紅鵝已識王右軍。

虞美人 題蓮巢撫琴仕女圖

湘絃譜出蒼梧曲。雲擘仙鬢綠。一聲聲寫竹枝愁。嫋嫋西風飛響。楚江秋。冰綃霧
縠涼於雪。手舞天邊月。露香庭院碧氤氳。淡墨花枝替畫藕絲裙。

浣溪紗 題查梅壑松林亭子圖

一朵江南雨後山。疏松隔水弄秋絃。草亭修竹兩三竿。卷裏遙青浮雪壁。屋中幽綠動烟鬟。迂倪粉本落人間。

買陂塘 少眉屬題逗秋閣學書圖

凭仙居。硯山融墨。灑窗飛響涼雨。臨池未許籠鵝換。點筆都成天趣。簾卷處。吹不斷。縈回寶篆如金縷。焚香論古。牘鳥蹟叢殘。蟲文剝蝕。誰與重豪素。塗鴉諠。若箇雷門布鼓。輸君能運靈杵。商量醉月開醇夜。欲繡屏間詩語。書可著。也占得名山。幾卷鈿函貯。烟霞護汝。看半幅雲藍。一行雁字。縹緲映秋宇。

一萼紅 白鷗池觀荷同人賦韻余填此解座有俞五彈四絃故末句及之

泛輕鳧。展涼雲深處。花葉卷還舒。昔昔巢痕。寥寥鶴語。飲水來讀仙書。溯前度。提鷗挈鷺。續清游。生怕白鷗疏。二頃琉璃。一雙翡翠。七尺珊瑚。何似觀河重到。正三年懷刺。一笑攜壺。菱角翻歌。荷心瀉酒。杯影綠颺菰蒲。算此夕。中流散髮。與飄然。都是列仙儒。臥聽絃聲雨驟。亂撒瓊珠。

躑莎行 題石谷畫詩意圖便面小山屬賦

深樹藏烟。幽泉帶雨。峯陰浮動雲光聚。蒼苔沒盡舊鞋痕。溪邊野鹿銜花去。梵放
空林。鐘沈遠渚。松間蕭寺清如許。好山排闥送詩來。夢中拾得青蓮句。

秋霽 題李長蘅谿山秋意圖卷擬蘋洲漁笛譜體

明淨嵐容。翦吳淞半水。冷楓蕭瑟。波上烟痕。石邊苔暈。平添幾分秋色。溪藤翠滴。杜
陵有句融殘墨。崑圓老人有題。謾自惜。詩鬢低垂。同作苦吟客。鐘沈破寺。約斷孤
村。轉眼蘼蕪。暗驚荒碧。贛壺中。悠悠歲月。松聲竹韻。散瑤席。一片白雲。仙夢隔。舊時
籬落。去年游嘉定漪園。卽長蘅故居也。知君笑插黃花。夕陽疏影。畫中移屐。

風蝶令 黑蝶

薄日團團舞。香莎黯黯遮。滕王一笑側烏紗。若箇倚窗。弄筆似塗鴉。捉搦花間住。
謎藏夢裏家。春陰如墨莫尋他。織向卓羅裙。釵見些些。

浣溪紗 憶虞山

聽雨僧廬今幾年。推窗臥看劍門山。紛紛紫翠落屏間。紅豆花開詞客老，絳雲樓鎖柳枝殘。蘼蕪香夢一身烟。

壺中天 雪巷新居落成邀二三子把酒餞春作飛英會醉吟此曲屬小林和之

買山無計把東廂。新葺蘆簾不掛。芳樹陰濃將綠遶。畫出村居初夏。三月鶯花。中年絲竹。消過閒庭榭。團團飛絮。輕雲扶起苔罅。可要飲潑杯深。含桃珠綻。酬此春殘夜。湖上水田人易辨。祇有清風無價。夢影鷗圓。香圍蝶散。瞥眼茶蘼謝。他年定憶。討春同醉花下。

菩薩蠻 海棠

苔牆抹角嬌紅滴。未秋先帶傷心色。翠袖掩啼妝。禁他風露涼。柔枝低自顫。雨洗脂痕淺。斜照小庭幽。花開我欲愁。

風蝶令 題蕊枝女史書畫冊

水繪撻酥手。江香沒骨花。舊時池館月西斜。曾照眉間、新雁鬢邊雅。蟬翼裝殘帖。羅紋折□釵。涪翁走筆似枯槎。同是飛鴻、點雪渺天涯。

清平樂 題南田山水

墨漪明淨。點出清秋景。水上烟光吹不定。浮動一痕山影。涼堂圖畫軸開。惜惜幽綠生苔。想見白雲溪上。東園月話歸來。

買陂塘 題繡谷圖

問閒鷗。那家池館。蒼涼惟石能語。荒蕪沒盡三三逕。指點巢痕何處。參活句。挈紅豆詞人、同倚相思樹。披圖認取。嘆粉墨猶新。溪山似昔。勝侶渺烟霧。笙歌樂。想見舊時尊俎。雲蘋飄警。難聚。柳枝低。買鴉啼屋。依約憶娘眉嫵。風吹絮。只織不成愁。一片溟濛雨。桃花半塢。贖野草黏天。東風剗地。春色已如許。

一萼紅 題江香百花卷

羨蛾眉。仿寒山點筆。研露暈輕脂。史著無聲。圖開沒骨。芳名壓倒修微。但留取、甌香

粉本付仙鬢。珍重好花枝。萼綠臨風。鞋紅繡地。萬種芳菲。知否人間秀氣。料不鍾男子。合讓深閨。詩語寥寥。鷗波昔昔。卻憐生未同時。算千古。靈芸三絕。刺鴛鴦。何處覓鍼絲。笑我看朱成碧。濡墨鵝溪。

風蝶令 爲韻香賦黑蝶

霧暗團香夢。烟昏撲翠樞。濃陰如幄。宵飛翎。隔箇阜羅。屏影不分明。瘦沈曾傳賦。小滕漫乞靈。尋常粉墨畫難成。只許硯池。花片賭輕盈。

賣花聲

秋綠點輕紈。翠袖生寒。露濃香細碧花天。魘地牆陰雙蛺蝶。飛過秋千。剗襪出來。難。鸚鵡都瞞。當頭月好爲誰圓。玉宇瓊樓渾是夢。此夕何年。

少年遊 小桃屬題梅花小影

萬株晴雪。冒梨雲。花氣忒溫磨。一曲紅闌。滿湖香月。燈火近黃昏。畫樓西畔吹霜。角扶醉看星辰。翠羽飛來。綠琴眠處。疏影畫湘裙。

小重山 玉魚重摹高房山山村隱居圖并錄前人題跋於卷後是圖房山當日爲仇山村而作也山村云予方棲遲塵土無山可耕展玩此圖爲之悵然蒲庵云崆峒外史得之攜以見示慟傷前輩凋謝不能無感今懷古之私噫玉魚已矣對卷愴然悲吟成調

浮動嵐光冒活雲。林深何處覓隱仙人。房山潑墨畫山村。仇池夢。空翠掃煙痕。猿鶴悵離羣。草堂詩卷在。最思君。數峯江上碧氤氳。傷懷抱。蟹舍一燈昏。

聲聲慢 聽竹坪琴

雲移 岳樹入屏山。篩空墨葉。扶疏過耳。冷然絃外。綠颭菰蒲。瀟湘滿篷。夜雨隔烟汀。雁櫓聲孤。興未已。把鐵如意。舞擊碎珊瑚。誰種玉梅三百。向花深深處。臥讀仙書。劍佩來遲。待到漏盡銅壺。飄飄一絲鷺頂。裊西風。半折寒蘆。意自遠。寫游心。在太古初。

浣溪紗 椒畦畫影梅庵圖

玉壺山房詞

二十五

一幘華光上畫叉。來尋烟語過山家。枝枝香月寫窗紗。天上紫雲無夢到，竹邊翠袖太寒些。輕紈黏住古時花。袁綬階所藏董小宛貼梅扇，今在古倪園中。

極相思 月夜憶文卿

年時初見茶茶。遮護碧窗紗。鶯兒同坐，燕兒同話，飛向天涯。月地雲階無夢到，碎秋心，畫鼓三搗。迷藏甚處，玻璃魂瘦，偎近寒花。

金縷曲 冬日過嘯園春伯出尊甫敬堂先生聽竹圖屬題因拈此闕卽效春伯獨酌花間體懷人感舊情見乎詞

兀坐深深院。對此君、閒凭素几。年時曾見。一十五竿琅玕影，昔昔蕭郎倚遍。看蒼雪、紛紛吹滿。數筆蕭蕭青藤畫。掃霜縑，一片秋聲遠。觀河皺，望衡面。摩挲倦眼烟雲變。記分明、鳶肩火色，畫圖重展。百歲幾何垂垂老，中有仙人舊館。颭葉葉、風梢零亂。聽到竹聲清如許，向池頭、拋擲閒簫管。長短句，寫柔翰。

臨江仙 望湖樓

不見跳珠來眼底。斜陽雨腳初收。遠山點點黛螺浮。天光如鏡。盪漾一輕鷗。手把芙蓉歌水調。仙人宛在瓊樓。寒泉同薦菊花秋。羽衣吹笛。乘醉月中游。

愁倚闌令 一半勾留處

裏湖水北山烟。斷橋邊。塔影當窗松頂翠光圓。消過荷風半枕。平添竹屋三間。幾度花開明月上。破詩禪。

滿江紅 開元宮本宋周漢國公主府元時句曲外史張雨入道於此外史賦
得月軒詞有石魚湖小酒船寬窄之句因用其調以志一時游興

落盡松花積一房。濛濛山色。只故老愛尋先隱。用樊榭句暫停吟屐。雲外簫聲猶縹緲。壁間斂股何狼藉。笑種桃曾見幾回開。元都客。青鳥去。無消息。瑤草長。多陳迹。待一輪推上。臥吹銅笛。古鼎香銷銀葉冷。宮塵露洗鉛華溼。引飛觴。流詠石魚湖。鬢眉碧。

瑞雲濃 珠厓載酒邀遊橫山醉歌此曲

畫船約在橫雲簫鼓催放。秋雪一篷打蘭槳。紅衣把釣。也不出、戴家新樣。笑我似楓人。對青松屏障。載得黃花。早點上、羊燈相賞。兩面琉璃月波盪。蕭蕭落葉。漸捲入、笛絲風颺。醉倚清歌。衆山皆響。

西子妝慢 耕石太史招飲湖樓泛舟南屏訪主雲上人不值

清入山心。綠攙柳意。蕩漾水雲無定。來尋宋嫂作魚羹。小紅樓、有人先凭。春醒未醒。挈同訪、南屏詩境。臘冬花綴。枝枝寒翠。僧窗俱靜。天將暝。斷塔頽陽。畫出雷峯頂。落梅如雪。糝空庭。替華光、背臨疏影。松風半嶺。漸吹冷、蕭蕭茶鼎。待詩成、呈佛。殘鐘臥聽。

少年游 蘇公祠觀梅

園林雪後靜眠琴。倚棹水雲深。鐵笛聲中。玉龍飛處。此老獨登臨。花光繞屋香成海。樹古碧苔侵。茶夢初溫。鉢緣重續。有句鶴來尋。

好女兒 過廢園有感

雨過落花津。三五踏青人。潑眼樓中遠岫。一片綠苔勻。金粉換斜曛。看水面、猶有
停雲。斂頭飛燕。裙邊簇蝶。簌簌歌塵。

愁倚闌令 寶帶橋看白蓮

千絲柳。一帆風。洞庭東。二項琉璃宛宛。臥長虹。露下漁衫欲溼。涼深蟹火初紅。白
藕花開秋月綠。倚吟篷。

尋芳草 歌樓感舊

綠遍深深院。又飛絮、一庭吹滿。墨華簾、低蹴紅襟燕。玉鉤宕、無人捲。有甚舊心情。
怕重題、去年門扇。小闌干、誰縮風箏線。晚花落、珠絲冑。

江城子 過西湖莊故居

小西湖上赤欄橋。柳搖搖。水迢迢。鞋痕一路、草長雜花飄。上學光陰渾似夢。風竹亂。
紙鷺高。

菩薩蠻

玉壺山房詞

一絲殘笛飛寒綠。離愁似水縈千曲。臨別又依依。不如緩緩歸。垂楊三兩樹。影也和伊住。夜靜月生烟。一雙人可憐。

羅敷媚 新柳

一汀春靄眠芳樹。鶯也初飛。燕也初飛。翦出鵝黃萬縷垂。可憐蘇小門前路。烟瘦如絲。月瘦如絲。些子眉痕懶畫伊。

摸魚兒 壬申四月十三日宿雨初晴柳上諸峯濃翠欲滴少眉載酒約予數

人登細林山絕頂憩神龍仙館少焉艤舟東余之麓緣溪而行過白石山址

訪眉公故居同舟諸子各有新詩余與藥房醉吟成調

搗香齋。放船橫柳。滿襟都染詩翠。山光潑眼濃如笑。笑我幾番沈醉。帆挂矣。掠片片。涼花漾入風濺細。篷窗聽水。恰樹帶茶聲。波迴櫓唱。萬綠瀉杯底。神龍頂。想見飛來劍佩。茅君乘鶴遊戲。仙人舊館依然在。松與碧雲無際。修竹裏。指斷塔斜陽。畫出蘭峯背。行歌未已。早青沒鞋幫。蹋莎烟軟。掃石看題記。

品令 月下聞簫

鳳簫聲緩。想玉指、花陰亂。銷魂此曲，爲誰曾寫，舊時團扇。知否蕭郎月下，竹枝倚遍。
銀河清淺。看碧落、華星滿。翠森森處，箇儂低髻，烟絲吹軟。不是淒涼風景，也應腸斷。

青玉案

累儂也到銷魂地。纔領略、愁滋味。錦字安排他日寄。青溪小妹，青衣小婢，窺透相思意。
熏衣只染幽蘭氣。問暮雨、簾櫳可容醉。略帶風情嬌語細。燈紅如豆，夜涼似水，影比湘花媚。

百字令 閣夜

一箏飛響，破長空、夜碧。愁春偏醒。風露闌干，衫影薄，悽絕背燈同凭。夕氣生烟，雲陰聚墨，遠火搖寒暈。肩排山字，酒星高與肩並。
莫悵曉寺鐘殘，舊歡已墜，單枕紅蕪冷。但少閒緣，尋竹柏，綠減年時詩鬢。細數花開，翻驚烏夢，樹帶茶聲靜。翠光浮動，數

峯斜插松頂。

菩薩蠻

殘荷葉上跳珠碎。分明似打孤篷背。隨意夢西湖。湖光潑一壺。荷風香氣辣。羅帳燈初殺。放下墨花簾。玉鉤新月纖。

卜算子

借了一分秋。悄向心頭種。偃近熏爐袖不溫。夜淺春寒重。思夢背羅屏。髻影殘燈擁。夢盡江南無數山。翠被愁無夢。

昭君怨

滿院落花如雨。中有數聲箏語。燕子最愁儂。一襟紅。遮莫新來消瘦。掩映軟絲烟柳。半卷夜明簾。露纖纖。

憶舊遊

穀人先生寄題少年聽雨圖依韻奉酬

認聲飛似葉。影織如絲。吹滿箏樓。我亦仙仙舞。怕一燈冷暈。暗赴春愁。酒醒不知何

處根觸看吳鉤。更香靄鐘沈。荒寒雁斷。詩鬢先秋。悠悠。溯前度。奈月黑丁簾。香燼
秦篝。莫賭瀟瀟曲。被滄江漁笛。偷換歌頭。老仙醉騎黃鶴。曾約掃花遊。道落盡殘紅。
風風雨雨歸也休。

扁舟尋舊約 藕藕卻扇詞

越網千絲。吳波一剪。鏡中忽墮行雲。年時曾見。采香猶小。襪羅不染纖塵。華星羞替
月。怎禁得。紅啼翠顰。幾番靈鵲。催人欲渡。恰趁夜涼新。捱過了。荷花生日去。牘半
湖秋色。並載桃根。蜻蜓偷眼。鷺鷥窺影。淺脂暈向斜曛。權穿蓮葉北。消受清香遠聞。
累儂纖手。水窗雪藕。傾綠樽。

齊天樂 孫雪居太守硯背刻像拓本藥房裝成乞題

衣文細鏤蕉痕白。斲來骨清如許。歲月磨人。烟雲過眼。洗出舊時眉宇。添毫貌取。想
點筆闌東。萬花飛舞。淚盡蟾蜍。一雙鸚鵡與誰語。分明蟬翼澹揚。似元香太守。風
韻猶古。山字肩撐。水紋面縹。長伴短檠吟苦。天龍護汝。問片石何年。破空而去。小像

香熏。掀髯看著句。

南鄉子

羅帳小如篷。燈影蓮花暈斷紅。手撥燒槽迴漫水。惺忪。酒醒今宵似夢中。並倚唱玲瓏。花氣凝沾薰露濃。送過冷泠絃上語。牆東。月底修簫點拍同。

滿江紅 輓瘦生

萬古青山掩多少。酒人詩骨。算只有。趙州澆土。劉伶荷插。千載鶴歸渾似夢。三更鷓鴣苦空啼血。怕他生。未必定相逢。傷心別。書喜字。銀鈎折。書恨字。紅箋疊。但墨磨人耳。字都磨滅。雪點鴻泥痕欲斷。香殘佛火心猶爇。向西風。不語淚闌干。聲嗚咽。

買陂塘 松江蟹舍爲硯北作

翦吳淞。半江秋色。緯蕭橫截烟翠。爬沙響處蘆漪白。涼雪枝枝搖曳。斜照裏。蓋一把香茅。影蘸菱波細。西風又起。配秫釀新篘。橙齏徐搗。長擗有餘味。湖田住。住爾幕天席地。樵青扶得殘醉。通波塘外橫雲繞。依約檣頭舡艤。楓落矣。憶左手持螯。右手

招漁弟。沈吟未已。譜絃上新聲。畫餘纖爪。茶鼎水初沸。

菩薩蠻 月底修簫圖

舊時月色涼於雪。滿衫花影飛仙蝶。碧玉一枝簫。紅闌十四橋。烟絲吹不斷。翠袖風零亂。根觸竹西亭。銷魂是此聲。

水龍吟 題泖東蓮社圖卷

海天鐵笛吹殘。綠杉斜颭龍門雪。爬沙冷韻。倚闌聽遍。梅花能說。西望垂虹。老仙一舸。飄然如葉。把珊瑚收了。鱸香拾片。邀同賞。虎溪月。竹杖挑來吟篋。映疏林。人隨寒蝶。燒豬有約。閒尋蓮宇。詩仍呈佛。前度橫雲。滿山松雨。燈前涼別。笑推敲影瘦。僧參活句。種星星髮。

虞美人

迷離不辨梅花色。片片梨雲白。袖羅籠翠拓窗紗。試比去年人日略寒些。雙烟細。裊湘篝潤。小篆心心印。瑤姬翦水作春燈。月影玲瓏照澈玉壺冰。

黃金縷

背倚羅屏燈影瘦。雨又瀟瀟。攪入銅壺漏。難熨吳娘眉葉縷。芳情釀得濃如酒。盼
斷人歸歸燕後。亂落梨花。最是愁時候。三起三眠人似柳。枕函不合安紅豆。

賣花聲

紅雨樓聽晚香彈琵琶同竹士作

花落小紅樓。烟蕩波柔。蔚藍天影看雲流。萬綠鋪成三面海。忽下雙鷗。儂已不勝
愁。密意難酬。淚痕散作四絃秋。惆悵子絃聲最細。語更綢繆。

醉太平

烟絲雨絲。楊枝柳枝。鏡中小小眉兒。吮纖毫畫伊。蘇隄白隄。花飛絮飛。人隨萍葉
東西。笑春歸未歸。

買陂塘

綠波池上作

夢橫塘。蛤蜊菰葉。者番詩境尋到。魚天幾疊。蘋影涼聚。綠池清曉。春易老。膽一丈。
紅蕎寶鬢開濃笑。鴛鴦最小。趁鶴帳風和。鴨闌人遠。偷眼看垂釣。苔陰合。挂屨楓

前客少。臥枝低拂茶竈。仙島不入鶯花隊。點破斜陽芳草。歌水調。擬著箇樵青同放。烟波棹。盟鷗未了。看淺淺山彎。纖纖月吐。杯底一眉掃。

又 冒雨過翦淞水屋主人留飲看菊夜歸華亭

笑餐英。暮寒人瘦。翦燈同賞疏雨。一枝倒臥花先醉。觴影帶飛秋句。簾捲處。伴坐客眠琴。領略無絃趣。黃金鑄汝。膽一片心孤。三分骨傲。詩思澹如許。溪堂靜。閒與尊前夜語。雲萍波上涼聚。蕭蕭短髮風吹帽。羞插滿頭歸去。君莫舞。擬追和陶詩。痛飲花間住。寥天雁鷺。怕潮落江空。今宵酒醒。蟹火滴煙渚。

滿江紅 中秋夜雨浣雲招集叢桂堂聽韻生度曲

石破天驚。鷓飛響。一枝銅笛。秋風撼。蕉桐深院。翠陰如墨。涼暈自搖紅燭瘦。雨聲驟打枯荷側。引清商。雲外噴珠霏。敲空碧。絃拉雜。衫應溼。歌捉搦。頭先白。況人間天上。可憐今夕。騎暖揚州仙鶴背。唱高東海蟾蜍魄。更夜闌。誰倚畫樓聽。闌干拍。

徵招 蘼蕪山樵還吳余冒雪相訪於白苧城中悵然而返因譜此闕寄之

翠烟不鎖。蘼蕪夢。雙鬢采香如畫。替換越羅裳。任迴風飄麝。遠山纔掃罷。送帆影、柳梢輕卸。笑問春人。幾番吟醉。水邊林下。雲雪盪寒空。相思字、偏愁雁兒難寫。步履小銀塘。詠人間奇夜。市橋燈落也。忍立盡、月陰苔罅。綺樓遠。舞困飛瓊。認玉梅花謝。

翠樓吟 春閨

豔雪飄燈。華星散蠟。烟蛾已逗眉暈。洞房春似水。洗不盡、珠塵金粉。眠鬢敲枕。怪燕語惺忪。梨雲無定。紅窗迴。曉寒籠袖。落梅風緊。小病鄰女難猜。抱一稜銅魄。幾番潛聽。篆成心裏字。怕灰了、秦篝蘭燼。香蘅簪鬢。引媚蝶飛來。竹欄同凭。春將暝。玉鉤斜挂。拂牆花影。

山亭宴 芳草

秦宮曉望。傷心碧。蕩鴛鴦、暗縈波鏡。香逕屨痕深。早沒盡、春烟一寸。王孫尙此。憺忘歸。念遠道、爲傳芳訊。誰與續離騷。怕過眼、愁難醒。半明半滅。春將暝。翎低也。尋金粉。淡到六朝山。只一片、斜陽未冷。醉眠何處。費鷗猜。任風冑。游絲無。晴翠染湘

帆趁月影移近。

菩薩蠻 花朝

曉寒如水鶯如織。苔香軟印沙棠屐。旖旎影小紅闌。銷魂似去年。春人開笑口。低祝花同壽。花語記分明。百花同日生。去年今日人知否。不如且飲杯中酒。月底一枝簫。青春豆蔻梢。雲漪池面縵。柳影新來瘦。風動護花旛。悄無人倚闌。

又 閨上已

十千不惜頻沽酒。又開笑口敲銅斗。月閨牡丹遲。鞦韆紅繡幾枝。蘭亭貴初寫。抵得春無價。一蝶上花茵。來尋舊酒痕。

買陂塘 陶菴紫藤

小吳船。四三鷗侶。水雲飛上珊瑚枕。沙禽兩兩尋烟語。烟際又飄殘磬。波似鏡。鋪一片。藤花影盪朝霞冷。朱闌掩映。對紫雪樓臺。青山屏障。人遠畫圖近。南村隱。關箇通。

幽曲徑。翠陰斜罨詩鬢。瓊珠絡滿天風細。吹過妙香成陣。懷古興。君不見。婆婆雙樹
巉巖並。重遊預訂。就鴨腳黃邊。吹蘆捉火。煨酒爆銀杏。

洞仙歌 綠罌粟花

櫻桃熟矣。正濃陰如墨。龍子耕烟破深碧。漸鴨頭波暖。鸚鵡噪空。算只有一翦可憐
春色。乞花兼乞米。準備量珠買斷清愁對傾國。仙掌玉爲槃。欲奏瑤章。更細捲、輕
綃如織。且莫向、藍橋種胡麻。笑認葉尋花。繡絨難擘。

子夜歌 爲小雙鶴居士題蓮影

阿谿寂寞烟中語。滿身仙露涼如雨。少小不知憐。何時鷗夢圓。盈盈十三四。纔識
眞珠字。花覆紫鴛鴦。影兒一鏡香。

漁歌子

楊子橋邊載酒行。瓜州城外待潮生。帆角動。水風輕。手拓篷窗看月明。

摸魚兒 柳湖

聽潮音。四禪天上。古今塵夢同洗。魚龍鑄入青銅鏡。猶見秦時舞意。雲漲起。只九點螺痕。碧露依微髻。三分翠水。恰綠樹藏烟。紅牆浸月。塔影一枝倚。新田米。網得銀鱸細。涼波小。摘蓴脆。朝衫儘有忘歸樂。苦憶此鄉風味。秋色美。讓頭白蘆花。冷笑楓人醉。漁帆峭矣。正鐵笛橫吹。異香初燕。蘋雨灑蓑袂。

子夜歌 二分明月女子像

團圓皓魄心心印。竹西亭子珠簾靜。只有一分人。同他月二分。仙仙飛入月。不覺烟鬟溼。別後見應難。金波瀉作環。

齊天樂 鷹

西風颯爽吹叢棘。平皋影搏秋霽。奔電驚迴。截雲忽斷。一擊鵬雛而起。烟霄萬里。試竦翮須臾。雪毛飄墜。饑亦投人。錦鞵羞踢健兒臂。原頭相逐走狗。伴五陵游俠。驄馬聯轡。倦羽初還。雄心未老。聊復毡毳春睡。宣和畫裏。對勁氣英姿。子虔能繪。守帳然香。鏃花看更細。

慶清朝慢 龍門精舍同人餞小庾星橋藥房瑟如卿常諸君公車北上席間

聽采山彈琵琶。堅木有詩題。壁余被酒寫墨竹一枝歸途步月倚此歌之。

杉颯嵐青。雪消渚綠。飛聲暗捲風濤。雲垂水立。鳳琶推手絃高。春在闌紅枝上。酬花先奏鬱輪袍。杯光瀉。滿庭藻苻。畫出僧寮。誰譜鐵厓樂府。況酒痕前度。月色今宵。闌干影裏。曾倚清笛閒簫。點破舊時薜壁。驚看龍子上烟霄。他年憶冷吟竹塢。淺醉花朝。

菩薩蠻

釀花特地重開燕。爲花替寫春風面。一昔採藤蕪。春痕澹欲無。那知天上樂。鸞鳳都飄泊。顰淺與顰深。春山月有陰。掃花帶縛春人手。落紅掃盡愁春瘦。難道不魂消。華燈壁上搖。杯邀舊時月。又醉花生日。誰與證前因。梨花和白雲。

生查子 長真居士偕游天龍菴啜茗

僧語出林間。晝靜濤聲起。松頂拓僧窗。風颺茶烟翠。同有愛山情。沈坐山光裏。一
飲在山泉。夢也清如水。

醉太平 燕園

蕉陰雨殘。松聲夏寒。岫雲一片初還。比鷗心更閒。杯邀古懽。風吹灑顏。淺樽休倩
雙鬢。對斜陽遠山。

踏莎行 小石洞

石級高低。酒人醉醒。紅藤扶夢尋蘿逕。雨餘一鷓步苔陰。笑他也住清涼境。觸熱
登山。臨深坐井。灑然沁入心脾冷。幾時玉女洗頭來。水中倒浸蓮花影。

喝火令 蘆士心青偕訪綠春戲贈此解

草色縈青鏡。嵐光漾碧蓮。烏篷移過畫簾前。遮黑夕陽亭角。幾曲小紅闌。柳搦纖
腰軟。珠承秀鬢圓。買絲容易繡卿難。一樣橫波。一樣鞦韆香肩。一樣翠熊衫子。鬢影薄
如烟。

長相思 玉松堂坐雨

風一更。雨一更。已惜無多鬢上青。僧窗忍再聽。
酒初醒。夢初醒。悟澈無生證夙生。
兼之一磬清。

齊天樂 塔鈴

泠泠細響從天墮。望中寶繩搖曳。九子聲圓。千花輪轉。影臥夕陽空地。香林暮倚。有放鴿閒心。護花深意。綺習難忘。珮環飛下碧霄裏。僧寮留客結夏。話關山曉月。馱夢驢背。梵唱高提。潮音靜答。烟語郎當遙遞。枯禪定矣。正佛火初殘。寺門斜閉。已斷聞根。任他風過耳。

壺中天 石梅在虞山之麓余偕長真同游時落日銜山翠光浮空疏影在地

顧而樂之他日將結廬其下因屬松壺補圖爲填此調

碧山人去甚東風吹老。枝枝香雪。曳杖拖孳看暝色。瘦步又隨寒蝶。松影如潮。峯陰欲雨。綠淨茶烟活。疏林殘照。打頭飄下桐葉。此地小駐游仙。初平叱起。頑石皆仙。

骨縛箇香茆青礪曲。臥對雲屏千疊翠。袖裏羅紅螺過酒。繞屋梅花發。手攜鴉背破空飛出明月。

少年游 逍遙遊

屏間金碧窗間紫翠。小閣倚三層。半樹斜陽。滿身松影。蘿逕揖詩僧。閒雲歸去青
山未買。一笑興飛騰。說與迂倪。商量點筆。烟墨灑溪藤。

水龍吟 破山寺

鷺鷥飛入遙青。流雲滿地涼於水。峯陰十里。斜陽無影。但聞風吹。選石臨池。倚楓挂
屨。清游能紀。待經繙月上。神龍出聽。僧眼碧。牛毛細。領略茶禪滋味。對空明。塵襟
如洗。竹林缺處。芭蕉斜飈。綠天秋碎。放下團蒲。萬緣俱寂。一聲彈指。剩參來活句。紗
籠斂股。剔苔花翠。

憶舊游 九月十二日偕菊裳十峯卿常登虞山遍游三峯劍門維摩諸勝歸
途過桃源澗看紅葉以長短句紀之

趁梯雲躡屨。負日乘藍。尋到招提。引入清涼境。喜松風十里。吹綠山眉。壁間翠光浮動。流影石梁西。看雨後。跳珠。潺潺拂水。溼了僧衣。忘機澹無語。任鼎沸茶聲。鬢鬢烟絲。更上三層閣。送蕭蕭。殘響。梅葉橫飛。遠空數行新雁。寒色盪斜暉。笑漁父重來。仙源咫尺紅樹迷。

采桑子 舟中望惠山

輕舟一葉隨流去。明月徘徊。鷗鳥驚猜。二十年前照影來。微茫不辨烟中樹。且撥新醅。莫放深杯。倒瀉山光綠似苔。

清平樂 太白樓玩月

水天一色。涼濯冰壺魄。樓角酒星如可摘。縹緲山河夜碧。西風瀨上生波。棲鳥啼遍霜柯。我醉停杯欲舞。月中弄影婆娑。

南柯子 雨花臺

雪映山眉紫。烟消樹頂圓。捫蘿欲上翠峯顛。忽墮半空鈴語。石壇寒。徑仄雙崖並。

泉枯落葉填。一繩雁底小江天。只在夕陽影裏倚闌看。

女冠子

些兒眉翠。略比初三月細。見來遲。著袂花千朵。凭欄笛一枝。背燈憐瘦影。面壁誦香詞。笑撚寒梅嗅。半開時。

菩薩蠻 橫泖舟中望九峯

落帆一片溪雲疊。烟霜消盡寒蕪色。返照乞花場。波明雁影涼。青青峯九朵。夜汎詩人舸。渚暗漏燈痕。爬沙響荻根。

又 壺峯叔美約同訪李長蘅故居風雪不果

草廬臥聽芭蕉雪。牆陰折竹聲如鐵。粉墨掃雲烟。居然王輞川。名園愁未訪。歸棹春流響。小艇載梅花。花開人到家。

黃金縷 雪夜宿舊雨軒聞琴

一鶴梳翎松不語。古雪飛聲譜出荒寒趣。杏靄烟江沈雁櫓。爬沙大蟹銜蘆去。院

字惜惜堆亂絮。風颭春燈。茶夢清如許。纔放玉梅三十樹。仙書閒讀花深處。

浣谿紗 黃浦舟中

自笑孤篷聽雪眠。來尋烟語白鷗前。相看鬢影惜華年。黃耳塚邊洲似月。春申閣外水如天。玉龍起舞一江寒。

生查子

人韻澹如梅。夜氣清於雪。夢繞冷香中。處處飛仙蝶。一逕碎花陰。風颭湘裙褶。手理玉琴絲。彈向春山月。

玲瓏四犯 書蓮龕十憶詩卷後


的的蓮儂。算斷送殘陽。重覓秋影。露點烟妝。心苦一房珠孕。曾見葉小如錢。也盪漾。碧波無定。怪甚時。手攬華鬢。明滅鏡奩脂暈。翠雲斜颭銀塘冷。瀉空潭。曉風初靜。紅情綠意詞人老。愁似藕絲難盡。誰料一杵疏鐘。未卜三生同聽。悵畫簾索句。微雨過。新涼近。

如此江山。椒畦過訪壺中賦。此志喜乞寫。乍村老屋圖。

斷雲一片收帆影。荒江翦淞人到。玉破鱸頰。霜酣菊靨。鴨腳黃邊移櫂。吳楓未老。趁詩鬢飄蕭。倚篷吟悄。笑脫羊裘。軟紅飛處跡如掃。西風留客小住。歎中仙去遠。謂南岑愁滿芳草。香葉凋零。冬花黯澹。根觸三生鴻爪。留傳畫少。賸粉墨離披。雪蕉殘稿。點染孤村。四山烟翠繞。

明月引 題畹蘭簪花圖

曉妝樓上結華鬢。鞦韆香肩。試輕衫。纖手簪花影。更媚於蘭。除卻周郎誰點筆。修得到對朝雲。描遠山。遠山。遠山。恁意看。鏡兒圓。眉子彎。燒槽金屑。無心理。夢雨闌珊。一笑拈來都是散花禪。不見憶娘新畫本。空想像。撥琵琶。馮小憐。



香銷酒醒詞

運彰



趙慶熹

字秋舫。浙江仁和人。性倜儻。工詩詞。第道光二年進士。遲回二十年。選延川知縣。不果往。改金華教授。亦未履任。有楚遊草。蘅香館詩稿。

序一

三十年前。同里應有司之試。兼爲詞章之學者。有趙君秋舫。暨葛秋生。姚古芬。梁晉竹。俞少卿諸人。而余則蝨處其間。風檐囊筆。酒座分題。相與上下其議論。各出所作。互相評駁。佳則誇詒之。其不愜者。必糾彈不少恕。時君與余詩文外。復喜倚聲。君則更爲金元樂府。纏綿哀豔。一往有深情。卽今附刊於詞集後者是也。張仲雅先生評陳小魯之詞。以爲其語華。其氣爽。出入蘇辛間。純乎性靈。君與小魯習。故詞亦如是。而律則較嚴矣。獨念君以沈博絕麗之才。能取科第。而不登館閣。僅以縣令待銓。家貧親老。仍食硯田。以帖括課後進。經其指授者。多得氣去。家居幾二十年。始銓授陝西延川令。中途病作。不得往。歸而杜門養疴。久之。始改就婺郡教授。一日過余曰。半生以帖括課徒。與米鹽塵俗者無異。今將棄去。探金華洞天之勝。課士有暇。當復理詞章故業。君司訓之期不遠。他日倘得同郡。吾兩人引商刻羽。定有倡酬之樂。余聞君言。亦心竊冀之。乃未幾而舊疾復作。遂不起。烏虜抱才不遇者多矣。若君讀書成

進士不可謂不遇。乃於金門玉堂。已歎神仙風引。卽一縣令一冷官。皆不克履其任。才人之厄遇而不遇。未有如君之甚者也。回憶少年角逐文場舊侶。君之遇既若此。秋生古芬少卿皆未第。先後歸道山。晉竹以孝廉就鯁尹。而又客死嶺南。惟余以瓠落之身。塊然尙存。讀卷中詞。多當日朋箋贈答之作。篋衍叢殘。螢乾蟬蝕。而余亦且百年過半。既痛逝者。行自念也。哲嗣子循茂才。將梓遺稿以傳。謂蘋香女兄及余。皆曩時與君論詞學者。屬爲商訂。後死之責。其何敢辭。昔杭堇浦太史序張南漪徵士遺集曰。余獨歎歎累息而不能自己者。則非以死生零落之謂。謂夫吾黨可以益余之短者。又弱一个焉。千秋之業。百歲之期。交集於胸中。愴焉寤歎。今余之序君詞。與太史有同感也。噫。道光二十八年重五後三日。魏謙升滋伯甫書于翠浮閣。

序二

辭藻色也。宮調聲也。選聲配色。而以我詠歎其間者。情也。情與聲色。去道遠。而一變卽可以至道。何則。小乘人仇視其情。惡色如革囊。畏聲如毒鼓。大雄氏訶之。謂其於

菩提絕分。惟上根利器。知徧法界虛空大地。乃至一塵一毛。罔非性體本具。自利利他。於是乎在。設無聲色。何名性具。設無情。何由興慈而運悲。故聲色者道之材。而情者道之蒂也。余髫年卽與梁君晉竹游。晉竹工文章。喜爲長短句。數爲余道。秋舫詞。因得交秋舫。迨長爲名網牽。不獲時晤。癸未與晉竹聚首都門。凡一載。互商學術。謂雕績非究竟事。將致力於竺墳。辛卯余旋杭。秋舫亦假居里門。嘗語余曰。詞學宜少不宜老。以時變者也。卽變而入不變。捨楞嚴其誰與歸。惜晉竹早亡。秋舫復示疾。頻年未卒業而逝。每念及。竟日愴然。以爲詞壇墟。義城亦墟矣。此香消酒醒詞。爲秋舫少時作。其一往情深。諧姜張之聲。續吳蔣之色。深入南宋諸名家三昧。所不待言。顧具是美才。而中年來拳拳白業。與晉竹若一轍。豈香果消酒果醒哉。香與酒。猶之聲色。苟融情於香酒。自有不待消而消。不待醒而醒者。固知聲卽無聲。得微妙聲。色卽無色。得善常色。情卽無情。得普徧情。雖現生未能卽證。而食少金剛。歷劫不化。大光明藏中。目偕晉竹由文字入總持門。出生功德無量。則是詞也。小乘戒之曰綺語。大

乘寶之則曰道種也。道光己酉二月下浣。愚弟項名達識於印蓮小室。

香消酒醒詞

仁和趙慶熹 秋舫

憶蘿月

夢魂如絮。隨定東風去。一堵紅牆攔不住。直到畫樓深處。落花小院池塘。鸚哥喚醒迴廊。誰道畫長春永。只消幾炷沈香。

點絳脣

獨上城樓。一聲畫角吹寒早。楚天雲杳。帆去如飛鳥。樹裏青山。山外長江繞。西風到。斜陽古道。明日多秋草。

長相思 湖上春暮

蘇公隄。白公隄。十里亭臺高復低。斷橋流水西。鷓鴣啼。杜鵑啼。樓外斜陽一酒旗。楊花不住飛。

菩薩蠻

香消酒醒詞

條條方空絲橫直。白菱花印琉璃格。六扇水瀟湘。一重和合窗。窗中人影倩。窗外人微見。只自不分明。是他釵釧聲。

憶江南 無錫華荔生春樓寄夢圖

春樓夢。夢裏隔紅牆。一世情懷原委曲。三生魂魄亦荒唐。說也斷人腸。
春樓夢。人憶曲闌憑。幡定風姨深掩護。屏張雲母不分明。空答畫簷鈴。
春樓夢。日日記凝眸。偶爲晝眠常掠鬢。多應酒病不擡頭。何苦放簾鉤。
春樓夢。絮語聽都訛。扶醒香魂呼燕子。軟調酸語教鸚哥。私祝順風多。
春樓夢。夢入曉窗前。壓鈕衣香雙蝶扣。盤雲髻重兩鴉偏。清早累人眠。
春樓夢。半晌晚勻妝。尺八簫兒新按曲。初三月子夜燒香。約略記昏黃。
春樓夢。夜閉綠窗紗。微有低聲傳燭剪。斷無私語卜燈花。樓外柳藏鴉。
春樓夢。刺繡耐尋思。偶倚紅窗閒破線。微擎翠袖想挑絲。呆煞斷魂時。
春樓夢。斑管見曾描。想界絲闌防屈曲。約摹琴譜寫句挑。不道有人瞧。

春樓夢一病已春深。白柰開花生再世。紅奩結子死同心。天上杳鸞音。
春樓夢夢斷幾番春。扇棄坤靈思寵寵。圖開軟障喚眞眞。畫出意中人。
春樓夢舊夢與誰談。一曲琴心悲綠綺。連宵淚眼搵青衫。怎不憶江南。

一翦梅 連日陰晴不定

乍暖還寒覺晝長。纔疊棉裝。又整羅裳。天公節序也匆忙。寒是重陽。暖是端陽。小
小疏籬短短牆。一曲幽房。幾曲迴廊。春遊排日費商量。晴後花香。雨後茶香。

風蝶令 夏閨

兩黛彎眉葉。雙紅印枕文。醒來一晌整羅裙。慕向碧梧桐下自開門。晝院吟蟬靜。
香鑪寶鴨溫。如今天也怕銷魂。卻怎日長不肯作黃昏。

金縷曲 藥階桂舟叔客醴陵書後附寄

又近中秋矣。向青天、可憐負卻團團月子。叢桂小山花已發。眼底人俱千里。引無數、
別離滋味。燕子飛來飛又去。認條條、古巷紅燈謎。去年事、我猶記。故園無恙西風

裏總負他。六橋煙柳。花天酒地。愁煞阿咸。空四壁。難把家常話起。只報道。平安而已。彈缺不堪重乞食。走天涯。又乏江湖技。詩酒耳。問何濟。

欲向秋風哭。歎人生。胸填塊壘。酒澆不落。棋子從頭成錯著。不合苦將書讀。把多少。心腸束縛。一樹紫藤花館裏。十年前。同翦西窗燭。思往事。兩眉蹙。當時曾譜離騷曲。有幾篇。紅蘭碧杜。何堪三復。楚北楚南同作客。一樣風塵魚鹿。況此去。兩人重複。桂舟叔先行。真箇竹林傳雅號。算黃岡。竹又湘潭竹。新舊句。大家續。

楚地皆奇妙。數行程。某山某水。想曾遊到。水驛篷窗山驛店。受盡星霜多少。閒指點。黃陵之廟。可有鷓鴣啼廟裏。說聲聲。不若歸來好。飄泊意。感同調。蒼茫落日青天小。望城頭。啣啣畫角。一絲紅照。客路加餐須穩健。且喫黃梁飯飽。切莫向。西風懊惱。記取春江三月浪。把桃花。歸買湘波棹。人聚散。似飛鳥。

又 亡友陳小魯一窗秋影齋詞集

一睡中山覺。醉劉伶。荷鋤埋我。請公無弔。名士眼前塵污面。且向夜臺笑倒。原不算。

聰明誤了。嘔出心肝拚死殉。是何人、手段伸長爪。歸去矣。玉樓召。可憐筆陣千人掃。奈何他。古今常例。詞場紗帽。傳與不傳原偶耳。傳者豈皆絕調。只達士、付之一笑。如此奇才偏抹煞。想天涯、埋沒知多少。布衣耳。有誰曉。

咄咄青天怪。怪天公、聰明懵懂。一般看待。處仲唾壺成底事。如意鐵都敲壞。此公死、諸君大快。落拓江湖年少侶。只君先、了結文魔債。作仙佛、永無礙。雨聲燈影魂何在。還記他、偏衫醉帽。狂奴故態。滿紙白描秋水影。落筆山林氣概。在秦柳、蘇辛之外。不少旗亭同賭酒。奈詞壇、從此無君派。眼中淚、爲誰灑。

憶蘿月

海棠花謝。長日閒庭榭。坐久無聊眠也罷。且把簾鉤放下。心愁好夢多磨。偏他一
雲南柯。原是惺忪慣了。卻來埋怨鸚哥。

浣溪沙

還記宵深解玉璫。此時模樣怎生當。是何福分作鴛鴦。別淚雙絨紅豆蔻。同心百

結紫丁香。教人那肯不思量。

壽樓春 自題招魂篇後

招香魂歸來。趁良宵月冷。吹落瑤臺。幾度情河恨海。水流花開。清霧溼。淩波鞋。認碧桃。春風天台。奈鶴斷笙遙。鸞空簫破。鵲滅鏡長埋。柔腸結。誰安排。又燈昏夢路。酒瀉愁懷。多分彩雲蹤逝。步虛音乖。憐薄命。空多才。誤少年。飄零天涯。記燭影屏聲。連枝碎敲雙玉釵。

柳梢青 春分日懷梁晉竹

薄酒微醺。水晶欹枕。擁被思君。雨雨風風。昨宵人病。今日春分。憐他靜掩重門。料打疊梨花夢魂。六扇文紗。兩枝紅燭。一箇黃昏。

金縷曲 春雨連綿桃花落盡忽憶去年今日姚小春集同人作皋亭之遊今

小春去都中一載矣黃昏不寐悵然久之挑燈爲譜三闋并寄小春

春色今年又。怪無端。東風多事。綠波吹皺。眼底桃花都不見。但見枝枝楊柳。忽憶到、

別離時候。蠟屐雨聲催不止。兩三杯。上馬河橋酒。君欲去。掉頭走。黃沙射獵然乎否。誤人生。少年俠氣。儒冠依舊。門外雷聲車似水。多少公卿拍手。中有箇書生兩袖。時小春寓章桐門相國邸第。我亦青衫真困絕。病毛錐。聊代談天口。君擊筑。我敲缶。

風雨雞鳴夜。忽挑燈。枕書而臥。莊周蝶化。一路邯鄲都夢到。看徧長安車馬。卻待要。與君閒話。無奈窗紗關不住。一聲聲。雨點芭蕉打。書未盡。廢然罷。思君此夕燕臺下。問何人。空羣肯顧。黃金置價。誤我天涯曾作客。提起舊遊還怕。只采得。蘅蘭滿把。豪氣全消還跌宕。便淮陰。也待鑽人胯。聲咄咄。向空寫。

且莫悲潦倒。走窮途。嗣宗狂哭。士龍狂笑。名士風流無不可。管甚寒氈破帽。終不似。怨秋蟲鳥。拔劍出鞘君試舞。冷芙蓉。脫手雙丸跳。龍破壁。大聲嘯。仙居見說瑤臺好。又何須。豪情盛氣。一番草草。天上罡風吹十面。星斗總能捫到。儘鍊起。藥鑪丹竈。鍊出文通生花筆。便千人。也作尋常掃。餘咳唾。惠同調。

南鄉子

香消酒醒詞

深院罷秋千。落盡殘紅滿地鮮。盼得春來無好日。天天。只自斜風橫雨連。鑪冷水沈煙。無力瑤琴不上絃。人意亦如春意懶。年年。多半敲牀中酒眠。

鷓鴣天

小字桃根姊妹傳。輕舟如葉載團圓。眉邊山色愁雙暈。眼底潮痕酒一圈。風側側。月圓圓。兩枝飛槳渡頭船。曲終楊柳紅橋路。過盡青溪幾箇灣。

浪淘沙

好夢忒匆忙。無處猜詳。綠陰陰院小池塘。卍字闌干丁字檻。亞字花牆。此景費思量。暮斷人腸。被池如水冷鴛鴦。數盡五更鐘百八月。照西廊。

鵲橋仙 夏閨

惜惜庭院。沈沈簾幕。坐到黃昏無那。玉爐片腦已都消。剛剩得一星兒火。蛾燈剔罷。蚊帳掩卻。斜扣金訶待臥。恰愁夜短夢偏長。含笑約檀郎分作。

沁園春 獨坐

獨坐無聊。衫。敝帽側。迴腸斷時。算合儂消受。原非薄命。無人可憶。不道相思。黃月初斜。青燈欲滅。酒醒誰家笛一枝。魂銷煞。便東陽不病也。瘦腰肢。憐他小草。蒼施奈亂。擺西風力不支。想身如藥裏。拈來便苦。心同蠟燭。積久成癡。柳性纏絲。梨魂潦草。抵死眠蠶。總有絲。紅衾冷。把淚冰溼透。除枕誰知。

高陽臺

明白梨花。昏黃楊柳。生來都會魂銷。如雪如絲。一般各度春宵。重門深閉。蕙蕤鎖。只相思。夢不關牢。漏迢迢。醒也今朝。睡也今朝。銅槃尙記。承紅淚。記封題羅帕。溼裏鮫綃。愁煞雙鱗。何曾信息如潮。人間容易。裴航老。盼雲英。目斷藍橋。儘無聊。酒盡三杯。燭換三條。

蘇幕遮 聽雨

鬢絲絲。香縷縷。深院黃昏。獨自和燈語。簾外東風天又雨。昨夜春歸。夢也今朝去。枕衾寒。更漏數。還是芭蕉。解得儂心苦。一句一聲相對訴。隔箇窗紗。說到天明住。

鵲橋仙 秋荷

一宵兒雨。一宵兒露。不管紅衣涼死。曉來秋水照明妝。已換了、當時梳洗。
絲還相結。心還帶苦。到老依然並蒂。累他扶病立西風。多分那、鴛鴦不是。

好事近

到底幾時歸。門外連天芳草。剛是海棠花謝。又荼蘼開了。紅燈夜夜卜金錢。遮莫雁魚杳。試把一春輪指。有夢兒多少。

菩薩蠻 三月二日偕華荔生晉竹湖上晚歸

一湖水碧濃於酒。兩隄環抱如梳柳。淺醉帽簷斜。滿天飛雨花。輕寒偏惻惻。薄暮風猶力。花落又江南。明朝三月三。

柳梢青 江舟偶成

四面窗紗。玻璃格子。照見些些。有箇人人。紅船六柱。烏髻雙丫。莫愁湖上兒家。水漲候。秦淮槳划。妹喚桃根。姊名桃葉。郎是桃花。

憶蘿月

不茶不酒。鬆了衣雙釵。心是梧桐身是柳。到得秋來都瘦。日間略可眉顰。一燈卜過銷魂。偏是天公無賴。近來只慣黃昏。

行香子 冬夜

下了簾旌。掩了燈屏。擁紅爐、小坐調笙。十三銀字。一一春鶯。看天如水。人如玉。月如冰。兔魄剛明。獸燄初停。滿窗兒、梅影低橫。絲絲風細。籠袖寒生。正燭三枝。香三炷。漏三更。

江城子

重重樓閣有銅鑲。月兒圓。月兒彎。十五初三何日是團圓。眼底眉梢心上事。誰解得。九連環。一回相見一嫣然。髻珠盤。耳璫懸。膽大東風不爲落花瞞。說道銀河清淺甚。何處去。覓青鸞。

菩薩蠻

迴廊剛閉鸚籠鎖。銷金鴨子沈檀火。明月可憐宵。箇人吹洞簫。夜深秋露墜。蟾影清如水。照見薄羅裳。替他身上涼。

風蝶令 獨酌圖

小院清於水。涼雲薄似羅。鱗鱗紅疊玉缸波。如此良宵、不飲待如何。淺醉科頭坐。高吟拍掌歌。天邊有箇醒姮娥。笑道書生、酒力也無多。

百字令 贈徐寶幢卽題其詩詞集

仰天不語。怪無端而笑、無端而涕。杯酒未乾、雙劍跳、看爾悲歌斫地。鋤下黃金、牀前阿堵、短盡英雄氣。不妨狂語。諸君浪得名耳。可憐豪竹哀絲。中年多感。坐作青氈計。斗大鵝籠愁悶煞。那得伸腰臥起。李賀心肝。劉郎脾肉。無限悲涼意。此中有恨。人生難得知己。

金縷曲 又

一樣傷心慣。月明中、南來烏鵲。楚天飛倦。身是湘江斑竹子。點點淚珠成串。曾熟讀、

離騷一卷。王謝才名。休浪許。怕舊家門第。滄桑換。爲君語。定腸斷。窮途愛結悲秋
伴。儘無聊。蘭啼蕙泣。花箋灑滿。消盡少年豪蕩氣。此意有誰情願。便化作石人都軟。
流水琴材君絕妙。遇中郎。定識桐枝爨。焦尾恨。且休怨。

滿江紅 又

我不工詩。君卻以詩篇示我。因想到。本來面目。廬山真箇。猿臂將軍金鏃羽。虬髯仙
客丹爐火。叫長空。霹靂一聲飛。青天破。滄海句。憑誰和。春江淚。憑君墮。是毫端活
現。才人坎坷。未免有情難遣此。呼之欲出斯其可。怪諸公。摹宋復摹唐。殫蠶裹。

摸魚兒 又

問西湖。花天月地。晨星幾點何處。玉川漸老。盧小菟元龍死。陳小魯。大半天涯羈旅。
君且住。聽五鼓燈雞。起作劉琨舞。俠腸快吐。算樞馬騰蹄。鞴鷹脫臂。莫便怨遲暮。
年來事。聚散波萍幾度。華筵那得千古。讀書容易多情累。紅豆相思最苦。今漸悟。把
別調琵琶。翻入伊涼譜。他年遇汝。認畫壁旗亭。雙鬟疊唱。貰酒兩人賭。

洞仙歌

嫩涼如水。記新秋池館。向晚桐陰畫簾卷。正銀燈初上，掩過屏山人靜也。有箇黃昏坐慣。玉簫何處去。良夜沈沈。花影橫階兔華滿。深院起微風。一點涼螢自飛上。白羅團扇。看楊柳梢頭。月趕西。儘把冷闌干。和衣靠暖。

鵲橋仙 重陽

一溪野水。滿山落葉。曉郭寒煙初透。前宵風雨。昨宵陰。纔畫出。今朝重九。紅萸結佩。烏菱佐盞。獨自淺斟杯酒。黃花瘦。總似當年。算我比。當年還瘦。

滿江紅 重陽後四日借姚古芬荔生晉竹酒樓小飲薄暮而歸古芬限登樓

持螯四字各填平韻滿江紅一闋分得持字

何處斜陽。剛照見。西風鬢絲。早一陣。晚鴉盤急。高樓暮時。剖橘搓橙。鄉味好。霜螯左手且須持。有故人。招飲補重陽。吾敢辭。巾邊側。花一枝。鱸邊熟。酒一鴟。也不妨。狂飲。燒燈寫詩。前夕青山應冷笑。明朝紅葉莫來遲。晉竹預訂湖上之遊。便黃昏歸路。

不愁迷明月知。

花非花 西湖曲

長橋長斷橋斷。妾意深。郎情短。西湖湖水十分清。流出桃花波太軟。

金縷曲 今夜

今夜仍無夢。冷紅蕤。枕函如水。但和愁共。綃帳一層張薄霧。燈影絲絲迸縫。覺帳外。玉爐煙重。安得蘅蕪香在手。便濃燒。心字成何用。銀鴨睡。繡衾擁。迢迢捱過清宵永。借叶數銅壺。不多幾刻。寺鐘應動。簾外五更風漸緊。想是釀寒催凍。早一陣。雨聲相送。不恨梧桐先作響。恨梧桐。原是儂親種。心上事。酒俱湧。

陌上花

西風畫角。荒城吹上。滿天霜氣。遠水斜陽。紅到亂山無際。樓臺一味銷魂色。翠袖有人寒倚。料珠簾半捲。斷愁如我。百端難理。向關河走馬。飄零長劍。舊夢淒涼空記。便作黃花。瘦也問誰提起。年來多少無名淚。何處生綃緘寄。但青衫。幅幅啼痕印滿。

湖波不洗。

浪淘沙

一樹碧桃花。花外兒家。綠陰深處柳藏鴉。二月東風寒惻惻。又采新茶。籬竹水紋斜。四面窗紗。畫梁文杏一簾遮。燕子飛來儂不管。去也由他。

河傳

飛絮無語。碧闌干。楊柳絲絲曉寒。美人夢醒羅袖單。偷彈淚痕紅枕山。廊下雕籠鸚鵡喚。簾影卷。小響聞金釧。兩蛾彎。兩鴉盤。嫣然酒渦雙臉圓。

陌上花 病中春去有感

流光去也。斜陽紅處。一絲留定。草斷虹橋。前度踏青心冷。東風吹得鬆無力。不把柳花團緊。但湖樓四面。陰陰飛絮。綠煙低暝。憶年來縱酒。羅衣纔試。便有畫船鷗訂。舊夢重尋。一樹熟梅黃盡。行雲逝水。知何意。誰教惜春人病。下簾鉤。燕子雕梁不語。日高畫靜。

醉太平 湖上

花香水香。風涼雨涼。青荷葉不多長。覆鴛鴦一雙。
橋西碧窗。橋南畫廊。綠陰陰裏
紅牆。是誰家女郎。

水龍吟 過孤山懷林處士

月明仙鶴飛來。孤山山上人吹笛。一湖雲水。兩堤烟草。四山花石。漱雪心清。餐霞肌
冷。箇人無匹。便茂陵老去。玉簪殉土。終不上。相如冊。尙有玉梅相識。好姻緣。古今
難得。笑他蘇小。尋郎橋畔。香車油壁。菊蕊煎茶。淥波釀酒。陪君蘇白。想天寒竹裏詩
魂可許。我呼而出。

洞仙歌 送晉竹之江南

烏篷艇子。有兩枝柔艣。一路青山畫眉嬾。正江南。葉葉酒味初濃。霜天好。飛盡吳娘
六柱。相思紅豆曲。畫壁旗亭。此去雙鬟定須顧。記取夜深時。明月楓橋。曾照我。淚
痕揩處。算鬢影。衣香易魂銷。休忘卻西湖。梅花待汝。

蘇幕遮

玉闌干。金屈戌。簾外長廊。廊響弓弓屣。鬢影春雲衫影雪。如水裙拖。幅幅相思褶。阮絃鬆。笙字澀。心上燒香。香上心先滅。安得返魂枝底葉。便作青蟲。也褪花蝴蝶。

摸魚兒

姚秋芷姑丈復有楚北之行填此贈別

不多時。霜痕遍糝。滿山紅了烏柏。斜陽怕照人離別。幾日濃雲絮厚。潘鬢瘦。已秋老。荷花。絲斷鴛鴦藕。銷魂還又。又柔艣。枝枝峭帆葉葉。重過漢江口。天涯路。頗憶雨窗燈牖。惱人情味如酒。當初尙道郵程苦。何況淚霑衫袖。頻執手。說我亦相如。臥病文園久。臨行話舊。有潭水汪倫。謂耕綠匡廬李白。謂賓竹寄語問安否。

憶蘿月

自鋤明月種梅花圖

梨雲凍碎。鬪得冰痕脆。香影滿庭天似水。此刻嫦娥也睡。一鋤鴉嘴輕持。補來籬葉橫枝。若問種花年月。除非仙鶴能知。

水龍吟

秋晚過城東有感

夕陽一陣盤鴉。西風落葉吹如紙。明霞斷處。角聲寒堞。鐘聲古寺。十里河橋。萬家簷瓦。月街燭市。漸南園霜滿。黃花過了。閒經過。魂銷起。一樣湖山位置。儘繁華。水流雲逝。玉牌詩沒。珠襦匣冷。弔殘宮址。瓦子勾欄。板兒門巷。酒樓銀字。但歌沈舞榭。更無人憶。話當年事。

鳳凰臺上憶吹簫 樊慈花室葉織卿夫人遺卷

碧月無聲。銀河有影。佩環飛去瑤天。料綵鸞人世。住不多年。幾幅淡螺殘墨。空剩下。香冷雲箋。君知否。從來好夢。只合如煙。仙仙九張機下。聞說道。秋星曾墜涼筵。織卿名梭以七月七日生。奈玉虹橋卸。鵲也難填。便是荀郎情厚。怎禁得。淚瀉紅鉛。東風峭。琅然一聲。吹斷琴絃。

疏影 魏滋伯大滌山房讀書圖

一間老屋。在萬山深處。四面皆竹。竹裏開門。流水聲中。有人把卷初讀。琅嬛自昔偷遊去。正洞口。癡龍眠熟。想書中。亂走紅蟬。仙字也都盈腹。試看夕陽天外。芙蓉十

二朵朵寒綠。便欲將身。畫裏尋詩。也算片時清福。南湖此去無多路。恰笑我、未能免俗。問幾時、瘦襪寬鞋。來與白雲相逐。

摸魚兒 又題綠天覓句圖

綠陰陰。嫩涼如水。西風好箇庭院。一間矮屋烏篷樣。種得芭蕉葉滿。窗六扇。把格子玻璃。淺碧文紗換。寒陰隔斷。正石磴科頭。花廊叉手。丫髻小僮伴。西窗夜。尙憶雨聲零亂。一枝紅燭燒短。當時我道淒涼煞。料是君應聽慣。愁不管。有天外飛來。仙語都成串。吟情未倦。便香字蟠灰。茶烟散縷。翠影畫簾卷。

石湖仙 又題花灘漁唱詞稿并懷其樓居之勝

花灘漁唱。認紅樹溪邊。天影雲盪。雲外結詩樓。倚樓人、悠然運想。沙鷗都熟。畫半頃、涼波相讓。閒放。喜此間、水竹無恙。前林幾家老屋。正斜陽、當門曬網。一笛西風吹得。青山都響。酒醒闌憑。夢回月上。句如飛槳。纔一响。高歌已拍仙掌。

蘇幕遮

雨聲多。梧葉墜。點點相思。點點相思淚。貧裏相如秋更累。得酒偏難。得酒偏難醉。鼓三通。燈一穗。入夜還愁。入夜還愁睡。四壁寒蟲心叫碎。夢也全無。夢也全無謂。

生查子

青溪幾尺長。中有雙枝艣。楊柳小於人。便解留船住。歌聲按暮雲。酒氣蒸香霧。又落碧桃花。紅了來時路。

高陽臺 渡河後寄家書有作

鼠影窺燈。雞聲叫月。馬蹄催送征輪。纔渡黃河。夢兒也阻三分。春宵寒暖憑誰問。況霜華。滿地如銀。得知他。燭燼香消。幾箇黃昏。來時只說長安遠。使長安不遠。說總銷魂。一月程途。今宵已過三旬。平生爛醉渾閒事。到天涯。薄酒難醺。可憐人。我盼雲鴻。卿盼波鱗。

摸魚兒 梅花

易銷魂。一枝涼笛。憑誰石榻三弄。東風約住輕寒信。深怕夜來吹猛。花似夢。卻寸寸

橫枝萬朵梨雲凍。碧天無縫。算如水清陰。除他修竹。只有月明共。江南好。好在鶴房仙隴。孤山山上曾種。翠禽小集香深處。不羨釵頭么鳳。簾影動。看雪片飛來。恰補蒼苔空。不歸誰送。記酒醒今宵。玉人何處。蝴蝶滿衫重。

高陽臺 夜雨不寐

細咽風砧。緩敲簷鐵。無端作出聲聲。透薄窗紗。偏生不肯天明。芭蕉自說淒涼語。又何嘗。必要人聽。奈多情。到此魂銷。入耳偏清。衫邊記起斑斑淚。記秋江夜泊。枕上潮生。一樣無聊。烏篷換了青燈。常時慣說儂多夢。恁今宵。作也難成。一更更。容易教人。候到雞鳴。

沁園春 嘉定竹煙篔圓潤可愛茗香姑母索詞篆刻其上

萬篠連山。新粉叢邊。分來露梢。記金搖竿影。橫量鈿尺。珠排節數。圓截銀刀。密裊龍頭。細拖鳳尾。水樣鵝黃玉一條。中通處。有拾餘瑤草。好逗心苗。琴餘書後無聊。便濃注薰絲。著意燒。儘荷筩暗吸。篆隨雲吐。蘭膏徐爇。香逐風飄。紅膩油脂。黑蟠灰字。

一點星星火易消。清宵坐。更斜籠翠袖。未忍輕拋。

摸魚兒 汪又邨柳暗花明又一村圖

一程程。山山水水。人家都在深處。彎環不辨羊腸徑。只覺樹陰無數。香似霧。問四面樓臺。多少春鸚鵡。相逢俊侶。正潭水桃花。踏歌聲裏。滿地落紅雨。仙源好。見說藍橋有路。胡麻飯熟如許。馬蹄催送征輪急。可是軟紅塵土。君記取。記步步移時。便入長安去。此中小住。笑圖畫尋來。絳雲青瑣。還似壻鄉否。時又邨都中就姻故云

金縷曲 徐問渠六橋草堂圖冊

瑪瑙坡前路。認虹橋。高低十里。亭臺無數。落日荒荒紅不語。只照長廊短廡。指斷碣。重來摩撫。南宋衣冠何處是。算六陵。并少冬青樹。高隱士。自千古。好山依舊青當戶。想深宵。月明人靜。水仙歌舞。我有先人祠宇在。恰對梅花古墓。家祠面孤山故云。料寒食。清明逢汝。桐帽櫻鞋須結社。願他年。分作湖山主。圖畫裏。可容補。

念奴嬌 何春洲春在草堂圖

杏花門巷。試雨聲多處。問春消息。中酒燒燈人意懶。又是銷魂時刻。見說江南。連朝天氣。只覺東風急。題詩須記。莫教忘了寒食。因想十里香塵。紫騮嘶斷。帽影鞭絲客。爭似草堂清絕好。紅到枝頭顏色。水竹籬邊。山桃簷外。燕子能相識。明年花放。我來此處橫笛。

洞仙歌 姚眉史紅樓相望圖

碧紗六扇。記銅鑲春晝。人在高樓倚雙袖。正試燈、風細。月子初圓。相逢處。好在上元時候。銀河原不隔。咫尺紅牆。贏得書生暗回首。衆裏最關心。一注橫波。算值得明珠論斗。便賣酒、臨邛也風流。還未識當鑪。卿卿肯否。

高陽臺 停琴佇月圖

心篆初燒。丁簾試卷。一燈掩過山屏。古錦囊空。玉琴膝上斜橫。碧梧桐院闌干曲。理冰絲。還自消停。看青天。幾片微雲。幾點疏星。高山流水知何意。除廣寒仙府。不許人聽。難道今宵。嫦娥還未妝成。銀河不動風如翦。漸瑤階。白露泠泠。再沈吟。蛤粉牆

西。一暈初生。

賣花聲 許君脩碧聲山館圖

風露夜冷冷。何處秋聲。梧桐葉上最分明。此際碧紗關不住。紅出書燈。簾幙峭寒生。鑪鴨烟停。兔華如水漾中庭。安得一枝橫竹好。吹到三更。 簾幙峭寒

摸魚兒 曹柳橋春江放鴨圖

放輕橈。青山靜處。一江春水初暖。沙痕漸沒。潮痕長。幾尺蘆芽短短。萍影斷。看一線拖來。鴨腳紅猶軟。綠隨波轉。正浴向花間。偶聞人語。驚起自相喚。江鄉好。無數漁梁蟹。斷此生清夢。誰管。夕陽細雨。持竿出一。雲闌陰聚滿。誰是伴。惜少箇紅裙。弄水船頭慣。閒尋畫卷。算買屋移家。栽菱種芡。便我也都願。

清平樂 吳次歐蕉窗坐雨圖

雨聲不住。都在芭蕉樹。銀豆拋來如按譜。此際有人細數。黃昏庭院廉纖。高燒絳蠟垂簾。一樣熏香獨坐。今宵只覺寒添。

金縷曲 林秋園二十四橋醉月圖

十里珠簾路。最風流、玉簫夜夜，玉人處處。身是三生狂杜牧，醉倒青尊幾度。料唱遍、竹西樂府。豆蔻梢頭春二月，問芳名、可記烟花簿。能幾箇，好眉嫵。荒臺一片瓊花土。說當時、鴉鋤耕出，寶釵雙股。依舊雷塘風雨夕，閃閃涼螢無數。誰解照、宮中歌舞。江水自流兒女怨，只嫦娥、天上圓如故。明鏡裏，自千古。

疏影 蔡木龕丈庭中有翠雲草徵詩盈卷復索倚聲因填此闕

綠陰如滴。在苔花疏處，深蒨堪摘。榴櫛斜梳，小樣魚鱗，涼烟一翦猶溼。年來南浦多離恨，想鈿朵、有人拋擲。恰笑他、吹出無心，還似鬢邊曾貼。最好手攜鸞尾，呼龍一片種，橫掃無迹。道是蘭江神女行來，有此襪羅顏色。水天環佩知何處，只滿把、靈苗拾得。料此時、采藥歸來，補取滿庭濃碧。

水龍吟 石帆

拳來非葉非花，海風吹老珊瑚色。細垂瓔珞，斜分釵股，勻排竹節。鎖鎖相連，鉤鉤不

斷峭籬獨立。便石家如意也。難敲碎。誰曾見。高三尺。尙憶荒磯古石。月明中潮生。潮沒。蛟梭鼻霧。鸞幃貼水。羅紋密織。紫榦撐時。紅瀾盪處。枯查浮出。算瓊田以外。更無人種也。無人識。

洞仙歌 吳閩峯覓句晚歸圖

碧桃花下。認重門雙徑。輕扣銀環犬聲應。向落紅、多處駿馬行來。人醉也。有箇熏衣坐等。六街更漏轉。良夜迢迢。明月當頭免華冷。底事太歸遲。選韻分牌。料詩句、苦吟未定。便拚著、黃昏細推敲。連畫燭燒殘。諒伊心肯。

水調歌頭 碧琅玕書館圖

一笑問修竹。相識是何年。此君瀟灑無侶。惟愛主人賢。門外數竿煙雨。門內數竿風月。中構屋三間。枯坐淡忘語。對影冷於仙。展書匱。攤畫稿。理琴絃。不妨燒筍開尊。同坐落花天。黃熟香消古篆。白定甃翻細乳。新粉落衣邊。萬綠盪如水。抱石好橫眠。疏影 綠陰和滋伯

一重窗網。認碧玻璃紙。三面屏障。不是梧桐。便是芭蕉。紅亭半角都讓。斷無人處。簾垂地。但幾點、疏疏雨響。有隔花、架上鷓鴣。恰好翠毛新長。最憶沙隄裏外。斷橋四五月。湖水新漲。密密層層。幾箇灣頭。暗裏只通雙槳。傷春杜牧來何暮。已贏得、天涯惆悵。看夕陽、山外青山。又費一番濃想。

梅花引 美人彈琴圖

畫屏前。玉鑪邊。一縷香生心字烟。落花天。落花天。深院綠陰。誰來驚晝眠。五銖衣薄當風冷。斷紅雙臉明霞影。七條絃。七條絃。今夜月明。聽他彈水仙。

摸魚兒 送宋月樵同年之官閩中

記天街、一條軟繡。馬蹄催送歸意。杏花開滿旗亭路。又早蘆花風起。人去矣。看一棹秋江。萬里還千里。宦遊誰比。有處處青山。題詩選勝。莫厭折腰米。天涯好。最好武夷仙地。榕城萬綠如水。放衙聽鼓何曾慣。且學黃綢擁被。成臥理。料養鶴調琴。都在紅蕉底。訟庭無事。但竹馬騎來。兒童笑說。領略荔枝味。

金縷曲 鏡眉關雪圖題吳梅梁太史尊人遺幘

一片銀雲溼。記當時、鞭絲帽影馬蹄得得。萬縷千絲都不見。只見太行山色。且莫問、春風消息。瓊屑灑空飛不住。撲征衫、還道楊花白。曾聽到玉門笛。家鄉萬里程程隔。有彎環、鑑湖一曲。垂條似織。回首若耶溪畔路。溪水魚鱗自碧。怕鏡裏眉痕非昔。二十年來人事換。向畫圖、重認陶彭澤。歸去好。渭城客。

南樓令 潯溪訪舊圖

茅屋兩三家。臨流小閣斜。一重重、水竹籬笆。幾日東風濃似夢。又開了、紫藤花。難得酒生涯。相逢我與他。玉東西、且酌紅霞。但願年年長在手。休放過、好韶華。

念奴嬌 家次閑寶月山居圖次閑先人有舊居在寶月山今已屢遷矣追憶不忘因繪此圖

舊時門巷。有舊時池館。舊時花石。一帶彎環屏障好。對面蛾眉山色。細徑羊腸。疏籬麕眼。此境都如昔。春來雙燕。杏梁還是相識。尚記九髻荷衣。兒時學步。細數山坡。

級轉眼滄桑塵事換。已是可憐陳迹。畫裏人琴。卷中詩句。也變山陽笛。謂潛園慈柏
諸君蒲團香裊。結廬終勝行客。

疏影 秋分日偕吳夢蕉汪子雨石芷卿篠珊叔祖買舟由古蕩至留下秋水

空明樹陰合。匝意甚閒適。因賦此解。

溪光澹沱。趁嫩晴出郭。催放輕舸。港路彎環。柔艣搖涼。秋陰兩岸低鎖。單衫小扇蕭
閒甚。看軟鏡、碧琉璃破。倚水窗、蓋許茶時。又是一橋穿過。石上勻藍點點。幾叢澹
竹葉。娟秀花朵。古木敲斜。修藤屈曲。時見墜枝紅果。游魚吹沫圓紋細。錯道是、雨珠
飛墮。卻羨他、開扇柴門。臨水老漁閒坐。

金鏤曲 孤山探梅圖

欲向青山問。問青山、白雲多處。幾番春信。著意尋春春尙淺。侵曉薄寒能忍。又早是、
段家橋近。流水無言人影悄。但盤空、撲雪鴉成陣。還只恐、北風緊。打門仙鶴曾相
認。剩枝頭、夜來殘月。半鉤黃暈。石古林深烟磴滑。一路鞋痕細印。渾不管、蒼苔立損。

太常引 陳秋穀畫溪漁父圖冊

平湖如畫遠山低。小小缺瓜皮。白酒一瓶攜。舉網處、銀刀正肥。 菴花洲渚，鷗波亭館，只在水東西。青笠綠蓑衣。渾不是、苕谿書溪。

摸魚兒 又題填詞圖

小屏山、最深深處。鴨鑪銀葉熏透。烏絲闌格紅絲硯，安放月窗風牖。人坐久。恰嬾嬾羅衣、天氣新涼後。蘋花渡口。看一朵遙山、一灣流水、一樹水邊柳。 新詞好、合數梅溪石帶。休言秦七黃九。年來笑我疏慵甚，忘卻笛牀歌袖。憑妙手。把玉盒輕拋、記曲相思豆。燈前夢後。儘減字偷聲，拈毫寫韻，銷盡夜來酒。

高陽臺 無錫華竹樓於鳳凰山麓民家得牙牌一面背刻荔支紋面鐫宋詞

玉樓春其上字畫明勁決爲南宋宮禁物因偕汪小米晉竹滋伯同賦

細字蠶眠。斷紋犀裂。深黃暈透鵝脂。一片文牙。何人手刻烏絲。東風荔子年華好。要

宜男翠葉青枝。最分明、兩面圭稜。兩朵靈芝。自從鳳輦宸遊少。有遺鈿墜佩。散落瓊墀。春去春來。知他是否宮詞。迢迢禁苑葳蕤鎖。料當年、曾繫金匙。易銷魂、結子同心。翠袖攜時。

金縷曲 東坡先生元符硯搨本爲嶺南黃荅石題

片石摩挲久。記當時、枕椰菴內。寶同尊卣。割取龍巖雲一朵。洗盡纖瑕宿垢。渾不是、涵星鳳味。俱東坡硯名食芋著書非易事。望瓊樓、玉宇空回首。鸚鵡眼。淚痕溜。銘詞璽篆應俱壽。七百年、枯棋小劫。圭稜依舊。想到松烟揮灑日。常置先生座右。在磨蝸、宮中磨透。不少西山柔脆質。黨人碑。枉自刊元祐。希世物。仗君守。

臺城路 三月中旬吳夢蕉約同人作皋亭之遊

一春好似黃梅雨。今朝嫩晴天氣。鶻響離城。雲移出樹。拂面繚絲風細。船頭舵尾。看水碧羅羅。野塘十里。一路桃花。淺深紅到半山裏。年來花事有幾。再消停數日。枝上如洗。歡喜橋邊。甘墩村外。都是曾經遊地。尋春倦矣。問前度劉郎。鬢霜添未。有約


重遊酒杯還自理。時有果熟重遊之約。

又 小滿後十日同人復遊皋亭舟行小港中綠陰夾岸意境幽絕

不寒不暖晴時節。開箱袷衣初試。酒舫重移。釣竿新把。且學老漁身世。花開楝子。看風過搖涼。水痕都紫。兩岸人家。畫長門掩正蠶市。枝頭青杏尙小。只桑陰豆莢。肥綠如指。土沒鞋平。衫兜扇出。又過斜陽山寺。紅橋雁齒。有曲港通船。草香蘅芷。除卻閒鷗。問誰能到此。

滿江紅 乙未臘月北行連日風雪舟阻孟河江口因如姜白石泊巢湖故事

私祝江神。倘得風平浪定。當以平韻滿江紅爲壽。曉起天果大晴。因填此闕。天末靈旗。看一展。雲散霧消。和春到。秣稜暗漲。瓜步寒潮。是日立春。萬里樓臺鋪水墨。兩山鬢髻露金焦。趁曉來。排陣集神鴉。開畫橈。瑤車碾。珠佩搖。擁芝蓋。泊蘭皋。有螺童擊鼓。蛟女吹簫。明月西來留後約。大江東去認前朝。願順風。飛夢過揚州。紅板橋。



浮
豁
精
舍

詞
三
種

運
彰



宋翔鳳（乾隆四一——咸豐一〇）

字于庭。江蘇長洲人。嘉慶五年舉人。官知州。精研經學。有浮溪精舍叢書。

自序

余弱冠後始游京師。就故編修張先生受古今文法。先生於學皆有源流。至於填詞。自得宗旨。其於古人之詞。必絕幽鑿險。求義理之所安。若討河源於積石之上。若推經度於辰極之表。其自爲詞也。必窮比興之體類。宅章句於性情。蓋聖於詞者也。還而自念。方纒疏其心。眩瞖其境。不敢以鄙倍之未化。輕涉藩籬也。後閒爲歌詩以示工部汪君小竹。汪君亦工詞。因爲余言。凡情與事。委折抑塞。於五七字詩不得盡見者。詞能短長以陳之。抑揚以究之。蓋窮居則氣鬱。氣鬱則志衰。志衰而慮亂。慮亂而詞碎。而能歸之節。輾之微。道以聲音之變。各使就理。靡不開暢。又能包含蘊蓄。不盡其聲。俾皆平其氣。以和其疾。是以填詞之道。補詩境之窮。亦風會之所必至也。又於白下遇教諭丁君若士。以爲余詩時與詞近。躍躍欲爲。猶未敢也。數年以來。困於小官。事多不偶。旣不能歇。骸以合流俗。又不能枯槁。以就山林。不平之鳴。託之笑傲。一往之致。消以沈澗。略曲謹而思棄。視齷齪而誰與。於是行事之閒。動遭蹇難。議論所

及婁叢讒譏。故人舊游。或相告絕。幸爲太平之人。不櫻羅網之累。然身心若桎梏。名字若黥劓。古之窮士。撫榛莽以興歎。送回波而欲泣。考吾所遇。一皆備焉。非假塗於填詞。莫遂陳其變究。因本師友相益之議。求諸唐宋諸賢之作。稱義選辭。審音問律。萬未得一下筆不休。春無關於飛鳥。秋無關於候蟲。有感於氣而不自知。有動於中而不自覺也。念以頑闇。動多感慨。然承舊德之餘。而聞達人之論。輕薄之行。素鄙於中懷。妙喻所觸。每寄於卽事。使以溱洧之芻芍。媿沅湘之蘭芷。取屠沽之面目。合伶籍之形迹。其事若出於一條。其趣自睽乎千里。識沈淪之可悲。諒疏狂之有託。是在存其篇章。辨其意指矣。乃編定舊作爲香草詞二卷。期斂散越之意。約以宛轉之言。出之靡盡。而留其有餘。庶幾掉臂憂患之中。游鞅塵埃之外。苟得之於微眇。非小慧之及知。則願與同志之士。由其聲律。精乎神理。離合之際。更有萬端也。道光元年六月廿六日。長洲宋翔鳳記。

浮谿精舍詞

長洲宋翔鳳于庭

香草詞

摸魚兒

任春人許多幽恨。芳草空自飛舞。人間只弄傷心色。又是幾番風雨。春欲去。就寫徧紅情綠意成虛語。羈懷最苦。任慢引清尊。徐翻怨曲。愁結總千縷。青青草。卻滿河潛江浦。銷凝何處。平楚繁英落盡。濃陰遠。還向斜陽延佇。須看取。春去後。美人香草俱塵土。悲今弔古。要收拾殘魂。商量舊夢。澤畔詠蘭杜。記東風乍吹芳樹。瓊樓難護。香國先教萬里飄零遠。鵲語幾聲聽得。聲已咽。爲飛到。昭君青冢非青色。悲弦似泣。又引起邊情。紛紛戰騎。行處淚沾臆。愁如織。更遇沙昏月黑。天涯誰寄消息。依稀陌上韶華好。思買玉鞭金勒。新雨溼。望不盡。江南草樹連江北。朝光未昃。問無力楊枝。忘情瀉鳥。可是舊相識。

燕呢喃、畫梁初乳。須知好景難遇。雙雙欲掠風中翦。未識軟絲輕絮。簾易度。已儘共
詩人、贈答無朝暮。紗窗似霧。擬挹取閒雲。鉤來新月。細把寸懷訴。朱門晚。但有參
差碧樹。飛飛時溼清露。紅妝羅綺渾如昔。無奈玉顏非故。飛早誤。誤一片斜陽。誰認
沙隄路。流鶯漫妒。分輕語都收。舞衣自脫。那問舊栖處。

佇雲霞、向空舒繡。無端吹作流水。孤山目斷君山色。中有暮烟濃起。愁最是。已夢到、
桃花落盡仙人死。蒼涼帝子。又浦裏新萍。洲前宿莽。歲月漸深矣。蘭舟上。容與中
流遂止。高城還障深壘。扣舷擊楫移情遠。無數暮蘭幽芷。香邈迤。爲獨抱孤芳。不插
閒紅紫。滄波自比。有千古澄清。洗心蕩目。替我謝塵滓。

正迷茫、十洲煙樹。白漚飛雪。同逝。鬣梁未接鮫宮隱。空滿海濱愁思。風景異。莫夜弄
蒼篴。去擾驪龍睡。魚腥蜃氣。要幻出樓臺。開來戶牖。此境幾人至。波濤闊。一葉飄
零似寄。瑩煌難認金翠。扶桑欲稅虞淵駕。酩酊只消沈醉。天欲漬。漬不盡。清宵萬斛
明珠淚。蓬萊舊事。費簫史洪厓。尋聲問影。猶有暮雲翳。

倚闌干。共人憔悴。低迷只有花影。瓊簫驚起珠樓夢。瑤思綺懷都醒。宵正永。有片片行雲。漾出波千頃。悠然汎梗。被怨繭情絲。輕纏細裏。曲裏助悲哽。江潭遠。那更流連光景。尊邊深意誰領。清魂銷盡無銷處。飛越蓬山高頂。羣籟靜。取寂寂寥寥。付與春弦冷。天遙地迴。卻不替殘紅。商量去處。明月自孤嶺。有黃鸝。盡情啼處。柳絲穿徧金縷。王孫不覺迷歸路。芳草又盈南浦。風更雨。便開到。姚黃魏紫心還苦。憐他媚嫵。對水咽雲愁。檻前樓角。此意幾重數。荒園小。不是瑤林翠圃。頻年空歎塵土。橋邊芍藥隄邊樹。寂寞新來無主。天暗許。任謝盡瓊花。一觀留千古。淒涼怨譜。待遙碧來時。亂紅飛後。更把歲華補。

高陽臺 自題笠履寫真

何事蹉跎。輕過壯老。虛生四十餘年。鬢影絲絲。幾人識向愁邊。章門昔日經游地。遇尋常。貌我寒肩。到而今。依舊飄零。獨立花前。昂藏七尺空如寄。負芳春明月。遙夜清弦。觸事悲涼。舊塵往夢都捐。從茲笠屨江湖裏。去安排。水宿雲眠。且收來。眼底羣

峯脚底蒼煙。

河傳 鼻煙

細細芳意酒初醒。消息吹來自醒。雜花故繁香未經。零星。不忘雙玉瓶。海上攜歸魂可返。聞緩緩。煙火還能斷。看如塵。拭有痕。綢繆薄酸兼小辛。

高陽臺 仙女廟

碧海茫茫。清淮寂寂。幾年頻過扁舟。山木叢祠。靈風夢雨生愁。何方簫鼓迎神曲。貯虛空。翠羽光浮。卻迢迢。蘭茝平皋。環佩中洲。遺碑已斷難憑省。有驚波迷岸。暮色沈樓。不卷雲旗。替人暗祝潛蚪。船窗試寫蠶眠字。取傳聞。更補荒陬。盡緘來古思仙心。付與冥搜。

寶鼎見

暮潮西上。淮水東去。揚州城郭無賴。算二分明月。照得垂楊宵漠漠。試舉首。問闌干。星斗可有仙人騎鶴。笑今夜。扁舟一葉。獨向隋隄。栖泊。笙歌佳麗非蕭索。是當初。

何遜官閣記豔絕。兩行小史。儘許湖山留著作。更隔座聽紅裙送酒。履鳥時時交錯。渾不似。圖中主客。秋雨春風總惡。來往閒瀉。空說是生前行樂。奈波馳花謝。雲散飄輕霧薄。待誰寄語。千紅萼。好記經年約。任玉簫冷徧瓊樓。莫便依依他寂寞。

青玉案

讀書擊劍都無謂。問名姓。差能記。更積傷懷前度事。鏡裏蛾眉。鑪邊犢鼻。幾許添顛顛。名場可有閒田地。安箇愁人定容易。百尺樓高難共倚。月斂寒輝。花含清淚。合遣沈沈醉。

轆轤金井 姜種梅濡穎圖

五更書幌笑毛錐。自把平生閒過。剛健多姿。爲差來婀娜。儘成坎坷。只分與。砌蟲相和。亂葉籤聲。寒雲研色。含豪枯坐。狂言怕驚四座。聞海濱。騎士修竹人臥。白石風流。況紅牙歌可。烏絲字妥。約何日。一尊尋我。更寫花枝。添將月影。題完愁破。

高陽臺 寄金近園

衆裏嫌身。人前制淚。一般寥落花時。能幾相逢。肯同燕影差池。相看英氣銷難盡。要留將、悱惻相思。記番番、相對淒涼。何事相疑。侵尋坐誤。誰相惜。太無頭緒。強要人知。陌上春歸。飄零風絮。煙絲。深深院宇。迢迢夜。莫呼來。燕子鶯兒。有無邊。海思雲愁。敢託微詞。

水調歌頭 王百穀遺像

詞客已千古。風貌至今傳。不知造物何意。生此太徒然。當日牡丹賦就。羞殺瀛洲閬苑。那得有神仙。去去虎邱道。終歲酌花前。燕臺筑。越溪紵。石城煙。行過四五十。惆悵到華顛。幾卷法書名畫。幾箇名倡大俠。日暮且周旋。何必傳文苑。身後有人憐。

念奴嬌 馬守真畫蘭

露啼花怨。有謝娘自寫。當時清影。家住青溪歌舞地。夢接瀟湘雲境。宿雨空滋。春風無力。儘任孤芳冷。題來姓字。與蘭相對同靜。曾記別院笙簫。高樓文酒。盛事成俄頃。腕底留將春恨在。空碧遙青俱永。小印朱鈐。明箋光研。供養陳彝鼎。菲菲難襲。素

心獨恨蓬梗。湘蘭小印文作守真元元子又在歷下見其著色蘭竹幅旁鈐印作孀民
二字

玉京謠 汪月樵四十初度

憶小詩龕裏藹藹停雲閒。卻詩筒久。淮海英靈。那得寂寥無偶。定幾時。東閣微吟。已
一輩。詞壇低首。更何有。春風小杜。秋聲歐九。銀尊乍暖。山陰酒。擬盤旋。起舞爲汝
壽。四十行過。空循腰伴銅綬。總怕是。聽鼓應官。渾不管。隋隄煙柳。青青如舊。須攜手。
還認一絲絲否。月樵寓館有小詩龕又集同人詩爲淮海同聲集

珍珠簾 余庚辰應禮部試以迴避先出都門龔定庵賦紫雲迴三絕相送袖
釋已久因度此詞以答之

斷腸只有春明路。儘年年。水瑟雲璈空賦。不盡玉階情。又一番風露。但見蘆溝橋上
月。肯照取。蹇驢歸去。難去。爲引夢千絲。傷心幾樹。簾底任我徘徊。漸啼烏悄悄。清
宵難曙。欲待問青天。怕總無憑據。都道杏花消息早。恁不把。花魂留住。誰住。分樓殿

茫茫江湖處處。

金明池 吳陵高氏園中二孔雀

奇鬪雲霞光分錦繡。籠得珍禽何許。記遠別。關河萬里。亦能抱。文章千古。積今番。繼
絆情懷。渾未失。來日飄零儔侶。任雀暍枝頭。雞飛屋角。一片遙心誰與。偶過堂前
看鏡語。莫使向閒人。無端狂舞。原經徧。年時雨雪。行蕉萃。摧將毛羽。肯相憐。顧影愁
形。要畫史圖來。漢庭歸去。就深翠園亭。空明池館。只憶華林芳樹。

憶舊游 南詔

四圍山色古。水滿山溪。樹接山城。在李唐時代。是西南六詔。蠻觸稱兵。爨歌尙有哀
怨。洱海咽無聲。只雪月風花。似傳舊恨。欲說邊情。飄零少年事。覓杜鵑紅處。匹馬
山行。去飛來寺裏。悵碑殘字少。鍾絕燈明。虎狼微見蹤跡。難到執題名。有萬古清寒。
空留積素縱復橫。

又 昆明

望風煙萬里。涉月經時百折千迴。昆明池水黑。已雁飛不到。人去還來。茫茫弔古無盡。定有劫前灰。少組練雄師。艤鱗巨艦。憑眺高臺。徘徊故鄉遠。聽一徧城頭。畫角生哀。消息東風憶。是舊時清夢。冷落孤梅。月明共引羌箋。雲思託霞杯。度八百芳春。留將此日紅幾堆。

又 牂牁

閱蠻煙瘴雨。鐵索危橋。銅鼓荒營。箐深林密地。見班蘭百種。柴落零星。問來不解人語。山鬼識逢迎。更啼血禽多。斷腸草滿。鎮日心驚。行行亂峯裏。半小妹無郎。解弄蘆笙。缺月初圓夜。證兜離舊曲。歡喜新盟。一書誰補叢笑。原有萬千情。任舊法窮苗。奢香十驛今已平。

又 五溪

到壺頭。昔嶮水自深深。路自遙遙。已積賈胡恨。賸將軍石窟。壯士弓刀。五溪一曲愁絕。師老氣全消。想曳足情懷。據鞍意態。急浪驚濤。滔滔過舟處。似風墮飛鳶。命薄

鴻毛欲向山靈問。問百年身世。千載賢豪。萬金寶劍無恙。空復看懸腰。要說與今人。雲臺不上銅柱標。

又 潭州

涉江淒已絕。況滯江潭。儘唱江花。芷蘭何處滿。滿三閩澤畔。太傅長沙。舊魂詎易招得。詩骨瘦天涯。鎮寂寞承塵。有天難問。是日初斜。煙霞幾千里。記破廟人來。題壁情賒。就使文章好。付徧山啼鳩。歸壑脩蛇。忍教漂泊終古。無奈惜年華。又託意瀟湘。蒼蒼自在秋水葭。

又 洞庭湖

鼓沙棠檝去。仰送烏鴉。俛瞰魚龍。橘社渺何有。有紛紛木葉。片片隨風。鬢雲憔悴前度。煙結萬眉峯。謝不卷靈旗。慣驚楚客。肯念吳儂。濛濛意無限。卻久愧湖波。頻笑游蹤。悵望琉璃界。只碧天際水。圓月涵空。幾年清夢縹渺。遙思待誰通。賦寂歷君山。秋來怕老芳樹叢。

又 武昌

武昌城上月。解照愁人。不照愁心。爲愁心天際。望南樓賓客。一散誰尋。舉頭皎皎如
舊。今昔動哀吟。費自古南朝。幾番描畫。幾度登臨。侵尋。怨蕭瑟。怕逝去年華。寒徧
江潯。此意蹉跎久。分詞章灰冷。勛業雲沈。暮天定有黃鵠。煙老託孤岑。試小立磯邊。
仙人玉篴聞遠音。

又 江州

一番遷謫恨。要託琵琶。訴與江流。送客原蕭瑟。卻聽來水面。觸到心頭。醉鄉本少歡
緒。痛飲更難休。是失職才人。去家思婦。昔日江州。孤舟倚灘泊。任水替含情。月替
生愁。各說平生事。竟并成佳話。蹤跡同留。至今遺韻猶在。沙際起清謳。總不似當年。
停弦寂寂江上秋。

又 黃州

大江東去遠。亂石驚濤。楚尾吳頭。不盡銷魂意。正沙平赤壁。水到黃州。此生已應磨

蝸中歲積煩憂。卻吹起虬龍。坐來虎豹。笑看蜉蝣。清游似前日。弔玉局仙人。零落山邱。薄宦須臾耳。爲空明一鏡。悵望千秋。女牆官樹蕭檝。誰上月波樓。有疊疊層層。相攜送我天際舟。

又 洪都

去滕王閣裏。散卻飛霞。住得閒雲。問閒雲何著。任絲絲片片。做到斜曛。暮江一色空碧。思比亂流分。已瘦徧山容。暗將劍氣。銷盡詩魂。黃昏。意難釋。望蓼子洲迷。寫韻軒湮。儘有帆檣影。隔煙中聚落。隄上沙痕。幾聲還斷清角。遺壘更無存。謝破浪長風。吹來寂寞孤酒尊。

又 荊州

郢中思故楚。夢雨臺荒。叢桂庭蕪。積古來愁思。覺春前寂寞。日暮踟躕。登樓四望如此。作賦慣窮涂。賸漢水波深。方城樹老。詞客心孤。模糊。問形勢。有高城戍角。戰艦檣烏。割據紛紛久。是當年門戶。今日通都。漫誇吞取雲夢。此境付空虛。任摘句尋章。

靈均宋玉今已無。

又 襄陽

舊聞傳典午。縹緲危亭。寂歷青山。是峴山亭畔。已蕤氈鶴去。最屬碑殘。後來積幾多
淚。當日已潺湲。況懷古多情。思賢不作。一餉難乾。搗彈大隄上。唱舊曲銅鞮。昔豔
明鬢。酩酊逢佳節。怕重來魂魄。花月都寒。百年只此風景。倦客恨征鞍。想緩帶輕裘。
誰從叔子元凱閒。

又 南陽

正形迷地勢。狀改川渠。古郡南陽。一記繡東觀。問風雲寂歷。星宿迷茫。渡河處處雲
擾。冠劍亦迴翔。有綠字留圖。赤靈往讖。白水遺祥。行藏幾時決。已桀溺津迷。諸葛
廬荒。最好躬耕地。聽煙蓑衣冷。木柄鏡長。田疇如此蕪蕪。秉耒意低昂。任梁甫吟成。
西風此日留斷岡。

又 汴梁

浮谿精舍詞

大梁城已暮。水溢洪河。沙冷空陂。東都遺事在。爲朱三作賊。鄭五吟詩。荒原有麋鹿。禾黍久離離。問乞活高臺。朱仙重鎮。青蓋徒悲。絲絲。汴隄柳帶月照離宮。人在天涯。怕出夷門道。自飄零作客。躑躅臨歧。婦人醇酒無恙。流恨尙前時。正戰國紛紛。今來寂寞誰與期。

又 鄴中

覓芳林故苑。玄武荒池。銅雀高臺。對酒當歌頃。已美人黃土。文士寒灰。漳河只有流水。烏咽儘縈迴。想勝事遙遙。清游歷歷。總付空懷。塵埃。過車處痛自昔紛紛。老盡雄材。玉露金風裏。更銅人鉛淚。石虎蒿萊。鄴中一記能讀古思。卷中來。但握管微吟。香姜舊瓦還淨揩。

又 洛陽

自天津橋畔。忽聽鶉啼。不是都城。試喚盟津渡。尙轅轅道險。伊闕山橫。古人已重離別。誰過夕陽亭。笑作賦蘭臺。強分主客。共盡千齡。機衡。昔游處。覓瓦屋東西。但識

流螢去國蒼黃態。爲關河有恨。筆研無靈。厭厭多少名氏。空積北山情。想壯麗當初。難尋杜篤論舊京。

又 關中

八川環繞處。山色終南。地勢關中。市朝如夢過。向斜陽影裏。儘問離宮。千門萬戶。誰記煙際出疏鐘。渾不縮離心。灞橋楊柳。盡日怱怱。行蹤最無定。鎮下馬陵邊。難住花驄。古思生何極。贖豐碑林立。斷石苔封。茂陵空說封禪。絲鬢對秋風。想主父西游。吾生一樣飛斷蓬。

又 驪山溫泉

問華清故址。瑤甃都殘。碧檻空漪。水滑春寒校。合溫來輦玉。浸出嬌枝。墜釵久已流去。遺製少人知。贖石畔粼粼。渾疑不是舊日方池。依稀燈火接。奈鳧雁魚龍。空說鱗鬣萬斛黃沙裏。就湔來冰雪。難浣塵縑。凌波記有羅襪。夕影定姍遲。對寂寞驪山。涼風習習侵瘦肌。

又 華陰

看遙山接起。斧削鎗鑿。片片重重。極萬千氣象。把華陰行盡。莫盡山容。日光漸做蒼
潔。霞態助玲瓏。想玉女盆寒。煙鬢欲墮。霧髻方濃。游蹤徧羣岳。莫便叩巖扃。怕是
雲封。老樹連蜷久。儘荒涼寂寞。漢柏秦松。舊題已積莓蘚。思與古來通。爲驢背難馱。
閒愁疊疊天際峯。

又 井陘口

又懸車束馬。山逼天光。石礙人行。井陘傳舊險。想全軍背水。兩國連營。六王位號空
寄秦鹿。逐縱橫。已跨有河東。逢時得地。將將功成。功名各千載。早旗鼓煙消。壁壘
雲平。自古沙蟲恨。爲真龍欲出。走狗宜烹。此時猶記英傑。釋縛坐論兵。儘跨下人來。
腰閒寶劍時一鳴。

又 西湖

約千絲萬縷。綠漲波心。青溼煙鬢。輕吹陳迹過。惜天涯夢冷。湖上春殘。嫩桃穉柳依

舊。濃去任人攀。怕無力東風。長條盡日。只倚橋闌。斑爛舊題字。有賓從。高樓交酒。餘歡雜事。南都在。賦藤蘿碑滿。蟋蟀堂閒。可憐一別如雨。六柱冷吳船。便各記清游。當無此客無此山。

醉落魄 題絕妙好詞

關河渺絕。斷魂久向黃沙沒。慢詞空對青山說。閒殺紅牙。細唱滿湖月。名花碎錦看成骨。蠻箋小字尋如髮。春心不爲春消歇。香草美人。那與楚騷別。

喜遷鶯 繆子嘉蟻山小築圖

雪泥鴻爪。已話盡行藏。分明潦草。小小平山。低低屋樹。寄箇閒身儘好。記取瀛洲風俗。難道海濱終老。更俛仰。笑登樓王粲。書空殷浩。圍繞書萬卷。劍氣珠光。慣接初。桃曉。舊夢輕塵。前身飛絮。休寫故園花鳥。三十六漚盟在。二十四橋秋早。錦囊破。有蟬侵鼠齧。莫拋殘稿。

水調歌頭 馮晉魚夢游弇山圖

曠世更誰接。四部漸飄零。賓朋文酒何處。懷古思沈冥。定有鮑家詩在。空使江郎賦好。愁草瘞山靈。怊悵復怊悵。臺榭雜流螢。情絲邈。路幽邃。記來經。莫嫌負此良夜。卻恐夢還醒。結得胸中雲海。印取舊時風月。相望各千齡。奇境不蕭瑟。遲我怕伶俜。

雙雙燕

家蘅芳兄以浙西王君贈郭小史花燭詞見示小史本滑縣故家子

癸酉歲家遭賊焚掠子身逃難依天津某太守作青衣使侍王君於書室太守以婢配之

抱琴石畔更烹茗。鑪邊謝渠辛苦。工書解字。好伴天涯羈旅。休聽梁閒燕語。似懊恨。春歸無主。相逢總易纏緜。小史詩成誰與。新許鴛鴦作侶。合并著青衣。共依朱戶。空教詞客。愁詠暮天砧杵。聊任倡予和汝。定觸起。鄉關煙阻。依稀羅帳燈昏。細話飄流意緒。

迷神引 毗陵志感

可惜芳春和夢去。雨雨風風如故。句留一霎。還任花成霧。聚如萍。離如梗。事朝暮。此

後香塵滅。愁白紵。可有斷紅留怨黃土。卻恨年時總作淒涼度。覺夜空長。更空數
眼。中心裏。有情極。終無語。記簸錢聲。秋千影。在廊廡。看盡不迴波。流獨苦。缺盡奈何
天。愁來補。

雙雙燕 古劍

土花蝕盡。想千古。畸人。萬金寶劍。微茫歲月。疑是血腥曾染。難聽荒雞慘澹。把夜半、
清魂頻撼。燈前莫照春坊。匣底應生秋感。教斂。星銜月刻。有斫地風悲。倚天雲黯。
陸離奇服。久冷一生肝膽。還就腰閒點檢。問可露。年時光燄。十分缺折摧殘。無限消
磨抑掩。

長亭怨慢 鐵篴

可禁得。龍吟蚪咽。潤玉偏摧。淚筠都裂。鍊節分程。指寒音重。意清別。有人樓上。須弄
徧。霓裳疊。古思調難終。爲鏽住。斑斕苔色。沾臆。到關西日晚。綽板和來聲急。江湖
遠恨。憑吹送。萬分蕭瑟。笑底事。怨柳臨風。要待取。穿雲奔石。卻漸冷深宵。空倚宮牆

追憶。

翠樓吟 鐵簫

幼眇低迷。纏絲抑鬱。淒清怨慕已共。曾脩明月底。又容易。雲迴波湧。臺高天空。似水面蒼寒。山頭凝凍。清飆送。萬花齊落。碧霄疑動。鄭重伶谷休裁。自響分戈戟。韻沈鸞鳳。江干吹日暮。鎮千里。迢迢如夢。天涯多恐。使老鐵重來。消愁無用。相思種。漢宮人遠。洞簫誰誦。

高山流水 銅琴

欲傳意緒託焦桐。奈絨將。幽恨重重。危柱一聲聲。優柔不任春風。精金製。舊費良工。高張久。誰數清弦。漢殿露索秦宮。問誰彈古調。果否叶黃鍾。歸鴻迷離失歸處。聊寫就。雪爪泥蹤。身世太飄零。付與指底。恁恁漫和平。且算雌雄。隔簾裏。疑有蕭蕭怒騎。寂寂乖龍。漸峯高雲斂。調軫試從容。

鶯啼序 題春江花月志

閒情作何排遣。儘商量無計。又經徧。風雨番番。不知春色誰繼。失多少。啼紅怨綠。都教葬得銷魂地。只空留陳迹。湖山斷腸身世。千古才人。但有一夢。便雲飛水逝。向霞帳。曾識珠光露盤。自積鉛淚。餞春風。愁深酒淺。遲明月。光寒星替。更沈沈。清角驚人。不會能睡。十三樓杏。廿四橋迷。覓來總不是。想曩日。美人歌罷。錦瑟璇幃。倦客游歸。玉驄花市。狂來痛飲。憂來長歎。酣歌拔劍。渾無藉。要呼將。無數春魂起。思平缺。陷重傾。十斛珠璣。寸心也極千里。情天待補。怨海須填。卻有頭有尾。莫比做尋常。調語斷簡殘編。迭宕迷香。亂紅繁紫。年時懺悔。平生怙悵。生花難夢。江郎筆。又虛空。書徧相思字。傷懷無古無今。縷縷摠來。此懷何已。

紫玉簫 題畫紀事

紅藥臺邊。燕支街裏。幾回花醉香濃。無端別恨。恨香留衫袖。花隔簾櫳。算難消受。春意醒。光自朦朧。渾疑想。一種綺情。儘誤疏慵。何人解識芳訊。卻攬取霞懷。寫就雲蹤。梅花賦好。奈箇儂天遠。離思重重。最清寒夕。問豔影。月底能逢。空延佇。良宵細籤。

自數樓鐘。

菩薩蠻

江南一片青山色。笑人憔悴留江北。江北已三年。江南更可憐。可憐渾不語。孤負心相許。相許早相思。相思應幾時。

生查子

筠簾織似煙。綃幄昏如霧。不用篆香熏。夢到沈沈處。剗襪自無聲。卻被銀鉤誤。繡被忽添將。道是深風露。紅燭不須燒。要讓花酣睡。枕角漸模糊。怕有傷春淚。微壓髻偏雲。小纒裙拈地。一笑似花醒。輕語都能記。

望江南

青齊路。倦客過愔愔。側帽未能禁猛雨。夾衣不任敵尖風。別恨又重重。天憐取。爲我放晴空。馬趁垂楊千種綠。鴉拈殘照一林紅。此景更誰同。

過新雨濃綠上征袍。燕小有心依棟住。絮輕無計入簾櫳。獨醉怕醇醪。句留處時節似東皋。碧玉闌邊迷芍藥。紫筠籠裏露櫻桃。風物補離騷。

初三月。何意照離人。窈窕不堪盈手弄。彎環卻稱畫眉勻。此際少芳尊。迢迢夢引起一鉤新。露出牆頭宜宛宛。掛來簾角定紛紛。總隔萬重雲。

輕雷過。陌上雨方滋。愁草已昏千里路。濃煙還恨一鞭遲。難遣畫樓知。荒郊外。獨坐便尋思。海角漸沈飛燕影。江干又值落花時。片片更絲絲。

高陽臺 次龔定菴韻

雲疊離情。風牽別緒。過來幾個今宵。人在天涯。芳時各恨飄蕭。尊前莫唱傷心曲。有年時。種種無慘。怕蹉跎。冷到瓊花。咽到瓊簫。休憎一水盈盈隔。喚蘭舟渡去。瑤想全拋。如此相逢。淚斑總漬冰綃。消愁說是杯中酒。爲愁多。酒也難消。又無端。玉頰微侵。卻暈紅潮。

又 次金篋伯韻

明月樓臺。瓊花院落。年來總已成塵。越紵吳絲。替將花月難分。珠光不定。湖波碧。儘教他。認雨疑雲。要描摹。一片新愁。一段眉痕。垂楊萬縷。都如結。誓邗溝。流水。獨個銷魂。可奈同時。一篇更誦靈芬。難傳有恨無情處。恰沈吟。倚畫闌人。又誰知。立盡蒼苔。等到黃昏。

又 湘影軒

疑雨千絲。和煙一縷。人間何處瀟湘。十二峯頭。十三樓上。旁皇。晚來無限凝眸地。有重重。雲水蒼涼。又愁他。飛落娥池。宛在中央。亭亭小立。渾無語。怕憑空引去。欲卽迷茫。道是還非。添儂多少思量。分明久被春風誤。把心情。託付斜陽。奈人人。能見清蹤。不見迴腸。

又 釧

酒倩香溫。花防露重。關心只爲渠儂。儘意端相。但愁約住還鬆。一規窈窕雙輪轉。更憑將。翠袖輕攏。怕如今。勸客燈前。不任瑤鍾。醒來帳角。纔鉤處。記鸞環雪藕。戍削

春蔥總是相思。煩伊製字須工。莫嫌條脫論年命。要黃金、好鎮惺忪。問誰能、互解連環。笑脫玲瓏。手約雲團心留月。夢酒情香。溫花防露。重余所製。回文劍銘也。

又 六月十五夜汎舟虹橋

雨約涼絲。雲藏寶鏡。畫船漸散虹橋。酒盡燈殘。絕無聊賴深宵。不如同泝空明裏。佇愁人、暮水迢迢。恰風來、吹上冰肌。欲怯輕綃。模糊殿閣高低樹。記前番倚檻。舊日攀條。今夕何時。清涼閒緒難撩。留儂煙景迷茫極。可知儂、此意全消。已無多月影花魂。待與誰招。

又 十七夜

立立行行。風風雨雨。低回惆悵沈吟。曲裏情辭。酒邊意味。惜惜。怱怱斷笛零箏後。識個人、託寄遙深。肯輕提、不見迴腸。得見傷心。曹騰上馬城闐去。又牽回坊底。重問花陰。總爲殘宵。怕他覓覓尋尋。更添無數丁寧語。立階前、斜插瑤簪。定誰知、一度離悰。一度難任。

浮谿精舍詞

念奴嬌 抹麗

塵清庭院。忽繁香微度，惹
欲墜。點點寒星擁。妝臺閒
送。卻恨今宵簾影裏。做盡
襟如雪。曾弄。

高陽臺

蟲語都停。籤聲自碎。三更
照成。一味淒涼。最難堪。滴
愁腸。底處星河。任他有意
添。夜爲愁長。

祝英臺近

樹陰深。蟬噪急。晴了又無

佛熟梅天氣。昨宵意。準取十日闌風。不怕雨聲碎。目斷長空。思託水雲裏。偏看脩竹倚青遙。峯洗碧。總隔卻。橫波眉翠。

臺城路 送俞澄夫游白下

西風已到青溪側。銷魂柳枝桃葉。賦寫花愁。詞傳月怨。去鼓江干蘭楫。紅闌曲折。認一桁珠簾。個人凝立。莫說蕭疏。用情定自肯關涉。頻年尋消問息。玉荷塘水遠。煙闊波急。是蓋難擊。有心便苦。怕見風欺雨泣。君詩妥帖。詠翠袖空山。信儂悱惻。爲道相思。暮雲增幾疊。

金人捧露盤 吳陵七夕

掩庭花。迷夜鵲。溼香篝。算人間。第一綢繆。尋常別慣。今年別淚。卻難收。鮫珠萬斛。定教他。漲得河流。玉釵冷。瑤瑟靜。銀燭暗。畫屏秋。要并成。寂寞更籌。星辰全隱。天孫多恐。怨牽牛。停梭儘可。怕雲機。織盡離愁。

高陽臺 七夕後一日代柬

弦月彎愁絲。風織恨。微涼便覺秋多。葉落蟄啼。夜闌少倚吳歌。輕憐重惜都難問。在自家調護如何。怕尊邊更減清肌。又斂雙蛾。須知七夕真離夕。莫頻尋髡鵲。屢試銀河。天上人間。做成一種蹉跎。沈腰潘鬢非前度。只憑將詞賦消磨。漫猜疑。花易生歡。酒易生魔。

驀山溪 蘭

離騷卷裏寫徧芳蘭意。風露潔平生。誰許問雙頭並蒂。滿堂無語。九畹更無人。香儘淡。思應濃。可奈秋無寐。雲階月地。分取元容易。只算是花魂。怕花影。看成憔悴。憶花何處。祇恐太清寒。便夢到碧湘中。總負花心事。

高陽臺

花月寒初。笙歌斷後。空成柳意纏絲。前度春風。舊來門巷依然。十分做盡傷心色。儘孤他。寶馬絲鞭。已明明。此別經秋。此恨經年。天涯咫尺偏難問。問昭明樓畔。董相祠邊。總是迷離。幻來怨海情天。酒醒夢斷無歸處。似依稀。抱月飄煙。又無端。立徧瑤

階詠盡金荃。

滿庭芳

酒境難尋歌塵如夢。水路山路迢迢。謝伊珍重留我住。今宵春在銀屏一角。何曾見、絮墮花飄。啼紅處。春風十里。好認女兒腰。魂銷。思此後。曉風殘月。野店村橋。有無限離情。暮暮朝朝。只願香痕不散。依然是、荳蔻初梢。隨隄路。重城極目。門掩玉人簫。

夜飛鵲

黃河幾千曲。旋折恹恹。行客草草相同。垂楊已共暮天碧。幾絲猶帶殘紅。塵沙正驚浪。疑江淮能合。此水還通。徘徊不渡。怕河流。織恨尤工。空理萬分愁緒。拋擲不多時。偏更重重。難去難留情景。來題斷岸。愁放疏篷。征鞭莫定。辨歸心。早與雲濃。分今番車馬。來宵驛舍。自記游蹤。

玲瓏玉

紅透疏櫺。綺窗靜。錦帳初寒。金猊乍燼。漸教夢裏春寬。似霧如煙。試覓尙眸將星掩。

髮任雲盤餘歡。知零零曾有露漙。不管沈沈漏箭爲蝶經霑溼。鶯訴摧殘。待得醒時。正銀屏翠箔迷漫。嬌枝偏能扶起。分今夜頻燒冷燭。照盡更闌。問芳意自迢迢。空倚畫欄。

鳳皇臺上憶吹簫

曲賦深情。弦傳幽怨。幾回漫撚輕攏。到十分寥落。訴與春風。不是春風無賴。還吹起。片片飛紅。人間恨。拋來一刻。又積千重。濛濛似花帶雨。搵不盡羅巾。珠淚玲瓏。要錦文機織。心字香通。縱有神仙未死。雲霞散。樓閣都空。閒吟徧。瑤林玉樹。卻是怱怱。碧牡丹

夜色西湖好。墜碧月生瑤草。霧斂雲凝。露出人間蓬島。萬紫千紅。讓一枝低裏。見芳辰。記剛卯。夢深悄。忽憶垂楊道。輕魂不禁縈繞。絮軟絲柔。隨隄莫認春早。十五盈盈。正來時嬌小。問飛隳。又多少。

渡江雲

五銖衣太薄。亭亭小立。曾記洗鉛華。一窩雲掩後。膏膩香濃。壓得玉釵斜。眉彎月樣。照清波。不任峯遮。經幾番融冰吹雪。開出碧桃花。天葩。纖塵未染。薄霧難籠。想瀛洲臺榭。愁此去。茫茫秋水。還隔蒹葭。遲回好問。洪厓意。且休迷。洞口煙霞。飄泊處。如何各在天涯。

湘月 在遲雲館攜回春蘭一盃。經年相對翠葉常妍。春來放蕊。余將出門賦此志別。

楚雲欲暮。憶瀟湘舊事。曾遲清影。珍重攜回人似與。露葉煙條俱冷。香夢難濃。素心逾淡。卻任秋宵永。偏教零落。怨芳只攬明鏡。懷抱已結經年。風多雨溼。想花魂無定。費盡春工。逗信息。肯取前盟重證。荒徑迢迢。去波寂寂。要試花情性。紛紛離思。坐吟又在孤艇。

水龍吟 梅花

雲中呼起春魂。東風逗出春前影。空山獨笑。長亭何處。夢寒宵永。月照光多。雲流態

薄成伊清迥。又高樓橫簾。幾番吹徹。雲和月。枝頭冷。抱取孤芳誰領。自蕭疏、煙開林靜。迢迢此際。縞衣難卽。翠禽都醒。玉骨瑤情。總無端緒。費人尋省。爲生平、結得江南恨遠。隔重重嶺。

沁園春 繡鞋

碾取香塵。銷來金縷。先愁素絲。記風前一捻。淺描蛺蝶。花陰拊寸。小印胭脂。江月初弦。湘波欲皺。已試得才人絕妙詞。姍姍影。倚畫屏久立。窄索微知。襯將羅襪行遲。怕等過。霜濃徑滑時。是叢頭樣好。不須添繡。合歡名在。要惜沾泥。儻是飛觴。借他量酒。百罰尊前總不辭。情無賴。向裙邊枕角。儘費尋思。

又 抹胸

絡索雙垂。輕容全護。收來暗香。憶纔鬆寶釵。領邊依約。偶除瑤釧。袖裏端相。塞上酥凝。峯頭玉小。恨淺抹橫挖。一道岡。深深掩。掩幾分衷曲。還待猜詳。幾經刀尺評量。與細膩肌膚。要恰當。爲當胸闌束。期他婉轉。一心假帖。不問溫涼。若化蠶絲。縫成尺

幅。那數陶家十願償。偏織手。在風前扇底。更自周防。

又 梳

比玉偏輕。近香多膩。月裁半輪。自檀心破後。慣經素手。蘭膏侵處。慢剔纖塵。篋上呈鸞鏡。中留燕。好一例妝臺去策勳。惺忪覺。便知他綢直。不掠先勻。染來粉暈脂痕。早理出。紅樓十倍春。看湘紋斜映。長長委地。湖煙濃起。宛宛如雲。玉指嫌涼。纖腰欲倦。卻倩紅紅將髻分。嬌慵甚。笑謝娘髮薄。那稱時新。

又 鏡

折取名花。總羞嬌面。自憐鏡中。似暮天澄碧。纖雲不翳。遠山凝黛。一月凌空。從古含愁。平生顧影。定出自秦宮。與漢宮。摩挲久。有模糊歲月。蘚蝕苔封。香籤任掩重重。爲寂寞。春來吹鬢風。自路岐人遠。相思菱葉堂前。夜聽消息芙蓉。迹共波清。事隨塵去。莫照深紅間淺紅。傷心處。怕玉臺難寄。冷到盤龍。

金縷曲

浮谿精舍詞

水繞平山側。記來時、柳絲千障。芙蓉一國。薄暮樓臺笙歌動。豔影清香自出。到處是、魂銷心惻。忽有驚鴻翩然至。覺鴛鴦、鷓鴣皆無力。蘭棹遠。尙追憶。沈吟幾費春風筆。卻遺來、小喬名字。小紅顏色。未入畫堂人何在。清夢那時相識。已弄徧、瓊簫瑤瑟。廿四橋邊秋風到。怕珠簾、不卷沈消息。雲未合。恨先織。

芍藥橋邊影。已無端、經年迢遞。半春幽迴。結得雲思兼霞想。不見幾回心領。到得見、留情俄頃。那料香迷金醉地。有峯銜、明月澄空景。千樹碧。萬花冷。都梁第一難教並。洗鉛華、姍姍丰度。翩翩秀整。未識相思應解恨。眉語知誰能省。卻分是、今宵偏醒。織女黃姑遙遙處。儘銷凝、樓角天河靜。多少事。待伊肯。

碧玉年還小。乍簪來、釵頭雲膩。髻邊香繞。六幅裙拖瀟湘水。步月分煙纔到。卻認做、人間春早。脈脈盈盈芳心重。要遲他、紅杏枝頭鬧。多種意。爲誰好。琵琶也弄相思調。動騷人、十分蕭瑟。一分顛倒。萬馬宵暗千騎發。婀娜還緘幽抱。難見處。嫣然一笑。更約花枝留春在。怕流鶯、漸爲啼紅老。歌席上。幾年少。

一餉銷魂處。記番番、未探心曲。略看眉嫵。不似行雲飛無定。那得朝朝暮暮。只辦取、深情付與。竹外疏香。還未識。覺東風吹起。沾泥絮。楊柳怨。大隄路。言詞總算無憑。據道渠儂。聰明更勝。光華全露。費盡纏絲。還悲惻。暗裏難消疑阻。笑自裏。蠶絲偏苦。小鳥何關春色淺。任時啼。時咽。輕相訴。紅亂落。竟如雨。倚竹青春暮。儘調停。三回五徧。千言萬語。我獨憐卿。卿憐影。偶作花叢回顧。那便向、花閒留住。微笑殷勤攜手。至願金鈴。一樣相遮護。惻悵極。意無主。惜惜卻想人如樹。怕蹉跎。紅飛作陣。綠陰成路。清夜迢迢。清弦冷。酒醒當歸何處。夢正墮。歌塵燭霧。不記前宵。雙淚落。歎芳菲。輕被東君誤。情切切。付箏柱。鳳蠟明珠箔。任西風。一花飄墜。一花幽獨。總是瓊樓高寒甚。冷到人間金屋。是處覓、當年車轂。積有征衣。千行淚。和遙峯。萬疊哀蟻曲。天際遠。斷還續。心灰耳冷。從拘束。別瑤尊。閒情不賦。閒愁偏觸。卻謝官梅通香信。離思同緘十斛。被勒住。紅趺絳鄂。不許春前容易放。賸芳枝。更自矜高躅。相見也。共寥落。

積得春前思。誤年時。許多良夜。許多清淚。花影吹簾齊度曲。此境模糊能記。又繫取、前番歸騎。舊雨不來來今雨。正疏燈、冷照傷心地。愁裏度、易顛顛。連宵未飲沈沈醉。被東風、催波欲碧。做山成翠。有限殘年無限色。且任月寒星替。總說是、燕鶯還稊。小立依然嬋娟影。莫怱怱、便問花心事。無語處、試深意。

十丈瓊瑤闕。有仙人、攜來碧樹種成香窟。本在雲霄餐風露。只抱冰肌玉骨。綢直處、芳心如髮。桃李嬌春低春影。是秦宮、總想花閒活。同盼盡、二分月。詩情不是因花發。儘徘徊、芳塵繚邈。暮天空闊。況自傷離傷別後。有夢還多恍惚。容易令、神魂飛越。獨倚斜陽沈吟際。道洛川、有賦先唐突。波未遠、詠羅襪。

道是無情甚。縱無情、春懷不散。春游誰禁。羅帕遺來微醒後。去認啼痕舊滲。怕漸老、東陽瘦沈。月不常圓花常謝。有佳人、暮合貽孤讖。雲境斂、露華浸。回文未織鴛鴦錦。又何須、合歡裁被。相思留枕。願向風前舒繡幄。長與低枝成蔭。已分取、宵深纔寢。卻感心頭傳眉角。勸迴燈、添酒厭厭飲。詞不記、夢難審。

卻似緘情待。正茫茫、煙籠帳遠。月篩簾碎。隄上楊絲。拖千縷。結盡離腸不解。便一刻、千金難買。心去天涯。人眼底。謝燈花。爲我生紅蓓。開未足。上眉黛。枕函定有香痕。在。過初更。端詳繡襪。思量羅帶。珠箔銀屏。重重處。藏得春寬似海。詠此際。江皋遺佩。荳蔻梢頭。如許恨。恨夢魂。狼籍仍無賴。愁已到。暮天外。曉色銅鋪影。送庭前。鞋兒微褪。冠兒不整。斜插金釵。人如玉。紕縵些些光景。不枉作。連宵酩酊。只恐長隄芳草意。積煙輕。雨薄成淒冷。從此去。悵萍梗。寥寥雁柱低迷。境。記人間。可哀一曲。賦情千頃。閒立空階。門初閉。漸是日高晝永。對滿地。參差藻荇。爲指田田荷葉在。要教他。抱取愁紅等。波不動。誓寒井。自溯清淮遠。有滄波。向東流處。客魂俱返。一片斜陽蕪城下。薰草只愁先晚。已不憶。瀛洲閨苑。準擬晶簾香閣裏。替安排。匳鏡陳箏阮。清露重。護前碗。人心怕沒天心。穩。積從前。醒時憐惜。醉時纏繆。天姥吟成羣峯曉。到得花明月滿。卻露出。明星宛宛。芍藥能將詩思動。倚東風。好築忘憂館。誰與證。此情款。

洞簫詞

篋藏洞簫。曾不解吹。畫橋月明。天涯路岐。長言短言。疑喜疑悲。中多鬱鬱。世未易知。同心幾人。請觀此詞。道光九年五月望後三日。刻洞簫詞一卷。因綴數語。長洲宋翔鳳。

暗香 題姜白石詩詞合集卽用集中韻

照來古色。有詞仙未老。高樓吹笛。望久玉梯。欲上浮槎。把星摘。清思湖山自冷。又風雨。飄零遺筆。任幾輩。換羽移宮。誰復繼斯席。鄉國韻正寂。久付與蝨蟬。數卷塵積。去波未竭。紅藥橋邊。屢追憶。明月當空尙有。須洗盡。樓臺金碧。按舊調。都在也。小紅唱得。其旁注之譜詳見張叔夏詞原可以得其節奏

疏影 前題用集中韻

紅牙拍玉。過好風幾信。時雨經宿。自製新詞。還度新聲。付與哀絲豪竹。江南自昔銷魂地。況隔斷。高樓西北。更愁他。倚徧闌干。早是一春人獨。須記垂虹舊路。馬塍好


未損。吟到濃綠。夢裏天涯。多少情懷。覓向空山茅屋。華年怕續傷心史。牘幾首、蒼涼詞曲。待後來、織上旋機。碎錦又難成幅。

揚州慢

紅藥空吟。綠楊如夢。二分月尙當頭。爲青春易去。更冷照清秋。記泥酒、酣歌舊地。玉觴無語。鈿瑟繁愁。正紛紛、波急前番。曾繞迷樓。醉中繾綣。怕醒來、瑤想都收。況露溼芳蹤。雲沈倩影。難說句留。便積幾重惆悵。無人處、素付休休。問瓊花開否。詩魂還戀揚州。

暗香 再次石帚韻

怕看暮色。寄遠情渺渺。還傳漁笛。怨語未申。掩卷微吟。試探摘。風重梅花自落。偏苦苦、煩伊詞筆。但挽得、一縷花魂。和淚奠芳席。傾國。漸寥寂。爲夢隔萬重。歲月初積。暗啼似泣。誰識微禽肯相憶。環佩歸來底事。孤影破、重湖深碧。到此際、腸斷久。幾人道得。



千點儘教夢裏添。將漏箭。愁中不斷零鈴。坐偏醒。今宵去波未平。

八聲甘州 雪

聽潮聲。不定激回風。雪意壓層樓。望江昏一鏡。天連一水。影斷煙愁。卻有江南倦旅。破夢上扁舟。草樹模糊處。莫怨芳洲。肯理重重吟思。奈冷侵巾袂。清溼衣裳。任吹來片片。輕薄未能休。記分明。孤山舊約。怕梅花。欲說信遲留。知人也。絮飄零似。只憶枝頭。

金縷曲 席蕙生杏花春雨小樓儲書圖

不見廉纖雨。憶小樓。舊時獨倚。一簾如霧。萬軸牙籤紛亂葉。肯伴殘芸冷蠹。莫道是。愁邊閒度。筆硯不禁寥落甚。正江南。紅徧花千樹。前夢在。似無據。天涯儘任飄零去。得相逢。無聊慰藉。各傷遲暮。跋扈飛揚疇昔事。回首斜陽易誤。問底許。扁舟歸路。福地鄉嬛容過訪。有湖山。待續閒居賦。煙水闊。幾家住。

又 蕙生又出杏花春雨江南卷索題是廿年前借計時所作也

思繞江南路。問東風、幾分消息。可同前度。細雨輕衫人獨立。隄上陰陰欲暮。溼樓閣、重重無數。紅倚畫闌橋一帶。趁半篙、新綠空流去。歸燕影、定飛誤。青峯不少句留處。卻無端、牽雲曳雪。作成風絮。煙靄蓬萊凝望裏。無奈紛紛草樹。笑更有、斑駁難住。絕憶枝頭春色鬧。任番番、延佇吳門渡。楊柳意、爲君賦。

霓裳中序第一 徐季雅蓬萊鼓柁圖

徘徊倚碧落。自結遙情何處著。空有清蹤漠漠。任幾疊雲霞。幾重樓閣。尋來寂寞。記桂舟、蘭槳曾泊。偏沈去、蓬萊消息。肯向夕波託。依約。圖中巖壑。望不到、精簾翠箔。飄零人瘦。似削。漸語笑分明。轉成猜度。洪崖渾未覺。賸夢裏、鈞天廣樂。洪濤闊、吹回容易。此意共絲邈。

水龍吟 陳芝年觀海第二圖

九州五嶽歸來。倦游依舊歸無計。萍蓬易轉。沙塵將老。銷來奇思。作賦工吟。登樓倚檻。迢迢千里。想暮潮生處。當年明月。曾潛織、鮫人淚。莫道前番難記。有滄波、待君

重至。遙天極目。東風吹返。飄零猶寄。卷裏煙霞。胸中島嶼。傲人餘此。怕蓬萊水淺。玲瓏閣遠。積蒼茫意。

少年游 題畫

休將錦瑟數華年。斷柱與零弦。春夢無蹤。春風不定。春思覺無邊。一尊替問春消息。花意記相憐。多恐春來。脩蛾顰損。曲裏恨嬋娟。

河傳 折蓮仕女圖

天曉。花好。浦溶溶。寂寞芙蓉自紅。暮潮可憐情未通。鏡中。折來凌曉風。借問生香能幾許。人不語。應解蓮心苦。最盈盈。最亭亭。酒醒。此懷和露清。

望江南 葉懷庭遺像

橫塘路。聞說住詞仙。破夢月沈珠箔冷。倚樓風定玉笙寒。法曲尙人閒。仙去後。此卷未叢殘。舊事青裙悲白髮。新聲紅豆記香鬢。風貌識溪山。

又 題宋之行豫章紀游詩卷子

江行遠人去冷沙汀。卷裏鶯花波上月。寫來詞意總沈冥。況是客飄零。回環讀。姓字尙分明。一任詩魂招未得。暮雲何事夢還經。長見越山青。

漢宮春 清微道人畫蘭

耐得清寒。是前番夢裏。露葉煙條。十分豔情抱取。儘負深宵。湘中消息。共雲階、月地迢迢。又卷裏。春痕幾許。引將舊恨難銷。我有尋芳伴侶。記頻攀澤畔。卻隔江皋。開來一花半蕊。空把愁描。蘭池瓦冷。任年時、獨坐含豪。知腕底。生香不斷。斷魂定是能招。

菩薩蠻 團扇仕女圖

芳姿欲替齊紈潔。含情肯訴團團月。無那漢宮秋。誰傳此度愁。好風懷袖得。清露知消息。別院露華深。空緘團扇心。

齊天樂 池陽杜牧之祠次張梧岡韻

夜闌何事悲清角。戎韜篋中曾注。四十銅魚。九秋雁影。弄水亭前頻賦。春期細數。積

講絕情懷。年華空誤。過了飛花。一枝低亞。懶重顧。人生偏苦薄宦。便青山未老。朱顏非故。短翼差池。江湖落拓。有曲當筵誰度。高樓日暮。賸碧樹無情。望中遙妒。煙雨祠邊。幾遲歸去路。

江城梅花引 周素夫蘇樓聽雨圖

八年前事若朦朧。記相逢。舊齊東。中酒青衫不任落花風。山繞郴江家故在。少年日。倚樓情。是夢中。夢中夢中。結離悰。嶺數重。人斷蓬。見也見也。見未久。分手怱怱。歸理相思新句怕難工。便作仙人愁定爾。當暮雨。問瀟湘。夜已空。

虞美人 吳城夜泊用竹山韻

客船最是燈初上。香燼煙侵帳。況禁連夜雨聲中。又雜殘更。又雜一江風。不能作雪瀟瀟下。地是江南也。此時誰與說心情。暗水回波。聽去莫分明。

十六字令 楸葉硯

楸。看作玲瓏展作愁。流難去。研盡十分秋。

百字令 歲暮舟中讀龔定庵詞

相逢能幾。儘相思、頻過花開時節。料理平生惟有恨，卻羨詞人能說。瓊宇層層，瓊樓曲曲，護爾成冰雪。言愁偏我，回腸今夜空熱。誰計歲月都深，新來瘦損，那是前番別。拍徧新聲疑夢裏，看盡殘釭明滅。風雨長宵，天涯多感，一片心魂結。不須頻問，暮笳何事淒絕。

長相思

水駸駸，路深深。無數遙山此際沈。知寒碧玉簪。歲闌心。夜闌吟。打疊閒愁休更尋。暮潮已不禁。

洞仙歌 再題定庵詞

香銷酒冷，是年來情緒。觸動淒涼得君語。爲春蠶早夜，拋了繅車，如再轉，不定安排何許。元知無倚著，墮向情天，賸有情絲理還吐。莫去問琵琶，搓作哀弦，已負盡、詞人辛苦。爲鎮夕長吟，寄空江、道幾尺潮添。未關寒雨。

菩薩蠻

分明已是西泠路。徘徊卻被斜陽誤。竚立問斜陽。柳絲今許長。重逢應似舊。怕遣腰支瘦。莫待暮鴉啼。謝娘門徑迷。

洞仙歌 劉幼竹屬題媚蘭小影

屏山曲曲。記堂前曾見。杏子單衣白團扇。問何人解寫。林下清風。偏冷到、鉤月波雲一片。畫作畫屏無睡待。牽牛句意。劉郎前度事。鬢影絲絲。爲詠隨隄柳絲徧。不是隔明河。燭暗簾疏。相對坐、吹笙深院。卻觸起、幽人恨長宵。鎮自數星期。怕孤銀箭。

青玉案 橄欖

作花不入嵇含譜。削綠玉、雕盤貯。看取兩頭纖可數。酒濃茶沸。薄醒微倦。略略知酸苦。甘嫌崖蜜酥嫌乳。獨與檀心沁腸腑。結盡清思含未吐。眉頭欲澀。舌端欲潤。此味尋何許。

越女鏡心

樓月藏煙。鏡花迷影。默默并成離緒。爲是前番。暮江分手。十分眼波眉語。正墜葉長亭樹。來聽打篷雨。儘難去。又無端、貯辛停苦。門掩後。寒到夜燈院宇。暝色出重城。引愁苗。歷亂千縷。路不分明。問前邊、誰定相阻。少一重惆悵。說與亂山無數。

寒雨淒涼。夕波蕭瑟。渺渺歸心空寄。小語臨歧。舊詞盟水。明明爲伊憔悴。總誤煞、恁地牽懷更何已。路迤邐。定添將、箇儂心事。蘿屋下。脩竹天寒自倚。情性那同人。有梅花、獨笑差擬。盼得黃昏。又迢迢、清夢千里。訪東風門巷。一帶女牆須記。

菩薩蠻

重重疊疊愁難理。絨將寄與松陵水。遙碧最傷心。暮雲何處深。高樓渾不見。曲巷先尋徧。兩槳更無情。送人來去輕。江風又送人千里。深情只在回波裏。寂寞憶吹簫。垂虹過舊橋。分明橋底路。說向橋邊樹。春水縠生紋。來題窈窕雲。

蝶戀花

幾度銷魂花底見。只爲低迷。一半籠嬌面。玉手卻嫌羅太茜。芳心難織絲成段。月
易淒涼雲乍掩。結得相思。一日盈千徧。憶坐憶眠渾莫遣。沈沈夢近吹笙院。雪
酒醞燈明都不記。記得窗前。熨帖留儂意。寂寂蒼苔門自閉。歡來更不相回避。

十二時

屬金筓伯作韓江夜月圖因譜此意

下弦時。半規纔露。梳得涼絲拖地。爲疏影、難將人繫。作出今宵離思。堞上清笳樓中
怨笛。抵者回心事。偏此別。尙有芳醪。一盞未傾。已向愁邊先醉。卻最憎、蘭舟雙槳。
載去暮雲無際。昨夜房櫳。前番弦索。呢呢都能記。繞岸聞暗水。教伊自堆繡被。儘
待來、霜濃馬滑。那似隨歡情味。片語銷魂。花寒魄冷。怕負團圞意。任片驢易遠。重城
只有涼吹。

長亭怨慢

聽風鐸。霜鈴都碎。似與愁人。劃成愁界。小坐沈吟。夜燈明處。思無賴。此情誰會。殘酒

盡將愁酌。惆悵過今生。未抵取、前生愁債。難再。是年時好夢。總繫繡囊羅帶。今宵黯黯。莫認作、別離常態。只檢點、一幅霞綃。驗當日、啼痕猶在。更萬疊愁心。須有扁舟能載。

記人日、題詩時候。怕共梅花。一時俱瘦。影薄香疏。那能禁取嫩寒透。要遲殘漏。魂不去、長相守。未許厭清吟。待後夜、月明如晝。羅袖便東風好倚。肯忘雪中盟舊。瑤箋試寄。莫是隔、雨林煙岫。倩絮影、替得春心。早防到、輕離輕就。問此際眉梢。應與江波同皺。

漫疑是、春情無據。總爲花枝。未經風雨。儘與流連。漸探芳意到深處。有懷曾吐。相旂旒。仍回顧。領略幾分春。卻怕說、落紅如許。空去看新潮漲後。底是暮江歸路。青溪近也。夢不到、莫愁前渡。便望斷、一片隋隄。分題盡、垂楊終古。憶廿四橋邊。誰把將離重譜。

瑣窗寒 剪刀

綫影初添。鑪熏漸潤。玉筍寒淺。單衣未試。要與商量裁翦。有并刀、一雙乍開。故園欲倦春心眼。似燕飛輕羽。東風料峭。畫簾纔卷。誰遣情何限。有歷亂愁苗。旋生旋剗。休教乞與。任是纖柔難斷。望長隄、煙雨更來。柳絲作絮。應自軟。待將他、鈿尺重尋。替約紅閨伴。

浣溪沙 贈梅

不著鉛華自出塵。漫疑姑射有仙人。讓渠管領古時春。寂寞幾年成獨笑。清寒入夜總思君。高樓橫笛那堪聞。

又 代梅答

一縷花魂未易招。空山只覺恨迢迢。願留雲影護清宵。寄語題詩人日後。斷腸人正倚紅橋。好停羌笛試瓊簫。

虞美人 畫蘭使面

春痕莫說無尋處。曾縮花魂住。幾重妝閣倚東風。抱取清愁、分付好簾櫳。空山此

際頻回顧。芳訊年年誤。玉階前夜露華濃。試向蒼苔細話舊蘭叢。

小重山 前題

冷蕊疏花思不禁。幾分春色後。尙沈吟。蹉跎前事況而今。相看久。須解惜花心。煙裏太難尋。可憐風露滿。暮山深。紛紛紅藥盡抽簪。瑤琴怨。還待夢魂侵。

臺城路

卷簾怕數青溪樹。微波畫橋俱永。小褪輕紅。全消暗碧。誰見參差雲影。樓高笛冷。有無限思量。一時難省。眼底恁恁。暮懷覺又動俄頃。春江花月未改。夢中聞怨曲。何曾輕醒。瘦是風欺。病緣露積。可憶天涯如梗。斜陽易暝。到啼鴉催人。萬愁都併。倚徧闌干。恁生知意穩。

一萼紅

路重尋。恰香銷燭暗。人在小樓心。銀蒜低垂。紅羅乍掩。曾費無數沈吟。又誰料、天長地久。正寂寞、三載意難禁。悄語空留。暗蹤猶記。前度寒侵。雲去月來何定。鎮紛紛

別緒忽是而今。步到回廊。行來曲檻。偏道花影深深。爲相見、年時瘦損。恨容易、孤負舊鴛衾。可惜牽情未知。趁盡春陰。

百字令

揚州不俗。照舊時月色。分明瓊樹。記得流連清影裏。肯聽夜闌人住。掩抑回腸。淒涼古調。幾惜年華誤。者回休問。任他光景來去。偏是袖冷衣單。薄寒初覺地。隔長干路。千疊雲霞千疊水。爭抵愁心無數。詞客重逢。一尊難醉。卻爲思前度。五更門巷。似添多少風露。

摸魚兒

題管異之詞次鄧嶰翁韻

細看來、已無塵土。眼中那見餘子。瑤璃硯匣珊瑚筆。散作奇文驚世。花有刺。莫觸起。花閒胡蝶翩翩翅。重門好閉。自料理奚囊。摩挲長劍。猶可暮天倚。青溪側。曾弔年時小妹。清魂銷向煙裏。無端又覺長干遠。待寫相思兩字。行更起。對萬頃滄波。且住。爲佳耳。離懷欲試。可許一商量。殘膏賸馥。乞我佩蘭芷。

又 次前韻呈嶰翁

繫垂楊。萬絲千縷。江湖空歎游子。風欺雨溼。渾無準。分是飄零身世。懷裏刺。就躑躅。天街。枉羨排風翅。閒門久閉。問舊日攀條。赤闌橋畔。可趁夕陽倚。青驄曲。難約紅。閨姊妹。模糊都付影裏。東君欲惜花開幕。肯說桃根名字。人未起。正夜色朦朧。尚有鴉啼耳。清弦乍試。又此境迢迢。波濤極目。無數隔沅芷。

瑞鶴仙 題佛喜畫扇

斷腸花易見。最不易相逢。舊時人面。同人俱賦白秋海棠詩贈之。秋心滿庭院。正煙啼連夕。露華猶泫。十分繾綣。付怱怱。流波一片。道相思。難到天涯。卻又爲渠吟徧。歌扇。袖邊闌角。說謝鉛華。轉圖紅怨。斜陽肯戀。前度事。淚如霰。問瑤臺仙侶。滄波偏隔。空憶蓬萊水淺。更愁他。機上塵生。去途未辨。

百字令

風吹暗雨。聽聲聲。滴過小寒時節。惜是侵尋將歲晚。獨坐思量愁絕。冰合黃河。沙清

玉塞凍滿天山雪。江南自好。布衾猶未如鐵。還念舊日揚州。故人相見。屐齒衝泥折。起舞尊前看劍影。攜手河梁難別。千里銷凝。一襟離索。并向歸鴻說。瓊樓正遠。問他可有明月。

望江南

揚州憶。最憶是瓊花。聚八仙。曾開一檻。無雙亭。早屬吾家。還可問根芽。
揚州憶。仙女廟前船。自古神仙名易誤。當時碑語字空鐫。芒稻水如煙。
揚州憶。幾度問瓜洲。聽水聽風江路遠。不知誰與上簾鉤。何況是樓頭。
揚州憶。樓隔小東門。坐得詞人明月底。喚來弟一久銷魂。夢冷獨黃昏。
揚州憶。詞客有深情。紅藥橋邊姜白石。碧桃溪裏玉田生。吹笛最分明。
揚州憶。勺藥事蹉跎。初白庵中人漸老。安家巷口迹重過。商婦淚痕多。
揚州憶。此意少人知。水重水輕全未覺。愁深愁淺定多時。雪醅觸相思。
揚州憶。古巷問蕭條。選學微茫樓好在。注書辛苦迹同銷。楊柳尙前朝。

揚州憶。帶酒更回腸。地下有人攜眷屬。教他月底不淒涼。天壤惜王郎。
揚州憶。攜手酒初釀。月影欲沈禪智路。梅花開作蜀岡雲。無那白紛紛。
揚州憶。明月弄嬋娟。煙夢詞中情歷歷。雪如墳遠草芊芊。料取託君傳。
揚州憶。越調付飄零。九曲池荒無客至。大明寺古少人經。千載惜娉婷。

長亭怨慢 皖江留別陸祁孫張魯岡楊伯厚陳叔安

已贏得、清愁空訴。別了金尊。更停弦柱。細數重逢。幾番斜日。幾番雨。眼中人遠。千里
外。離亭樹。小立試愔愔。被一岸、疏楊留住。臨去。憶前塵若夢。不獨青山無語。孤懷
總在。算各積、斷章零句。爲後夜、定起相思。肯自說、歸期頻誤。怕過盡江風。難記年年
江路。

又 祁孫次韻贈別因答其意亦次前韻

聽江上、征鴻相訴。起拓船窗。自扶船柱。舊別誰尋。那禁新別。又今雨。近來多病。生意
少。千行樹。葉葉儘飄零。恨碧影、無情難住。當去。正羈魂未定。尙有紅樓傳語。傷心

子夜總不似、杜郎題句。爲是處、肯作句留。問幾許、年華教誤。賸贈答詞多、吟向西風前路。

又 記別

又孤負、良宵無價。轉觸愁心、欲題還罷。暗裏青溪、覓來都作、舊臺榭。者番攜手、襟袖淚、須盈把。好月要朦朧。莫認是、嫦娥能寡。連夜對清尊、易竭。坐過更闌燈灺。無言半餉、爲說到、花開花謝。試看取、小小門前、已不駐、連錢驄馬。訴一笛淒涼、送我扁舟東下。

碧雲齋詞

金縷曲 陳百泉郡丞洗硯圖

此硯難離手。記當年、書生倚馬、策勳元舊。十萬軍書中夜起、墨水知消幾斗。又不覺、垂楊生肘。兵衛歸來攜燕寢、驗微凹、卻惜磨礱久。毛穎在、尙堪友。精神易敵名寧朽。見家聲、有人繼起。石田能守。看取官奴臨故紙。日日清光到牖。爲底事、偏耽詩酒。

碌碌風塵今幾許。對尊前、畫諾應低首。圖裏事、試重剖。

疏影 潘紱庭屬題顧南雅學士畫梅卷

披來一幅。識舊時倩影。曾去塵俗。結盡相思。疑是還非。風前肯訴心曲。珊瑚卻向圖中出。但賸取、清愁能續。謝故香、著手生春。已負箇人如玉。不是前番夢境。欲吟更徙倚。夜夜燒燭。寄語潘郎。好惜芳華。莫似飄零空谷。明年儻見江南信。怕隔了、暮天脩竹。要待來、樹色黃昏。冷月正侵茅屋。

淡黃柳 琇卿夫人澹墨桃花畫幅

煙分露溼。溪上尋常憶。黯黯花魂如太息。一桁珠簾到地。遮盡人閒好顏色。問芳陌。春天又將夕。畫中意、淡無迹。似模糊、幾度看成碧。卻笑清吟。費他延佇。紅雨年年可惜。

百字令 題紱庭詞卷

吾今衰矣。見人閒英絕。往往移情。況復逢君年最少。照來玉樹同清。酒冷香溫。晴天

雨夜遙思筆端生。風前微動。一重簾幙吹笙。曾過窈窕文窗。空濛庭宇。相對暮愁
縈。爲按紅牙論拍。細斂取。才氣縱橫。香滿荷衣。芳褰蘭澤。此意要分明。妙詞如寄。斷
鴻應識江程。

水調歌頭 題潘星齋詞卷

璧月與瓊樹。十丈砌樓臺。蒼寒已足古色。煙霧數重開。無奈情根種取。更積情魔如
許。不覺引愁來。碎錦尙成段。待子自量裁。天街畔。頻攜手。幾銜杯。生前何意相見。
相見便縈回。一卷新詞袖裏。吟向紫藤架底。花鳥莫疑猜。使我不能去。恨此夕陽催。
又 眉生皖人隸京師和春部生十五年矣色妍麗而聲清妙結束登場盡失
儕偶顧脩潔遠人人亦遠之自弄弦索無非怨情余垂老失意見郎殊憐惜
而力不能慰其零落爲譜此詞欲證之他日也

人在藐姑射。風露佇層臺。天孫替織雲錦。待取障塵埃。誰製冰弦裂帛。佐此清歌戛
玉。疑是月中來。回首萬花暮。愁見繡成堆。西風近。馬嘶處。向儂催。臨岐祇有殘酒。

和淚入深杯。莫問春朝秋夜。休墮情天怨海。清影自徘徊。那料心如鐵。爲爾十分摧。

虞美人 絳庭睡香花室填詞圖

新詞吟徧玲瓏影。手寫烏絲整。幾分開到睡香花。喚起紅兒。次第拍紅牙。近來定作江南夢。頻把離人送。夢中疊疊亂山多。多恐愁心。無奈暮雲何。來札云一生知己不過數人每當送別黯然無盡

水龍吟 呈陶彙香廉訪

仙人合住蓬萊。如何轉愛人間世。波濤蕩漾。風帆浩渺。海天無際。擊楫中流。峯回路轉。雨清煙霽。問當年香案。姓名猶在。誰牽率。尋常計。目極燕南趙北。有紛紛暮雲如翳。千村樹接。萬家鱗密。深情同繫。似此聲名。那生寂寞。詎增迢遞。奈岐涂尙有。飄零窮客。怕流光逝。

又 前題

別時暗數流年。十三弦柱調非穩。前游歷歷。星移物換。路長人近。獨滯春明。旋吟秋

樹歸期無準。又連番陰雨。泥深車轍。漏相見。蕭疏影。欲話黃墟舊夢。過長街。愁尋去軫。青衫似我。酒痕全滅。淚斑猶隱。便是晨星。而今有幾。掉頭安忍。謂徐少鶴侍郎吳讓入學士黃範亭侍御相繼謝世。幸平生知己。衰遲肯念。正西風緊。

洞仙歌

李仰山與其配吳夫人以竹梅代寫真爲雙磨圖索題

一枝竹外已替來人影。相對渾忘夜方永。問雙雙。品格特地高寒。能待得。明月空山初醒。薄雲曾護取。多種香留。天上還零露華冷。擷笛正前宵。夢憶江城。寄唐韻。烏絲闌整。更尺幅。臨風寫芳蘭。破瑣碎昏黃。別開清景。夫人善畫蘭。

浣溪沙

得端溪硯刻三靈芝題曰三芝硯

誰向端溪割紫雲。濛濛猶漾舊波文。肌膚嫌滑玉嫌溫。一瑞已從文兒見。三莖欲就露盤分。可能翰墨奏奇勳。

又

瑞卿來索三芝硯去因賸以詞

獨坐難酬十索詩。堅盟取證兩心知。待渠往復訴相思。莫任柳花飛點點。又教清

夜夢華芝飄零一片見何時。

賣花聲 絳庭平臺啜茗圖

春色費雕鏤。纔上簾鉤。碧雲藏樹樹藏樓。剛到平臺花氣近。人意都幽。隔檻見凝眸。飛絮風柔。懷中茗柀覆還收。此是人閒真豔福。幾箇能脩。

金縷曲 范今雨出清微道人扇頭畫蘭屬題

春色飄零久。記分明、畫蘭有曲。芳姿無偶。韻事總隨流水逝。卻共離騷繫肘。問霧閣、雲窗依舊。染黛添芽人不見。積深深、風露能相守。花已暮。影空有。素心難得相攜。手認前題。沈沈欲醉。何曾耽酒。月底清魂休寂寞。賴與玉京爲友。怕此際、秋林都瘦。幽意琴絲煩更譜。想年時、好夢偏消受。歡未墜。在君袖。

又 星齋屬題藤花館填詞圖

誰解詞人意。爲年年、風前欲困。花陰頻醉。此酒未能消鬱鬱。肯說感時澦淚。知辨取、宮商能細。隄上女兒歌楊柳。有銅弦、鐵撥詞須記。千種積。那餘事。生從槩戟高門。

地謝深情。相過寂寞。相憐顛顛。重疊贈行。淒欲絕。獨笑浮蹤猶寄。怕陌上、難尋歸騎。
館憶藤花。花漏月下。湘簾重譜相思字。圖再展。夜無寐。

又 絨庭秋 林琴趣寫真

請奏瑤琴曲。問秋林、自搖清影。有人如玉。雲作襟懷。天寄想。冰雪替消塵俗。已停了、
繁弦脆竹。澗底流泉。花外韻。就匡牀、眠處陰成綠。歌絕代。在空谷。披來畫本真堪
讀。鎖常年、引杯看劍。賦詩橫槊。祇有吳絲。係徽軫。理盡纏絲往復。爲媵子、新詞一幅。
唱和更傳。文窈窕。動歸心。我溢愁千斛。桐葉墜。意初觸。

南柯子 星齋畫紅梅琇卿夫人補竹索題

竹弄吟聲碎。梅添綺思新。相依已類比肩人。相向風前。占了十分春。高絕空山裏。
移將玉砌鄰。各持明月照前身。一任天桃含笑柳含顰。

一萼紅 紅葉

路遲遲。爲霜濃十里。天色欲寒時。雲護遙山。霞分斷岸。誰辨光景離奇。駐車向、林深

徑折費畫本。頻染舊燕支。薄袖能來。小帘猶展。斜日相宜。還認幾重紅冷。是天憐暮景。替補芳菲。漢殿先秋。吳江漸晚。空倚闌檻遲疑。便題徧。無情詩句。怕難共。溝水訴相思。借問涼蟾綠楊那見絲絲。

蝶戀花 雙紅豆圖

門外東風應比舊。人憶風前。說是新來瘦。何處空山寒翠袖。幾年南國生紅豆。明月入懷花似畫。千種心情。一種眉端皺。氣味而今非中酒。燈邊可奈殷勤侑。

木蘭花慢 出京

過連朝陰雨。放晴後。理征鞍。照一角秋城。數行秋樹。人影初寒。吾生本輕離別。奈江湖極目路漫漫。匹馬短衣行徑。碧雲黃葉關山。相看臨去淚休彈。襟袖早成斑。爲天街躑躅。已經病酒。莫說加餐。新交更兼舊雨。怕從今。漂泊見應難。分付帶人疏柳。煩他重數雕闌。

又 潞河夜泊

趁斜陽欲暮。舍車馬上扁舟。正望裏模糊。參差雉堞。西北高樓。數來上弦已近。照孤篷。尙是月如鉤。夜久細思往事。路長還觸新愁。回頭佇立。費凝眸。別語記休休。漸場屋歌殘。旗亭韻遠。此願誰酬。紛紛潞河水急。抱離悰。重疊夢輪蹄。莫問人歸何許。要知人去深秋。

又 津門書憶

記華燈帶酒。早說是、要回腸。況一帶淒清。暮煙作縷。衰柳成行。人如畫中有幾。惜前番。醉裏太疏狂。七十二沽風緊。三千餘里波長。歸航冷淡。過重陽。梳底有微霜。共天涯淪落。未相料理。轉念輕裝。征涂已生白髮。積雲愁。海思更茫茫。誰見倚篷寂寞。那堪擊楫低昂。

又 楊柳青夜泊同陳誠之

聽繞船暗水。繫纜處。正三更。是楊柳青邊。者回重到。恐覺飄零。津沽幾時過了。又風波。細數一程程。乍可披衣徐起。則知伏枕還驚。同行各自怕愁生。相對忽愁并。念

增來迢遞。無言可慰。有夢難成。羣仙也應悵望。道歸鴻、未必憶瑤京。一月流光黯淡。九河遺迹縱橫。

生查子

塵吹廣陌多。情戀餘春促。隔卻一層樓。遙倚人如玉。月底事模糊。花想疑重續。背面昔生憐。見面相思酷。

整衣入座來。添酒回燈夜。多恐月朦朧。光色從渠借。生小弄奇香。襟袖留蘭麝。一任忌聰明。卻與秋聲價。

相逢又幾時。衣帶嫌寬綽。微露雪肌膚。獨坐調弦索。一闋怨初生。四顧情何託。白玉願爲堂。翠羽宜開幙。

飄零芍藥花。冷澀玫瑰柱。下得畫屏風。來話天涯雨。舊約怕重尋。新恨教償取。從此費纏繇。刪了閒情緒。

衆香經雨生。萬綠當風亂。肯作護花人。日暮尋芳援。幾度向沈吟。罷酒成長歎。爲

憶好春時。卻盼流年換。

細葛已含風。況弄生綃扇。認是謫仙人。忽墮吹笙院。

鋪得水紋輕。恰稱冰肌倦。香

夢待沈酣。銀漏看移箭。

些些紕繆時。略略差語。膽小正惺忪。教去還疑佇。

總是藕絲牽。嘗到蓮心苦。我

早悔從頭。明日卿來否。

陝西巷口尋。白馬門前繫。滑滑暗中泥。月沒教星替。

拖取縷金鞋。步下蒼苔砌。兩

意本分明。欲說還含睇。

夜珠不易來。刻意憐明月。月自有圓時。圓過愁當闕。

那肯說歸期。道是歸心歇。屋

瓦薄霜凝。庭樹西風發。

度詞人未明。雜事誰能祕。舉手贈洪厓。不是文遊戲。

江南魂最銷。塞北心如醉。四

面問春山。可比眉閒翠。

余枯樹憐身。浮萍比迹。未精顧曲。聊借攄愁。小史十三。回頭曾識。舞童二八。

垂手重逢。月滿花明。風飄雨墜。跨驢避路。賦鶴冲天。已誤浮名。共悲薄命。忽
焉寒暑。邈矣分攜。絳雲在空。清霜戒路。夜中不寐。坐起微吟。話少情多。韻長
節短。牽懷異地。莫託郵筒。相見他年。爲開篋衍。己丑九月。滄州舟次記。

拜星月

劍匣三更。衣裝千里。客裏荒雞聽慣。一倍淒涼。是今宵孤岸。夢中到。月潔霜清。境地
又與。綽約穠姿重見。尺五城南路。迷茫誰辨。記華燈。翠幙開芳。撥琵琶。自說當
風怨。未定何日相逢。已酒闌人散。送門前。跨馬天涯遠。離亭外。柳色全遮斷。贖河邊。
暮雨瀟瀟。滴愁心久亂。

蘭陵王 秋柳

西風急。吹徧枝枝葉葉。絲絲意。難信飄零。猶挽柔條暮天接。紅樓倚城堞。還隔。亂雲
重疊。幾行遠。祇在長隄。結盡淒涼送蘭楫。行來舊原隰。記經雨。經煙。離思先搗。霜
華得三分溼。已不是。蕙手空他眉睫。重重望去。那安帖。笛寒未宜擲。桃頰久無

醫更輕薄飛絮。儘教收拾。棉衣取次開箱篋。但神君夢裏。可留殘汁。風蒲萬頃定憶取。共獵獵。

又 前題

青驄陌。攀折年年可惜。差池過。新雨作涼。尚戀風中幾絲碧。斜陽照行役。誤了山程水驛。凭闌處。惟有斷腸。那是前番一千尺。平橋過車迹。問何處陰陰。門巷初夕。微颺未覺侵簾額。曾半曲徐度。四弦輕擘。煙淒露冷怨疇昔。疏疏漸迢隔。無益。思方積。正葉漏橫參。樹倚初魄。林稀不見秋河窄。倩長年此去。休掛帆席。須留殘翠共暮景。慰病客。

木蘭花慢 德州舟次寄星齋絨庭昆季

又成千里隔。照涼影。月如弓。問道路情懷。似秋慘澹。疑夜朦朧。相逢但盈古思。料新詞。相憶定重重。寄語對牀兄弟。勞人草草難同。船篷路遠作愁濃。誰與辨清蹤。記說劍論詩。芙蓉鏡檻。鸚鵡簾櫳。怱怱幾回夢裏。自緘將。寂寞付西風。曾向河梁攜手。

暮雲何處江東。

菩薩蠻

一燈自照初寒影。夢難成。覺宵方永。到了十分秋。無端在客舟。
玲瓏休看月。已是霜華滑。月色暗重重。霜濃愁更濃。

八聲甘州 臨清待牖

緘十分。離抱向天涯。水急尙回縈。又重重暮牖。流遲北去。人滯南征。坐聽城頭吹角。
樹樹宿鳥驚。何日江淮合。纔算初程。偏有微澌動響。怕一層隔斷。千疊難平。任篷
窗不寐。自起訴孤檠。奈霜天。幾番淒緊。認歸塗。那比雁分明。飄零到。最荒寒地。心跡
還清。

二郎神 任城太白酒樓

冷空墜月。有寂寞。一樓天際。恨劍字全消。酒星欲墮。還隔參差埤堦。俠客神仙知何
在。對日暮。浮雲如翳。偏咽徧瓊簫。當年闌檻。況增迢遞。時世舊來齊魯。而今沈濟。

問此水紛紛。一舟兩槳。那是中流不繫。夢裏蠶叢。人閒魍魅。天遣飄零誰替。吟望處。又是西風幾度。黑貂裘敝。

金縷曲 里門晤王湘菑以其令弟雨樓寫真索題

春早吳趨路。恰重逢。春明舊侶。尊閒空訴。問我飄零何日定。兩鬢侵尋非故。待新燕。歸時當去。怕別難兄知難弟。有年年。聽雨連牀處。情欲往。事終誤。教繙畫本思平素。儘流連。幾重雲水。幾行煙樹。多少家山分近遠。隨意將人留住。比客夢。恁恁無據。此後天涯相思積。寄行藏。爲續登樓賦。頻四望。鎮朝暮。

百字令 訪李中耆於暨陽講舍出倚杖數歸雅寫真屬題

暮雲千里。憶江南春樹。尋常遮斷。又覺天涯寒料峭。許繫扁舟孤岸。十載飄零。故人餘幾。往事愁重按。相看圖畫。舊來顏色都換。誰似歸興先濃。平林如織。過了啼鴉亂。定有營巢無計就。還向煙中分散。莫問驚飛。記留宿影。闕月纔生半。蒼波尺度。寄君應費柔翰。

又 申耆和前韻贈行復和答之

霜侵綠鬢爲江鄉。隨處教人腸斷。乍得相尋梅樹底。又數新楊兩岸。苦語元多。悲懷易激。欲說還頻按。青春別後。落花啼鳥。當換。暗計三十年來。三千里外。心曲紛長亂。試較年華吾略小。可奈年年輕散。眼底川涂。百重千折。蕩漾中流半。依然行徑。者回添了詞翰。

又 舟次再和前韻寄申耆

寄情何許。認遙山隱隱。欲連還斷。祇有滄波流旋續。替溢新愁盈岸。譜思風前。綴詞月底。惜少紅牙按。薄寒微覺。客裘解了。忘換。最是此去經春。江湖前路。草長鶯飛亂。抱得芳馨襟袖在。不讓驚飄吹散。水竹多時。煙蘿深處。更約平分半。不如歸好。故鄉元羨張翰。

又 管孝逸用前韻見贈又答之

與君把酒話平生。心曲總成淒斷。江水而今遲去櫂。明月曾思江岸。蕩麴塵來。借蒼

苔住舊迹還能按。浪游如此。早愁人事空換。元是往日南朝。過江重地。贍山多雲亂。都說長才羈小邑。人吏朝衙初散。尚有官梅。幾枝零落。忽忽春將半。去留何計。坐來吮盡豪翰。

又 孝逸又次前韻因更答之

十分離緒。惜尊前。豪竹哀絲全斷。江北江南人易老。慣見長條繫岸。回首高樓。浮雲何限。難把清歌按。那同疏索。爲他風信頻換。更取一疊蠻箋。數行苦語。撥鞦懷繚亂。新賞墜歡疑若夢。幾度粉銷香散。不是當時。洛陽年少。心事蹉跎半。煙深深地。寄情須盼芳翰。

薄倖 孝逸索題仙鬢采藥圖卽和其韻

琴絲猶潤。奈不見。文君鬢影。試重數。流年三五。圓月饒他離恨。最淒涼。隔斷神山。哀箏怨曲無從省。況碧海波寬。芳蹤吹遠。羅襪全迷塵印。孤負卻。揚州夢。經多少。瓊花飄盡。那關人帶酒。江寒如許。故人慰我天涯病。十洲憑問。定何時。采藥能歸。碎佩

當風引。沈吟畫裏。宮燭知燒幾寸。丙子歲作圖迄今庚寅已十五年矣

念奴嬌 孝逸舍山官舍晤懷遠許叔翹出其團勇助軍記有鄧嶰翁中丞用

東坡念奴嬌韻題詞亦次一闋

唾壺缺後。儘消除不去。胸中何物。草木淮南全剗處。歷歷猶存壘壁。癢拭刀鋌。沙蘊箭鏃。人事更霜雪。後生鄉里。近來莫問英傑。官舍尊酒流連。沈沈春雨。正江花初發。待可商量耕與釣。好聽虛名磨滅。千里迢迢。家山何許。一抹青如髮。著書更好。閉門誰算年月。

揚州慢 清明用孝逸韻

替草生晴。與花作暖。畫堂略有微風。是連宵急雨。送百舌聲中。到前度。頽垣影裏。海棠香困。楊柳煙籠。恨無端。遮了天涯深翠房櫺。任儂小住。念同游。曾訴孤鴻。賸落魄山城。今朝熟食。愁語難工。莫道青春能去。年年憶。好好紅紅。任模糊。臺榭牽來殘夢猶濃。

柳梢青 紅豆仕女圖

展畫屏風。相思欲語。早費春工。折藥闌邊。弄青梅底。一樣玲瓏。手按裙帶微慵。已放了。閒階幾叢。十五盈盈。舊時見也。那是怱怱。

春從天上來 題畫

人見江皋。記皎皎明星。獨立清宵。博山頻燼。沈水誰燒。幾度過了春潮。整芙蓉裙帶。定可認。舊日纖腰。寄相思。補海棠樹樹。楊柳條條。年來總成愁絕。任碧月瓊枝。付與煙消。好事飛花。綺懷流水。不禁往恨重撩。倩畫屏中影。肯和我。暮雨瀟瀟。奈無端。爲滄波如夢。停住蘭橈。

江城子 太真出浴圖

冰肌無力怯衣單。是春寒。是春殘。不見珠鈿。尚有水潺湲。一卷清華宮裏事。傾國意。畫圖看。昔游還記過驪山。事闌珊。夢闌干。無數行雲。替寫舊煙鬟。玉闕西廂何處。是零落恨。在人間。

摸魚子

寄題嚴小秋詞稿兼寄蔡友石觀察

渡江時、便聞才調。年年蹤跡相避。冶城明月青溪雨。折盡柳枝難寄。歌扇底。傳一卷、烏絲闌寫蠶眠字。青衫舊漬。付燈下低敲。尊邊試拍醒後那能記。昭關古、乞食重悲往事。懷人如在天際。淮南直北紅心驛。卻喜郵書容易。風正細。怕譜向檀槽。不出纏綿意。何時把臂。問主客圖中。投壺篇裏。可作故人地。

生查子

畫紅蜀葵

將開留正面。欲折當盈手。何意出疏籬。顏色濃於酒。認是米囊花。卻殿荼蘼後。過了十分春。肯與紅相守。

滿江紅

木蘭從軍圖

女子知兵。想自古、引弓風俗。沙塵裏、蠻條重繫。繡鞵輕蹴。十二年增戎馬恨。一千里借明駝足。細看來、忠孝失男兒。軍書促。黃河畔、曾游牧。黑山下、前番宿。是隋家遺事。樂官新曲。人列啓民酋長內。地思大利堅城築。問而今、能取木蘭詩。從頭讀。

念奴嬌 林東溪醉紅山館圖

故園回首。有深紅一逕。澄潭千尺。總爲飄零書劍遠。從此雲山迢隔。數載江皋。相親魚鳥。吟盡終何益。問君薄宦。冷懷應勝遷客。留滯祇在天涯。相思不見。名字常相惜。忽向郵筒傳數紙。也信詞人心迹。雨後看山。風前展畫。情動遙天碧。還憑寄語。幾時同醉芳席。

又 初秋呈孝逸并寄伯恬小宛於宣州

一江上下。數中間。隔盡煙嵐明滅。天遣吾儕淪落處。各聽潮聲鳥咽。小住頻過。闌風伏雨。相對愁時節。天河見也。又當斗柄西揭。海內有幾知音。風塵長墮。名姓勞傳說。賸得閒身須好愛。已換三春顏色。如畫城高。弄舟溪遠。況是連年別。每思攜手。坐看明月初潔。

洞仙歌 七夕前二日偕孝逸汎舟秦淮

詩人老去。更飄零江上。早把雲霞付遙想。過江來。又是百里煙波。城下問。可有前時

兩槩。秦淮依舊碧。畫檻重新。影送垂楊正惆悵。不見六朝人。好破閒愁。奈愁與潮頭同長。算後夜、明河渡牽牛。怕河畔星辰古來相望。

最高樓

琵琶曲。曾按畫樓前。往夢已如煙。去波尙作相逢意。新花那肯罷生憐。到初秋。簾影動。一鉤妍。記纔趁、暮潮牽小艇。便約取、微風摹鬢影。思此事。亦徒然。豔情就未消磨盡。病魔已結往來緣。又孤他。天際月。十分圓。

薄倖 青溪紀游同孝逸作

板橋東裏。有屈戌銅鋪好記。尙留取。落斜門徑。依約閒庭芳砌。最關心。金屑塵生。蕭蕭怨曲何方寄。但草草相逢。舊人白髮。略記開天遺事。也算得、揚州夢。偏一覺。十年容易。闌干重倚。徧新鶯。稱燕那。能便識流連意。畫船休繫。更教他。滅盡華燈。不見曾游地。僧廬臥後。說是宵來雨細。

千秋歲引 畫峽蝶帳

小海留圖。西園識影。兩宿煙沈。慣相並。天涯草芳。試粉薄。陽春樹暖。依枝緊。隔雲來。上階好。意初靜。誰到幾番花事冷。花裏活時。知花肯。定引詩魂。入宵永。羅浮兩峯。離合際。流蘇一帳。低迷境。是空山。是香國。那須醒。

摸魚兒 皖俗婦人於中秋夜竊人園中倭瓜爲宜子之兆謂之摸秋有以鼓

籥送新嫁娘者。懈翁中丞命製摸秋詞。因成此闋。

問西風。可能逢使。良期同盼三五。關心祇在綿綿地。自昔肯傳佳語。新過雨。到玉漏初清。依約尋場圃。今宵暗許。正密意含瓢。盈懷抱子。莫作小兒女。江潭客。長似匏瓜獨處。移情還記風土。生平要足家家願。替祝生男當戶。憑告與。把花蒂藏來。漫共論甘苦。門前聽取。道好種先成。牽泥帶露。是處送簫鼓。

又 舊游黔南水西地。中秋亦有送瓜之俗。追憶用前韻。

記牂柯。舊攜家地。少年纔過三五。閨中正作宜男夢。碧玉難聞私語。秋慣雨。已結就青黃。籥竹連園圃。佳名共許。是滅燭攜來。籠燈抱至。歌笑聽蠻女。歸來久。漂泊何

曾室處。暮雲長隔鄉土。病妻弱息知何似。藤蔓定牽蓬戶。歌漫與。怕燒盡栗薪。未必存瓜苦。此時認取。又江上中秋。送瓜時節。有樂異銅鼓。

浣溪沙 題折梅仕女圖

記得天涯有舊痕。幾分春色到江村。待他涼月照中門。修竹已消空谷影。梅花真作美人魂。不禁寂寞倚黃昏。

江城子 程幼橋江干訪舊圖

江干重至正魂消。認長條。舊停橈。往日心情。徒結夢迢迢。誰識飄零書劍影。千里外。一身遙。皖公山老樹初彫。坐無憀。鎮連宵。各抱秋懷。同和雨瀟瀟。莫道天涯成獨往。能戀我。是回潮。

沁園春 別管孝逸

相別無言。得見何時。念子太孤。便魚書可託。水方迢遞。雁聲欲斷。山更模糊。回首昭關。吹簫路遠。已分年年懷此都。申前約。奈怱怱會合。總是征途。歡娛從此愁無記。

前度垂楊葉盡枯。尙醉呼碧玉。君悲拓落病扶絳樹。我惜踟躕。離緒先繁。壯心難寄。空向燈前碎唾壺。停杯後。道雪花濃處。人在江湖。

又 涂次寄孝逸

無限江風。獨放扁舟。幾夕未眠。正星星遠火。又迷古岸。沈沈暮柝。空急寒天。曲室關門。回燈換酒。預數相思調舊弦。琵琶曲。想青衫溼處。不爲離筵。秋邊。無那尊前。算此別。知君亦可憐。有謗書盈篋。流言滿路。任他潦倒。肯作纏綿。去住成疑。行藏誰覺。便老三河俠少年。城南路。約何時得買。二頃良田。

細數平生海內知交。爾是俊人。料儘能收拾。藏書萬卷。莫輕孤負。有酒盈尊。舊別天街。新分山路。祇有吾徒相見真。丁寧切。把胸中臧否。付與人論。塵昏。沙塞銷魂。問誰似。夷吾直下孫。鎮吏閒人散。看山拄笏。也同秋士。寂寞江濱。月篋無多。霜絲已積。難說還家理釣綸。相憐意。被寒雲隔盡。獨倚船唇。

念奴嬌 用祁孫韻爲楊伯厚題雲溪送別圖

雲溪水滿。記年時、倚槳遲遲難發。柳色千行，今不見、歷盡天涯霜雪。畫本依稀，詩篇零落，自顧空藤笈。楊朱岐路，可堪更置行屨。同向楚尾吳頭，臨風望遠，此意從搜括。一片江波無賴甚，也似游人輕別。萬里關河，鐵衣已冷，正怨秦時月。吾儕俱老，壯心何事頻說。

暗香 和幼橋詠紅梅用石帚韻

賦成好色。對一枝正冷，難傳鄰笛。嫩蕊不禁，說與花時也休摘。偏到重逢絕豔，題稿袂、還教停筆。總爲是、夜久香多，紅淚在茵席。春國事未寂。使雪意欲消，綺思仍積。但愁易落，摹出深痕罷追憶。君自防他泥碗，如我又看朱成碧。負絳蠟、空照取，那回記得。

又 前題

故香著色。恨暮雲隔了，高樓橫笛。月上曲闌，尙覺模糊忍重摘。休說紅情不見，千里外、憑傳吟筆。就認作、絳樹能歌，依約是離席。江國路易寂。怕紙帳畫來，淚點先積。

昔游幾度人去揚州遠成憶。猶似微酣倚處。清影動。冰壺瑤碧。便此際。芳信冷。恁生
忘得。

齊天樂 歲暮書懷次嶰筇先生韻

江城風雪渾無限。何能便催寒去。已算初春。行過小歲。誰辨羈人情緒。休吟恨賦。任
天市沈來。井芒生處。不住飄零。幾時飛起。是泥絮。清霜先上鬢影。鎮常年落魄。還
忘辛苦。病怯熏鑪。愁陳酒盃。幸有重簾深護。身慚健弩。漸難向圓沙。更驚瀉鷺渺渺
天涯。冷弦猶未譜。

祝英臺近 東坡生日和嶰筇先生韻

賦黃州詩海外。斯境更何有。天上人間。名姓比山斗。八百五十餘年。年年此際。疑筇
屐歸來如舊。放梅候。先生前日生朝。模糊記還否。東閣開時。聽說陳春酒。便思千
古相望。文章政事。看一例。湖山同壽。

大酺 嶰筇先生以端硯徽墨箋紙茗壺見贈作此以謝用清真韻

正雪花濃。梅花冷。風入東邊空屋。殘年仍旅寄。聽鴉飛難定。悶懷當觸。一紙書來。兼
珍作伴。寒色知憐。脩竹還生沈吟久。爲昭容肯記。客卿相熟。奈徒有茶經。玉川人遠。
年年幽獨。豪錐全秃速。恨輕付塵土埋雙轂。見几案。初陳清供。昔別如逢。也都成
餞冬題目。百番銀箋好。重疊寫暮雲心曲。念今日。依江國。春信千里。何處能開紅菽。
夢來自攜夜燭。

齊天樂 水仙花

薄塵未必生羅襪。瀟湘路長能記。盎溢冰花。巖分雪浪。水佩風裳同倚。容華試擬。佇
夜月空山。冷梅初綴。各抱清懷。自流遺韻向琴裏。神人姑射正遠。借傳來小影。宜
笑含睇。幾惜娉婷。難評綽約。無語猶緘芳意。微香邈迤。要待得羣仙。便行瑤砌。望極
湖波。影寒雲更起。

江神子 柬孝逸

別離情緒又花朝。問江潮。未迢迢。幾日春陰。庭館坐無憀。到得黃昏簾幙定。釭綴粟。

暗還挑。月朦朧後雨瀟瀟。寄長謠。鎮魂銷。咫尺天涯。何處舊蘭橈。溼盡蒼苔渾不見。同過也。可憐宵。

又 題趙野航小羅浮山館前後懷人圖

近來容易觸離情。雨難晴。月難生。望去模糊。聽去太分明。卻想羅浮山館夜。人不寐。到三更。一重江驛一重城。見元輕。別元驚。溼了花朝。三五益淒清。竟夕沈吟綠讀畫。勞和我。一聲聲。

高陽臺 有圖仕女攜白芍藥碧桃花滿筐屬題

名惜將離。詞傳薄命。人閒自識名花。多種芳馨。數枝折作橫斜。分明合見瑤臺裏。又無端。攜向天涯。怕難尋。千里春心。好記萌芽。平生蕉萃相逢易。有前番顏色。誰護輕紗。便是仙人也。教誤了年華。要渠結伴空山去。更迷來。洞口烟霞。儘低回。讀畫屏風。展玉丫叉。

清平樂 酒娘餅

紅綾可似。略帶青春味。未必坼來成十字。小戶還防先醉。東風餅餌初香。更尋阿姥餘杭。阮籍何如束皙。大官要問公羊。

百字令 蔡友石觀察以贈公鏡堂丈探梅遺象屬題

水邊一樹。記年時。徙倚暮天空闊。吟盡冰壺春已到。此境和煙和月。意匠難傳。墨場誰繼。眉宇神猶溢。畫圖無恙。橫斜疏影疑活。應是人日題詩。徘徊欲寄。自向風前折。莫認清香清易遠。正釀枝頭深雪。恰比吾家。廣平賦罷。千古心如鐵。和羹滋味。後來還誦芬烈。

浣溪沙 新得厲徵君絕妙好詞刊本

不費黃金共翠裘。用朱竹垞事。客窗便可破閒愁。要將樊榭替蕢洲。西子湖波明寄託。南都事迹又研搜。古來遺恨至今留。

黃絹題來卷未多。烏絲界就字難訛。明明隔水似聞歌。餘事枉判心力盡。深情其奈古人何。冷煙斜日尙蹉跎。

八聲甘州 王四喜號花農深州人年十三四以色藝稱京師四喜部吾鄉某進士爲甘肅令以虧帑逾萬金下獄輦轂諸公釀金謀緩其死事未集花農初不識某令聞之倡助百金皆美其義不卻也因此名大噪此事隔十四五年今歲辛卯余客并州見其人尙在樂部中年長而曲伎益精並聞近工琴能畫蘭所習日上然猶在歌場求食則可知其淪落矣有感今昔爲填此解不可以王郎之曲紫雲之詞同日論也

住零箏斷笛對清尊。日暮思無涯。問當年顏色。無情風雨。摧損名花。記得鳳城春好。一曲動雲霞。何似并州地。目極邊沙。易水悲歌慷慨。道那人不是一例纖葩。漸蕭條場屋。心迹在琵琶。奈前番。未能痛飲。負酒痕。點點溼輕紗。金臺路。費回腸處。都被山遮。

摸魚子 夏詞仲藏毛西河姬人曼殊水墨荷花一幅索賦

憶人閒。十分春色。殘紅難問歸路。依稀芍藥豐臺側。可有舊蕤香處。秋又暮。更冷到、

年時尺幅留豪素。愁中看取。惜淡墨窗閒。荷花水面。不見機塵步。桑田後。催上徵車肯住。佳人還被君誤。名花易謝。荒園在。多少傷心會。訴詞再譜。怕畫裏芳馨。寂寞仍無主。前宵風雨。便寫出。亭亭已空去。影客夢共誰度。

南柯子

詞仲檢曼殊小傳不言其工畫疑是西河自作而以姬印鈴之又賦

此闕

小印明明是。生絹細細猜。學書會說倚妝臺。果否隨郎。參得畫禪來。白髮將催老。紅顏幾愛才。欲澆黃土寄餘哀。況有芙渠清影。共徘徊。

菩薩蠻

女史陳筠湘畫碧桃楊柳扇面星齋屬題

江頭瀾岸曾相見。年年處處思人面。無待祝東風。春光留畫中。問花花不語。香色尋何許。多恐詠花人。識花猶未真。女史自題云太白詩風吹柳花滿店香柳花有香始見此詩云云按柳花實無香言滿店尤不辭蓋店者酒店酒香滿店正風吹柳花之時當合下句讀之也

浪淘沙 題琇卿夫人畫白丁香花

多種費安排。結盡柔懷。一枝肯與月徘徊。瑣碎能傳香影出，留向深閨。紅雨溼蒼苔。芍藥遲開。風微尖處玉塵來。號作瓊花花也稱，那隔雲階。

洞仙歌 戴編修畫花影吹笙圖星齋屬題

好風碎處，送微香欲透。月未昏黃見花瘦。問疏星幾點，明滅如何，樓上意，已是玉笙寒久。露華知漸溼，石畔吟身，不覺泠泠著衫袖。恰稱到新涼，清樾遲眠，休閒了，參差在手。向此際，商量卷重簾，爲影裏依稀，絳河如舊。石湖詞借昭華三弄，以擬好風碎竹之聲，與上吹笙絕不犯，而江村欲改爲垂簾，則與花影不屬。又畫花影作桃花，而詞有絳河清簾亦不合。

念奴嬌 絨庭山抹微雲館圖

寫成寒景，記蓬萊閣裏，少游曾住。從古才人同韻事，傳得筵前新句。子舍春溫，堦鄉雲遠，回首山多處。闌干拍徧，此情應待重譜。須認翠箔精簾，牙籤鈿軸，一任經年

去。庭院好留清影在。風月那時相許。畫本攜將。吟懷未獨。莫說人如樹。故園消息。綠楊拖盡千縷。

浣溪沙

桐仙詠菊寫真

愛菊堪稱第一流。風花露葉費雕鏤。最蕭疏處最宜秋。

肯倩揮毫傳影出。還當把

酒與相酬。不辭斜日儘句留。

又

前詞意有未盡

珍重人閒有數春。曾辜沅沚與湘濱。底教畫裏著斯人。

好句漫將花比瘦。清言欲

屑玉爲塵。尋常風月不能鄰。

又

東曹良甫

又作恩恩出國門。幾番離合那堪論。二分明月憶黃昏。

門外馬嘶愁問路。眼中鴻

爪欲留痕。莫緣讀曲掩芳尊。

青衫溼

蓉郎來送

臨歧預約重相見。經歲路方賒。倚裝今夕。去鞭駿駟。來又昏鴉。也知病客。綺懷有限。別思無涯。分明同是。關河淪落。一種年華。

惜餘春慢 題扇頭畫蘭

一握纖纖。風來徐引。未識清芽深淺。分明夢影。層疊春心。并作葉低花軟。難忘人來坐閒。鉛粉親調。玉豪親吮。問能教長似。今年重午。客懷全遣。又底事、輕度關山。前番香草。自向懷中空卷。先防瘁損。更易模糊。好惜露華初泫。塵陌重相見時。留取舊紈。燈邊同展。奈十分蕭瑟。天涯吟到。五更將轉。

賀新郎

海內瓊花一。舊根芽。瑤京移取。放來清絕。何意數宵嫌夢冷。爲近冰肌玉骨。漸信得。花魂能活。坐起盈盈渾不語。弄明珠。在手琴橫膝。香欲軟。意先密。天街有侶仍蕭屑。惜芳馨。經年見後。隔多時節。箬裏新芽盤散芡。都是江鄉風物。道防了。長塗飢渴。更有素絲盈尺在。未分時。已料青衫溼。無過雁。寄消息。

念奴嬌 陳瀛東藏銅雀瓦硯

餘香分盡。賸漳河數曲，纏綿行客。踢徧荒煙，還漠漠。塵斷高臺百尺。飛去鴛鴦，竄來蒼鼠。土色藓成碧。陳根覓處，士衡惆悵曾積。況是此日摩挲，墨痕全滲，歲月過千百。七子南皮遺韻杳。記室風流如昔。手搦丹銘，背鐫草隸，點綴閒蹤迹。奚囊嫌重，古懷莫便輕擲。

又 娘子關

真人雲起，記燕犀欲動，晉陽宮闕。鞭虎驅龍，前日事，閨裏戎機同發。女子論兵，美人教戰，料理非倉卒。繡旗立處，雄關猶自嶢岌。已見塵滿中原，鼓行東向，閒道多能越。此處太行山極北。一隊先驚蒙戲。夫壻從軍，父兄踐陣，勇氣興焉勃。經過鞍馬，地名常未消歇。

沁園春 孟縣秋日用稼軒韻

開戶頑山，一望模糊。此閒又來。看牀頭盛夏，先燒石炭。窗前侵早，已積塵埃。跨衛兼

程。餐。梁。數。器。日。暮。心。情。何。壯。哉。深。秋。近。送。行。行。雁。字。慣。向。南。回。無。端。坐。守。空。齋。取
硯。匣。書。囊。隨。手。開。見。疏。疏。絕。豔。影。憐。砌。卉。紛。紛。往。事。曲。憶。江。梅。問。字。偏。多。論。文。未。倦。
桃。李。真。思。著。意。栽。江。鄉。遠。念。家。無。儋。石。不。任。徘。徊。

風。露。深。時。客。夢。難。成。萬。端。盡。來。步。空。階。暗。月。全。無。瘦。影。虛。堂。清。夜。不。見。浮。埃。車。上。衣
裝。燈。邊。書。篋。天。與。飄。零。真。信。哉。三。更。後。牘。重。尋。箋。譜。愁。斷。方。回。多。年。別。了。山。齋。更
何。計。歸。將。荒。徑。開。待。細。揩。昏。眼。枕。函。貯。菊。閒。眠。病。骨。帳。頂。圖。梅。坐。憶。家。園。漸。驚。搖。落。
叢。桂。庭。中。幾。樹。栽。連。蜷。處。聽。花。魂。寂。寞。儘。費。低。徊。

高陽臺 題陸瑤林悼亡詩用吳笛江韻

五。載。離。棕。三。秋。客。思。相。逢。忽。在。并。門。示。我。詩。篇。纔。知。瘦。了。吟。身。篇。篇。別。鵲。離。鸞。意。問
青。天。何。處。招。魂。早。知。他。有。夢。通。幽。不。哭。傷。神。悄。然。讀。罷。生。根。觸。念。室。藏。斗。酒。人。似
勞。薪。香。霧。清。輝。年。年。疑。斷。音。塵。傷。離。傷。逝。同。蕭。瑟。把。韶。華。久。付。啼。痕。隔。關。河。自。倚。西
風。難。住。蓬。根。

百字令 題張梅琴寒香古韻圖

當年難去。記幾枝向暖。放梅錯嶺。消息重尋何處有。負了空山雲景。閒遣青琴。試飛小雪。也隔天涯信。低回欲寄。塵中少此清境。不意共結遙情。尊邊愁易別。語長宵永。我說前游君故土。瘦玉團香俱冷。冷落關河。試繙舊曲。未必堪持贈。悠然掩卷。古懷還問三影。

沁園春 太原郡城重九陸瑤林用稼軒韻見贈因和之

佳節難酬。冷雨頻番。暮秋氣來。待傳杯在手。空傾白墮。登高縱目。尙隔黃埃。薄宦逢君。羈棲念我。昔日飛揚安在哉。星霜久。算此閒九日。已過三回。叢叢菊繞軒齋。想未必能將懷抱開。異眼中風景。地連燕趙。前時歌舞。人憶歐梅。紅袖香消。青衫淚漬。賸得愁根收次栽。勞持贈。到江涵雁影。歸路遲徊。

卜算子 得蓮卿消息

日下數行書。雲內三秋至。怕作從頭到尾看。只看相思字。更想情人時。爲說飄零

意墜葉紛紛客未歸。兩地情何異。

齊天樂 甲午孟春至皖上呈嶰筠先生

東風吹送江頭路。重尋舊游三載。露浥高牙。香清燕寢。又見牢籠山海。知音許速。更緩帶輕裘。雅歌情在。請展烏絲。看他樂府寄蘭苳。天寒記吟候館。對荒寒景色。無限酸碎。小隊曾經。高樓獨倚。此境何人能解。花添蓓蕾。被料峭頻番。儘教凝待。賞雨誰從。玉壺春要買。

百字令 嶰筠先生用洞簫詞韻見答又呈此解

研紅書就。付青徽徐聽。流泉音節。日坐春風前度事。此際分明重說。道路塵生。煙霄氣杳。懷抱緘冰雪。冷然自遠。轉嫌人境猶熱。試看繞屋梅花。許教微醉。已是連年別。認作雨深花意淺。惹袖香塵難滅。細拍新聲。更拈舊韻。欲慰心如結。江樓倚處。去波一片無絕。

滿江紅 蔡小石翰林官閣詠寒圖

臘破清淮。簾幕靜、寒增官閣。知鎮日、風清階樹。夢閒庭鶴。山色未能舒睡意。梅花不肯虛前約。趁暮天、三五故人招。吟離索。江上酒、停斟酌。卷裏事、尋酬酢。記圍鑪選韻。展圖如昨。關塞自憐銷歲月。詞章此後思京洛。待數篇、重疊寄遙懷。情長託。

瑞鶴仙 冒辟疆姬人蔡含畫水繪園圖

遠山無一點。對多少、亭臺儘費渲染。垂楊幾絲斂。正花枝明處。酒旗斜颭。句描太澹。細尋來、香痕易暗。料中間、曾著芳蹤。冷了翠屏珠簾。空感名園脩禊。捧硯人歸。賦詩情減。春光冉冉。閒窗下、舊圖檢。念雉皋當日。巢民老去。祇恐紅閨霧掩。但愁他、芳草和煙。又平畫檻。

青玉案

尋春已到花深處。又認作、花期誤。連日春寒空復度。敝裘難換。重簾猶下。祇是聲聲雨。花愁風雨飄零去。尚有濃煙罩花住。試乞軟晴天可許。春光能幾。春魂欲暮。不定隨輕絮。

又 題錢小南詞稿

詞人心迹無尋處。已儘把平生誤。一曲新成腔自度。漸甘寥寂。渾無情緒。掩卷思今雨。南雲北樹難歸去。幾載依人暮江住。豔福消來天卻許。閨中琴友。坐中花語。燕也梁閒絮。

又 送鄧子期入都

一天濃綠停鞭處。鎮極目長亭樹。尙有輕寒須自護。街衢如繡。簾櫳如霧。京洛消塵土。衆仙正待霓裳賦。梵字逍遙記前譜。難弟難兄應接武。桂華秋月。杏華春雨。好識長安路。

浣溪沙 題莊眉叔詞稿

織取雲霞入慢詞。譜將珠玉付紅兒。此中寄託定誰知。羈旅坐教人寂寂。不堪長對柳絲絲。江頭攜手莫春時。

蝶戀花 題李子喬詞集

妙麗天然成好語。定是前生。結得情千縷。似水年華過幾許。天涯處處多煙雨。難得相逢容易去。欲向琴絲。盡把新詞譜。無數綠楊連柳浦。高樓從此增延佇。

摸魚兒 題畫鍾馗

計年年、艾符蒲酒。人閒頻過端午。又從度索山頭至。當日鬢須如故。長劍拄。跨黑衛
鈴傳、偏蹋崎嶇路。擲揄任苦。趁醉眼朦朧。夜燈閃爍。祇認舊塗去。蕭條意。絕似天
涯倦旅。茫茫疑墜雲霧。元知有蓋張還好。也禦溼衣微雨。前望處。添一段笙歌。院落
留伊住。巾袍自古。更鞞著深雍。帶控廓落。鞭影破昏暮。畫作鍾馗跨黑衛。一鬼執繖
一鬼執燈前導。

又 六月廿四日爲荷花生日同嶰筠先生作

倚闌干、送來香氣。已消無限煩暑。亭亭早向淩波見。不待生朝先吐。人久佇。立廿四
橋邊。廿四番風數。良辰此度。正翠蓋擎珠。碧筒作罌。清露代芳醕。嫣然笑。忽覺相
逢舊侶。年年風貌如故。前身定託空明境。那染世閒塵土。憑寄語。已玉整方池。過了

瀟瀟雨。芳華誦汝。覓銷夏灣頭。水精域裏。更取冷弦譜。

高陽臺 和蔡小石詠同心蘭

香夢通時。暮煙濃處。同心一翦初開。葉葉花花。冰瓷如玉盛來。目成未許芳情獨。見分明。月地雲階。好攜將。證取前盟。更觸遙懷。玉堂人對瀟湘影。悵無言自遠有意。相偃佳話須傳。那同九九圖梅。碧紗與護雙雙蕊。想露寒早結胚胎。漫教伊冷到巖阿。空了亭臺。

擊梧桐 延秋

時序如遷客。看斗柄。偏是秋來無迹。暑氣仍留住。佇清意。一片精屏尙隔。潮波自去。樓臺欲暮。宜有西風信息。漫使涼蟬靜。奈葉葉正掩。園林沈碧。青女遙遙黃姑歷。歷不費人閒尋覓。記得回廊裏。算此際。定送微颺簾額。屈指銀河初轉。玉梭停後。便巧逢七夕。想池頭。冰肌無汗。零露方積。

鵲橋仙 七夕詞同蔡小石鄧子久作

鎮相望。遙天裏。年年肯動離緒。試重尋。當空際。欲寒風露。銀河深淺可識。是舊來曾渡。長寂靜。到夜鵲飛時。碧雲方暮。此夕巧須乞取。對人間、綺窗朱戶。愁織錦自成。漫勞機杼。緘情脈脈難訴。待霓裳能譜。屋端橫處。怕明星將曙。

鵲橋仙令 小石屬題七夕畫意

模糊天闕。徘徊雲影。一望迢迢無際。仙山樓閣絕塵寰。奈也有、離愁深繫。良期總是。常年今夕。待得二更風細。半規月上好簾櫳。又不覺、涼侵半臂。

念奴嬌 黃又園憶潮圖

無雙江夏。記年來、傳徧天涯名姓。故里泉唐江上。是潮落潮生難定。握手相看。廣陵八月。但覺波如鏡。東南趨海。三千強弩猶勁。能寫鐵騎鏘鳴。銀牆陡起。事比前游勝。我昔牽情今入夢。且與圖中同聽。江月如斯。海天未遠。筆底增秋興。易增遙憶。玲瓏山館人靜。

沁園春 亦名壽星明嶼筠先生以此體製詞爲友石廉訪壽意遠而辭工可

謂高唱絕羣言矣。廉訪命工譜之，以付管弦，亦勉效之。

置酒庭除，再拜陳辭。且傾數觴。正境連楚越，誦歌不絕。算周甲子，歲月方長。雪釀寒餘，梅舒萼後。清到枝頭，來暗香。新詞詠趁雲初覆。竊月未昏黃。宮商細與評量。怕管急弦繁意渺茫。看氍毹鋪地，重披雲錦，流蘇蕩影。更譜霓裳。吉語分明，心聲曲折。何必吹笙弄鳳皇。簾旌動，定逡巡難去，問夜渠央。

層疊屏山，曲彙闌干，細尋近題。料今番會合，祇談風月。昔年投分，已隔雲泥。臘鼓迎時，霜鐘動處，古調翻來，弦月低。沈吟久，要暫停斟酌，把碧玻璃。長隄流水東西。幸介壽、公堂此日躋。對眼前絲竹，儘堪陶寫。手中壺榼，尙賴提攜。廣廈千閒，寒天三九，獨客江湖路未迷。聽歌意，爲竹枝韻好，聊和銅鞮。

又 甲午季冬嶧筇中丞友石廉訪先後舉六十觴時陳鐵君同年客節廨年亦六十匿其月日中丞以東坡生日率子弟爲之介壽作詩以贈因填此解
奉和

皖水龍山。卻倚層城。君爲寓公。值高牙開宴。先歌降嶽。外臺置酒。又祝生嵩。都是耆
齡也。逢周甲。總有生辰。今歲中。情深處。擇來朝爲壽。製句偏工。玲瓏弦管。愆愆。使
時序。將闌氣已通。想未經游者。聽蟻巴峽。何曾坐了。磨蝸身宮。聊與先生共追千古。
定可稱觴。此日同齊。年久。獻巴人一曲。我愧雕蟲。

蕉葉抽心。桂樹分叢。共此旦晨。記昔官百里。素稱廉吏。行年六十。尙作羈人。早種芝
蘭。舊栽桃李。猶隔重重江上雲。星回矣。問生朝約略。認假疑真。良辰重絮芳尊。借
壽介坡仙。進一巡。賴鄭公節度。草堂爲啓。侯芭弟子。絳帳同親。對酒當歌。先生且醉。
香雪融來四座春。尋前約。正天涯未遠。好結比鄰。

念奴嬌

用胡城東韻題蔡友石廉訪喜雨酣春圖分巡鳳陽時所作也

知時好雨。倩長空。留住東邊雲腳。襲襲輕風。庭院裏。更與枝頭微掠。海樣春深。煙中
香滿。莫解相輕薄。闌干倚處。豔情清思。難著。已是霑足郊原。歸來小隊。宴坐垂晶
箔。正有名花能掩映。佳句尊前宜索。紫膩紅嬌。冷銷圓印。壓徧芳條弱。輕綃寫出。共

來展向江閣。

千秋歲引 嶰筇先生示近詞

沃土瀕江。豐年入臘。近水遙山勢方合。乘風檝來維古岸。衝寒蕊放吟官閣。百城煙。萬家意。相酬答。開取尺編然絳蠟。琴趣已傳情周匝。一片清聲不容雜。明窗暫陳蘇季篋。高齋許下陳蕃榻。雨晴時。待攜向。江亭榭。

高陽臺 乙未人日立春同嶰筇先生

山樹含煙。江波皺縠。暖風早轉年華。纔到鞭春。恰看翦勝家家。城南怕覓登高處。爲層樓。總被雲遮。任新來。柳放長隄。草滿平沙。誰教青鳥通消息。奈剛逢人日。人在天涯。東閣官梅。數枝濃傍檐牙。已知此後關河隔。對冰姿。遙思偏加。儘徘徊。香霧侵簾。弦月籠紗。

唐多令 李式齋舊夢圖

初日透疏櫺。微風掩畫屏。算唐梯、幾級曾經。隔斷陌頭楊柳色。怕此際、夢纔醒。瘦

影太伶俜。濃花何處汀。到天涯。暮雨冥冥。春事闌珊。春恨遠。獨自箇。小樓聽。

蝶戀花 繡毬花和絨庭韻

絕憶年時花解語。欲燃芳枝。可奈連番雨。但覺模糊留影住。昏黃月底看如霧。曾惜春歸尋幾度。號作瓊花。早是傳聞誤。回雪團風空自舞。荒園零落今無主。

念奴嬌 過黃州用東坡赤壁韻

扣舷西上。到黃州。未異山川風物。玉局仙人尋已杳。徒見千尋絕壁。寂寂傷今。紛紛弔古。懷抱如冰雪。當年詞賦。幾篇應讓雄傑。何處能覓旌旂。百人山下。贍江花空發。本與烏林相遙望。戰壘承平全滅。也許游人。據情隨地。自恨星星髮。洞簫聲斷。下弦猶有涼月。


憶舊游 黃鶴樓下放舟

趁江風送客。萬疊滄波。一葉扁舟。目極空濛際。爲雲閒鶴遠。獨踟高樓。昔年適爾。相對遺蹟。那能留。動道路情懷。人將西去。水自東流。悠悠。到斜日。又一片回颿。偏打

船頭欲住辛夷槳。尙望中隱約。鸚鵡芳洲。洞庭渺渺千里。山色定含愁。但引得羈人。沈吟歷盡江上秋。

滿江紅 倪玉女畫石黃石齋題句障子

黯淡苔紋。蝕不到、零章斷墨。記當日、雲根纔剗。遠煙猶直。瘦立能令圭角露。空撐那借藤蘿色。是昔賢、餘事各遺留。名猶識。漳浦句。據胸臆。上虞畫。刪荆棘。看素屏張了。莫教輕拭。白石粼粼人共見。青霄漠漠蹤難卽。對一重、清峭碧無痕。虛堂側。



三十六陂

漁唱

運彙



王敬之

字寬甫。江蘇高郵人。嘗北游燕趙。與瘦生交最篤。故集中詞題所宜軒者爲多。詞宗南宋姜夔。故題曰三十六陂漁唱。蓋取白石句以名也。白石自訂詞集最精審。敬之不多存詞亦如之。

三十六陂漁唱

高郵王敬之寬甫

揚州慢 送春和蘿谿

啼血鶻枯。抱香蠶散。砌紅萬點愁人。看繁華過了。臙幾樹斜曛。漸濃到。王孫草色。馬蹄歸也。空蹋芳塵。問離懷。新釀天涯。多少酸辛。恨餘賦筆。儘銷磨。風雨黃昏。只冷落當時。星旂一片。留與招魂。碧漾幾灣流水。三生幻。絮果萍因。對無聊。圖畫餘情。癡喚真真。

桂枝香 檐馬

懷人正苦。又撥觸年時。最難忘處。縷縷情絲無奈。晚風庭宇。自從冷落游仙夢。算重搖。佩環來去。月斜蟲咽。酒醒雁杳。漸催愁赴。傍一枕。荒郵倦旅。此鈴語。郎當應更淒楚。疊寄吟箋借寫。側商新譜。索伊敲和玲瓏韻。怕孤檠。遙夜難度。數聲纔歇。又飛落葉。響連疏雨。

三十六陂漁唱

好事近

齋閣夜迢迢。酒醒一燈明滅。夢裏梅花千樹。坐江城風雪。擁衾吟冷撥鑪灰。愁思欲侵骨。巷口柝聲敲遠。隨紙窗殘月。

南歌子

未醒愁春夢。愁濃夢亦癡。接天煙草望淒迷。又是淥波歸櫂去年時。溼了楊花路。楊絲攪雨絲。最高樓外最高枝。好在流鶯占得盡情啼。

一萼紅 題重脩水繪園圖

小橋西。染一痕煙水。殘墨寫淒迷。勝地鶯花。中年絲竹。當時傳唱春詞。頓海上、騷壇銷歇。問滄桑、陳迹白鷗知。徑窄蘼蕪。牆高薜荔。幾度斜暉。上已何人載酒。只漁舟橫處。碧漾琉璃。腰斧誅茆。肩鉏種藥。者番重整柴扉。料不厭、羊求剝啄。待古歡、今雨各招攜。怕是游蹤難定。敲笠來遲。

南歌子

殘雨孤舟暮。西風野水寒。一燈搖夢入湖煙。夢醒鷓聲鴉軋。荻聲乾。吟譜哀蟬外。行蹤斷雁邊。攬和情味苦還酸。那更酒杯濃浸木瓜山。

齊天樂 藝菊者以竹器擔菊賣之爲賦菊擔

杏花深巷春聲寂。霜枝一肩重到。荷蕢餘工。承筐活計。新試涼天晴曉。湘筠製巧。學麀眼東籬。更誇輕小。采藥籃邊。伴他樵路去來繞。山翁腰腳尙健。壓秋田相載。堪畫新稿。落葉荒街。西風野市。索價今年多少。寒香賣了。賸疏影隨人。澹篩斜照。卸向茆檐。落英閒自掃。

又 試仿陸放翁菊枕之製賦和星階

色絲縫倩。綉蘭手。都收半籬秋碎。側向藜牀。搯餘筍席。輒便涼宵人醉。華胥夢擬。儘臥穩羲皇。北窗香細。摘豔醅醲。漫同春莫睡。鄉味。清吟頻喚夢醒。悵消磨好句。年少重記。采想新霜。敲聽舊雨。不判離人高士。梅花帳底。有化蝶魂歸。戀伊芳意。約踐登高。曉天推更起。

浪淘沙

燈暗酒人醒。雨夜淒清。風吹點滴竹窗聲。無奈寒枝棲不穩。鸚鵡更更。愁恨要都平。除是天明。來宵莫上小樓聽。免觸關山孤客夢。前度淋鈴。

憶舊游

打江波去住。慣趁秋風。白下門前。舊約尋僧寺。幾銷磨旅思。禪榻茶煙。任呼莫愁名字。愁緒轉年年。仗月夕招邀。攜筇鞞屐。酒聖詩仙。鷓鴣弦。撥餘恨。聽玉樹清歌。二八雙鬢。十里秦淮水。送橋邊花底。多少燈船。一鞭軟搖歸興。驢背六朝山。爭過客窓。沙鷗自靜雲自閒。

寄低篷釣艇。十二年前。曾渡胥濤。破楚門無恙。蚤荒邱冷落。劍氣都銷。俊游古今誰繼。吳市一枝簫。只短簿祠邊。瀟瀟暮雨。譜入檀槽。迢迢。淥波路。任去鷁搖愁。燈火清宵。共載人何處。賸金閨亭子。煙柳長條。水程易流歸夢。鐘外過楓橋。待鄧尉探梅。重來酒伴雙屐邀。

倒金波小盞醉眼模糊望遠任城。滌筆泉邊路。記春帆輾卸。沙岸蕪平。綠窗坐開齋。開叢竹午陰清。更曉枕先醒。傳來鐵塔百八鐘聲。行行市橋外。有李杜游蹤。分擅詩名。荇水南池暮浸天光樓影。秋碧空明。掉頭去隨津鼓。風雨短長亭。只紙墨番番。遺文漢魏歸擔輕。

憶塵襟浣處。十頃玻璃。柳外明湖。上巳東風暖。儘花光四照。占得樓居。濟南大明湖水穿學使署。經四照樓下。王阮亭送施愚山歸宣城詩。所謂四照樓前水。是也。漾波海棠紅遠。四照樓下有石碣。顏曰海棠汧以水上一樹海棠得名。煙雨七橋疏。香祖筆記環明湖有七橋。曾子固詩從此七橋風與月。夢魂常到木蘭舟。更趵突泉邊。嬉春士女。寶馬香車。菰蒲轉鷗路。望歷下斜陽。名士亭孤。唱入滄浪曲。想蘋洲詞譜。長笛橫初。別懷五年飄瞥。秋老鵲華圖。擬畫裏浮家。輕蓑小笠。隨釣徒。

減字木蘭花

春波路轉。影度風蒲斜照遠。花界黃昏。月下門敲水上村。江湖舊侶。自在行雲隨。

去住。酒醒燈殘。聽雨孤篷曉枕寒。

蝶戀花 小山舊有小燕銜花春一片之句。今不載遺稿。蓋歐心佳語埋沈。故

紙堆中者不少矣。因廣其意。卽以識感。

柳外紅樓簾半卷。雨後寒輕。纔試三分暖。小燕銜花春一片。梁閒舞入香風軟。吐
盡蠶絲歸夢幻。唱冷秋墳。記否情深淺。故紙雲煙吹易散。烏衣還自拋雙翦。

鷓鴣天 憶丙子殘秋夢中得句云。水香曉閣荷猶卷。風軟晴隄絮自團。似詠

揚州莫春風景。北歸三載。屢虛勝游。因用夢中句譜作一解。以志別思。

花事江城幾度殘。記招游侶趁齊紈。水香曉閣荷猶卷。風軟晴隄絮自團。吟舊句。
倚闌干。春衫薄。耐麥天寒。何時尋夢紅橋路。料理扁舟載釣竿。

菩薩蠻

清霜一夜楓林瘦。秋衣漸覺新寒透。悵望小橋頭。夕陽紅半樓。歸心隨去艇。水市
搖燈影。仗酒破愁城。酒闌愁更生。

減字木蘭花

萍蹤去住。淮甸江鄉。隨雁鷺。紅樹揚州。還蹋斜陽上酒樓。楚天霜重。遠寺寒鐘撞曉夢。愁裏懷人。六六湖頭六六鱗。

豆葉黃

清霜二十四橋秋。衰柳殘荷各自愁。放鴨人歸一葉舟。夕陽收。水上鐘敲煙外樓。

酒泉子 邵伯埭舟夜

來記湖城繫別緒。柔艣一枝搖。暮雨茱萸灣下。碧流長。客路小重陽。花村十畝尋秋徧。水調揚州聽。又倦。浮家還泊雁邊灘。霜月柁樓寒。

一萼紅 臘八日小梅手箋招飲醉後索冰梅一枝而別

掛幽懷。是南枝消息。應有一分開。凍雀棲煙。古蟾照雪。與誰閒鞞吟鞋。蔞小幅。蠻箋秀句。奪遙山。寒綠寄新裁。九九圖殘。三三徑冷。六六鱗來。不羨雲堂。餛飩粥。只禪逃彌勒。米汁長齋。坐閣尋詩。巡簷記夢。勝佗花雨經臺。更分取。冰心供養。共水仙。鬢斗

好安排。抵似紙窗疏影。鴉背親栽。

掃花游 病餘寡寐多。夜吟倚此用志寂寥。

一燈紙閣抱寂寞。冬心暗敲寒句。擁衾細譜。按歌頭近拍。柝聲來去。子夜迢迢。最是無弦調苦。遠懷訴。問聽向夢中多少詩侶。三影消綺語。莫喚起熏籠。雪兒低度。唱予和汝。有吟蠅凍鼎。月廊閒煮。別調宮商。欲向天涯寄與。更延佇。寫烏絲。小窗清曙。

滿江紅 文游臺蘇東坡王定國與孫莘老秦太虛燕游處

突兀高臺。文采照湖光。卅六七百載。龍眠圖畫。勝游誰續。賓主東南三雅醉。海山題詠千豪雋。惹半生。讒燄是才名。孤臣逐。苔莓徑。尋芳躅。能幾占。林泉福。只谿毛頻薦。冷澆醺醪。斗野亭餘屋。采爛玩珠樓。臙波紋綠。讓登臨。閒擊隻雞來。漁樵局。

又 瞻衰堂宋提舉董某爲張魏公浚建

木落堂空。尋都督。紹興陳迹。甚衰繡。視師淮甸。駐紆籌策。劇盜湖氛降後靜。轉資血戰他年力。試評量。功罪抵苻離。駒聲息。忠定去。中原失。長腳相。南朝逼。任荷戈諸

將憤填胸臆。進退賢奸成再誤。空餘天水傷心碧。更夕陽韓岳弔荒祠。回雙屐。高郵
舊有紹興三鉅公。祠祀岳忠武王韓蘄王及魏公。

又 宋端平二年榮全據高郵叛官奴毛惜惜不爲行酒見殺事聞贈英烈夫
人詳宋史今有祠在南城內墓在南城外

微矣官奴。薶碧血芳名如昨。勝學士高譚大節。到頭還錯。惱問朝廷何負汝。汝曹反
賊公然作。有海青一例共千秋。拋絃索。紅顏命兒真薄。青史筆人爭著。便生涯歌
舞也休慚恻。英烈崇封抔土在。叛臣朽骨今安託。鑄頑金。應跪墓門前。昭元惡。

又 承天寺元末張士誠據作天祐府

棟矢東來。肆竊據檐鈴還說。說殺運中原豺虎。草間雄桀。受撫受降降亦叛。空濺太
守心肝血。惹陰風忠憤卷長湖。濤如雪。鹽徒散筓吹咽。僧徒聚鐘敲徹。問土花折
戟。蚤銷鋒鐵。回首寒山楓樹外。張王舊第灰飛滅。只燈龕古佛悄無言。觀塵劫。

虞美人 東阿旅次

篝燈影裏留人住。懶下槃飧箸。茅柴老瓦賣山廚。漫想真珠紅滴買春壺。木棉裘薄寒初透。況是詩肩瘦。三分惆悵到心頭。枉倩四條弦上撥無愁。

南鄉子 九日友人攜酒文游臺作登高之會有以他客過訪不赴者譜此調

寄示坐中有催租敗興之比

臺古碧梧秋。短艇招尋載酒游。游侶當年苔印屐。名流。乘興曾防敗興不。餓字欲題休。風雨城中最易愁。仗此客來催韻事。冥搜。成就詞人一唱酬。

憶舊游

坐昏燈雨夜。點滴秋心。訴倩寒蛩。去住懷人慣。儘江花淮月。十載愁濃。尺書更遲天末。聽杳北來鴻。怕曉影晴窗。潘絲兩鬢。添入青銅。怱怱歲華晚。任舊夢模糊冷了。游蹤落葉長安道。記疲驢鞭著。蹋徧西風。日歸又隨鷗伴。水宿幾孤篷。正別緒回腸。荒城一杵何處鐘。

洞仙歌

陸放翁詩自注鄉人植竹取蟹謂之蟹椹卽天隨子漁具錄中所謂

列竹於海濱曰滬。吳人今謂之斷者。吾鄉甓社湖亦有之。

蓑邊風雨。仗茅茨低苦。夜影蘆花一燈閃。看樹來。柵短編比。簾疏排水口。一樣莎礪能占。稻芒輸已罷。小作句留。故態橫行料應斂。遠響過烏篷。載酒持螯。定何處。斜陽繫纜。又漲落。漁梁試寒時。賸歷亂枯萍。白黏千點。

卜算子

斜照送兵鴉。低掠寒蕪去。接翅城頭作陣回。聽似風和雨。蠻語費商量。選徧池邊樹。一樣棲遲未穩心。分付燈窗句。

轉應曲

寒夢寒夢。夢被詩魔調弄。醒來吟落燈花。燈暗紙窗月斜。斜月斜月。巷口柝聲敲。

酒泉子 邳州

舊颺鞭絲沂水路。三載春船重喚渡。吹勻柳色曉風輕。作意攢清明。餘寒消遣荒村酒。釘惜蔬槃庾郎韭。燕來時候憶鄉園。筍賣過頭番。

摸魚兒 陶然亭晚眺偕淮南故人

度楊隄、一條波影。危闌來倚清曠。遙分萬笏西山綠。深染半篙新漲。耽勝賞。惹蕩笠生涯。陡作江湖想。誰催去槳。肯載箇漁竿。此中小住。暫與謝輪鞅。蒼苔壁。碑版摹看無恙。風鶉詩墨留唱。當年小築塵沙外。忙裏幾成幽訪。消悵惘。儘讓我鷗羣三五閒來往。蒲風弄響。又吹送游人。去尋鄉夢。煙水夢邊漾。

山亭宴 南歸道中賦柳絮

綠陰黯澹長亭樹。點行程、一襟秋緒。晴雪枉團成。料不數、芳妍到汝。午橋輕趁落花風。也作伴、殘春歸去。歸去碧湖頭。可又惹、萍波住。濛濛撲面春街路。憶平分、軟紅塵土。蹤迹太愆。儘寫照、飄零倦旅。停鞭凝望最迷離。試尋夢、天涯無據。除是便沾泥。問有甚、禪心悟。

賀新涼

瘦馬紅塵道。記蘆溝、高風黃葉。去程秋曉。人海三年勞遠夢。雁足平安催報。更起向、

長安西笑。歷碌氈車殘雪岸。輾餘寒。捆載圖書到。春酒把。別愁掃。尊前喚賣將離蚤。又猛被香風吹入。一鞭斜照。渡影滹沱河上水。依舊行蹤潦倒。只枯管。添些詩料。不染松煙題驛壁。怕重看。鴻爪傷懷抱。書故紙。寄同調。

漁家傲

菱葉平田連荻渚。風帆滿掛鷗邊路。路轉漁莊幽絕處。和舊侶。重聽篷背蕭蕭雨。一宿曾尋禪榻住。移舟春岸煙鐘暮。試續三年行篋句。吟更苦。秋宵秋士秋心訴。

蝶戀花

游屐燕南春盡後。憶是紅芳。擔賣豐臺候。婪尾花前婪尾酒。鞭絲軟入停杯手。歸興茶瓜消夏九。風雨燈宵。作弄新涼又。江海萍蹤能定否。秋衣準向天涯授。

菩薩蠻

牀頭藥裹纔拋棄。雨窗乞酒涼宵醉。殘雨泣蒼煙。欲晴難準天。閒愁天釀就。人共秋花瘦。秋夢傍花尋。一蟲愁外吟。

陌上花 春盡揚州旋次倚寫悶懷

當時水調從頭歌起。夜篷悽韻。廿四橋邊。吹到幾番風信。落紅一點燕支淚。先付濕波流恨。恨而今枉是二分眉月。照餘潘鬢。更餘醒曉枕。疏鐘撞夢。夢裏繁華都盡。晚晚年光。細雨暗愁催儘。欲尋燕外春歸路。應待夕陽晴穩。料多情。只有隋隄風絮。趁人飛緊。

南鄉子

情黯黯。別恩恩。一湖涼月一帆風。夜半湖風吹月墮。愁無那。水鳥呼人秋夢破。

虞美人 題山小四面

白鷗飛滅餘霞卷。渺渺江天遠。碧山斷處寺門紅。好似樓臺北固夕陽中。誰臨舊稿描雲水。惆悵無名氏。倩伊添箇釣人舟。畫我乘潮西望秣陵秋。

浣谿沙

窄地簾波睡起遲。春寒作弄雨絲絲。養花天氣困人時。燕外午風吹驟暖。破雲一

隙漏晴暉。簫聲巷口綠陰肥。

賀新涼 新製詩屏用揭友生唱和之作

半壁花箋聚。認才名、芝泥小押。古歡今雨。一扇橫遮無四摺。仗與風騷作主。幾封塚、
筠筩來去。斷句雜聯收拾夥。樹新裁、舊製圖書府。較我輩、最佳語。春江晚景休描
取。看詩中、都饒畫意。臥游應許。從此雪鴻尋爪迹。省我巡牆繞柱。怕步韻、枯腸搜苦。
檢點煙雲題字缺。擘烏絲、別倚新聲補。黏面面、足吟譜。

南鄉子 旅感

落葉滿荒坡。蕭瑟旗亭倒叵羅。醉酌二分明月影。婆娑起舞愁邊斫地歌。故里渺
滄波。霜信蘆花遠夢多。灑墨西風酬雁字。和佗一樣天涯喚奈何。

渡江雲

露蛩吟夢破。花陰月午。消受一窗涼。試烹前夜雨。石銚甕甌。小淪水芽香。迢迢別思。
共麗譙、秋點敲長。空爲檢、雲箋魚腹。綺語細評量。詞場天風海雨。滴粉搓酥。儘分

傳餘響。誰更唱。孤村鴉點。流水斜陽。於今便與修簫譜。怕華顛、孤負吳娘。贏得是殘宵獨坐迴腸。

木蘭花慢 疊和友人寄懷之作

抱涼襟似水。待籬落。一分花。望雁影橫邊。月波千里。秋思誰家。煙霞謝伊寄語。仗箇燈挑起。認風鴉。細數蓬蹤去住。詞人漸感年華。天涯瘦馬倦塵沙。尋夢也都差。更畫裏江城。迴帆陡聽。鼓面先槌。兼葭只招舊侶。不愁迷鷗路。碧谿斜。應約霜螿。斷起旗亭。蒼酒同賒。

燭影搖紅 中秋月夕雨窗招集酒伴放舟城東共領閒鬯病夫未能從也倚

此書寄

落盡紅衣。渚煙欹倒。枯荷柄。撈蝦呼鴨。碧澄波。誰占秋千頃。著箇尋詩去艇。免空拋。圓蟾夜永。酒邊應欠尺八清觥。和伊高詠。寂寞荒居。杜門秋士愁和病。一蟲幽砌咽。還吟喚夢江湖醒。小步空階瘦影。徧支筇。蒼苔露冷。冷懷還寄。插帽黃花。後游誰

訂。

龍山會 九日文游臺載酒登高故事。也有寄詞申約者。疊和。

冷剔蘭缸燄。試展箋雲。不似春詞豔。游情渾未減。東山路。約準鷗羣閒汎。古興與秋心。蚤牽繫。寒谿短纜。擬招佗。西風落照。共穿葭菼。揚州舊夢尋難。半里花村。駐屐年時。占鴻泥重檢點。登高眼。莫誤平山堂檻。今古各才名。便例是。題餞未敢。合商量。枯豪著語。酒旗茅店。

木蘭花慢 抱疴不得作江上之游。譜記惆悵。

畫余懷渺渺。欠水墨。渡江雲。只花底燈船。清溪幾曲。尋夢無因。銷魂那株細柳。料而今。憔悴倚斜曛。我亦秋來病起。藥鑪還伴吟身。詞人風月評論。添鏡裏鬢霜痕。悔驛壁僧窗。管枯豪禿。種就愁根。逡巡罷鑽故紙。便攤書。不到送窮文。望遠煙籠塞水。古懷分付鷗羣。

龍山會 村居正勞。遠想忽得友生寄詩。譜此爲報。

悄被流螢扇。招到西風。作弄秋情淺。夢來容易斷。牽遠想、還引藕絲成綫。綫綫作長繩。可能綰、年華暗轉。只荷葉、員珠漾雨。貯深清怨。回頭竹裏柴扉。拖屐支筇。趁月何人款。露枝涼夜。泫憑蟋蟀。占了秋花庭院。寂寞水西村。鎮鷗外、湖天吟戀。爭禁佗、尋煙語冷。素箋愁展。

蹋莎行 秋齋小病消遣旅懷

半老年華。長貧身世。松煙一寸研愁記。濃書秋葉付東流。要佗載得濃愁起。寄阻當歸。拋荒遠志。偏開藥裹供憔悴。雨窗扶病坐黃昏。一蟲吟咽苔花砌。

長亭怨慢 秋村雨夜

又敲緊、山窗涼雨。夢溼天涯。險迷歸路。病骨支愁。爭禁消息。鎮延佇。錦箋重寄。還曲折、柔腸訴。苦語要分明。儘剔短銀缸蘭炷。淒楚。傍秋宵蟲砌。那比燕簾春午。將涼替暖。恁一樣、小年難度。只孤坐、野水荒村。欠街柝、聲聲敲數。聽攪樹西風。難得栖鴉啼曙。

解連環 雨艇莫歸燈窗據悶

碧搖燈暈。又湖雲送雨。釀人孤悶。聽不多、篷背瀟瀟。爭打入秋林。者般淒緊。漲落谿痕。要量減、旅愁分寸。奈空階點滴。冷閒吟蟲。暗惱星鬢。香銷木犀一瞬。餉餒槃望杳。佳節空近。幸水村。不怕催租。只詩事城中。寄箋無分。雁是來時。欠一陣、蘆花風信。盼苔邊、破扉曬曉。放晴未準。

摸魚兒

誦瘦生過所宜軒感賦之作故交零落不堪回首亦不能已於言

寫秋花、半牆疏影。涼天容易斜照。秋心落得聯秋侶。苦語贈宜同調。人漸老。看愁裏、冬烘短髮今頭腦。蠶絲未了。儘寄託遙情。美人香草。留待驗鴻爪。弦詩地。舊雨聽難重到。遺箋塵壁應少。深宵一笛吹孤月。賸記那時懷抱。離夢杳。付禿帶山童。落葉和霜掃。新醅賣蚤。好商略消寒。暖鑪雪屋。百疊醉吟稿。

賀新涼

疊和虛白子酒閒感興

新創清愁稿。在鴉邊、西風野水。小樓殘照。冷入苔箋魚腹字。根觸當年黯抱。消受幾

黃塵烏帽。折徧江南江北柳。更疲驢。落葉長安道。纔放準。故鄉權。初心變滅雲煙了。問黃花。如卿晚節。酒徒多少。投筆從今無用手。只有持螯尙好。約芋火。圍鱸還到。醉裏寒宵催鉢韻。寫空中。語耳風情老。消百感。仰天笑。

暗香 一柳居分詠梅花故實得白石清詞以白石自製腔詠之

亞枝雪屋。對小窗畫影。高人誰讀。唱冷玉煙。落紙新聲寫幽獨。詩興揚州便好。應吟闕。烏絲箋幅。妒豔福。脩到詞仙。題與刻寒竹。豪禿。句難續。奈舊譜翠禽。夢遙紅玉。畫樓度曲。笛空江城幾吹促。惆悵歌珠杳後。花亂落。石湖波淥。又聽讓。荷露底。短腔按熟。

疏影 星階攜酒所宜軒集同人詠梅影

離魂綽約。印一痕冷墨。移上簷角。卻怪銀蟾。虛寫橫枝。不染綠跗紅萼。輕冰破處湖波靜。也照見。疏疏籬落。省那人。纖手呵溫。半樹曉窗描學。仙夢茫茫去杳。翠禽悄更下。應誤寒啄。雪逕分明。花隴迷離。雅興平章無著。冬心供養銅瓶短。又數點。欹斜

燈閣。只誑他、鐵腳探春。未飽一番狂嚼。

賀新涼 疊和東阿客舍題壁之作

粉堦徐方數。颯征衫、柳條風起。馬頭塵土。百五光陰寒食店。小憩關河倦旅。儘燈壁、評量題句。句好應輸紅杏開也。廉纖惹得霑衣雨。都溼了、送春路。生花枯筦春休妒。渺天涯、年時爪印。總無尋處。翠袖殷勤山市酒。曲記銷魂前度。奈芳意、而今遲莫。人海浮沈頭易白。撥無愁、怕聽琵琶訴。偏夢裏、一鈴語。

虞美人

停鞭又是斜陽候。草草三杯酒。夢邊敲枕暗油缸。孤負春風弦索馬頭腔。分明說與愁人道。儂只陪歡笑。紅顏一霎鬢如絲。看取桃花明日是空枝。

虞美人 趙北口

午風客路黃塵裏。耐得鬢眉澆。鞭絲搖上赤闌橋。洗眼荻苗波影碧迢迢。似曾相識閒鷗鷺。我亦漁鄉住。又尋水驛去停驂。欠箇吳篷小泊夢江南。

疏影 寒燈

孤檠半壁。借一星芋火。纖炷然夕。竹屋深窗。瓶膽梅枝。銀白黏邊描黑。冬心穩句宜。催雪照炙硯。詞人吟索。最惱他、雁喚無眠。舊事者回重憶。難忘相親破卷。不辭指爪凍。殘夜刀尺。鼠眼窺頻。雞口啼殘。莫話熏籠愁臆。燭昏雨細。紅羅帳。料未要、春情留得。漸一籌。挑盡霜更。還又冷蟾簾隙。

蝶戀花 題蛺蝶畫扇

遲日紅邊新綠長。小陣東風。扇得春情蕩。好夢迷香團不放。一生花裏成癡想。研露傳伊金粉樣。不信金銷。粉褪歸惆悵。別翦齊紈看筆仗。蟬枝淡墨描秋響。

摸魚兒 裕園者夏筠莊侍御遂初之地也今年荷花極盛京甫邀客招涼竟

日

占清華。半陂香水。虛涵涼曉風露。林泉小築成高臥。抵得木天延佇。今舊雨。早會散蒼英。別聚閒鷗侶。前遊認取。認楹帖鐫留。茶經酒政。行樂及時補。南山下。先隴遙

連別墅也留曾釣遊處。可帆亭子荒波外。賸有砌苔蒼古。先文肅別業在天長故潘氏可帆園也中有可帆亭漁唱譜甚綠意紅情。稱得詞仙語。吟懷訴與。只畫舫紅橋。揚州夢憶。花壁四無暑。

摸魚兒 友生訂約消寒醉鄉身世衰意可嗟

信前身。緼人窮薄。不辭生世蟲蓼。鄉園同氣儒酸腐。各有菜根堪齧。荒徑掃。約三五。攜尊脫略來傾倒。花邊醉好。儘風雪圍鑪。歲寒需暖。吟待打春到。春雷便是仙凡換了。平生榮願都飽。幾多千佛名經客。百悔轉追年少。吾輩老。況投筆而今已欠從軍蚤。林泉舊稿省數尺生綃。鷗波遠夢。他日畫離抱。

賀新涼 所宜軒前去年移植老梅春深作花

獨拗黃花地。幾霜天。蒼涼寫照。澹懷秋士。隔歲花光移換得。開到北枝春蕊。賺仙夢圓成容易。夢暖東風冰雪外。儘交游。傲幸穠桃李。唐子西桃李盛開梅花尙存數枝詩向來開處。當嚴冬桃李未。在交游中見。宋張邦基墨莊漫錄。看一樣。下禽翠。惜香

別有屏帷裏。倩黃瓶、和苔供養。酒邊烏几。我只小山閒位置。領受斜陽千里。笑樹木、十年遲矣。準數羹材無分到。有喜神、描好酸根蒂。吟玉照、舊題字。

又 讀星階哭友之作悵然有述

譜入淒涼犯。繞玄絃、酸風冷雨。作成愁黯。虛白樓邊花隔坐。坐上茶清酒灑。幾選調、鬪題分占。舊寫烏絲黏壁在。蝕墨痕、蝨腹無濃澹。傳刻計、贖遺憾。記纔臘尾題多感。灌書軒、清譚聽杳。玉梅窗掩。一樣春蠶絲易盡。一樣雪泥留驗。悔綺語、吾曹應懺。轉眼陳編供醬。有何人、披對秋燈燄。懷抱惡、筆停點。

龍山會 九月十九日瘦生供菊招客作展重陽之會


一樣風吹帽。勝友重來。趁取黃花好。幾枝和雨拗。瓶膽貯、難得秋燈移照。題字壁塵邊。只無奈、詞人漸少。謂虛白生更湖干、蕭條客館。去拏孤櫂。謂朴山小園我亦歸遲。乞食淵明。轉仗餐英飽。移文誰續稿。三徑外、怕換南山騰笑。落葉酒罇供也雅例。霜籬輪到。擬苔箋、申邀屐響。再據涼抱。

長亭怨慢 冬柳

過搖落、江潭時序。幾樹淒寒、暮鴉終古。閉悄紅樓、望迷晶箔、凍雲互。恨條依舊、憑掛向、無情處。片雪點長亭、算有與、吟飛風絮。歸路。曳孤筇、臘岸不似繫船前度。空腔半倒、付清響、別村樵斧。悵憶是、縷縷當年、又寒夢、三牛橋堍。三九後插柳易生謂之夢柳甚多事春風還要描愁眉嫵

賀新涼 歲莫

頓改門庭悄。儘恁忙、催租吏去。索逋人到。一例空倉聽噪雀。不是尋常愁料。偏乞米、書來索報。更說雪街衣葛士。欠肉糜、虛語飢腸飽。支歎歲、百堪惱。月圓時候春來蚤。十二月十五日立春蚤打到、秧歌羯鼓、市喧添鬧。我輩春情無寫處。只寫冬心不了。恁遊戲、文章顛倒。又換新題吹暖律。彊搜尋、吉語年頭要。聊慰我、悶懷抱。



畫梅樓

倚聲

運筆



湯貽汾（乾隆四三——咸豐三）

字雨生。江蘇武進人。以廕積官至樂清副將。不得於上官歸。寄居江寧館周濟家。與文學士相結。詩詞書畫靡不工。洪秀全攻江寧。貽汾集義勇守城。城破。殉焉。著有琴隱園集。

畫梅樓倚聲

武進湯貽汾 雨生

十六字令

晴。幾度黃鸝勸踏青。紅樓閉。刀尺不曾停。

南鄉子 秦淮

春水綠平橋。十二紅樓戀畫橈。是處簾櫳遮好夢。良宵。不勸金樽月不饒。魂也不
禁銷。燕別鶯離暮又朝。兀自憑欄空弔古。笙簫。斷送南朝六七朝。

賀聖朝 宿松軍中

暮雲一片隨營落。看旗翻日腳。朝朝閒卻綠瑠弓。向霜林彈雀。將軍白髮。征夫血
淚。迸三更霜角。狂歌痛飲曷如吾。早枕戈眠着。

邁陂塘

奈何他。掉頭不顧。者般波浪偏走。征帆漸小。看旋遠。再看些時無有。風恁驟。伯冷入

篷窗冷得衾兒透。薄棉添厚。是昨夜針針。今朝幅幅。辛苦與纒就。今番便金印歸來掛肘。也難償我消瘦。別時已覺懨懨病。況更相思時候。論井臼。便典盡釵裙。一樣人前後。徹貧拚守。只不了孤單。未來富貴。人壽幾能久。

酷相思 秋夜

一遍香消涼一遍。步金粟。西風院。甚一曲霓裳偷不轉。人看了、嫌天遠。月看了、嫌人遠。鴻去鴻來秋過眼。夢入寒蟬怨。怕芳訊。天涯從此斷。儂負了、他無限。他負了、儂無限。

鷓鴣天 姑蘇

舞板歌紈送落霞。館娃淒似玉鉤斜。春風綠水楊花命。細雨紅樓燕子家。波瀲灩。櫓伊啞。踏青不見七香車。曾將一掬相思淚。化作真娘墓上花。

天香 王夢樓太守招飲觀家樂作

城掩寒潮。堂鋪暖月。瓊筵正圍簫管。年少貪歡。知音愛密。一醉一回春短。鬢軒舉。

任繡袂、輕風飄轉。幾度歌闌。又珠簾、燭枝偷換。多時漏聲怕斷。漫纖纖、玉杯擎勸。羨艷餽親教。東山妙選。贏得香羅題字。只醉草、欹斜怕君看。十斛明珠。纏頭不算。

念奴嬌 周石苔鶴立別駕將之皖中

那時相識。正東風吹散、柳花如雪。已悔盟鷗。吾未早、爭又匆匆言別。待過中秋。看君策馬。別字如何說。從今憶着。教人不看明月。贏得幾日離筵。酣歌醉舞。未解心頭結。宦海顛風當斷渡。漫向中流擊楫。鶴要將雛。烏須哺母。搔首添華髮。香花墩畔。子規日夜啼血。

驀山溪 旅夜

東西馬首。到處憐鴻爪。傲不受人知。誰問我、少孤客早。荒村茅屋。擲筆酒初醒。風料峭。人清悄。斷雁將愁到。學書學劍。付與英雄笑。壯志未能成。漫回首、長安古道。狂歌痛飲。流水逝年華。何時了。彈烏帽。一夜教人老。

蘇幕遮 團扇

掩丹脣。遮皓齒。墮月懷中。涼意羅襟裏。警過花陰窺子細。詩是儂題。畫也儂名字。舊歡娛。新棄置。且莫悲秋。秋亦無多子。已悔團圓圓到底。珍重鈿箱。盼到薰風起。

西江月 牛首一名天闕

天闕何年人住。山門鎮日雲封。一枝塔影墮廊東。壓得吟肩疑重。烏帽頻敲黃葉。珊瑚鞭細數青峯。下山剛打上堂鐘。落日馬頭相送。

黃金縷

斜溜秋波垂鬢影。切切檀槽。喚取愁魂醒。學得新歌工記省。十分指甲彈將盡。羽
換宮移紅燭暈。語語相思。恁把離人引。短榻疏櫺風不定。柝聲野店三更近。
綠蠟香浮親勸與。來似無情。別便情如許。箭袖籠脣低不語。弓鞋怎踏寒霜去。我
是浮萍卿是絮。再約相逢。那是相逢處。腸斷城闌荒草路。生生不共江南住。

采桑子

相逢相憶真難說。十四樓前。廿四橋邊。今夜圓從離恨天。相逢相憶都休說。人坐

晶簾花映瓊筵。醉一春宵補一年。

小重山

鳳眼窗前消息空。見時容易甚。夢兒中。日長繡幕捲東風。誰在也。翠被撇薰籠。何處玉丁東。原來尋女伴。繡芙蓉。也知有意可憐儂。花間過。不見蹙眉峯。

好事近

繡罷踏青鞋。歷日呼郎替揀。又怕陰晴未準。見階前蟻亂。幾回裙帶茶蘼冑。撲蝶憑闌看。還向花邊輕放。念一生雙慣。

蝶戀花 夜泛

記否秦淮雙槳夜。過盡朱樓。香霧融蘭麝。翠管紅牙春去也。空江何處人簾下。荻雪紛紛秋袂灑。一樣清宵。自減千金價。一宿沙洲和雁借。角聲淒絕魚龍怕。

夜行船 過江

一夜扁舟輕鳥快。雁飛來、箇儂先在。誰道船頭。杏花十里。春更先儂待。翠幙紅欄

烟柳外。簫聲近。別愁堪解。佳約頻更見。時應恨。拚下裙邊拜。

雙雙燕

鶯樓鴛艇。算此處從來好。春長久。花開花落。休閒雲新雨。舊由着翠裙紅袖。越襯得水明山秀。也知朝暮風鴉。都把風流看穀。才上平山堂後。又花影偏西。上船時候。紅橋夜暖。燈月空明如晝。若箇歌殘紅豆。扶不住。懨懨中酒。且向柳底荷邊問去。那門開否。

相見歡

歸來不卸新妝。倦眠牀。綃帳分明。一半露紅裳。鸚哥喚。誰偷管。閉紗窗。相見除非。月上獨乘涼。

長亭怨慢 送金十手山

揮不了。這行清淚。三十蕭郎。半肩行李。帆影車塵。長天闊路儘無際。人兒漸老。把送別。看成例。度度唱驪駒。也不信。幾時煞尾。悲矣。念陶籬蔣逕。若箇先商歸計。蟹肥

菊瘦又虛度。重陽天氣。任今生、賣賦錢多。買不得、雁歡蛩喜。問後約何年。只恐相思沒底。

玉連環 嫦娥奔月圖

翩珊不用青鸞跨。去兮堪訝。幾時碧落寄相思。莫把月輪還射。桂花香徹清寒夜。有誰來也。君王不及李三郎。猶把霓裳偷下。

憶秦娥

鸚哥巧。聲聲喚道花朝了。花朝了。踏青期近。鳳鞋成早。去年女伴今年杳。眉山已有檀郎掃。檀郎掃。菱花應念。箇人難道。

點絳脣

秋思如何。一肩風露焚香坐。碧雲吹破。桐葉裙邊墮。庭院無人。但聽飛鴻過。情無那。嫦娥知我。誰共瑤琴和。

滿江紅

畫梅樓倚聲

雨少風多。春殘也。薄寒無那。算幾度。將歸未忍。欲眠還坐。詩到無題偏有恨。他雖小。夢都逢我。怕櫻桃。採摘不教休。鴛兒餓。劃一槳。萍分破。吹一笛。花飛過。陌頭人可。奈玉鞭頻墮。池館惟憑花作主。天涯空要人添箇。奈何時。除是慢聲歌。無工課。

行香子 再至蜀岡廢園閣上

紫陌朝朝。畫舫宵宵。問何情。獨覓蓬蒿。狂吟花落。醉眼天高。也有人疑。有人問。有人嘲。千秋花國。千秋山色。只千秋。誰主亭茅。不如獨客。來替遊遨。儘雨聽泉。風聽竹。月聽簫。

一葉落

情漠漠。憑高閣。夜烏啼。風竹間鶴。翦燈書易成。江風吹潮落。吹潮落。雙鯉難輕託。

少年遊 揚州約內子偕歸

拋書孤坐。對瓶花。笑語隔鄰家。薄被春寒。小窗燈燼。依約似天涯。明朝準備歸程。急攜手。七香車。一片鶻聲。幾番風信。悄悄別離他。

臨江仙 新婢

捧硯添香容易妥。屏邊淺淺含顰。微長教翦舊羅裙。小名謔不慣。紅暈頰潮頻。學
挽拋家新樣髻。工夫費了清晨。庭庭院院漸諳門。蝶兒儉伴撲。燕子隔花噴。

浣溪紗

珠箔香車半面逢。踏青時節恨匆匆。無雙亭畔夢魂中。春水一痕如意綠。迴闌幾
曲斷腸紅。畫船纔傍水樓東。

青玉案

紅樓獨在花深處。有紫燕、隨人住。廿四番風容易度。聽鶯情倦。采桑人去。一陣催花
雨。征帆過盡烟江暮。春色三分二分絮。漫隔銀牆聞笑語。夜香燒罷。玉簫吹取。明
月寒如許。

倦尋芳 三江東軒落成

梅邊窗矮。竹裏扉斜。一望瀟灑。掃地焚香。今日道書方把。瘦菊疏籬陶令宅。清泉峭

石倪迂畫。只檐前。欠芭蕉未種。雨聲聽怕。任今後、閒中忙煞。月夕花朝。詩興難罷。到處吾家。何論市朝城野。便話桑田。苔石上。頻敲棋局。松陰下。共鄰僧。共漁翁。牧兒樵者。

眼兒媚 紅橋

桃花如面柳如腰。畫舫集紅橋。一樓燈火。滿湖明月。徹夜瓊簫。平山堂外春如海。春夢幾時銷。鶯鶯燕燕。風風雨雨。暮暮朝朝。

蝶戀花 江村與友人飲

紅雨霏霏江岸悄。極目風帆。看比青帘小。壓酒吳姬春正好。綠楊陰裏臨邛道。換卻金魚愁盡掃。醉裏詩多。醒也都忘了。明日接羅誰共倒。春山處處提壺鳥。

又 江月亭吹笛

中酒心情春寂寞。玉笛參差。無限風懷託。催得千花齊破萼。柳邊多分黃鸝覺。曲罷憑闌風絮惡。我自吹愁。愁是吹難卻。何處樓頭人倚獨。轉憐雙淚因儂落。

陌上花 揚州見鶯繡履

織紅一捻。堪憐漫問。掌中輕燕。何處春遊。猶帶落紅幾點。欄邊帳底湘簾下。除是玉郎曾見。恨東風爲底。輕將雙鳳。恁般飄遠。記紅樓初下。風裙婉轉。怕流鶯偷眼。立月西廂。一步一回低眇。者時便沒相逢處。眼下心頭能免。算秋千影裏。苔痕猶在。賺人腸斷。

滿庭芳 答揚州故人

踏翠鞋鬆。辟塵塵軟。行行曲逕迴欄。花偎竹伴。隨處自尋歡。不斷鶯簧蝶拍。須勝是、管咽絃喧。揚州月。于今幾許。分到一江寬。新築江月亭難瞞。我本是、狂嵇貧阮。瘦沈愁潘。論祖楫劉鞭。有甚心關。只是消消遣遣。便過了。暖暖寒寒。頻啖了。中秋月餅。重九蟹尖團。

明月生南浦 予守官江上暇乘小艇輒信所之風日佳時往往吟嘯竟夕筮冠蓑袂固未嘗爲天械所拘也扣舷以歌聊紓逸興

蓮葉舟輕和鶴載。流下前溪。昨日桃花在。謝卻人間詩畫債。蕭然一笠烟波外。儘口閒吟鷗鷺解。綠柳村邊。自把新醅買。醉便橫眠無罣礙。醒來已是斜陽矮。

雨中花慢 落職後感題

從此歸來橫檐柳栗。先將五岳閒遊。想世情不到猿鶴朋儔。只怕青山相見。還嫌蠟屐遲投。肯憑醉尉。將人遣與。任意嘲羞。惠文冠下。從事衫中。一身久自偃。除夢裏。欠伸差快。峯頂雲頭。算把腰魚換醉。別從酒國稱侯。難回首處。唯應江上。幾點沙鷗。

聲聲慢 虎邱月夜

春船掠燕燈閣攢星。笙歌隊裏流光。自小嬉遊。總在七里山塘。白鷗近來難狎。算相知。只有鴛鴦。乘皓月。向千人石上。哭了真娘。依舊梨花在眼。記花邊別淚。瓊袂留將。不是鶯啼也。怕好夢難長。漫提再來遲早。已如今。三十蕭郎。春去也。問青山。知甚斷腸。

四字令 秦淮感舊

花柔水香。樓高閣涼。春風一曲章娘。是吳妝越妝。
情天夢鄉。愁城酒場。十年不到
王昌。剩悠悠夕陽。

蝶戀花 雨發石頭城外同峻欽作

閒倚孤篷杯自把。潮去波平。兩槳和烟打。一帶遙峯青斷也。莫愁嬾把修眉畫。終
負聯牀風雨話。壁立相如。慣把都亭借。何處漁竿容我下。綠蓑豈比青山價。

法曲獻仙音 岱宗遇雨宿南天門

嵐翠薰衣。松濤洗耳。一路涼侵肌骨。上幾重天。撥千層霧。今朝也還興發。喜五嶽初
游起。吟情一時活。雨聲潑。怕迢迢。屐摧筇折。乍闐闐。呼開玉仙齊接。何處足高眠。
直商量。曳倒秦碣。明日陰晴。問天雞。知否能說。待看看天下。速把亂雲收拾。

虞美人 新歲發揚子江

千檣萬艣環江驛。鴉鵲都停翮。天明一片爆聲齊。只見新年、舟子拜馮夷。金焦兩

點三年別。相見吟情潑。從來第一好江山。北固山有石刻天下第一江山。獨自揚帆。
第一過江看。

金縷曲 上已後二日偕劉芙初庶常樂蓮裳孝廉法源崇效二寺看花

不料春如許。算連朝、鷓鴣拚典。薄寒猶阻。直恁垂楊青着地。已綰遊驄無數。把姹紫、
嬌紅都誤。修禊光陰還正好。倩蒼禽、占了春愁去。琴酒樂。且尋取。車箱促膝吾伊。
汝。是年前、平山堂下。畫船遊侶。鳳泊鸞飄星鬢早。怕憶旗亭風雨。共提起、雪兒淒楚。
蓮裳有烟夢圖爲揚州女郎雪如作也。漫說笙歌銷歇易。便黃鶯、可也無聽處。蕭寺
晚。競鐘鼓。

瑣窗寒 客感

怕理焦桐。倦拈斑管。悄然無那。催愁風信。催到膽瓶花朵。算年華付與生離。好春好
夜輕拋過。便寄與雙魚。歸期滿約。並非真箇。念我顰眉坐。問妝閣鴛邊。幾番夢破。
空齋斗大。兀自屏南硯左。竟相思不許人提。侯門翻把蕭郎鎖。儘新詞譜出酸心。小

紅歌弗妥

摸魚子 清明日燈下

料伊人玉釵卸去。鏡臺猶自慵倚。春來例有零星病。怎更腰肢愁細。寧不記。那點檢
征衣。無語銷魂際。幾絲清淚。待睡暖寒衾。雞聲又警。何處夢兒裏。無端笑。夜夜燈
花報喜。平安隻字無寄。桃花紅到清明節。不似江南天氣。歸也易。奈苦苦相需。幾斗
淵明米。相思滋味。念繡榻瓶花。侍兒嬌女。都有斷腸意。

南鄉子

抵死勸儂留。留也何曾得並頭。對面相思誰得解。高樓。燕子輸他幾世脩。不住響
簾鉤。碧月殘時放下休。卻又支頤簾外立。寒不。誰喚雙鬢送翠裘。

一萼紅 秋夕

透疏櫺。只一絲秋氣。涼意逼羅襟。紈扇塵凝。玉階苔長。何人料理穿針。早斷了。瓜紅
果碧。便梧桐。疏了幾分陰。打疊今宵。添重小幕。添道孤衾。已是不堪愁病。怎望邊

雁落。尙去搜尋。擲碎金錢。聽寒玉笛。知他幾許傷心。任多少、箋長緘密。一番番、魚雁會浮沈。坐盡一條殘燭。獨凭瑤琴。

高陽臺 雨夜

竹屋琴拋。花廊屐斷。雨絲一片秋痕。乍幾分涼。孤衾已覺難親。者回不到知心。月算相思。惟見眉顰。最愁人、何處池塘。蛙鬧黃昏。商量去住渾無計。聽鷓鴣、留定杜宇催頻。便有歸心。年來只是因循。夢回軋軋開機杼。認燈光、一隙東鄰。漫重溫、篋裏千行。前度回文。

臨江仙 題拈毫美人

翠幕紅亭人不到。睡餘嬌撚。慙支不起纖腰。欲吟拚罷。欲罷又無聊。怎避屏南鸚鵡眼。書情書恨。都瞧待。緘方勝。寄誰遙。沈吟半晌。又付鴨爐銷。

金縷曲 中秋踏月偕周伯恬孝廉

冷落金蓮炬。暗銷魂、西風裙帶。兩行詩句。玉笛銀箏。庭院僻。今夜彩鸞何處。料只與、

嫦娥同住。縹緲瓊樓。還得到甚家山。目極空雲樹。離別恨。自今古。相逢且莫愁同。訴便鄉園等閒相伴。雁悲蛩苦。踏過疏林深巷。月病也不禁風露。竟醉也。不知歸路。縱得團圓長似此。算良宵。幾共知音度。絃管歇。漫吟苦。

好事近

小病鬱春心。心碎一庭疏雨。紅豆誰能剖得。把相思剖去。歸期穩在菊花天。槭書漫相許。只怕蒲帆生嬾。費高樓凝佇。

摸魚兒 題屠琴塢庶常耶溪漁隱圖

問何人。苧蘿村畔。一竿閒釣春水。朝衫便許從容脫。可有蓑衣笠子。閒似此。怕小小瓜皮。未了屠鯨事。蘆花風裏。任漁弟尋來。鷗兄約去。沽酒也應繫。長安市。話盡耶溪鄉思。掉頭今日誰是。蓉湖一片傷心碧。我亦商量歸計。歸也易。甚張翰鱸魚不抵陶潛米。披圖重記。記昔日波心。柳竿長嘯。風浪等兒戲。余有秋江罷釣圖

憶王孫 懷江上舊遊

可惜一江花月老。算有夢、春潮同到。海棠知否會思儂。記種汝、當年小。桃源自是扁舟杳。歎塵滿、青鞋席帽。一竿留得舊波痕。做今日、相思料。

卜算子慢 秋夜

青燈助悄。翠管弄寒。秋思一襟難寫。宵淺杯深。醉也不會眠且。任風鐘、雨柝愁城打。算只有、秋屏瘦影。見人揮淚盈把。記否。假肩話。共鳳眼窗前。蝦鬚簾下。不分天涯。花月竟無良夜。漸輕衫、褪盡薰籠麝。便做道、楊花飄泊。也年年有罷。

玲瓏四犯 將之粵東重題秋江罷釣看子

一桁青山。被幾陣西風。吹向何處。極目浮雲。一領敝裘塵土。昔日欸乃扁舟。是那箇、釣人移去。念白鷗、不甚關情。只在夕陽閒步。而今底又從容憶。歎鴻泥、新又成故。風波便把綸竿擲。不及藥鋤樵斧。漫羨赤手屠鯨。任片帆、碧空飛渡。笑這番、蜚雨蠻煙。怎伴泣珠鮫戶。

蝶戀花 章江雨行和峻欽舍弟

潑墨淋漓顛米愛。狎浪輕鷗穩受江豚拜。一桁遙山青不在。蒲帆片片濃雲礙。記
否蕉聲燈影外。對楊前盟。已是商量再。何處烟波將我待。且停酒債蓑衣買。

摸魚兒 吉安舟中寄董小狂

念江鄉、肥櫻瘦筍。玉缸一碧春釀。羊求都作天涯客。今雨更誰酬倡。頻引望。算鶴伴
琴邊、夙約真難忘。雙魚來往。任萬語加餐。千言努力。知否尙無恙。銷魂甚。後會都
成虛誑。幾時纔脫塵網。蠻花乞鳥思君句。空補君家屏障。知冷況。竟三百青錢、不掛
遊山杖。章江江上。訝落月誰邊。謫仙何處。一夢涉波浪。

一萼紅 過湖口縣

碧彎環。看一圍城郭。宛轉遶青山。霧閣凌虛。烟樓罨翠。幾分桑柘田園。又三五、菱村
藕市。有瓜皮艇子下漁竿。無限湖光。汀花的、水鳥關關。漫說葦鱸鄉味。羨雕蚶
鏤蛤比戶堆盤。飯熟桃花。杯清竹葉。閒尋風月湖干。只不信、桃源雞犬。也有人、管領
作閒官。恁與鷗盟鷺狎。肯掛吾冠。

賀新郎 惜研齋落成集同人分賦新種花木余自得竹蕉桃三首

趁雨分鄰竹。早新涼、疏枝碎影，幾聲敲玉。隨處吾廬隨處種，心自不關清俗。爲消受、風吟月讀。冠蓋紛來何必避。只高棋、拈韻無時足。塵不到、碧欄曲。故園荒徑餘松菊。問琅玕、從拋翠袖，碧消簾幄。未見冰霜猶不信，恐也秋風蕭索。費日日、平安心祝。盼到龍孫都長大。豈他年、不值鸞鳳宿。只我去、向誰綠。

翠壓湘簾重。快披襟、清風幾扇。午天羅洞。漸與韋郎題句滿。顛草精神飛動。算免取、旁人覆瓿。卻笑迂生帷幪盡。尙濃陰、板榻資吟諷。雲影亂、碧無縫。高桐疏竹三生共。慣空庭、蕭蕭瑟瑟。秋聲閒弄。爲甚年來還種汝。我也無愁無夢。任風雨、宵分相送。倩補樵疏垣斷處。恰參差、掩映人窺宋。低不礙、吟肩聳。

度索三千里。自何人、多情種汝。瑤池堪比。露井閒拋三五核。不管千年結子。只願得、春春紅紫。羯鼓頻催嬌欲笑。賺黃蜂、粉蝶同生死。知幾度、劉郎至。尋常豈必天台似。只花陰、雙扉深掩。也非塵世。棖觸年前江上住。亭閣層層霞綺。問來往、扁舟不記。

底事殘枝留別恨。恁無端、風浪春江起。總不若、秦人避。

又

燕子巢難至。笑鴛鴦、一時飛亂。不知春水。合是春人飄泊地。種種攪儂心碎。更似夢、如癡還醉。千萬丁寧歸去也。甚瀟瀟、夜雨孤篷底。譙鼓斷、斷腸際。扶頭酒醒絲兒氣。恁緣慳、相如善病。累人憐死。覆與羅衾偏替暖。幾扇桃花風細。恨一霎、林鳥飛起。算把良宵拋去忍。到今宵、已是人千里。都只道、再來易。

又

抵死留人住。把銀箏、彈將不斷。暗潮催暮。鸚鵡杯深犀筋滑。款款生生歡與。勸忘了、天涯愁緒。薰了羅衾還換錦。道春寒、耐了些兒絮。便訴了、情千縷。疏櫺月落風兼雨。早移來、瓜皮小艇。一聲柔櫓。翻恨儂如桃葉命。嗚咽長江古渡。恁賺爾、雙眸凝注。不信旁人偏有淚。聽聲聲、珍重聲聲楚。生割斷、斷腸路。

長相思

畫梅樓倚聲

水邊涼。竹邊涼。倚遍迴欄信渺茫。月斜花影長。
繡鴛鴦。畫鴛鴦。怎比荷邊真箇雙。
雙棲秋夢香。

聲聲慢 鄭諉坪明經榕屋橫琴圖

清泉滌夢。素月流襟。箇人冷吟無伴。幽意難消。閒與桐君繾綣。屏山珮環何處。漸春風。綠樹吹暖。堪悵惘。任蓬萊易到。成連不見。漫問天涯蹤跡。也華年拋擲。曉鞍宵店。斷錦殘紋。此外祇餘一劍。關心舊時絲竹。誤玉樓。幾番歡讌。待抱了。去羅浮。去也不返。

風入松 秋夜聽內子理琴

曉風吹雨過妝樓。新月上簾鉤。夜香燒罷紅欄靜。儘伊儂、綠綺賡酬。不怕滿身風露。一絃一點清秋。自然纖玉韻清悠。小病指聲柔。幾回愛惜拈花爪。把并刀、婉轉愁脩。玉釧生憎腕重。羅衫怪底香流。

虞美人 李芸甫水部繪己像作僧復圖諸姬環侍日鏡花水月圖索余題詞

亭亭嬈嬈蒲團畔。梵嫂由人喚。前身明月後生花。只怕莫愁、愁住梵王家。朝朝暮暮跣趺坐。空色寧參破。羣花畢竟爲誰開。不信一花一葉一如來。

浣溪紗

亞字欄前月怕明。相逢長記柳邊亭。斷腸池館斷腸情。依舊好花紅月月。可堪愁鬢白星星。見伊除是化黃鶯。

鷓鴣天 過老龍山

綠樹紅亭古驛春。畫船將夢柳花村。天明便上藍關路。半夜梳頭累細君。愁曉露。怯遊塵。香車驄馬不輕分。有誰知是江南客。錯認尋芳踏翠人。

鷓鴣仙

宮花舞墮。湘裙颺冷。纔向箇儂偎近。勸人先自中微醺。怕扶着、朱欄未穩。來時太晚。去時恁早。明日斷無憑準。夜來分付掃花人。漫蹴損、弓鞋雙印。

賀新涼 題吳仲雲振械雲礪壯遊圖

足躡千層起。歎何爲、端居不樂。便成遊子。遊到乾坤無地處。五岳踏成平地。問可也、遊蹤能憩。屐壞筇枯。拋便得、只黃塵、千斛無從洗。悲欲泣。少年志。圖中風景分明記。最銷魂、鞭絲帆景。秦山蜀水。移鯉乘龍。全似夢。今日遊人老矣。剩幾首、傷心遊記。楚尾吳頭。偏又隔、恁教嘗、蜚雨蠻烟味。猶未必、壯心已。

又 題吳鏘如聞雞起舞圖

獨立寒肩聳。奈如何、雞聲四起。斷人清夢。手把吳鉤。不語熱血心頭潮湧。試劃破、冰堅雲凍。蛟鬣鯨屠何足道。願塵寰、斬盡荆榛。尤論此志。有誰共。一朝風雨龍飛動。笑人間、琴邊酒畔。萬千無用。愧我十年空學就。只算猿公能弄。漸瘦沈、腰間嫌重。賣劍買牛。吾欲老。任曉風、殘月扁舟送。端不會、先鞭縱。

百字令 題張南山孝廉海天霞唱圖兼書其詞集

唱霞漁者。南山自號。恁襟懷直似。海天空闊。萬里潮平。烟盡處。遙指中原一髮。屢市忙閒。鯨波喧靜。過眼都休說。一聲高唱。六螭扶起紅日。憶昨海上攜琴。知音遍訪。

見汝心偏折。魚姊妹娘偷絕調。共把珊瑚擊節。海雨晴時。天風斷後。醉臉丹霞熱。魚龍夜定。更休橫竹吹裂。

滿江紅 題吳石華孝廉小照卽書其桐華閣詞草

玉樹亭亭。休只羨粉郎年少。曾歷盡。騷湘豔洛。雄秦俠趙。秋水聰明生在骨。春花富貴天然貌。怎潘愁沈瘦。一年年。生潦倒。其山上。幽居悄。荔村裏。良田繞。其山荔村皆君故居。儘柴荆深掩。塵飛不到。彈鋏登樓君試省。牽蘿倚竹人將老。漫風輪。雨櫂。一年年。仍潦倒。

魚姊妹娘。唱不盡。桐花新曲。生憐殺。藕絲腸細。斷時難續。金屋銀屏春似夢。紅牙翠管人如玉。便三分。羅綺七分愁。風流足。功名貴。凡夫福。神仙壽。愚夫慾。只騷壇清冷。我堪馳逐。燕領鳶肩終有老。鷗朋鷺侶從無俗。更何人。能結墨因緣。同歌哭。

一萼紅 羅裙

步珊珊。愛柔紋似水。細響赤闌邊。蛺蝶貪隨。茶蘼易惹。賺伊幾處流連。被一陣。東風

偷展恁弓鞋。瑟縮怕人憐。知否銷魂。斜陽透影。淺草拖烟。最憶銀釭背解。更腰肢纖瘦。小立將眠。簾底縫時。花陰浣處。而今縷縷情牽。料付與、關心侍女。問石榴、顏色可如前。漫共青衫冷落。換盡流年。

念奴嬌 題秋燈伴讀圖

秋心無着。悄屏櫳。卻向夜燈收束。雁苦蛩悲。都莫問。肯愛敲枰吹竹。香冷金猊。風殘鐵馬。街鼓籠銅促。錦屏人困。奈伊辛苦還讀。且便斂股挑檠。鷓鴣檢點。爲製冬郎服。刀尺聲寒書韻婉。學語童烏聽熟。卷底花絨。鍼尖仙蠹。怎到旁人目。月明庭院。此時誰正幽獨。

金縷曲 芸甫村居圖

莫待黃梁熟。且留將、廿年簪紱。換些桑竹。水曲山隈塵不到。此地幽居堪卜。便宜釣、宜耕宜讀。短褐芒鞋閒到老。卽天公、賜與才人福。肯虛食、太倉粟。李聰左右人如玉。劇新鮮、兩行紅粉。三重芳屋。不是烟霞都有癖。那作神仙眷屬。是富貴、清高齊足。

試問披圖誰弗羨。只敲棋拈韻。聊愁獨。能惠我隱居服。

滿江紅 送江五素山參軍

一晌伊鴉人去也。夕陽愁白。從此後。瀟濱湘口。怕無消息。荔熟荷香嘉會杳。魚蹤雁跡長秋寂。便平安。日寄一封書。終相憶。揚州夢。平山客。時光迅。歡場易。自情天推墮。別愁非一。楊柳樓心鸚鵡恨。芙蓉江上鴛鴦泣。漫篷窗。獨坐苦思量。天南北。

黃金縷 題南山松石把卷圖卽送之京師

一卷黃庭看不厭。石上松間。坐臥時光變。似爾幽棲真可戀。出門便被紅塵見。萬里京華鄉夢遠。何日歸來。示我新吟卷。且看花磚紅日滿。玉堂西畔槐陰轉。

訴衷情 病夜

紅窗細雨夜三更。病惺惺。喚醒何曾未醒。藥碗費伊擎。坐不是。寐無成。冷冰冰。桃花過了。海棠開近。明日清明。

浪淘沙 宿桐城山家懷素山素山桐城人攜家官嶺南有年矣

如此好溪山。底不休官。幾家茆屋白雲間。我是勞人頻過此。算替君還。亦自有鄉關。盍掛吾冠。也知當局卽旁觀。怎把并州千萬里。當作家看。

卜算子 九江得琬君寄贈墨梅卽用自題元韻

一夢落春風。萬里槭香雪。不定相逢在幾時。別是黃梅節。別恨兩紛紛。只共梅花說。嫁得林逋瘦一雙。長是天寒日。

甘州 廬山天池作

狂猿揉扶我萬松頭。立腳怕難牢。笑飛雲隙裏。浮圖矗立。與我爭高。長嘯文殊臺上。空碧答笙簫。且短衣寬笠。拜了仙曹。一掬天池清冷。把十年塵面。淨洗今朝。便閒騎白鹿。先赴赤松招。記依稀。遠公廬舍。本前生。同社舊朋交。歸來也。勸今生休更。揮手溪橋。

蝶戀花 舟中琴夜回憶匡廬之遊

江樹萋迷山月小。吟嬾眠難。獨撫瀟湘操。一鶴橫空波浩淼。夜涼風定扁舟悄。廿

載江湖人漸老。縱有知音。各似東西鳥。幾度雲邊看瀑到。一琴閒着山童抱。

渡江雲 乙亥秋余自廣州押伴暹羅使臣丕雅梭挖粒巡吞押撥蘇昭突廊窩紋蓀泥暇握撥突廊拔車哪鼻悶平哩突坤第匹呱遮辨事等四人入貢京師明年春役竣還粵篷窗驛舍罄談海外異聞頗極歡洽今將別矣難已于情因書此爲贈

霎時舟鼓動。風旌獵獵。海客罷離觴。萬里歸程。天海渺茫茫。多情鮫淚。恐化作。蜃雨淒涼。漫回首。皇華景物。幾度赴天閭。思量。蓬萊宮闕。柳雪花陰。到雞林細講。忍忘却。疏狂都護。曾伴梯航。舶趁風高從此別。便相思。知我何方。怕我也。夢魂難到扶桑。

壺中天 將別羅浮江瀛濤道士以布衲相贈慨然作此

蓬萊游倦。把筇枝挑起。蒲團飛步。布衲殷勤勞贈別。不似綈袍人故。破袂流雲。素襟浣月。衣此無寒暑。松間石上。幾回拾葉閒補。剛稱鶴瘦腰身。半仙半俗。混迹漁樵侶。痛飲悲歌今也罷。莫把淚痕留與。宮錦袍長。文犀帶重。早付兒孫去。可應知道。袖

中天地如許。

金縷曲 自題劍人緣傳奇

雪色寒嬰頷。恁吳鉤、千磨百鍊。究誰持贈。戮盡長鯨兼毒虎。纔放俠人心靜。用不著、慈悲情性。富貴神仙須仗福。只林泉、我取非關命。誰愛砍好頭顱。良朋那獨聯觴詠。問乾坤、何人能俠。何交能訂。鮑子分金成底事。千古名傳僥倖。奈今也、無人堪並。杜宇聲聲歸去好。甚梅關、梅比孤山勝。看隻鶴、道旁等。

鵲踏枝 和內病中

玉釧生生寬褪肘。怯坐嫌眠。扶左偏欹右。中酒傷春原慣有。者回那似尋常瘦。不住春寒風雨慙。半臂慵添。但把薰籠就。猶是綃帷燈燼後。鴛衾一半留儂覆。百二春光拋去驟。小病工夫。偏比春長久。藥鼎茶鐺拚替守。紗窗幾陣涼風又。蟄雨蠻烟經也。設不爲丹砂。底事猶勾漏。瘦沈腰肢禁折否。可憐也似卿般瘦。

木蘭花慢 喜內病起

看梳頭罷了。環佩響。繡窗邊。報樓角堂東。柳絲風悄。今日晴暄。輕衫再添半臂。儘雙鬢、假護出屏前。乍怯迴廊日色。還嫌曲逕苔錢。西園春又銷殘。今見也、暮淒然。道一歲、花枝不曾經眼。恁地闌珊。都因玉郎游遠。把相思、招得病魔纏。卻笑郎今腰帶。還因鄉病新寬。

醉花陰

愁損蛾眉今夜月。照見珠江別。柳絮可憐生。幾日樓頭。便入東風劫。紗籠燭換冰絃歇。無語空嗚咽。去矣立斯須。露冷潮生。畫舫沙頭活。

望江東

憑暖紅闌言未絕。爲今是、分離日。鴛鴦那得化蝴蝶。便離了、烟江闊。編郎可是心腸鐵。恁抵死、催桃葉。只愁月落又潮入。怎不許、潮回別。

行香子 郢中郡齋有孟亭浩然尋梅處楊敬齋表弟嘗從官茲郡葺而讀書

其中屬余補圖

詩逕苔封。鶴樹烟籠。愛梅人、築屋當中。紅欄界雪，碧幌垂風。襯幾重山，幾竿竹、幾株松。今朝畫裏，當年驢背，問梅花、都似雲空。醒殘詩夢，老了奚童。牘一張琴，一雙履、一枝筇。

金明池 海珠得月臺銷夏偕李鳳岡太守謝理圃庶常葉雲谷農部張南山

孝廉李芸甫水部

觸熱人稀。招涼珠在。一艇移儂畫裏。百尺樓臺，四面早面，欄杆人倚。問天風、何處吹來。直幾處、紈扇佳人扇起。聽急管催潮，哀絲咽雨，疑向秦淮夢裏。五嶺山川無多子。算畫癖詩顛，盡收履底。誰將者、一丸城郭，高築就，半天騷壘。看今朝、雅集圖成。笑入箇、龔官興豪十倍。算事可千秋，人如六逸。此會蠻天有幾。是日有圖予所作也。

好事近 桂林別弟峻欽

雲裏一枝筇。十日不曾遊倦。只道桂林山好，甚將人隔斷。雁門關外雁孤飛。此去

幾時見。莫把夢魂相訪。怕路長宵短。

謁金門 湘江舟中

湘水綠。斜日何人吹竹。隔岸紅樓看不足。片帆何太速。一路鷓鴣聽熟。烟際漁翁相逐。彈卻水仙琴。一曲蘆花和雁宿。

長命女 舟夜聽女簫彈琴

新月上。一碧湘流平似掌。斷螢涼入舫。半夜漁燈吹盡。綠綺片時清響。只有中郎能意賞。客緒無安放。

鳳棲梧 宿邯鄲

脫卻征衫先醉倒。肝膽平生。只向杯中好。幾點城鴉空晚照。世無俠客名都小。十斛明珠爭買笑。漫論叢臺。何處非秋草。一頓黃梁餐不飽。荒雞催別邯鄲道。

鷓鴣天 琴隱園落成

花榭松亭似畫成。斜扉鑄出小園名。幾弓借月支風地。半世巢山館水情。花正好。

酒須傾。小紅歌我小詞聽。明年識得春來路。早遣雙飛燕子迎。

虞美人 聽侍兒歌余劍人緣樂府

斷腸人度傷心曲。千古工愁獨。世無俠客莫論交。一任雀羅門巷掩蕭條。金樽檀板生消受。淚灑紅羅袖。冷吟閒醉可憐情。只怕小紅愁見鬢星星。

玉漏遲 仁和孫蘭友夫人祐兒婦母也名雲鶴姊碧梧名雲鳳並工詩古文

詞碧梧集已剗蘭友僅梓聽雨樓詞其女弃其遺詩丐余與內子釐定因題其後

西窗銀燭夜。雨聲淒斷。遺編同校。詠絮才名。傳自掌中嬌小。半世車塵帆影。多只似。男兒懷抱。原是少。清才豔福。幾能兼了。可惜姊妹花枝。便絮分萍別。被風吹杳。萬種傷心。都在一囊殘稿。腸斷燈前愛女。是句句。當年吟教。珍重好。雲箋漫同花稿。

念奴嬌 宋芝山廣文訪王千波徵君幼海明府于華下故居爲作陶園話舊

圖徵君兄弟屬題于并門以予與芝山亦有一日之雅也

陶園何在。怪藤箋三尺、白雲飛起。嶽色當門盃在手，羨爾烟霞生計。花下棋聲、竹間琴韻、竊聽都非易。幾時款段，看山竟到圖裏。共道今日天涯，酒龍詩虎，莫過難兄弟。屈指紛紛投轄客，白鶴亭前寧記。老去羊求，別來松菊，動手萍蓬淚。怱怱今古，又誰長共天地。

一落索 塞上九日

此地也來重九。僅一城如斗。斷雲一片挾沙飛。更日暮、牛羊四走。歲歲萸囊菊酒。光陰輕負。登高今日更和誰。又豈待、悲秋瘦。

南浦 憶弟

征鴻望斷。又愁心、萬里到君前。見說思量江上，孤鶴伴歸船。不住長吟短醉，算青山、幾笏對閒官。怕鱖魚灘險者，回書札，剛道布帆安。喜得阿宜初長，問何時，向我搔髭看。腸斷黃雲白草，費汝勸加餐。趁好而今夢裏，任相逢，猶是舊容顏。念青燈無恙，白頭何處對牀眠。

東風齊著力。石華嘗索寫風雪。入關圖未幾而余乃出關。觀景懷人情思何

限。既爲補圖兼寄此闋。

獵獵關旌。嗚嗚隴水。此境悲哉。昔年向我。把酒述天涯。今日寧知我到。風兼雪。一騎誰偕。長城外。吟鞭凍折。冰面難揩。腸斷白登臺。孤負了。雁門四扇長開。幾時入也。君又不重來。萬里音書斷絕。空凝望。白草黃埃。笳聲裏。君諳滋味。識我情懷。

虞美人

玉驄認得門前樹。門裏人非故。不因鸚鵡喚煎茶。誰識小紅名字。是名花。畫堂捲起三重幙。只怕東風惡。勸伊莫對柳花愁。輕薄還曾。日日到妝樓。

水龍吟

帶圍怪底新寬。幾宵風雨將秋到。香寒燕幕。烟迷蝶徑。往來人少。箏雁無聲。釵鴛有夢。可堪淒悄。恨蘭釭多事。紗窗隻影。爲打就。相思稿。本是心情潦倒。浪生憎。砌蟲簷鳥。幾回乘醉。尋絲覓竹。猶同年少。花底風裙。樽邊波眼。甚時忘了。怕今生無分。成

仙蓬海把情緣掃。

沁園春 舊被

蜀錦堆霞。吳綿捲雪。多年象牀。認芙蓉淺淡。猶迷芳魄。鳳鸞憔悴。久閱柔鄉。紅浪翻時。青燈黯處。幾許酣情箇裏藏。堪憐惜。賸數重嬌暈。一段溫香。也曾腸斷蕭娘。記酒醒和衣擁夜長。又繡餘斜倚。尋思舊夢。薰成空展。孤負新涼。驢背囊塵。蓬窗偃雨。斷送華年更可傷。寒如鐵。尙朝衙戀住。秋病遮將。

謝池春 王千波幼海兄弟嘗隨其尊人刺絳今幼海仍牧是州自唐樊宗師

有絳守居園池記茲署遂成名勝千波兄弟因作絳守居園池再賦聯牀之
圖囑余題之

姑射仙姝重把春眉淡掃。識翩翩、春風年少。銜杯雙笑。受千花拜倒。只愔愔、卅年過了。名園自昔。誰創聯牀畫稿。算今成、謝家亭沼。風吟雨和。便流鶯羨好。問千秋、幾人同調。

金縷曲 蔚州尉徐子容與予相慕而未識予託爲羅浮道士黃冠相訪以詩
代刺子容一見留飲歡極生平會爨奴靈邱人私識予密白子容次日跡予
城東酒肆相視大笑復與遍遊古寺狂醉竟日子以向遊羅浮所製逍遙巾
爲別因作逍遙巾雜劇書此自題

回首蓬萊隔。記當年、鹿巾鶴氅。仙家主客。袞袞紅塵天萬里。誤了青鸞消息。又誰與、
烟霞同癖。白草黃沙冰雪地。算陽春、腳斷遊人。蟄。何處可。蠟雙屐。有人卻共葦鱸
憶。竟何緣、鄉音到耳。花前相覲。只道來時輕跨鶴。細問餐霞真訣。竟同是、哀鴻塞北。
脫下星冠渾一笑。並狂歌、痛飲無聊極。遊戲也。抵悲泣。

千秋歲 九日靈邱北城寺樓

僧樓側帽。無限悲秋意。斜風細雨重陽例。窮邊人自少。佳日秋餘幾。傾綠蟻。吟朋且
把黃花抵。無處思兄弟。腸斷登高地。身又老。官如寄。全家霜角畔。雙淚飛鴻底。鄉
萬里。并無荒逕歸何易。

七娘子 題內子梅窗琴趣圖

泠泠瘦玉纖纖指。深深繡幕悠悠思。畫了眉山。燒殘心字。百花頭上春風至。江南本是春人地。高樓早築香雲裏。擬作一樓于白雲溪。名畫梅冰雪聰明。漆膠情意長共梅花堵。

南鄉子 題畫梅邊士女

詩思在憑欄。妝鏡初拋黛未乾。翠袖禁風人獨自。吟看。爲伴梅花不畏寒。欲折一枝還。分付銀瓶汲小鬟。細譜暗香成笛弄。花殘。才放龍涎爇博山。

采桑子 題畫有感

白鷗家在蘋風裏。秋水長天。細雨空烟。一別天涯思渺然。美人不記青衫溼。宛轉冰絃。江月彈圓。仍上當年送客船。

憶舊遊 黃研北明府松江蟹舍圖

記九峯烟外。二陸家邊。我是遊頻。最愛湖光淨。向蘋村柳岸。欲結鷗鄰。誰知片帆飛

去未識隱居人。嘆今日天涯。披圖感舊。同夢菰蓴。聞君畫圖裏。慣獨醉持螯。吟倚柴門。烟水生涯淡。任答答風雨。燈火黃昏。捕蟹者然火輒附明而止。監州奈何相妒。東坡詩只愁無蟹有監州。富貴亦浮雲。願補網引竿。從君風月三泖分。予舊有秋江罷釣圖。

解連環 黃次皋明府方山春曉圖 次皋宰萬泉以署齋對方山顏曰山來草

堂故作此圖

黃綢夢暖。漸簾旌敲夏。畫堂春曉。正燕子才出紗窗。便衙鼓催傳。訟庭清掃。白恰青衫。伴一鶴。逕邊吟遶。笑青山無事。瞥眼花前。共人起早。知誰鏡鸞頻照。卻峯痕偷學。來問京兆。更何時。不對芳樽。算日暮烟重。翠鬢去杳。一片明霞。是洞口。碧桃紅到。山有桃花洞。待看花。去尋仙子。費伊東道。

又 題蕉窗吟思圖

放衙初了。向明窗獨坐。悄無人到。正綠天。暑退涼生。看清簾疏簾。隱囊紗帽。無限吟

情渾不識。碧梧秋早。問故山誰在。荔熟橙香。歸夢空杳。興來幾行顛草。便碧雲千片。都算吟稿。記舊日、傍竹親栽。甚惹雨添風。做成愁料。衫色分明。認掩映、窺牆花貌。願時時、寸心自展。似花慣笑。

一枝春 千波新納。姬取昌黎詩意。囑作小桃留花圖。兼索贈句。

宛轉晴絲。碧欄畔。似把春情偷繪。羣芳漸老。懊恨流年逝水。秋千院冷。但贏得、柳絲烟翠。渾不料、一點紅情。相伴日長如歲。
姬小字小年 低徊漫同燕子。向芳陰輕掠。東風吹醉。多情最苦。怕惹雨風蕉萃。而今計穩。便身做、花幡遮衛。從問取、最小偏憐。甚人似爾。

滿江紅 節婦邢夫人輓辭常山令張祖基姊

鏡破鸞分。三十載、貞心雪皎。堪歎息、蘭階寂寞。萱庭衰老。清漏沈沈。蘆被冷、殘機軋軋。棗燈小。算花邊、雙燕月邊鴻。皆愁料。寡鵠怨何人曉。原鴿痛。何時了。曠空庭古柏。翠烟寒繞。碧草難埋黃土恨。冰蠶怎遣朱絃好。記鐙旁、辛苦燕吟髭。難重道。

浪淘沙 偶書蕉葉上

詩夢碧迢迢。春去花梢。故人長是信音遙。幾度芭蕉書欲寄。癡被人嘲。得句嬾推敲。情自無聊。鬢絲愁對綠雲嬌。一枕颺涼蝴蝶病。雨又瀟瀟。

又 周暖姝夫人修梅圖

珍重玉階寒。香雪吟看。前生種下此生緣。只怕來生還是我。翠袖琅玕。仙佛欲修難。可奈塵寰。不嫌寂寞是嬋娟。修到梅花休嫁了。古鶴空山。

又 題鈕西農福疇聽秋吟館圖

葉落滿亭皋。天宇蕭寥。詩人獨夜靜無聊。學箇寒蛩吟不斷。秋上眉梢。切莫種桐蕉。風雨難消。年年愁瘦沈郎腰。檀板金樽何限好。花月春宵。

百字令 嚴修能元照倪米樓稻孫奚虛白疑三人爲莫逆交修能先逝米樓

有榆樓感舊詞虛白和之迨米樓又逝虛白復作榆樓感舊詞且補圖徵同人
和焉榆樓者虛白所居嚴倪所常寓也

碧天無際。看征鴻過盡。茗南弁北。自古騷人來往慣。此是詩天酒國。烟雨汀洲。斜陽樓閣。偏有傷心客。笛聲淒怨。不堪回憶當日。須信過眼浮雲。無窮代謝。後視今猶昔。但問題圖誰尙在。只賸幾痕殘墨。清淚難收。芳魂易斷。何必曾相識。及時行樂。眼前如此山色。

又 汪小米孝廉松聲池館勘書圖

松心共訂。記論文池北。流連尊酒。忽地濤聲清到耳。一幅新圖入手。筆自飛花。書還掃葉。窺左蒼髯叟。問奇析奧。一時名士低首。愧我半世風塵。牙籤未觸。儉腹慚孤陋。君是他年天祿客。事業今生不朽。史局分修。經筵進講。才子呼元九。金蓮燭豔。那時添箇紅袖。

蘇幕遮 湖上春寒簡小米

畫橋邊。垂柳下。一桁珠簾。香霧凝蘭麝。償了千金風月價。不上蘭橈。不愛花驄跨。課三餘。吟五夜。坐臥書城。相對人如畫。好聽銀箏揮玉筴。鶯囀花南。春去牆東也。

金縷曲 戴銅士銘金乞畫西湖訪秋圖卽次自題韻

清淚沾吟袖。恨西風、吹秋到眼。掃愁無帚。樓閣參差黃葉雨。山色波光非舊。是西子、顰眉時候。有甚心情悲往事。問浮萍、不憶前生柳。沙鷺嬾笑人瘦。玉簫金管繁華。數記芳時。鶻花顧曲。春衫假皺。直恁匆匆人去盡。畫舫知他在否。竟獨自尋詩貰酒。一段幽情描不出。算光陰、拋擲如丸走。遊未倦。願攜手。

玉漏遲 孫嫻卿雲鵬夫人停琴佇月圖

暮禽棲盡了。銅環靜掩。園林清悄。獨下瑤池。自把玉琴閒抱。耐得羅襟露冷。向寶鴨、濃薰龍腦。蓮漏杳。秋心一片。問誰知道。只有月姊多情。慣碧檻紅窗。伴儂嬌小。又恐霜鴻多事。帶將愁到。不忍重尋舊夢。算青斷、裙邊春草。同調少。朱絃暗憐人老。

一翦梅 分詠隨園諸景得因樹爲屋

萬綠陰森一榻橫。樹上禽聲。樹底吟情。子龍應也妒先生。屋外花明。屋裏樽盈。高隱難逃身後名。半世書城。千載詩成。牽蘿不見影娉婷。落葉空庭。月白風清。

浪淘沙 有寫香山斜倚薰籠坐到明詩意者甚多予亦繼聲

蓮漏滴心頭。燼了香篝。夢還招拓夢都休。三十六宮春夜永。誰是無愁。薄命幾生脩。歲月如流。吟成團扇向誰投。不及雞人工唱曉。籌到龍樓。

浣溪紗 隨園雅集次主人袁薇生韻

秋在君家野鶴知。龍山高會好先支。病餘烏帽不禁吹。瑟瑟殘荷池上雨。蕭蕭疏柳鬢邊絲。芙蓉能豔幾多時。

浪淘沙

絃管舊樓臺。滿地松欒。驚鴻過影悵瑤階。十二闌干風露冷。環珮歸來。遙夜愴吟懷。雁楚蛩哀。芙蓉猶對鏡奩開。虛幌愁人秋夢短。清淚頻揩。

虞美人

玉簫吹破相思夢。獨夜寒衾擁。萬言千首悼亡篇。不信重泉無路寄魚箋。生綃算了空房伴。腸斷春風面。千金難覓返魂香。拚把逋仙讓與玉梅雙。

絲兒氣力慳慳病。強起妝臺凭。不知甚日過清明。只見簾櫳斜插柳枝青。伊人莫是尋春去。難得書聲住。等閒蛺蝶愛花開。猶會瞞人偷過粉牆來。

百字令 壬辰正月于役吳興故人相逢無日不醉倚聲紀事留謝鄭雪堂副戎周貞木太守楊龍池徐侶樵兩大令吳伯勤少尹兼誌別懷

扁舟衝雪。乍新年過了、寒梅未放。六七年來頻到此。賸有故人三兩。白髮饒誰。青山笑我。僕僕猶塵網。把茆難得。萬間心廈徒廣。堪歎滿眼哀鴻。雀窮鼠盡。廉吏愁相向。饑鶴應無餘粒飼。臘酒先驚履響。昨夜西園。今朝東閣。何忍平原暢。多情拚別。玉湖難變春釀。

又 題石敦甫司馬松菊猶存圖

年年依舊。是馬頭山色。天涯芳草。書劍風塵嗟老大。浪跡真同飛鳥。此地逢君。故園何處。畫裏林亭好。子規聽倦。祇應詩夢歸了。誰識張儉無家。江湖滿眼。百口憐鴻爪。也待商量錐立地。只怕青山笑倒。松下橫琴。菊邊漉酒。輸與柴桑老。結鄰難必。幅

巾他日尋到。

金縷曲 吳仲雲閒雲圖

驀聽催年鼓。正愁人、梅花同瘦。病魔戲侮。歲晚鄉心偏自切。高臥何時天許。把知己、天涯漫數。只有吳筠詩筆健。更仙音、不讓霓裳譜。藉酬倡、慰羈旅。雲山好景何人補。悵年前、思親感舊。客窗風雨。贏得才名傾歷下。高詠使君金縷。又底事、常懷愁苦。雲自隨風容易散。問雲邊、野鶴誰爲侶。搔首向、碧翁語。

君是奇男子。料平生、東西南北。閱人多矣。簪組誰爲娛老具。不過浮雲而已。算只有、林泉可喜。買得青山方退隱。怕青山、不在黃梁裏。人苦學、蠅攻紙。看君早晚東山起。定難拋、孤山梅鶴。西泠烟水。且共閒鷗閒領略。閒福於今無比。儘事業、閒爭杜李。歎我無家身老大。似暮雲、思岫胡羈此。雞肋味、一官耳。

攤破浣谿沙

團扇初捐枕簟冰。西風吹恨滿江城。鴻雁多應羈旅客。是前生。險韻吟安妨短夢。

愁霖聽斷黯孤燈。瘦影秋窗相對默。一更更。

齊天樂 南湖花隱樓圖爲宋芝山寫

南湖舊侶今何在。披圖令人腸斷。燕幕香殘。蓮塘月冷。寂寞秋娘庭院。流年暗換。悵宋玉多愁。吟魂難返。一樣飄零。翠樓落葉送秋雁。揚州無限舊雨。予始晤芝山於揚州。竟紛紛跨鶴飛去。霄漢小小真真。朝朝暮暮。誰問蓉城近遠。浮雲易散。趁風月當前。酒尊須滿。莫恨蓬山。有時遊汗漫。

長亭怨 衰草

漫重認六朝山色。霜冷雲凝。燒痕如墨。懊恨王孫。斜陽催送馬蹄疾。鞦韆欲脫。怕血染平蕪赤。是處亂蓬飛。共綠鬢一般秋白。還憶伴珊瑚。花徑暗把茜裙沾溼。踏青去也。算屨印爲誰留得。怎料取孤館秋清。牘消受。怨蛩涼夕。便扇底燈光。都被西風吹息。

又 衰柳

更誰向、灞橋攀折。萬里關河。一天風雪。古陌人稀。絲猶自馬頭拂。蕭蕭短髮。正顧影、同淒絕。盼斷七香車。還只當、聽鶯時節。休說。賺高樓翠袖。望眼欲窮天末。浮萍散了。怕流水、也應消歇。最苦是、落葉江城。賸一笛。風前幽咽。算夢裏腰肢。難解眉頭千結。

攤破醜奴兒 丙午秋秦雪舫耀曾孫月波麟趾張嘯峯鴻卓周香初綸渙蔣劍人敦復殷峴雲慈祐雷約軒葆廉隨園雅集招余未赴翌日諸君以詞見寄調此奉和

倉山故是風流地。一座詩城。割據誰能。此日羣仙拔幟登。也囉。花月好。正秋清。年來洛社鷗盟散。筇屐齊停。老病還增。輸與他人醉綠醞。也囉。花月好。正秋清。

虞美人 渾源道中阻雪

馬頭愁煞山無數。又待重重度。前身多分是征鴻。猶自辛勤、霜雪不停蹤。可憐村酒渾無力。怎把寒威敵。肉屏圍著獸爐紅。當日還嫌、舞袖惹輕風。

畫梅樓倚聲

又 楊花

斷橋西畔橫塘路。難挽
去還吹轉。簾幙無人捲。

買陂塘 六月二

至余方小極獨

以誌歡蹤且索

賺吟朋。幾番載酒。平波

六朝。風月騷人長。紅霞

笛。桂釀。雲和斜抱。低唱。

催雙槳。深情海樣。道家

卜算子

溪上小紅橋。橋畔垂楊

渡。打疊吟箋寄不成。今夜郎看取。

憶蘿月

倚欄人獨。誰墜搔頭玉。喚取侍兒籠畫燭。驚走一雙鸚鵡。羅衣點點流螢。冰肌漸
漸涼生。僥倖名題團扇。深宵猶傍卿卿。

百字令

雷約軒以陳迦陵填詞圖石刻拓本屬題爰賦此解

牛腰畫卷。算才人簿牒。有神呵護。髻也仙乎。追玉局。人誦大江東去。茂苑春心。梁園
客夢。收拾銷魂句。十年紅豆。種將愁恨如許。昔日湖海飄零。雲郎宛轉。得似圖中
女。吹破情天簫一管。鳳背憐伊風露。花月三生。樓臺七寶。賸下殘縑蠹。風流一代。有
情同此千古。

醉花陰

題約軒蓮社圖

色空空色參明鏡。心迹原同淨。詩在梵王家。盃會催來。莫便禪棲定。紅裳零落秋
風冷。碎葉搖烟暝。製了采蓮歌。瞞著吳娃。唱與鴛鴦聽。

虞美人

落花時節君何去。且在儂家住。累君辛苦畫雙蛾。還是秋千、還是聽儂歌。淚痕點點紅羅袖。憐否人消瘦。樓前解去木蘭橈。怎又門前、偷繫玉驄驕。

又不寐

眠時已是寒燈燼。好夢知無分。雨聲聲又漏聲聲。翻恨鄰雞、不肯早些鳴。征鴻不識相思字。儘把音書滯。萬千心事九迴腸。爲甚光陰、獨到五更長。

鷓鴣天 秋柳

曉岸霜清桂檝遙。短亭沙軟玉驄驕。最難客路逢青眼。猶記章臺譜綠腰。魂已斷。思無聊。風前愁對鬢蕭蕭。莫言人似萍無定。人去萍猶戀畫橋。

柳梢青

碧玉簾櫳。聽鶯時節。人在東風。茶熟廊前。日斜樓角。才畫眉峯。柳影隔斷塵紅。萬綠裏、春心暗通。繡幕針停。小窗吟倦。多分思儂。

喝火令 征帆

渺渺天涯夢。悠悠客子魂。忽迷烟雨忽迷雲。去也不知何處。斷雁楚江昏。招手知難見。高呼怪不聞。句留望眼賸斜曛。肯把牙檣。繫我藕絲裙。又怕東風無力。不會送歸人。

又 歸帆

柳港昏鴉亂。江樓翠袖寒。一時飛箭下驚湍。準把歸心望眼。收拾碧雲端。琴鶴隨人老。風波識路難。別時寧卜見時安。容易天涯。容易萬重山。多少白頭夫婿。未得到鄉關。

一翦梅 題陳曼壽梅窗覓句圖卽以寄懷

瘦影疏疏閣綺寮。翠羽聲調。玉雪香飄。閉門刻意事推敲。句寫銀毫。韻付瑤簫。千里相思水一條。芳訊頻勞。舊夢難拋。片帆好趁浙江潮。攜了詩瓢。來話春宵。

喝火令

畫梅樓倚聲

中酒迎人嬾。調鸚挽髻遲。開簾已是可中時。團扇羞看細字。前夜定情詩。鬥草輸裙佩。含毫褪口脂。堂前冷落賞花卮。姊去吹簫。小妹去彈絲。郎去紅牙低按。儂去唱郎詞。

相見歡 楊花

被他攪亂離腸。閉紗窗。不道絲兒氣力。恁清狂。紅樓畔。秋千院。太匆忙。好是飄零。飄不到他鄉。

虞美人

西風裙帶無人見。拜月歸來晚。穿花避月過秋千。知是隔花偷眼。是誰先。雙鬢喚整燈窗課。好夜拚清坐。箇人只道不情癡。卻是相思兩字。怕人知。

小庚詞

運




葉申薌（乾隆四五

）

字維嘏。號小庚。又號其園。福建閩縣人。嘉慶十四年進士。官至河南河陝汝道。著有天籟軒詞選詞譜詞韻閩詞鈔本事詞等。

詞者樂章之流派也。唐始萌芽。至宋暢其流。作者與詩爭富。大約多大江南北之人。而言四宮十二律八十四調者。以柳屯田爲宗。實閩產也。它如蔡君謨李伯紀之勳業文章。朱仲晦之道學。葛瓊瑄之神仙。並喜爲之。份份稱盛矣。顧自元以後。幾失其傳。國初惟紫雲滄霞而已。小庚太守慮絕學之莫繼。旣緝宋元六十餘家爲閩詞鈔。使車所逮。多白石碧山詞隱之鄉。酒闌燈炮。每樂道其古歡逸事。頃者賦四明之窗。尋六街之夢。舞繡歌雲。極鼓吹太平之盛。爲愈多而愈工。將見楓亭荔浦之間。有井水飲處。咸能唱曉風殘月。豈第續璧園之嘉話云爾哉。乙未花朝。館後學由拳馮登府書。



小庚詞

閩中葉申薌雜感

念奴嬌 東坡先生生日集何氏紅園

乘風歸去。笑髯翁。本是神仙中物。七百餘年仍不死。笠屐圖來滿壁。磨蝎身宮。蟄龍詩案。往事成鴻雪。一場春夢。名垂身後猶傑。卻喜東閣何郎。紅園雅集。詩興尤清發。一瓣香爲坡老爇。耿耿芳懷難滅。臘酒珠紅。嶺梅玉粲。凍雨絲飄髮。舉觴爲壽。祝公千古明月。

滿庭芳 嘉興遇雪遲同伴不至

極目天垂。打頭風峭。同雲一望瀟漫。高低近遠。凍雪未曾乾。生怪天公多事。殷勤把玉戲重翻。連朝裏。幾番做作。釀就十分寒。無端。剛贖得。詩敲韻險。量入杯寬。但孤吟獨酌。終不成歡。寒已敝裘侵透。難禁是。酒醒更闌。青綾被。鞞眠易覺。夢不到家山。

摸魚兒 東阿阻雪

小庚詞

最無端。昨宵風雨。偏將寒月吹去。輪蹄歷碌。剛過半。喜把來程暗數。翻又住。算難事、人間難。莫如行路。問天不語。更費盡工夫。裝成玉戲。六出舞飛絮。男兒志。堪笑儒冠多誤。浮名肯把人妒。酒闌欲擬鷓鴣賦。多少壯懷誰訴。拚醉舞從吾願。此身願化陶家土。休論甘苦。但塊壘須澆。醉鄉頻到。此外少佳處。

沁園春 自題二樂圖

蠹可成仙。麴亦稱神。奇乎未奇。但擁將萬卷。百城何假。飲堪一石。卮酒安辭。惠子五車。平原十日。樂在其中。奚復疑。從吾好。便曹倉高築。仲榼常攜。古人糟粕誰知。笑賢聖。還憑清濁爲。倘五經饋至。吾應束帶。一甌借得。我且垂帷。文字生涯。醉鄉日月。消受清閒事。事宜。君休笑。任相呼醉漢。或日書癡。

臨江仙

十載江湖常載酒。等閒孤負春風。莫愁湖畔板橋東。垂楊千萬樹。何處繫花驄。爲愛綠窗人似玉。卿偏憐我情濃。翻教恨晚惜相逢。清歌聽未已。離夢又怱怱。

念奴嬌 狂歌

麴生知己笑。憑伊澆盡胸中塊壘。雲夢真堪吞八九。何物還能芥蒂。曼倩談諧。幼輿任達。甚矣吾狂矣。人生行樂及時宜。自留意。也解筵畔評花。尊前顧曲。學作逢場戲。但得百年開口笑。此外不知餘事。白眼閒看。素心誰是。閱盡人間世。唾壺敲缺。短歌無復宮徵。

菩薩蠻

好花開處原非易。看花須惜憐花意。花亦解人憐。臨風花自偏。酒徒狂態作。翻道花情薄。對酒碎花枝。此情癡未癡。

金縷曲 落花

命莫如花薄。歎年年、一番春盡。一番漂泊。孤負東皇栽培意。生受封家惡劇。況更有許多做作。飛上錦茵能有幾。但吹來。藩溷真無著。回首視。孰清濁。紅嫣紫姹何如。昨想都因未除結習。俗緣難卻。琪樹瓊花神仙品。一染紅塵便錯。空悵望。蓬瀛樓閣。

此別鈞天成小謫。也有人說道人間樂。身世事。杏難託。

沁園春

辛未改官後乞假歸省留別芷汀六兄並題洪江送別圖

憶丁卯冬。買洪塘舟。與君共登。笑棘闈再試。初欣覓詠。蓬山一到。旋被風驚。五度星霜。三經離別。況此還爲萬里行。重披視。正人歸海嶠。心戀春明。壯游若快平生。但怕聽陽關第四聲。念觚稜曉日。瀛洲獨步。珊瑚夜月。洱海孤撐。珊瑚撐月乃滇中故實好繼家聲。來持使節。慰我蕭然遠宦情。頻回首。想西堂詩夢。別後常縈。

滿江紅

九日出都留別楊蓉峯前輩李蘭卿舍人

地角天涯。誰禁得。幾番離別。爭奈是。銷魂況值。薊門秋色。握手沈吟忘語笑。回眸頃刻成睽隔。盼道旁。憔悴柳絲黃。難攀折。聚與散。如萍迹。往復返。真駒隙。但驪歌一唱。此情何極。綠酒好留他日醉。青衫已爲今朝溼。慰相思。惟有月當頭。同南北。

沁園春

淮上留別次幔四兄

別三神山。作萬里游。斯真壯哉。笑八年在外。慣嗟行役。一行作吏。暫賦歸來。誰念王

孫難逢。漂母頻過。淮陰古釣臺。相逢幸。正漫停征櫂。共把離杯。家園嶺嶠長淮並。燕北滇南各一涯。念何時。夜雨聯牀共話。每逢佳節。對酒遙懷。底事年來。吾家兄弟。碌碌偏多百里才。交相祝。是潘輿迎奉。同慶南陔。

滿江紅 壬申九日疊前韻

去歲今朝。記曾是、燕臺分別。萬餘里、飄然來看。九峯山色。紫蟹黃花風景杳。碧雞金馬關山隔。歎每逢、佳節倍相思。腸應折。賓客少。無游迹。簿書簡。多餘隙。笑直須臥治。清閒已極。高會遠懷。窳廠勝。荒居絕類。溢江溼。問愁城、自昔酒兵降。今將北。

水調歌頭 癸酉送同年戴春溪舍人差旋

遠宦萬餘里。落拓寄南荒。故人持節遙至。相遇碧雞坊。未作臨邛負弩。且學都官分校。玉尺共評量。君返鳳池去。重與奏明光。應念我。宦情減。旅愁長。山城斗大。漫說彭澤與河陽。京邑舊游相問。爲道狂奴故態。今也不成狂。回首望霄漢。分手悵河梁。

鳳凰臺上憶吹簫 菜花

粟影疑空。麥雲訝薄。凝眸一望千畦。儘臨風錦爛。映日金迷。爲愛淺深濃澹。平分出、
近遠高低。春如許。黃花滿地。莫認秋籬。參差麴塵吹動。正陌上人歸。色蘸春衣。記
年年佳節。長說挑時。試問題詩張翰。風流句。端合因伊。還相笑。芳根咬處。此味誰知。

又 白芍藥

素魄籠煙。豐膚膩雪。亭亭玉立春風。豈洛川微步。姑射仙蹤。彷彿趙家姊妹。新妝竟、
齊倚簾櫳。還應是。楊妃出浴。豔冠驪宮。形容難摹丰韻。笑謝朓當年。祇詠翻紅。任
廣陵嘉話。金帶奇逢。爭似盤盂琢玉。坡仙語。比擬偏工。蓮香白。芳名記取。色相皆空。

木蘭花慢 袁季範水晶簾下看梳頭圖

袁絲今老矣。看故態。尙疏狂。愛畫閣春風。湘簾曉日。坐對吳娘。新妝笑臨鏡檻。綰雙
鬢。斜掠鬢絲長。巧樣靈蛇學就。妖姿墮馬偷將。回廊。花影罨垂楊。風送綠雲香。倘
芳卿我見。猶憐斌媚。何況伊行。端相天然丰韻。便虬髯臥看也無妨。眉懶任誇京兆。
風流不讓王昌。

又 秋湖送別圖

人生行樂耳。得閒處。便宜偷。奈小別。逡巡。柔腸繾綣。欲去還休。芳游暗攜翠袖。擬都將。離恨載扁舟。鏡裏波添眉黛。酒邊風助歌喉。情稠千種意。綢繆。一樣思夷猶。恨金烏影墜。碧雞路近。雲散風流。新愁頓生萬斛。倩琵琶。彈出水天秋。綠鬢韋娘初嫁。青衫司馬難留。

沁園春 送秦馥堂司馬領運

辭雲中君。歌蜀道難。勸君莫嗟。看奏最三年。兼逢奉使。離官萬里。快且還家。白帝城高。黃牛灘陡。此去真乘八月槎。樓船壯。盼亭登至喜。穩下三巴。亭亭玉樹堪嘉。愧如許。頭顱漫倚葭。羨祿養承歡。捧來毛檄。弱齡作宰。栽遍潘花。首薦新叨。頭綱獨領。試問歸期再及瓜。歸來日。是九重恩賚。五馬榮誇。

滿江紅 碩致堂別駕黑龍潭看梅圖

丰度翩翩。問驃騎。何如第五。況復是。士元驥足。早看展布。需次十年秦塞久。馳驅萬

里滇池阻。贖閒來、游歷好山川。開襟處。潭百尺。龍深護。梅千載。花初吐。正微吟把卷。翛然天趣。羨爾閒身邱壑置。嗟余浪迹風塵苦。擬何時。同躡筇鞋青。眠花塢。

一萼紅 己卯四十初度

笑奔波。忽平頭四十。歷碌隙駒過。萬里攜家。三年宰劇。虛將心緒消磨。邇來是、宦情都澹。爭禁得、半載病爲魔。酒淺生疏。吟懷蕭索。興致如何。回首舊游天上。悵仙山縹緲。落際風多。滇海塵勞。蜀江瘴癘。榮枯寵辱由他。憶香山、著緋司馬。也曾嘲、官職未蹉跎。白詩四十著緋軍司馬男兒官職未蹉跎況我頭顱如許。且自婆娑。

滿庭芳 潯陽琵琶圖

詞客牢騷。美人遲暮。情懷一樣無聊。悲秋傷別。無那可憐宵。忽憶青樓舊夢。都付與、慢撚輕挑。鄰船客、尋聲暗問。移舫近招邀。誰描愁萬種。風鬟霧鬢。老大萍漂。休提起當年。一曲紅綃。我亦青衫司馬。重題處、也爲魂銷。應念是、天涯淪落。同寄恨迢迢。

水調歌頭 辛巳初度題黔南驛壁

回首過來日。四十二年非。半生俯仰隨俗。名利兩相違。萬里遠飛鳧鳥。十載重瞻鳳闕。舊夢總依稀。惆悵再來燕。仍向社前歸。青綾被。紅綾餅。更休題。腳襪手版。未卜何日息塵機。瘴雨炎風天氣。茆店筍輿滋味。辛苦復奚辭。也解歸休好。何以慰朝飢。

滿庭芳 高郵遇雪

病骨闌珊。旅懷蕭瑟。十年又過秦郵。迎春送臘。兀坐對扁舟。連日嚴陰釀雪。侵尋是。寒透重裘。因風絮。晚來更急。堆積滿船頭。寒流。流漸澀。輕橈過處。玉碎瓊浮。愛潛聽琤琮。細響常留。只恐宵深凍合。歸舟阻。羈思難收。私相禱。晴帆高掛。明日到揚州。

又 壬午人日過梁谿題韻香道人空山聽雨圖

秀格簪花。生綃寫蕙。年時曾仰芳名。梁溪雪權。快得遇飛瓊。爲我含豪呵凍。素箋上。墨妙縱橫。攜來是。湘香滿袖。傳翫遍江城。忘情。偏愛此。空山獨坐。聽雨圖成。想聞根參透。萬籟俱清。猶恐塵心未盡。菩提水。淨洗光明。蒲團畔。泠泠幽韻。常答步虛聲。

漁家傲 羊城留別芷汀六兄

水驛山郵經歲度。怱怱又別珠江去。江上木棉花正吐。千萬樹。紅雲遮斷羊城路。波面漂萍風裏絮。游蹤官跡渾無據。十載分離旬日聚。腸斷處。鷓鴣聲急斜陽暮。

永遇樂 和魏贊卿司馬詠萍

漠漠楊花。東風吹到。添半池翠。細點星疏。柔茵錦滑。蕩漾圓還碎。隨波容裔。偷遮山影。一碧侵人眉際。傍苔磯。平鋪似掌。礙他釣艇垂餌。浮蹤若寄。升沈聚散。付與半篙新水。魚唼頻吹。蜻飛小立。鴛浴根翻紫。去留無計。爭如蕪菜。慣惹秋風鄉思。斜陽外。菱塘蓼嶼。藉伊點綴。

鳳凰臺上憶吹簫 重游廣西州東湖

艇泛瓜皮。波揩菱面。重游也屬相宜。看蒲縈翠帶。蓮褪紅衣。蕩入綠雲深處。沿堤去。催喚漁師。鳴榔過。千絲細網。出水魚肥。忘機。傍人鷗鷺。每篙影輕搖。還自驚飛。忽片雲頭上。急雨催詩。叢葦高荷送響。涼衫上。煙靄霏霏。歸來後。寺樓風定。鴉背光低。

滿江紅 重臺紅梅

茜雪飄香已占斷。羅浮春色。幾曾見。南枝放處。重攢五出。競爽讓他蓮蒂並同心。疊抱丁香結。想雙聲絳樹。是前身。方修得。點不盡。深宮額。吹不斷。江城笛。宛暗香疏影。垂來的的。染翰好憑雙管手。簪花恰似連珠格。向石湖。譜外數奇胎。真佳絕。

滿庭芳 綠萼梅

染黛嫌濃。銷冰訝薄。春波淺蘸芳魂。天寒修竹。翠袖倚無痕。烏羽攏。褰遙映。羅浮夢。好與溫存。橫斜影。巧偷苔暈。清絕月黃昏。前身憐應是。仙人萼綠。小字同新。數頭番花信。略較逡巡。倘向含章點額。撩雲鬢。鈿碧輕勻。東風惡。一簾花雨。腸斷墮樓人。

水龍吟 水仙

是誰微步淩波。娉婷顧影東風裏。額黃明澹。珠璫搖曳。冰綃雪袂。韻比蘭腴。品同荷淨。天然嫵媚。向春前臘底。評量花信。都說道。三番是。題就梅兄。攀弟。玉玲瓏。更饒風致。清泉白石。花瓷髮几。山齋位置。風透重簾。微聞薌澤。粉濃脂膩。翻教人勾起。閒情多少。憶鴛花地。

木蘭花慢 紅山茶

譜滇南花卉推第一。是山茶。愛枝偃虬形。苞含鶴頂。烘日蒸霞。極杈高張火傘。笑粵
姬。渾認木棉花。葉幄垂垂綠重。花房冉冉紅遮。仙葩種數寶珠佳。名並牡丹誇。憶
吟成百詠。記稱十絕。題遍風華。生涯天然爛漫。自臘前。開放到春除。風定絳雲不散。
月明。賴玉無瑕。

念奴嬌 謝王協戎惠巧色菊

重陽近也。學淵明閒探。黃花消息。恰好江州王刺史。送到幾株秋色。黃妒鵝翎。白欺
蝶粉。紫豔分鴛翼。攜尊相對。不妨長醉花側。正待細把餐英。驚看朵朵。巧樣爭偷
得。誰料夜郎荒僻地。忽覩名花傾國。倩女雙魂。徐妃半面。鴉髻三丫擘。傲他五柳。昔
年當未曾識。

滿江紅 丙戌初到大關作

斗大山城。居然是。滇東鎖鑰。千餘里。襟黔帶蜀。犬牙相錯。屹烏蠻花風景異。棘僮爨

女夷情樂。沐承平。雅化百年來。安耕鑿。輿馬困山程。虐舟楫。險溪灘。惡笑鴛鴦鳥道。崎嶇猶昨。田壘樓梯窗際列。泉通竹視厨中落。對邊關。斜日起新愁。聽笳角。

金縷曲

游宦成羈旅。問當時。誰人投筆。誰人誓墓。笑我頻年牛馬走。依舊頭顱如許。休更憶。金閨故步。萬里攜家從薄祿。又那堪。千里拋家苦。離思積。向誰訴。愁來難覓高陽侶。鎮無聊。編籬穿沼。移花栽樹。敢學魚湖同鹿柴。運甓漫消閒緒。但可惜。流年虛度。會道銷魂緣賦別。恨而今。魂也無銷處。空悵望。碧雲暮。

又 撫琴圖

梧竹清陰繞。對庭軒。瑤琴獨撫。是何年少。濯濯丰姿憐張緒。蓮幕蜚聲偏早。託雅趣。絲桐深妙。莫奏高山流水曲。自鍾期。去後知音少。但目送。孤鴻杳。披圖細揣君懷抱。想當時。文君未遇。偷彈新調。欲寄琴心求鳳意。盼得遠山眉好。況恰有。雙鬢來到。笑我忘情何所好。學淵明。祇愛無絃操。詞題罷。尊頻倒。

清平樂

濃雲翻墨。遮卻青山色。萬變圖成真頃刻。草莽魚鱗誰識。須臾雨散雲空。碧天千里光同。閒倚闌干四望。依然翠錦屏風。

點絳脣

繞屋青山。屏風十二週遭綠。峯重嶺複。拄笏閒延囑。最是宜人。雨後山如沐。新妝束。嵐光翠撲。個個雲鬢矗。

臨江仙

陣陣輕雷催驟雨。曉窗快覺涼生。坐聽檐溜雜泉聲。小庭苔逕沒。新沼鴨闌平。階竹枝垂青到地。短籬瓜蔓輕盈。遙山隱隱近山明。浮雲馳倏忽。飛瀑落縱橫。

蝶戀花 蟬

庭院陰濃消暑氣。忽帶蟬聲。便有山林意。雨後風前聽未已。纏綿最在斜陽裏。飲露棲煙仙骨蛻。品格清高。曾伴金貂隊。獨有長吟無限思。秋來慣惹新愁起。

永遇樂 秋夜不寐

秋後關山。月斜衾枕。皆斷腸處。露井啼螿。霜霄過雁。更湊淒涼趣。銀釭珠穗。寒花半吐。起坐欲挑還住。漫思量。酒徒狂態。而今鬢影如許。無端夢裏。悲歡聚散。又被鄰雞驚去。薄宦飄零。壯懷消滅。怕起中宵舞。關心何在。嶺梅開否。芳訊遠沈驛路。頻搔首。青綾寒擁。強吟悶句。

聲聲慢 秋聲

冷月催砧。尖風侵牖。滿庭都是秋聲。乍歇寒蛩。砌蛩斷續相迎。遙天數行新雁。引圓吭。肅肅宵征。無奈是、聽荒雞。隔膊壯志還驚。池上蕭蕭送響。想敗荷枯葦。衆籟齊生。金井梧桐。葉疏遠韻偏清。芭蕉未經雪壓。與松濤、特好爭鳴。殘漏急。又單于吹徹。曉角高城。

齊天樂 喜內人挈兩女歸聘

宦游萬里攜家累。關心更憐兒女。十口相依。雙珠未聘。耽閣芳齡誰訴。欣聞歸去。知

幾費經營。幾般辛苦。多感山妻。將雛曲向鳳絃撫。秋光應念倦旅。那堪經遠道。頻歷霜露。黔館寒螿。湘江新雁。都是添人離緒。歸期漫數。盼橘綠橙黃。歲華將暮。輾轉春來。又催登驛路。

青玉案 九日登郡後山

秋來雅稱登臨意。況此日、重陽是。獨惜邊關無勝地。笳輿輕穩。幔亭高峙。賓從隨游戲。風高落帽高人致。末座難逢孟嘉至。試問黃花開也未。蟹螯休憶。萸囊且佩。莫負登高會。

浪淘沙 山行

秋色滿天涯。旅興清佳。籃輿緩緩遶山斜。隔岸霜林紅不斷。深處人家。心緊路偏賒。轉入幽遐。煙村錯落半雲遮。牧笛樵歌分隊去。暝色歸鴉。

祝英臺近 紅葉

茜霞明。桃浪妒。寒豔竟如許。滿眼秋光。春色莫相誤。爭愁萬卉霜欺。誰知霜後。轉染

就、嬌紅無數。雁來否。更愛階下亭亭。疏影列珊瑚。柏赤楓丹。催得歲華暮。因憐酒客衰顏。霜林一樣。日日醉斜陽一度。

高陽臺 連得梁茵林廉使林少穆齋院手書感賦茵林書有安得好風吹近一方語故及之

拙甚於鳩。忙還似燕。年年來趁春風。舊壘難依。借棲終歲。愬愬。滇雲縹緲三千里。學浮鷗。莫定西東。笑萍蹤。漂泊依然。濩落難容。故人念我疏慵甚。向千山萬水。遠致郵筒。珍重開緘。錦書芳意重重。多情爲盼。風吹近。奈好風不庇寒蓬。莫書空。且倩雙鱗。猶望南鴻。

漢宮春 茵林來書以漢雙瓦硯拓本緣始索詩賦此以代硯爲紀文達公所貽

漢瓦名齋。笑高人佳致。冠絕千年。鴛鴦舊范。況是雙璧依然。師門貽硯。念吾鄉故事。聯編。曾記得。銘鐫夾深。好將嘉話同傳。夾深草堂硯在林。硯樵明府處云亦紀文達

公贈其尊甫澹亭先生 篆就長生無極。想武皇當日。志在求仙。祇今劫灰已冷。片

瓦爭憐。錦函檀檝。費騷人。多少吟箋。應笑彼。香姜銅雀。浪誇斷甃零甃。

踏莎行

檐溜飄階。山雲穿戶。重陽過後猶風雨。悲秋已自恨無聊。問誰能免添離緒。新雁不來。黃花無語。紙窗兀坐朝還暮。可堪窗外有芭蕉。聲聲似說新愁苦。

減字木蘭花

秋光冷澹。已過重陽。花始綻。雨後離披。猶有霜枝護短籬。花前對酒。爭道黃花人比瘦。人隔天涯。憔悴西風鬢影斜。

風入松 喜晴

經旬寒雨鎮無休。人意不禁秋。朝來乾鶻聲頻噪。開窗望、爽氣迎眸。澹宕晴雲。影疊瞳矓。曉日光浮。須臾暖透木棉裘。葺屋喜偏周。家家新稻黃雲似。籌車滿、玉溢珠流。萬寶西成景象。千箱南畝歌謳。

南歌子 夜柝

雨裏音偏急。霜天韻更清。也隨寒漏換殘更。直伴窗雞、噉旦到天明。遠與吟螿和。高疑警鶴鳴。愁人耳畔最多情。每待曉笳、吹徹便無聲。

解語花 曉行

殘星帶雁。落月啼烏。畫角催天曙。鞭聲鈴語。輪蹄亂、迤邐客程分去。衝煙披霧。望初日、瞳矓將吐。霜力濃、卯酒全消。瘦馬凌兢步。試問爲何羈旅。被名韁利鎖。勾引如許。不辭辛苦。奔波狀、歷碌那論寒暑。宦游吏誤。念孤負、香衾無數。算幾人、暖閣黃紬。高臥聽衙鼓。

綺羅香 東川道中

宿凍封條。新寒起粟。連日嚴陰催就。霧海瀾漫。望去欲迷昏晝。聞雞聲、知有山居。瞥帘影、忽來村口。傍郵亭、是處人家。帶煙都似乍炊後。西風頻聽夜吼。還恐朝來釀雪。客程廝勾。曉色熹微。誰料碧翁晴透。敵霜威、卯酒全消。怯風力、重裘依舊。想歡聲、

暖遍茆檐。負暄多野叟。

又 新柳

晴靄烘黃。遙波蘸碧。偷把春光洩漏。非霧非花。凝望似無還有。倚東風、青眼才舒。浥朝雨、翠眉將鬪。最可憐、長短亭邊。嫩條先折玉人手。妝樓頻誤少婦。忽向陌頭瞥見。芳心潛逗。黛影煙痕。慣惹春情。倦憊欲藏鶯。淺綠未勻。待繫馬、柔絲難繫。問當年、張緒風流。可能如此否。

蘇幕遮 春草

燒痕蘇。酥雨細。一遍春風。一遍添新翠。除卻朱門居要地。廢沼閒庭。處處饒生意。妒裙腰。黏屐齒。若道無情。南浦情何已。漫說行人千萬里。碧色連天。更在行人外。

蘭陵王 秋陰

正蕭索。連日淒陰漠漠。無寥賴。秋思惱人。溼霧低雲。黯池閣。重陽已過卻。難博。風高帽落。東籬畔。愁損菊花。孤負登臨對寥廓。新寒晚來惡。念獨擁青綾。歸夢難託。香

濃燈罨煙凝幙。聽冷雁音遠。瘦蛩吟澀。寒聲隱隱送夜柝。把離恨重拓。曉覺悵猶
昨。望樹影迷濛。山態冥邈。米家畫幘難描摸。想酒興誰遣。吟懷無著。西風何處倩爲
我。掃寂寞。

滿庭芳 自題詞存

鐵板高歌。紅牙低按。佳話分擅詞場。笑余迂拙。渾不辨絲簧。卻愛倚聲深妙。暗偷搯、
竊效顰妝。怡情處。花天酒好。隨意譜宮商。清狂留幾許。零箋賸墨。結習難忘。向偷
聲減字。子細評量。縱未盡諧音律。半生也。曾費吟腸。憑誰付。雙鬟試唱。紅豆記新腔。

過秦樓 川江到宜昌爲出險舟中始有帆檣錨艣之設詞以紀之

一片鳴鈺。數聲柔艣。連檣曉發宜昌。值桃花新漲。把瞿塘灑瀨。換做康莊。醜酒醉長
江。願布帆。風色相將。喜峽猿聲斷。江魚味美。穩坐篷窗。溯彝陵在昔。稱荒郡。自紅
梨吟後。豔說歐陽。尙堂留絳雪。想風流猶憶。太守文章。名士半疏狂。笑古人。遷謫何
妨。遇江山卉木。偶然題詠。千載流芳。

洞仙歌 荆江曉行

沙明岸遠。正荆江清曉。鱗唱齊聲舉蘭橈。錦帆開、驚起一陳神鴉。倚檣望殘月、尙懸林表。 鞞紋連萬頃、蘋末風生、吹動紅旌向前透。狂煞弄船兒、拍手歡呼、守帆腳、不教輕掉。又只恐江流似腸迴、願暮北朝南、心心虔禱。

摸魚兒 石首阻風

聽晨笳、櫂歌齊發。怱怱移過沙觜。長年忽覺竿烏轉、驚道石尤風起。行且止。共商略、依然繫纜垂楊裏。短檣漫倚。盼五兩杓回、三篙浪軟、好把畫橈理。 重搔首、參透盈虛妙旨。其機多半如此。蜀江已快乘槎便、休怨停舟荆水。怡然喜。況爲我、驅除煩暑回天氣。不知許事。且料理清尊、安排吟卷、靜待掛帆耳。

燭影搖紅 由荆江入漢江南望洞庭作

浪迹天涯。半生鴻爪紛紛似。此行爲補未游蹤。巴郢三千里。曾向洞庭買醉。又浮槎、東來漢涘。星霜八度。笑問垂楊、樹猶如此。 鸚鵡洲邊。古來多少才人淚。萋萋芳草

自生愁。極目黏天翠。且泛鴨頭綠水。學青蓮、糟邱高壘。醉鄉穩住。痛飲狂歌。唾壺敲碎。

又 戊子初度登黃鶴樓

遼鶴重來。駒陰瞬屆。知非歲。世人幾輩得神仙。此語原游戲。百尺危闌遍倚。念蓬飄、誰時暫止。鄉關何處。望極南天。萬重煙水。仙棗亭前。道人指說新栽是。浮生半百。尙蹉跎。過眼雲煙似。白髮漸來鏡裏。笑頭顱。依然如此。青衫雖舊。縱聽琵琶。幾曾溼淚。

水龍吟 武昌留別李儕農太守

半生落拓天涯。常將刺向懷中滅。情深傾蓋。風流肯讓。當年僑札。人詫登龍。我慚交鮑。此緣奇絕。想苔岑臭味。適相投契。都非爲尋常設。 襪儻人憎。觸熱笑。邨生時來。排闥豪懷北海。座中容我。酒徒疏闊。爭奈恩恩。掛帆東去。碧雲天末。念何時。把袂開尊。重與話南樓月。

南樓令 舟中望采石

采石古磯頭。磯邊太白樓。欲登臨、遙隔蘆洲。四十年前曾到此，漫指點，舊時游。王
事敢淹留。空凝醉後眸。好江山、眼底難收。釀酒臨風憑借問，還許我，再來不。

南鄉子 陳洲阻風

何事苦淹留。日日征帆滯石尤。咫尺秦淮天樣遠，凝眸。但見長江滾滾流。繫纜近
陳洲。過盡重檣估客舟。北雁一聲驚曉夢，新秋。真箇言愁始欲愁。

滿江紅 金陵書懷

過此江山念都是，舊曾相識。萬餘里，張帆捩舵，也應暫息。愁水愁風心欲碎，憂晴憂
雨頭將白。到秦淮、未敢訪桃根，青衫客。憶前度，垂髫日。再來是，燒燈夕。算者番三
看，白門柳色。忙近槐花文思湧，漲生桃葉秋潮急。笑年來，如許好光陰，閒拋擲。

燭影搖紅 得茵林方伯手書以近刻諸種見贈並邀蘇門之遊賦此奉答

咫尺天涯。蓬山在望船難到。卅年酒社舊狂徒。心似驚鳥遶。萬里楂來天杪。溯漕河、

秋風汛早。舟裝百萬忙。煞黔婁。頻頻西笑。珠玉紛貽。臨風雜誦舒離抱。政成述德。創梁祠。葢林新建伯鸞祠堂徵詩輯志名出三高表。準擬來年歸權。過蘇臺。放懷吟嘯。滄浪亭畔。濯我塵纓。羈愁頓掃。

揚州慢 平山堂

廿四橋邊。二分月夜。繁華自古揚州。憶髫齡隨侍。騎竹馬曾游。從此後。征帆頻過。綠愜意懶。輒引風舟。笑半生。彈指聲中。白了人頭。者番重到。數良辰。才過中秋。念山水依然。林亭就廢。勝蹟仍留。四十二年舊夢。憑闌望。煙靄空浮。但巖前。老桂飄香。尙滿山陬。

珍珠簾 桃源夜行

激江凍月。明如晝。溯寒潮。穩趁葦帆風驟。檣影動棲烏。傍幾行岸柳。忽聽櫂歌煙外起。又暗把。旅情勾逗。傷憊。且抱膝微吟。挑燈喚酒。隱約人語。燈光。知近依水市。去程將盡。試問夜如何。恰三更時候。篷背霜濃。寒氣肅。聽遠驛。數聲荒漏。依舊。向斗帳

孤眠。梅花影瘦。

桂枝香 蟹

江鄉稻熟。正蓼老浦紅。蘆凋波綠。好是沿江縛棹。葦簾深曲。晚潮乍褪灘痕露。聽爬沙、映燈爭逐。健螯泥護。嫩筐沫聚。滿盞聲促。宜右手、持杯相屬。更細縷香橙。碎接新菊。那似蒹風風味。漫關榮辱。老饕賦罷閒修譜。遇無腸、便求符竹。圓評湯眼。清聆琴韻。雅情堪續。

減字木蘭花 蝦

長鬚黝目。來趁新潮痕。蘸綠戢戢如蠶。自愛沿堤入翠籃。撈來草屨。謝豹聲中花事老。巧是吳儂。喚做彎鑽比肖工。

憶舊游 得家信知內子臥病蘇邸

憶將雛曲奏。三載分飛。卻返鄉園。又買洪江櫂。向黃花香裏。送到蘇門。秋風偏困倦。旅衰黛。疊愁痕。轉引起離情。碧雲縹緲。立盡黃昏。銷魂黯然處。是魚隔層波。雁杳

重雲寂寞寒江夜。念青綾獨擁。孰與溫存。人生惟有別苦。此恨倩誰論。問更待何時。篷窗雙飲同翠尊。

江神子 任箕川明府晦翁詩意畫冊

春江浩渺穀紋生。畫橈輕。箬篷新。多少帆檣。來往此中行。驀地狂飆濤拍岸。爭又向。岸邊停。推篷曉起問前程。宿煙清。曙霞明。依舊滄波。雙槳浪花平。畢竟輸他漁艇。穩風與雨。不曾驚。

掃花游 綠陰

牡丹開後。數番風將盡。棟花時候。萬紅似繡。恨無端暗把。園亭換就。翠幄週遮。不許鶯穿燕逗。林光厚。更潤遍。簾櫳。濃蘸衫袖。倏慙風雨驟。念幾許情懷。總如春瘦。杜郎去久。悵尋芳較晚。已成孤負。畏景將臨。且喜滿庭雲皺。休相咒。對清陰。好消炎晝。

滿江紅

萬里歸來。久吹斷、龍潭清夢。滇中黑龍潭古梅兩株傳爲唐時物。多情是、賣花人把。

一株春送。老幹經霜。風格古。仙姿酣酒。胭脂重。且欣然。分卻典衣錢。攜鋤種。瓦盆貯。山齋供。枝低亞。香浮動。念幾生修到。品高誰共。好向小窗邀月賞。莫教長笛臨風弄。更急須。招客對花開。傾春甕。

水調歌頭 陸萊臧司馬螺江載石圖

拙宦將廿載。歸計幾綢繆。羨君家風未墜。載石壓扁舟。萬石灘頭水立。七里瀧中風急。穩泛浪花浮。更過季鷹宅。笑問舊沙鷗。追念我。沿灘瀕下黃牛。舟裝百萬。連檣經歲。狎陽侯。宦海波濤閱盡。世路蓬萍難定。理櫂又乘流。把袂與君別。何日解離憂。

漁家傲 壬辰北上

春水方生春草碧。扁舟又作辭鄉客。江岸柳條才一尺。難攀折。回眸已是雲山隔。催理倦篙離岸側。蕭蕭暮雨篷窗黑。欹枕欲眠眠未得。情何極。挑燈呼酒歌聲咽。

鷓鴣天 富陽道中

董相墳前暫繫橈。北風吹送海門潮。舟無長物輕難進。客有離懷醉未消。雲嶂疊。

浪花高。富春山水助吟毫。此行恰趁桃花漲。重訪仙源路豈遙。

南樓令 漫歌

春水麴塵波。春聲入櫂歌。好光陰、爭忍虛過。老去閒情頻對酒。贏得是、醉顏酡。往事說東坡。驚心春夢婆。問玉堂、茆舍如何。塵世但逢開口笑。榮與辱、儘由他。

又 抵都門

又踏軟紅塵。相看俱老成。三十年、七度春明。嬾散情懷羞對鏡。憐鬢影、欲星星。酒輒忘形。誰論身後名。愛西山、山色常青。人海藏身應久慣。更何必、問君平。

沁園春 潘星齋藤花館填詞圖

春月梅開夜宴呼賓。昔聞老坡。更易安風調。比同花瘦。文姬雅操。輒和漁歌。絳樹雙聲。紫雲高唱。肯讓檀郎才思多。花陰下。把紅牙親按。微斂煙蛾。自慚衰柳婆娑。也曾爲、填詞著了魔。羨錦瑟年華。珠溫玉潤。瑤臺眷屬。鳳唱鸞和。人鏡芙蓉。門風紅杏。佇看聯翩擢雋科。風流處。認藤廳舊履。接武重過。

一翦梅 潘紱庭蘭閨唱和圖

慧業修從忉利天。藍壁良緣。錦瑟華年。潘花謝絮總神仙。才調翩翩。風度娟娟。滿抱芳懷若箇傳。並倚吟肩。對擘吟箋。畫圖誰仿小娘嬾。紅杏詞妍。紅豆情堅。

菩薩蠻 秋葵

迎眸幾點秋光媚。倚風淺拂鴉黃膩。遮莫認東籬。低傾金屈卮。嫩苞開曉露。影轉斜陽暮。吹散麴塵衣。芳魂伴月歸。

南樓令 絳庭囑題秋林琴趣圖

秋色到蕉桐。秋心無限濃。好襟懷、瀟灑誰同。膝上橫琴雖不鼓。時亦復、送飛鴻。古調杳難工。知音豈易逢。最移情、海上仙蹤。流水高山仍著相。真妙手、但空空。

鵲橋仙 本意

新秋涼乍。初弦月掛。天氣偏宜良夜。世間兒女總情癡。道此景、古今無價。鴛鴦機杼卸。鵲橋忙跨。多少幽歡情話。雙星先自沒工夫。又誰把、蛛絲巧借。

采桑子 梅花雙影圖爲星齋賦

瓊枝玉樹交相倚。人比梅清。影並花明。修到今生定幾生。同拈雙管吟兼畫。天上雙星。仙裏雙成。都讓卿卿兩璧人。

玉連環 鸚鵡

靈禽翻被能言誤。向雕籠珍護。妒他梁燕每雙棲。常愛把春寒訴。方響一聲輕度。喚雲英不住。粉郎詩句是誰教。在畫閣深深處。

減字木蘭花 美人焚香圖

亭亭獨立。蟬穀倚風鴉髻側。竟體芳蘭。自有生香妙莫參。春閒晝永。靜對爐熏看篆影。一氣雙煙。縹緲凌虛意欲仙。

眼兒媚

老來偏費惜花心。秋色豔難禁。雞冠血染。鵝翎殼破。紅透黃深。酒人例向斜陽醉。醉後遶花吟。花應笑我。髭將撚斷。鬢欲愁侵。

柳梢青 秋日陪諸同年登陶然亭

快馬輕車。城南飛鞚。秋日將斜。遙望危亭。參差雉堞。遠近蘆花。憑闌風景無涯。笑
爭道。江鄉更佳。催整歸鞍。寺樓鐘動。暝色棲鴉。

驀山溪 自題庚午雅集新圖

頭顱依舊。廿載重回首。著破此青衫。滯溟雲。浮湛最久。軟紅頻踏。故態尙疏狂。杯在
手。笑開口。肯負尊中酒。故人知否。天意憐憨叟。且許作詞顛。任學他。蘇辛周柳。閒
來拄笏。莫問鬼揶揄。身宜守。顏休厚。留對圖中友。

行香子 醉題吳醉生駕部聽琴圖圖爲聽其姬人翠濤撫琴

以醉爲生。爾醉誰醒。笑此髯。此樂誰曾。旣修豔福。更賦閒情。對杯中物。琴中趣。意中
人。天爽秋晴。月澹花明。問何時。許我同聽。紋紗窈窕。絃語瓏玲。憶詞中句。簾中影。
畫中聲。

朝中措

歸鴉陳陳日沈西。天闊暝雲低。遠市車聲歷碌，隔城嵐影淒迷。最宜入畫，紅黃村樹，紺碧招提。倦客吟情未減，高秋景物難題。

醉太平

秋晴夜清。雲輕月明。遠庭閒步微吟。引離人恨生。更深酒醒。愁縈夢驚。擁衾遙伴孤檠。更怕聽雁聲。

山亭宴

和戴春義儀部贈別元韻

征衫慣漬燕臺酒。舉離觴。別愁今又。去作浙東游。佳山水。何妨住久。烏篷畫舫任逍遙。最好是。鑑湖新柳。酒隱寄紅塵。吾欲繼。龜堂叟。憶君秉節滇池舊。持玉尺。夙推名手。對話銷廳秋。問當日。豪懷誰負。笑余潦倒尚青衫。戀錦窠。仍同株守。春義兩掌鑄印局殆將十載。且莫管浮名。但細把離情剖。

醉太平 白溝曉發

霜凝夜深。參橫斗傾。氈車寒擁青綾。聽鞭聲鐸聲。晨鴉夢驚。東方漸明。無端霧幘。

冥冥。迷來程去程。

金縷曲 旅枕聞隔院琵琶

何處紅樓女。隔牆兒、輕攏慢撚。哀音如許。多少悲歡恩怨事。都入輪袍新譜。但只戀、溫柔鄉住。此日尊前金買笑。彈指間、半是潯陽婦。推復引、轉淒楚。倦游念我長鞵旅。印鴻泥、天涯踏遍。幾經辛苦。孤枕寒衾眠未穩。那慣更聽絃語。十五載、青衫塵土。潦倒使君癡絕甚。枉替人、細把衷情訴。呼燭起、題長句。

南歌子 平原夜行

永夜人方定。初弦月乍傾。孤衾短夢易驚醒。叵耐柝聲、催起未三更。鈴語郎當響。籠燈近遠明。重裘已被曉寒侵。恰好郵亭、卯飲稱人心。

又 連日翻車戲賦

慣向泥塗辱。頻廣偈仄吟。敝車羸馬舊曾經。始覺年來筋力、怯長征。雪積岐難辨。冰融轍更深。一程分作兩三程。試問何時、雙槳換雙輪。

風流子 整陽阻雪

風雪滿天涯。貂裘敝、僕僕困塵沙。慣殘月曉星。一車兩馬。長亭短堠。五飯三茶。當年事。改官辭閬苑。宰劇領昆華。橐筆從戎。長卿諭蜀。貢金奉使。博望乘槎。而今重捧檄。山陰道。賸對巖壑清佳。況有蘭亭名勝。禹穴幽遐。但一行作吏。未能免俗。半生拙宦。無以爲家。猶自奔波道路。顏鬢空賒。

霜天曉角 沂河聞雁

曉色殘星。聽遙空雁聲。目送參差陳影。都伴我。向南征。霜晴音更清。沙平飛暫停。忽被車鈴驚起。排幾箇。字人人。

摸魚兒 寶應阻凍遇陳芝楣太守

念山行。備嘗艱阻。勞悰忼到淮浦。輕帆急艣。方稱意。怎又畫橈亭住。游宦誤。記廿載。舟車遠。遍天涯路。茲行最苦。望三十六陂。琉璃世界。一葦未能渡。愁難訴。忽遇同舟仙侶。昆華舊夢如許。燕臺慣伴離筵醉。此日萍根復聚。攜手處。笑各把。別來旅況。

深深語。羈愁頓去。更許約同游。六橋三竺。與做湖山主。

浪淘沙

雪意滿西湖。雲水模糊。天然一幀米家圖。城闕樓臺迷近遠。似有疑無。飛霰亂跳珠。篷背聲粗。北風吹浪戰菰蒲。輿僕催歸天已暝。燈火街衢。

齊天樂 雪後于役浙東

臘前剛把征帆卸。扁舟又還東下。萬壑瓊凝。千巖玉琢。真箇越溪瀟灑。勝游今乍。快銀海生花。冷光交射。如此江山。大癡粉筆那能畫。豪懷更宜泛夜。水光相接處。清景無價。乘興拏舟中宵訪友。誰繼前賢佳話。官身偷暇。且捉鼻微吟。舉觴深瀉。醉後推篷。下弦寒月掛。

花心動 甬東除夕招馮柳東太史小飲

臘鼓聲中。又殷勤。暗將歲華催換。旅鬢漸衰。壯志猶驚。枉自勾留海畔。悶來強把屠蘇酌。轉引起。鄉愁無限。空凝盼。山遠水遠。家遠人遠。堪歎老懷疏嬾。幸客裏相逢。

瀛洲仙伴。籀聖經神。詩史詞仙。都被先生占斷。建溪慵展。栽花手愛。綠帳春風生。清談健。令人宦情逾澹。

瑞鶴仙 癸巳元夕餘姚舟中

歲華驚浪擲。記雁後、初歸剛逢人日。湖山壯春色。擬芳游飽看。臨安燈節。官符火急。又催度、西興水驛。坐烏篷、重過山陰。萬壑千巖曾識。追憶故園今夕。火樹銀花。南油西漆。關山路隔。空悵望、夢難覓。對江村近遠。漁燈幾點。便是元宵消息。賸多情、好月當頭。伴人岑寂。

沁園春 書家祇林明府出關草後

讀萬卷書。挽二石弓。吾家阿連。笑弱齡攢解。頻嗟瓊穩。壯懷投筆。竟勒燕然。幕府書。助琴軒坐嘯。贏得山陰巖壑。緣相逢晚。喜襟期瀟灑。傾蓋情聯。自憐留滯南溟。又來繫蓬萊閣下船。恰落燈風定。欣當佳宴。歸舟雪壓。快讀新篇。畫壁詩多。弓衣句好。悲壯音爲出塞傳。重三近。想蘭亭觴詠。肯讓前賢。

醉太平

春江凍消。春風浪高。晚潮催送歸橈。過長橋短橋。
離觴淚澆。離衾夢勞。今宵真箇無慘。恨山迢水迢。
春風柳花。殘陽亂鴉。山村臨水人家。問誰曾浣紗。
溪橋逕斜。柴門樹遮。酒帘招客停車。豈仙源路賒。

望海潮 祝譽庭司馬廣陵看潮圖

伍胥忠憤。枚乘麗筆。錢塘自昔雄潮。千弩射回。兩山束住。爭傳白馬銀袍。壯觀快秋高。紅旗影紛颭。出沒輕舸。狎浪吳兒。水嬉猶自話南朝。
羨君逸氣凌霄。想長風萬里。羅刹停橈。碧落曉晴。綠瀛波動。迎眸一綫痕遙。追憶舊游豪。乘漲馳三峽。畫鷁聯艘。老我重來江口。同看廣陵濤。

水龍吟 謝陸愆田司馬五色畫竹

渭川千畝。胸中寫來。到處皆成竹。勻紅剔翠。塗黃渲紫。屏山六幅。煙暝瀟湘。霜晴雲

夢畫圖彷彿。想坡仙老去。枯腸得酒。森然作芒角出。無竹應令人俗。念荒齋未能免辱。欣逢持贈。此君一到。春生茆屋。秀拂蠻箋。花攢江管。迷人心目。笑籀龍難赦。空教饑守。憶賃營谷。

洞仙歌 過名山古院訪水秋白鍊師善醫時年八十六矣

名山古院。隔塵寰非遠。橫枕吳山倚天半。道廬深留客。茗盃爐香。憑闌望。飛下白雲幾片。鍊師老逾健。久住人間。鶴骨童顏令人羨。醫世活人多。種杏成林。註仙方。千金傳遍。但鍊就。還丹嬾飛昇。更笑指蓬萊。近時清淺。

念奴嬌 步張仲甫舍人韻送楊雪椒比部

恩恩握手。對湖山佳處。未能留酌。笑我酒腸枯澀甚。羞入劉伶天幕。客裏相逢。中年別況。拚作經旬惡。送君此去。江南猶未花落。回憶曾伴歸旌。快談昕夕。意氣真盤薄。卅載萍蹤頻聚散。何日重傾下箸。紫陌軟塵。白雲高唱。讓爾吟情樂。驪歌輒和。俚音應愧牛鐸。

滿江紅 送童楚翹明府赴閩海運

海上浮槎。張騫後、誰將空鑿。男兒志、乘風破浪。壯懷磊落。艤艫雲連馳畫鷁。帆檣風
利占黃雀。認虎門、缺處是三山。南臺泊。分天庾。廛民瘼。勞轉輸。甍溝壑。想鄉園萬
井歡聲騰躍。愧我神山舟舊引。羨君橫海助猶昨。更有緣、飽啖荔支回。香留齶。

眼兒媚 桐廬道中

峭帆風定晚來晴。遠浦斷霞明。篷窗靜倚，半江漁艇，兩岸鳩聲。船娘生小嬌癡慣，
軟語泥人聽。笑輕歌緩，茶香酒釀，著意逢迎。

南樓令 端節小住蘭谿

溪水碧於油。溪娃能盪舟。慣凌波、秀靨明眸。生長闌干船上住，渾不解、別離愁。佳
節快臨流。蘭橈枉駐留。憶臺江競渡芳游。鬢影衣香簾盡捲，人都上、水邊樓。

摸魚兒 和石敦夫司馬見題詞存

念平生、交緣最淺。蓬萍蹤跡將遍。與君把袂蓬萊閣，便爾殷勤青眼。交貧賤。君不見、

古人傾蓋情何限。恨相見晚。擬尊酒論文聯牀話雨。更把烟絲。詞消遣。勞生塵夢都澹。中年陶寫無絲竹。寄聲聲偷字減。浮名換。又豈羨當年奉旨。柳三變。問誰是伴。有金谷遺音。許稱同調。贈我驪珠串。

東風第一枝 白楊梅用竹垞韻

鶴頂凝霜。驪胎孕月。櫻廚過後新薦。色誇玉盃盛冰。味宜晶鹽堆繖。筠籃才翦。未入嚙。芳津先遍。笑洞庭。萬顆猩紅。比似聖僧都賤。擬粉荔。粟肌偏軟。訝青李。雪衣初染。掬泉方詫。星吞落盤。更疑珠轉。纍纍如貫。愛飮座。玳筵側畔。問小兒。此果何名。想是君家常見。

風蝶令 本意題畫

結隊爭攀豔。凝神獨弄芳。翩翩狂態任悠揚。真箇一生花底過時光。莊夢何時醒。韓魂竟體香。誰人羅扇撲來忙。試覓滕王粉本細評量。

天香 謝胡篋農太守惠墨

麝劑遙分。豹囊才啓。紫玉稜稜光透。細搗松煤。倒鈐香印。真箇輕堅黑黝。歙州膠法。是易水。奚超傳後。好配宣豪江硯。端宜芸案消受。須知文章太守。集良材。重經杵臼。箋農每購佳墨。配膠另製。愈見堅好。高比玄霜一品。研犀題就。語妙還思坡叟。笑再著。麻衣飲將又。磨墨磨人。真詮誰剖。

壺中天 和少穆中丞韻題伊少沂江閣展書圖

是誰老手。寫江閣。摹取當年錦里。獨抱遺編。臨檻曲。放眼參觀雲水。高樹盤空。小溪橫約。俯仰乾坤裏。畫長人靜。茶煙一縷初起。笑我書癖空耽。頻年奔走。硯席安無地。羨爾身宜邱壑。置名下原無虛士。四壁蕭然。一經傳得。嗜此醅醑味。臨歧題贈。吟懷聊慰離思。

金縷曲 桐江書懷

倦聽秋蟬咽。送征帆。半江碧浪。滿山紅葉。問我勞蹤何日歇。買權又來東浙。空自歎。年年傷別。回望吳山煙濤闊。倩夢魂。歸去愁難越。歌未盡。恨千疊。篷窗兀坐何爲。

悅檢巾箱重商舊稿添編新閱對酒當歌羞白髮孤負桐江風月漫指點荒臺
高隱孤忠同奇絕與江山終古難磨滅情獨往觴頻酌

浪淘沙 沈成齋縣尉西藏從戎圖

投筆話封侯想見風流貂蟬多半出兜鞬往返烏斯三萬里幕府諮謀
潘鬢已驚秋身世悠悠卻憐垂老尉江州枳棘卑棲同一慨壯志難酬

我亦贊戎籌打鵲山陬嘉慶丁丑臨安窩泥夷滋事余奉調軍營嗣獲首逆打鵲山下
芭蕉古箐瘴煙稠一換青衫逾十載空白人頭萍迹暫句留傾蓋情投披圖追羨
舊豪游快讀新篇斟濁酒倍使人愁

金縷曲 和陸祈孫明府見贈

宦海風波怕況文人一行作吏更銷聲價自古名高多運蹇福慧雙修蓋寡算只有
泉明高雅五斗折腰真不屑賦歸來采菊東籬下問誰繼清風者知君仙骨原瀟
灑脫荷衣鳴琴偶試便恣冠掛浮世升沈何足道羞煞好官笑罵待春雨杏花歸也

愧我塵勞逾廿載。過江州。誰念狂司馬。歌欲闕。淚先瀉。

謁金門 鷹潭晚眺

登臨適。遠水遙天一碧。歷歷去帆山觜滅。晚江風正急。高岸楓丹柏赤。淺渚煙消霞溼。做弄秋光娛倦客。客懷愁轉集。

沁園春 歸鴉

落日扁舟。縱目江天。投林暮鴉似秦郵萬點。疏疏密密。沙陀一隊。整整斜斜。乍合還離。將棲復起。陳勢回旋變態。加孤村畔。認紅黃霜樹。近遠人家。烏雲堆鬢宮娃。妒日影。昭陽不及他。記銀鈎帖瘦。濃塗曾誚。玉池畫好。試展頻叉。白項多慈。黑衣常勇。帆錦爭隨神更誇。沙洲迴。看北來羣雁。也宿蘆花。

一翦梅 婺源卽事

匝月舟居矮打頭。風也須愁。雨也須愁。暫移瓦屋小如舟。得自句留。且自句留。放眼霜林獨倚樓。楓也紅稠。柏也紅稠。旅懷何事可銷憂。吟興難酬。飲興難酬。

滿庭芳 婺江石境灘

笏石嶙峋。箭流奔激。爭誇石境雄灘。推篷試望。風景宛鄉關。應料宵分歸夢。憑江水。送到家山。西風好。浮雲掃盡。霜月逼人寒。奇觀。曾歷遍。九瀧怒浪。三峽驚湍。更洞庭秋漲。廈島春瀾。誰念倦篙此日。好山水。來訪新安。停杯聽。長年笑我。行路不知難。

齊天樂 婺源譚公嶺

摩空萬級穿雲棧。驟來頓驚心眼。折比羊腸。陡同鸚背。起伏岡巒不斷。憑輿俯看。詫馬勒崖懸。蟻隨磨轉。叱馭王尊。經過難免墮雄膽。山行笑余久慣。黔滇連蜀道。頻歲登覽。黎嶺雲封。蒙山瀑凍。歷盡嶽崑無限。平生壯觀。念奚錦詩牌。幾曾吟遍。老去情懷。宦游應更倦。

滿江紅 歙溪卽事

放眼溪山。宛然又、別開生面。況復值、霜林風景。翠凋丹染。夾岸礧田梯萬疊。近灘水碓輪雙轉。更沿村、粉壁好人家。炊煙滿。冬過暖。天應變。凍雨散。酸風健。正濃雲釀。

雪。灑篷飛霰。透骨新寒。裘屨易。破愁卯酒杯頻勸。念歲華、將暮旅懷深。難消遣。

桂枝香 石琢堂前輩重逢泮歲徵詩賦此代之

熙朝著舊。是念一科前。臚傳魁首。雁塔龍頭姓氏。羣推領袖。泮宮憶采芹香歲。數花甲。重週剛又。文章當代。簪纓奕世。孫枝爭秀。更玉尺、量材老手。曾閩海珊瑚。荆山璞剖。異數黃堂雀弁。烏臺豸繡。廿年乞得官身暇。比鑑湖、君恩還厚。退齡胸看。萃歌櫻宴。霞觴頻侑。

浪淘沙 再題詞存

迂拙百無成。莫問浮名。曉風楊柳耆卿。陶寫奚須絲與竹。減字偷聲。宮調易分明。深在言情。夜窗細校復微吟。且喜拈來無綺語。差慰平生。

探春慢 甲午春初雪中探梅孤山

積雪彌冬。快晴挾日。梅花當有消息。才過歲朝。便邀吟侶。好探孤山春色。玉戲又翻新。悔忘學。坡翁笠屐。衝泥放鶴亭前。縱望湖山畢白。尋遍山南山北。問芳訊如何。

三分之一。幹化銀虬。苞含珠蚌。還待東風披拂。商酌再游期。計約近元宵時節。觴棹重攜。拚將醉眠花側。

金縷曲 上元日重游孤山

盼得元宵到。趁良辰、攜朋重與探梅孤島。恰值蘇堤晴乍穩。催出半湖蘭橈。正雪後、羣山如笑。躡屐同來山畔覓。訝春光、尙淺香魂悄。游漫續、興仍掃。東君特釀春寒峭。勒幽芳、南枝欲吐。北枝猶少。或恐逋仙憎俗客。不放梅花開早。待何許、羅浮夢好。屈指花朝應不遠。倩翠禽、爲我頻頻報。詞壘和、尊還倒。

一萼紅 中和節看梅孤山

過西泠。問水仙祠畔。鶴夢可曾醒。春訊將分。花朝恰近。堤上無限游人。畫船向、裏湖蕩去。好風便、吹送暗香頻。翠羽啁嘈。紅妝掩映。孤嶼危亭。應念先生絕俗。爲愛梅成癖。幻出因塵。麗藻爭題。雅懷補種。孤山梅花開。係林少穆中丞任觀察時新葺祠堂所補種。逃名翻受高名。更誰料、效顰吾輩。幾番是、探訪意殷勤。盼到北枝放齊。已

欲春深。

浪淘沙 看梅次夕忽霰雨交作枕上賦此

梅訊快曾探。六七分看。壺觴裙屐遍孤山。料得清高林處士。厭絕躋攀。斗帳驟春寒。曉夢驚殘。霰珠聲迸瓦溝乾。花好怎禁風又雨。恐已闌珊。

宴清都 花朝自天竺到金沙港

共快新晴好。花朝屆、雅游宜趁清曉。晨鐘乍動，禁城催啓，涼蟾猶皎。穿將翠逕深窈。萬籟寂、不聞啼鳥。近上方、梵唄音齊，琳宮高出雲表。歸途更喚輕航，偏尋曲港，花院重到。牆頭竹外，嫣然依舊，枝斜香悄。頻來應被花笑。但又恐、春光易老。算羣芳次第開殘，番風還早。

木蘭花慢 別梅孤山

被東風幾日，做弄出、豔陽天。已勒住餘寒，催將新暖，紫萼紅嫣。梅仙香魂欲返，費相思、此別又經年。索笑空縈夢想，憑闌且復留連。還憐風景芳妍。蘇堤畔、段橋邊。正

春色撩人。天桃浥露。穉柳籠烟。湖船儘多俊侶。問誰曾扶醉覓花鈿。膽對山光波濤。爭思脆管繁絃。

應天長 湖上餞春

節過穀雨。番近棟風。堂堂春去奚速。買得問花吟舫。遨頭出城曲。沿堤柳波妒綠柔。櫂快。翦開新穀。午鐘動。恰到南屏。僧話茶熟。雲斂霽光浮盡。拓船窗。烟景豁心目。領取麴生風味。名談屑霏玉。湖山美游宦福。恐此後。雪鴻恩促。勞悵倦。倘得餘閒。清興宜續。

山亭宴 吳山公餞高淳亭太守

宦游昔羨湖山美。結勝緣。又來吾輩。五馬去朝天。念別後。鴻蹤奚似。離筵剛值餞春開。望湖上。游人如蠓。萬綠已成陰。早染遍。西冷水。晴湖占得春光媚。換雨景。別饒風致。畫舫冒烟歸。多爭傍。柳堤輕艤。峯雲塔影半模糊。宛潑出。米家墨戲。留客好傳觴。珍重意。休辭醉。

一斛珠 葡萄

草龍珠帳。翠陰宜夏清而曠。纍纍都似胎懸蚌。賜紫櫻桃。萬顆勻圓狀。釘盤只許離支讓。錦紋巧學虬螭樣。兔睛馬乳分形相。釀做新醅。色妒春江漲。

憶秦娥

芳游謝。牡丹開過春歸也。春歸也。落花時節。子規啼罷。風光又到薔薇架。湖山清景宜初夏。宜初夏。新廚櫻筍。濃陰桑柘。

菩薩蠻 題團扇

冰紈祇恐經秋棄。畫師偏寫深秋意。衰柳帶鳴蟬。秋光絕可憐。蓼花紅點點。秋色疏而遠。障面且婆娑。休賡桃葉歌。

定風波 董鏡溪茂才妻煤仙館詞稿

瘦沈愁潘絕可憐。新詞字字吐芳妍。家近湖山游興足。清福。妻梅端欲繼通仙。對酒當歌年少事。況是。芙蓉淥水度翩翩。大抵鍾情惟我輩。君最。笑余垂老學詞顛。

莊椿歲 壽林少穆中丞

當年天上麒麟夢。佳話榕鄉爭誦。神童馳譽。弱齡釋褐。臺烏池鳳。使節頻持。溫綸屢起。九重倚重。溯登科卅載。初逢大衍。延壽筭。從茲奉。試院煎茶會共。睽滇雲。好風吹送。任城夜話。胥江雪泊。輒傾春瓮。欲製新聲。愧難追步。鶴南飛弄。想大江南北。人人額祝。上生申頌。

金縷曲 戴壽伯明府碧曉耕讀圖

萬里歸來久。乍披圖。碧雞山色。峇曉依舊。憶昔名賢南遷日。留此山居半畝。問誰仰。高風尙友。濁世翩翩佳公子。倩畫師。摹取林巒秀。耕與讀。樂兼有。君今方館銅青綬。聘驂騶。雲遶展步。天衢驥首。點檢硯田并書圃。付與山靈廝守。待他日。功成名就。乞得滇池三千頃。向大觀。樓畔開新構。踐斯約。歸田後。

秋霽 丈亭曉行

迎曉推篷。正月仄金盆。凝碧無際。陸稻吹香。嶺松送籟。霽色湖光爭媚。朝來爽致。蕉

衫悄覺涼生袂。漫追記。前度雪中短棹。慣曾艤。當此闌暑。欲避無方。昨翻天飄。炎景如洗。恍身游。冰壺影裏。一襟秋思。向誰寄。促膝扣舷聲漫倚。恐待雲斂。催將初日。瞳瞳。逡巡仍換。畏人天氣。

齊天樂 監試內簾呈典試吳退旃司農

憶曾教澤留閩部。春風先被蓬戶。司農督學閩中時胞姪入學者兩人使傳頻移。星軺再蒞。仍戀湖山暫駐。司農先亦督學浙江。茲以典試再來。芹庠翹楚。快趁此高秋。競思軒舉。文字機緣。金鍼神巧。定重度。南宮夙欽座主。公門桃李盛。持節無數。司農己丑春闈門下士。今科同典試者九人。分出詞曹。羣司文柄。月府霓裳同賦。栽花仙侶。更鳳唳堂前。親承杖屨。分校李。峴雲明府亦司農門下士。天下英才。想皆歸孔鑄。

桂枝香 呈典試徐廉峯太史

石麟天上。是孝穆後身。山斗同仰。歷遍蘭曹芸館。芳聲馳暢。霜威乍奮。秋鷹擊。又親

掃鳳巢重傍。太史初得侍御以言事仍回原衙門。新持使節蓬萊花樣。斯文宗國。恰鳳味堂懸舊榜。想月色潮聲。風景無恙。試院煎茶。誰繼坡翁高唱。自慚潦倒青衫客。慣追陪瀛仙几杖。銀袍鵠立。南金東箭。盡收珊瑚網。

水調歌頭 中秋試院待月用東坡先生韻

試湖中秋月。九度棘闈天。余四試鄉闈宦瀕後同考兩次監試兩次並茲而九矮檐情景猶昔。辛苦隔多年。屢學都官分校。輒步坡仙監試。萬里仰高寒。鳳味堂仍在。何幸廁其間。想三山。今夜裏。更誰眠。星懸萬點。東西雙塔射空圓。頻對鎖廳風月。追戀故鄉節物。此樂豈能全。漫和紫雲曲。那復覩嬋娟。

青玉案 張浣秋畫竹

此君瀟灑誰能狀。倩彩筆、偷摹仿。酒入枯腸生意匠。檀園柯葉。粗疏節目。都作凌雲想。湖州畫法應同賞。除卻髯仙未多讓。滿幅翠痕烟欲漲。最宜懸向。小窗雪壁。初月朦朧上。

西湖五詠 和張仲甫詞社題

天香 龍井茶

雀舌冰芽。龍團雪餅。茗戰漸開唐後。顧渚旗槍。洞山羅芥。舊錄浙西傳久。龍泓新品。雙絕是靈湫配就。活火須求烹法。松聲更調湯候。茶經策助誰右。論香甘。建溪居首。試向春風細啜。品題難剖。甌面素濤微皺。笑只合名姬戲相鬪。破睡封侯。怎能斷勾。

桂枝香 桂花栗

桂花開乍。見滿市栗蓬。饑眼先詫。爭說新穰試嚼。味含龍麝。木樨香發真無隱。宛參透。禪機棒打。紅菱紫芡。珠圓冰脆。一時銷價。儼蝟刺。鬢髮難畫。看競奏并刀。黃玉盈把。倘到秋深。空贖霜苞紫罽。李和燭法誇甘美。更誰憶。汴都舊話。若教疏事。休文縱在。也慚博雅。

摸魚兒 瓜皮船

是誰人浮瓜湖上。水仙偷削新樣。榔聲結隊侵晨出。遠遍藕汀菱蕩。烟水曠笑宛是野航。恰受人三兩。衝波狎浪。最春未。暮蕓秋初。采菱風景妙難狀。追游賞。多少吟窗醉舫。湖山佳勝猶曩。衣香鬢影波光麗。不礙綸竿絲網。還復往。合添箇菱娃裏鴨。紅裙颺。檝頭差仿。便細雨斜風。不須歸去。傍晚起漁唱。

齊天樂 畫角

臨安做小朝廷日。邊聲慣驚鸞蹕。曉月烏棲。殘陽雉堞。都是怕聽商律。詞仙白石。曾調犯淒涼。翻成新拍。只恐梅花。也應誤認玉龍笛。清時久經混一。臨風三弄處。音韻非昔。江海救安。湖山秀麗。繪就昇平景物。摩訶兜勒。想樂府延年。當時留得。鶴唳華亭。那能相彷彿。

水龍吟 漁火

湖光夜色蒼茫。兩三星火。明還暗。烏啼月落。柳堤花港。儘無人管。初訝流螢。旋疑飛燐。隨波開閃。想釣舟人醒。蟹簾風定。遠與近。紛零亂。此日湖山清晏。更何曾。通宵

荒醺。猶聞南渡。歌樓燈舫。暮游侵旦。賸得而今。漁莊風景。依然湖畔。但鐘聲動處。客船誰到。隔南屏遠。

奪錦標 謝凌東園太守惠筆

管削松枝。毫珍栗尾。終遜宣城諸葛。若論文房造化。賴爾中書。方能穎脫。但尖齊圓健。備四德。近推茗霽。荷使君一束新貽。謝啓愧無佳札。聊藉倚聲酬答。不寫吏文。山谷舊規堪法。應念堂新六客。寶帚重揮。樓題楹帖。定來春。樞謁好。追陪愛山風月。笑何時。投卻毛錐。偷覓封侯功業。

八聲甘州 新葺寄巢

念宦游蹤跡。等蓬萍。到處借棲留。笑蠹巢蝸舍。但求容膝。何愧低頭。況值冬宜室密。深邃宛如舟。左右明窗好。愛日光浮。更稱圍籬消夜。儘朗吟深酌。莫問更籌。待疏櫺月滿。梅影絕清幽。倘乘狂。巡檐索句。任冷香。侵透五雲裘。縱然有。風饕雪惡。閉戶奚愁。

又 種梅

笑年來、鎮爲此花忙。幾度踏孤山。向臘殘春破。攜朋挈榼。雪訪□□。似荷鋤自種。剛損蘚痕斑。時對黃昏月。笑索檐間。盼到六花飛舞。正擁爐袖手。兀坐青氈。忽重簾風揭。花氣撲樽前。定催來、何郎詩興。更奚須、驢背灞橋還。宜添與、此君瀟灑。翠袖天寒。

滿庭芳 天竹

碎擊珊瑚。奇擎火齊。芳名巧借琅玕。瓊枝翠葉。秀影自嫵嫵。藥品曾收本草。南天燭、小字誰譜。今移向、名園珍砌。點綴到屏山。勻圓。疑恰似。歌唇乍破。一點紅酣。倘春鶯偷見。定誤桃含。還憶歲朝圖裏。折枝好。摹遍黃筌。應休認、相思南國。鸚鵡啄來殘。

花心動 除夕守歲用壬辰除夕韻仍索柳東再和

臘雪初消。數年光、又將舊符都換。暫假一麾。守歲句東。仍戀賀家湖畔。豐年笑話誇。三白聽。聽葑屋。歡聲何限。更爭盼。放晴元夕。桂華光遠。竊歎詞顛未嫵。況酬唱依然。

鴛湖昔伴。睠此歲華。舊韻重拈。欲把吟髭撚斷。唐花滿室。寒香發。正笑擁。夜爐添暖。醉筆健。呵來那愁墨澹。

浪淘沙 丙申夏仲去浙有懷石敦夫

脫卻此青衫。鬢已髟髟。耐他十九載相纏。浙水滇雲徒潦到。西笑長安。風日快晴。酣穩泛輕帆。倚檣回望戀湖山。此後相思惟石友。雲樹天南。

金縷曲 重葺寄巢初成適李夢韶觀察寄新詞走筆和答

誰勸青蓮酒。訪遺蹤。天津橋廢。高樓非舊。重葺寄巢寬十笏。且息輪蹄奔走。笑差勝。槐安夢守。六易星霜方滿秩。戀皇恩。奚啻三年久。堪容膝。莫搔首。新詞忽寄屯田柳。伴樛花。鱗函遠歷。隻雙亭堦。貽我三章金縷曲。快讀藉消寒晝。應推作。花間好手。欲向旗亭偷賭唱。奈輸君。先占雙紅袖。同此樂。甚時又。

驀山溪 前在虎林與石敦夫論詞以拙作學蘇辛多豪語僕謂蘇辛亦有曠

體非不能也時值冬令戲填兩闕示之茲檢得舊稿補錄於此

名工鑄就。出入卿懷袖。鏤蓋巧玲瓏。熾紅麟、葭灰煨透。曉妝未竟，常置鏡臺旁，呵額翠。注脣朱。時熨纖纖手。冬寒罷繡。暖閑閒相守。並坐綠熊茵。握春葱、帕羅交覆。檀郎貪耍。當作博山看。燕沈水。裊雙烟。圖得氤氳久。手爐

小憐雅製。鳧藻傳名古。隨意范方圓。愛溫磨、冬閨仿取。繡茵坐倦。小立鬪身輕。雙弓穩。儼承蓮。奚異盤中舞。嚴宵雪驟。何計寒威禦。妙用代香毬。被兒烘、暖春留住。羨伊得地。常許臥狸奴。裙褶覆。襪羅親。占斷風流處。腳爐

最高樓 丁酉人日雪後登文峯塔

人日好。恰好雪初晴。尋勝蹟。快登臨。未簪彩勝。慚衰鬢。且攀高塔。暢春情。閣千尋。窗四面。望無垠。試南盼。洛川縈縞帶。更北顧。邙山橫玉塞。銀世界。粉乾坤。憑闌遠眺。收烟景。圍爐夜酌。樂嘉賓。對年華。酬令節。發豪吟。

催雪 元宵催月

快雪初晴。連日沍陰。釀就春寒如此。更凍霧同雲。商量不已。未許花飛六出。但偶簪。

輕拋珠塵細。想癡龍睡足。無人翦水。倩誰鞭起。迤邐。元宵是。倘玉戲頻翻。誤他燈戲。待欲問姮娥。憑闌無計。喚取萬家疊鼓。共催出。當空蟾光麗。看滿城。開遍紅蓮。還我花天月地。

浪淘沙 中秋卽事

殘暑快全收。千里驚飄。刁調終日竟無休。落葉漫天塵捲地。佳節難酬。暮色靜悠悠。忽湧晶球。年來無此好中秋。指點胡牀饒老興。奚似南樓。

金縷曲 題趙蓉舫學使嵩峯攬勝圖卽以誌別

歷覽寰區勝。數高高、巋然峻極。天中作鎮。三十六峯雲不斷。羅列丹崖蒼嶺。問誰倩、圖將好景。緬昨星輶春過洛。愛探奇、躡屐尋幽興。當更訪、石淙冷。曩游猶憶昆華近。仰丰裁、靈鍾金馬。秀推玉筍。此後頻看持使節。今日親依樾蔭。況恰值、泥函催覲。欲致臨岐珍重意。爲留題、二室烟霞幘。歸去與、鳳池證。

南樓令 呂翼士明府有佳醞霜螯之贈走筆謝之

籬菊對秋高。閒情愧老饕。忽江州、送到香醪。更有霜臍三百箇。應備四時。卓醉鄉豪。忙兼左右操。笑勞生、樂也陶陶。倘益鱸材雙尾惠。吾還欲、奏鸞刀。

木蘭花慢 新拓寄巢前軒初成

人生如寄耳。須隨分、過生涯。笑負郭田無買。山貲欠官。以爲家。州衙幾經結構。但窗明、几淨不求華。曲室房櫳深邃。修廊闌楯周遮。堪誇人境非遐。塵不到、靜無譁。宜默坐焚香。爐安鵲尾。畫展鴉叉。何加。倘饒水竹。又豈遜香山池上耶。寒夜留賓。煮茗春來課僕栽花。

沁園春 題蘇蕙璇璣圖後圖分爲七乃陶氏說郭本

圖織璇璣。蘇氏若蘭。錦心繡腸。念詩易感人。情何容已。才還若彼。妒亦奚妨。八百餘言。三千來首。宛轉回旋五采彰。真奇絕。笑藏頭體拙。雜組詞荒。無雙閨閣文章。更贏得、金輪御製揚。羨連波悔過。陽臺別遣。鸞膠再續。燕寢專房。團扇悲秋。珍珠寫怨。都覺輸他恩寵長。重鈔翫。恐解人難得。析牘分行。

金縷曲 戊戌春仲晦日大雪盈尺賦此誌異

休道春寒淺。奈連朝、封姨無賴。風光陡變。翦水成花皆六出。那料飛來春半。訝玉宇、瓊樓重現。柳絮榆錢漫天舞。霎時間、處處都堆滿。春如此、幾曾見。曉來仍索冬裘換。怪夜分、衾裯潑水。孤眠難戀。催爇香篝添熾炭。卯酒三盃助暖。扶藤杖、小園行遍。花事從茲應漸緩。想麥疇、深慰三農望。寒如此、幾曾慣。

蝶戀花

已過清明春欲暮。連日春寒。強把春留住。牆角海棠紅乍吐。怎經風雨頻相妒。燕子不來來復去。待覓雙棲。又恐重簾誤。遙憶天涯芳草路。萋萋碧色魂銷處。燕

南樓令

春雪做春寒。花天養牡丹。盼繁華、晴晝闌干。油幕金鈴加意護。多留得、幾朝看。屈指欲春闌。逡巡廿四番。到牡丹、花事將殘。莫惜開筵排日醉。須休放、好春閒。屈

金縷曲 謝周稚圭撫軍寄示詞稿

筆墨供遊戲。笑年來。詞頗私署。新聲偷倚。豈較紅牙和鐵板。按譜誰將迷指。顧誤周郎詞壇帥。忽一編。遠惠珠盈紙。盟薇讀。握蘭比。壯夫休晒彫蟲技。想佳章。吟就幾費。含宮調徵。況復鍾情惟我輩。懷夢雅圭悼亡詞。言情尤旨。空悵望。蓬山伊邇。徒藉雙鱗通尺素。願毋忘。咳唾隨風致。癖雖在。語非綺。

寄園百詠 并序

府署舊有怡園。乃吾鄉齊北瀛前輩所輯。余既題西軒爲寄巢。因改爲寄園。芟荒蕪。分畦畛。日課園丁。雜蒔花木蔬果。於茲三載。衆卉欣榮。玩物適情。寄之吟詠。始於戊夏。迄於亥春。恰葭琯之一周。彙蕪詞爲百闕。未能協律。聊以自怡爾。蓋以爭誇州宅。始自稽山。遍數名園。應推洛下。裴公綠野。愛芳草之多情。李氏平泉。傳名花之遠至。昔稱金谷。競奢美於林泉。邇溯香山。尙優遊乎水竹。遐稽往代。祇屬空談。耳食徒勞。夢遊難賦。是以欲詢勝蹟。僅伊闕之依然。竊訪遺蹤。問津橋而奚在也。然而春葩夏果。集賢留白傅之詩。種竹澆

花獨樂著溫公之詠。且復右丞輞水。分椒園杏館之題。與可洋川。述貧谷蓮湖之景。但逢佳勝。均託篇章。僕讀曲未精。愛花成癖。輒品題乎名卉。思繼迹乎前賢。每當坐嘯之餘。恆就倚聲之好。羣芳添譜。擬追夫餐英。搴佩之遺。小令頻拈。盡付諸減字。偷聲之際。已亥春後。瀛壖詞叟識。

荷葉杯 盆蓮

宛爾紅情綠意。並蒂尺許小盆池。雙心千瓣鬪鮮奇。出水不沾泥。試問花中何比。君子風度勝張郎。碧紗窗下晚風涼。花葉兩俱香。

南鄉子 茉莉

冰遜潔。麝輸芳。華鬢偏助晚來妝。九里花田荒舊夢。宜清供。誰識妙香天竺種。

又 夜來香

珠錯落。翠流蘇。綠苞開待晚風初。花葉但分深淺碧。纖手摘。宜傍烏雲香暗襲。

生查子 蘭萱

蘭爲待女花。萱是宜男草。徵夢偶稱祥。最是忘憂好。

真色與生香。各

又 金鳳牽牛

階前好女兒。籬角勤娘子。雜豔媚如斯。淺碧嬌無比。

葉凝曉露溥。花怯朝陽萎。物

十六字令 金錢

錢。箇箇黃金出。范圓偏妒菊。開不待秋天。

昭君怨 四季榴

浪蕊浮花都盡。濃豔芳心交勝。情性傲封姨。有誰知。

笑彼空貪結子。那得花開若

此。千葉白兼紅。冠芳叢。

如夢令 夾竹桃

道是桃花竹倚。道是竹枝桃媚。相並笑東風。別具此君風致。何似何似。佳士美人同

醉。

好事近 百合花名倒垂蓮。根爲百合亦名蒜腦。諸

恰是倒垂蓮。六出紅黃相閒。風過芳心微動。看粉痕零亂。

品中更數麝香奇。葱碧

色逾淡。百片合成蒜腦。助山家清饌。

又 草繡毬是花羣芳譜。未收閩中名爲千變。萬化喜水又名水胡盧。

朵朵錦團圓。錯綵雕瓊。幻出顏色巧能多變。訝看朱成碧。

花開爛漫幾經旬。常傍

畫闌側。只是欠些風韻。與無香堪惜。

采桑子 紫薇

當年虛白堂前種。一樹春風。兩代詩翁。先後傳來麗藻工。

自慚未到金華省。追賞

仙蹤。獨對芳叢。誰道花無百日紅。

又 翦春羅是花亦名洛陽花。洛中最多高不過三尺。去歲蓄舊根而培之花

時高至六七尺。洛人頗以爲異。並誌之。

階前喜見瓊枝苗。碎翦紅紗。烘日蒸霞。七尺珊瑚傲石家。
偏佳。異種堪誇。莫是仙人旌節花。

絳蕤翠葆

更漏子 月季

號長春。稱瘦客。色有淺深紅白。欺玫瑰。傲薔薇。榮華歷四時。
春不老。花長好。與月盈虧爭巧。香斷續。豔週遭。芳情真久要。

點絳脣 梔子

蘂蔔天香。祇園佛品誰移到。珠胎玉貌。六出靈葩小。禪友名佳。宜得旃檀號。玄機
妙。聞根參了。鼻觀通應早。

女冠子 石竹

淺深濃淡。五色參差相閒。最輕盈。瓣薄鏤冰屑。英圓吐錦心。
弄豪描莫似。翦綵仿難成。始詫花神巧。更誰能。

減字木蘭花 蜀葵

豈同凡卉。一別月支來萬里。爛漫春風。值得名爲一丈紅。無香有色。牆角籬邊誰愛惜。莫等閒看。曾被詩人比牡丹。

又 錦荔支卽蔬中苦瓜種在盆盎結實如荔支其花甚香

黃蕤翠葉。籬畔風來香引蝶。結實離離。小字新偷錦荔支。但求形肖。未必當他妃子笑。藤蔓瓜瓢。豈是閩南十八娘。

調笑令 女蘿

弱質嬌無力。裊裊柔莖扶不直。依松遠引脩千尺。細綴朱英的歷。微風吹動蒙茸碧。補屋誰人獨立。

清平樂 佛手柑

祇林寶相。忽現拈花像。豈比金仙承露掌。鎮日高擎雲上。禪根託體朱鬩。木奴幻就瞿曇。風動遙疑彈指。妙香時度旃檀。

又 木槿

紫英瓊萼。名向葩經託。比似紅顏多命薄。休怨朝開暮落。花如紫萼。
日初長。曾傍研光綃帽。舞殘一曲山香。

虞美人 林檎頻婆

月臨花結林檎果。香色真兼可。曾聞此果最來禽。贏得右軍墨寶比蘭亭。果中更
羨頻婆好。風味尤稱妙。芳名傳說出楞嚴。譯就相思兩字是華言。

又 四季橘

南中佳果千頭橘。霜後方成實。誰傳奇種四時看。一樣開花結就滿枝丹。上林夏
熟誇珍樹。曾著相如賦。摘來顆顆小金丸。試納陸郎懷袖墮應難。

菩薩蠻 迎夏是花爲諸花譜所未收亦他處所未見花葉似迎春而較小夏
初卽開勤與澆灌秋後猶着花也

炎官畏景羣芳怯。偏欣小草迎薰發。花比散金黃。開隨夏日長。嫩英分五出。細葉
娟娟碧。纖秀卻無香。依然蜂蝶忙。

又 野茉莉滇中名爲野丁香又名粉果花以其花落結小黑果其粉可傅也
斜陽牆角疑鋪錦。紅黃紫白交相映。也助晚妝忙。風來冉冉香。佳名偷未麗。野意
饒娟娟。留得果盈盈。還將粉細勻。

謝秋娘 秋海棠

秋花好。無似海棠佳。淚臉恰如思婦態。愁絲真是斷腸花。秋色勝春華。

又 雁來紅

秋光好。更數老來嬌。五色渾疑花爛漫。三秋占斷葉妖嬈。畫苑也難描。

西江月 玉簪

葉比蕉心較狹。花疑薺面偏修。漢宮遺下玉搔頭。化作仙葩獨秀。導影宜依雲鬢。
芳苞合傍妝樓。晚風吹送好香幽。當得瑤妃消受。

又 雞冠

儼是花冠形肖。居然絳幘丰標。倚風含露越雄驕。只欠臨明啼曉。色判紫紅黃白。

種分散整卑高。後庭玉樹話南朝。博得玉奴題藻。

秋波媚 蓼花

小園奚似壯秋容。烟穗簇芳叢。蕭疏畫意，柳衰讓碧，蘆淡輸紅。水天忽憶江南夢。落日放孤篷。影迷初雁，香留殘蝶，點綴西風。

柳梢青 秋葵

常傍疏籬。亭亭並立，遙仄金卮。花妒鵝胎，葉分雞爪，別樣風姿。偏知衛足尤奇。會相笑，智不如伊。傾日芳心，開迎朝旭，謝待斜暉。

臨江仙 藤架

消夏南軒何最適。新移藤架陰濃。蒼虬夭矯欲擎空。葉稠能障日，蔓曲巧來風。更盼來春花爛漫。紫苞密綴芳叢。根蟠怪石任苔封。遠香侵硯席，深翠卷簾櫳。

又 豆籬

鹿眼方籬遮屋後。滿籬豆蔓垂陰。花疏葉密碧沈沈。玲瓏風翦穀，瑣碎日篩金。寄

傲北窗時企腳。隔窗野趣偏深。拋書午枕夢還成。游心疑蝶化。聒耳醉蟬吟。

憶秦娥 梧桐

炎光薄。園林又見梧桐落。梧桐落。初秋景物。晚涼池閣。露荷風柳還如昨。綠陰將謝偏先覺。偏先覺。一行新雁。數聲殘角。

又 槐花

風飄香。雨餘滿院槐花黃。槐花黃。昔年辛苦。三度曾忙。婆婆生意欣偏強。涼歸高樹延秋光。延秋光。辭巢客燕。噪晚鳴蟬。

南樓令 桂花

金粟散天香。羣芳爭敢當。最宜人。涼月修廊。試品秋花真第一。蟾窟種。本非常。四出應金方。三開花事長。問嘉名。仙友難忘。參到木犀禪語雋。無隱爾。孰能藏。

又 藍菊 閩中名爲萬歲菊。滇中名爲五月菊。以其香同菊而開最先且耐久也。

花葉菊同香。初秋已吐揚。憶滇中、五月先芳。但遇菊開宜把酒，又奚必待重陽。紅紫白兼將。花中獨欠黃。想難同、真菊爭強。倘得團臍和醉擘，按嫩綠也相當。

雙調南鄉子 胡盧

長柄種何來。滿架纍纍手自栽。記得當年劉寶問，談諧了卻江東二陸才。瓠落拙生涯。誇值千金價浪擡。更笑金華陶學士，書馱依樣年年畫怎該。

又 落花生

濃翠滿秋塍。葉底輕黃裊裊縈。浥露迎風花暗落，難尋。誰道花零果便成。釘座配瓜仁。剝出牟珠箇箇勻。常被藏鈎纖手握，偏贏。擲向檀郎意倍深。

踏莎行 晚香玉

葉比蘭柔。花憐梅小。嫩苞六出天然巧。晚來風過玉生香，無風時覺香尤悄。殘暑園林，新涼池沼。閒情忽憶都門道。黃昏聽唱繡毬籃，賣花聲裏秋光好。

又 茄

小庚詞

崑味稱奇。落蘇名俏。五茄久著珍蔬號。自從題做
原佳。將糟亦妙。老饕所嗜從吾好。憶并白苧話清

阮郎歸 菊花

此花開後更無花。問誰偏愛些。憶從九日伴陶家。
英古趣賒。秋容老圃莫嫌他。香留晚節佳。

又 園菊白花有一朵。變作半邊黃者。賦以
愛花成癖老猶狂。重陽爲菊忙。東籬笑欲傲柴桑。
枝各鬪芳。玉球幻出半邊黃。徐妃醉後妝。

雙調南鄉子 秋柳

衰柳倚風前。已帶斜陽又帶蟬。濯濯丰姿依舊否。
時賢。司李新詩邗上傳。寫就南朝無限恨。纏綿。偷

訴衷情 種竹近得斑竹紫竹分種

瀟疏無似此君佳。新種數竿斜。柔篁嫩篠，勤培護，添影映窗紗。斑點細紫，筠誇翠，交加。籊龍成後，好助秋聲，更伴梅花。

武陵春 櫻欄

霧影挖抄竿影直。冉冉紫髯修。瘴雨蠻烟春復秋。移植到中州。森森非竹還非木。葉散夜叉頭。拂子偏供高士求。談柄助風流。

霜天曉角 白菜

菜根風味。無過秋菘美。每念周郎高趣。嗟肉食，真堪鄙。湘羹甘滿匕。窖菹香沁齒。倘佐辛盤生菜。試嚼動，聲尤脆。

又 瓢兒菜

園蔬譜外。更數瓢兒菜。遠向金陵乞種。緣近市，無從買。妙品羞葱芥。疑欲秋菘賽。若論咬根佳話。笑風味，依然在。

賀聖朝 冬韭

半畦冬韭黃芽嫩。向春盤初進。萍齋休更石家誇。恐令人齒冷。庚郎三九食鮭常品。仰清貧風韻。還欣冒雨客來時。把霜苗翦盡。

卜算子 菠菱菜

奇種出頗陵。獻自開元歲。春末秋初兩度栽。菜品應稱最。紅背綠鸚哥。雅號新而美。誇富冬蔬憶大蘇。始識真滋味。

又 芋

岷蜀富蹲鴟。居者終年飽。洛下誰知欠土宜。珠寶殊纖小。莫乞嬾殘餘。自與煨龍腦。更學蘇家玉糝羹。真味清而妙。

霜天曉角 梅花

傲雪凌霜。經寒分外香。開向百花頭上。又豈爲占春忙。壽陽誇睡妝。羅浮談夢說。識得林家處士。贏多少。好詞章。

又 紅梅

絳脣點點。都把胭脂染。植向紅羅亭畔。燈月下。影難辨。色豔香微欠。品更孤。出
恰似江妃含醉。盈盈是潮生臉。

又 蠟梅

駝酥搓就。色妒鵝兒酒。暖閣花瓷清供。時時覺。暗香透。磬口標芳久。檀心幽韻秀。
自被蘇黃題詠。品欲與羅浮鬪。

江城子 萬年青

羣芳譜外著芳名。比仙蕙。傲華平。綠葉朱苞。刻翠更雕瓊。爭向歲朝誇吉語。都道是。
萬年青。

天仙子 水仙

得水能仙矜冷豔。陳思賦裏依稀見。品高惜未入騷經。塵不染。香偏遠。雅操誰人彈。
別怨。

又 天竹羣芳譜一名大椿又云可作青飀飯其名出西真書

翦翠凝丹密閒疏。青琅玕綴莫難珠。大椿品自衆芳殊。青餽飯。歲朝圖。名出西真紀異書。

思佳客 山茶滇中定光寺紅茶最佳樹大十圍花開數千朵相傳唐時物也
萬里歸來十載賒。最難忘是定光花。彤雲鬢鬢千枝豔。翠蓋團圞半畝遮。吟未已。
夢猶誇。移從吳苑助風華。寒苞怯雪紅微露。凍葉經霜綠漸差。

又 瑞香

睡夢誰曾聞妙香。廬山高座探奇芳。品題舊號熏籠錦。珍重新呼山麝囊。宜暖室。
對明窗。翠雲裾映紫霞裳。攀枝帶葉梅將遜。攢筍成苞桂可方。

迎春樂 迎春

春光九十花如海。冠羣芳。梅爲帥。斯花品列番風外。偏迎得春來賽。未有花時春
易買。笑還占中央色在。誰與錫嘉名。爭說道金腰帶。

探春令

探春是花羣芳譜未收春初開白花似小雪毳甚香洛中僅有他處

未見也

鏤冰作瓣雪成毳。探春光消息。愛幽香、欲與江梅敵。笑桃李、那能及。洛中名卉真無匹。向花經難覓。占芳華、常趁春幡出。問蜂蝶、幾曾識。

一落索 玉蘭

玉樹青葱競秀。恰迎春開候。嫩苞九瓣臭如蘭。最留得、芬芳久。品與辛夷疑鬪。宛瓊瑤彫就。落英還比菊堪餐。偏宜是、酥煎透。

少年游 櫻桃花

春寒深釀春風吹綻。芳信占春前。疑杏輸濃。方梨較淡。嬌態弄晴酣。筍廚同薦。筠籬相贈。嘉話憶唐賢。油幕重遮。金鈴加護。留果待鴛含。

江城子 新柳

春來何物最嬌嬈。麴塵飄。綠絲搖。舞態風情。天付眼眉腰。好是不經扳折苦。儘留與。短長條。

漁家傲 海棠庭中雜蒔西府垂絲貼梗諸種花時對酒亦樂事也

西府名高誇蜀錦。垂絲貼梗交相映。縱說無香偏有韻。誰堪並。美人睡足春醒醒。
杜老無詩空寄恨。花中真是神仙品。欲種紅雲三百本。憐潘令。老來尙帶看花分。

謁金門 杏花

春意鬧。萬點明霞初照。催轉年光驚客抱。江南歸夢好。新燕柳絲亭沼。消息雨中
偏悄。最是關心深巷曉。賣花聲絕悄。

浣溪紗 紫白丁香

細葉疏花冉冉芳。靈根移自海南鄉。交柯分影出東牆。紫豔倚風偏有態。素苞浥
露更生香。結來雞舌待山郎。

風光好 洋楓其種來自海外春半發葉先紅後綠良可玩也

妒朱霞。染丹砂。異種來從海上槎。豔交加。江楓葉待秋霜老。春偏好。真箇紅於二
月花。不如他。

十六字令 榆錢

圓。輕薄真如沈氏錢。無才思也。學雪漫天。

武陵春 桃花

漫說避秦傳作記。爭把寓言誇。占斷春光。是此花。深淺絢朝霞。助嬌銷恨唐遺事。妙語燦天葩。採藥誰迷歸路賒。遊客不思家。

又 碧桃

和露移來天上種。簌簌粉雲遮。碧玉芳年未破瓜。標格淨無瑕。前度劉郎應未認。素魄妒梨花。珍重詞仙賦露華。冷豔儘堪誇。

南歌子 李花

色訝銷冰薄。香疑染麝偏。九標題品妙誰詮。最是葦綃佳句。盡人傳。素影宜臨夜。芳魂欲化烟。春風二月豔陽天。不鬪風華。秀色絕堪憐。

又 梨花

小庚詞

夢欲朝雲共。香飄霽雪濃。瀛洲玉雨費形容。恰愛黃昏院落。月溶溶。買樹論園就。簪花壓鬢鬆。洗妝莫惜玉尊空。只恐妒花時候。雨兼風。

柳含烟 觀音柳卽三春柳

三春柳。軟烟浮。嬌態學成人字。倚風一樣弄纖柔。儘風流。頰幹青條宜映水。更吐紅。紫穗。漢宮曾說日三眠。不飄棉。

相見歡 紫荆

天桃媚杏輸穠。紫蒙茸。碎翦彩霞千縷。鬧東風。嬌旖旎。豔無比。費春工。不愧芳名喚作滿條紅。

又 荷包牡丹卽魚兒牡丹又名花妃

牡丹舊號花王。鎮無雙。合有嬪妃隨侍鬪新妝。珠成串。魚兒貫。惜無香。密綴芳苞

巧肖紫荷囊。

長相思 新蒲

綠齊抽。翠偏稠。秀色曾將細柳儔。曲江春日游。曉烟收。午風柔。欲立蜻蜓不自由。臨平五月秋。

又 雪毬

玉璫玲。雪晶瑩。攢就千花一蒂擎。東皇費巧心。鬪娉婷。弄輕盈。拋向春風倍有情。午闌花韻清。

浣溪紗 黃刺縻

綠刺纖柔翠幹長。點酥作瓣蠟爲瓢。臨風綽約淡聞香。弱穎冒衣留蝶粉。嫩塵飄。麴訝蜂房。紅顏偷換道家裝。

又 棣棠

春色釀成花世界。棣棠豔出羣芳外。一葉一花繁可愛。黃深碧淺嬌無奈。搖曳綠羅金縷帶。留得名詞題詠在。

轉應曲 薔薇

小庚詞

春雨。春雨。染出春花無數。薔薇開殿東風。滿架花光豔濃。濃豔。濃豔。疏密淺深相開。
又。紫胡蝶。閩中名爲紫燕。滇中名爲扁竹。蘭且有開白花者。亦花譜所未收也。

胡蝶。胡蝶。紫豔翠莖綠葉。翩翩對舞風輕。團扇撲來夢驚。驚夢。驚夢。一樣粉柔香重。

怨王孫 紅杜鵑

杜鵑啼候恰開花。血染花枝豔妒霞。萬紫千紅總遜他。鬪風華。元白聯吟特地誇。

又 玫瑰

天教深淺染燕支。開向東風錦段披。弱質徘徊不自持。惜芳菲。收取香苞事事宜。

漁家傲 牡丹

爭說洛陽花最盛。邇來花事渾難問。千里遠從求異品。花時近準。應助我看花興。誰道名花天亦吝。不教姚魏春風趁。仍對舊叢三數本。羞潘令。自嘲還欠看花分。

賣花聲 木香

連日做春寒。花事將闌。惜春常自數風番。剩有木香猶未放。待送春殘。壓架翠蛟。蟠。花影爛斑。戀春且復日盤桓。好與攜尊花下醉。英落杯盤。

又 新筍

攜杖遶庭墀。謝豹初啼。狂鞭孕出籜龍兒。豈肯學他饒太守。留長孫枝。斑點苗文。犀。玉立參差。願看成竹莫教遲。還恐綠垂風折損。加意扶持。

春光好 春蘭

芳蘭好。乞新栽。晚春開。風過幽香自送。襲人來。越墅曾傳禊事。湘鄉誰續騷才。題品欲兼三友美。巧安排。

又 菜花

春光好。菜花開。遍池臺。薺白蕓黃。蘊紫錦成堆。張翰風流誰繼。劉郎蹤跡重來。燕麥兔葵同一例。助吟才。

醉花陰 罌粟

種向中秋開待夏。穠豔誰能畫。號做米囊花。萬粟同畧。欲糴疑無價。子規啼罷羣芳謝。惜春光難借。留此錦屏風。紫姹紅嫣。渾忘春歸也。

又 蠶豆

種向中秋收待夏。久歷三時也。花吐宛如蛾。莢宛如蠶。形肖真難畫。自來題寫憐應寡。僅誠齋詩話。欺蜜復欺酥。甘軟相兼。佐我盤餐雅。

河傳 柳花

花落風弱。晚晴池閣。捲絮吹綿。顛狂情性最堪憐。流連。春殘三月天。星星莫點潘郎鬢。歸香逕。怕有人驚問。任飄零。化浮萍。無情。隨波不暫停。

點絳脣 桐花

清露晨流。新桐花吐。清明到。碧鮮紫俏。待殿春風好。好潔倪迂。日洗真堪笑。春深了。殘英莫掃。留飼相思鳥。桐花鳳喜食。桐花園中名爲相思鳥。

又 金銀花一名鷺鷥藤

斂股雙垂。色分黃白。真纖巧。珠縈翠繞。小摘宜清曉。茗戰爭新。香助湯功妙。誰知道。段家詩好。初把芳名表。

少年游 棗柿頻乞棗栽柿栽輒萎今春皆榮喜而賦之

棗稱百益。柿誇七絕。佳植並羣芳。頻乞新栽。未成嘉蔭。移種笑空忙。瓊枝欣茁。瑤柯競秀。生意入春強。葉醉欺霞。果垂耀日。都待滿林霜。

惜分飛 棟花

二十四番風試數。開到棟花春暮。無計留春住。憑闌脈脈愁無語。淺豔含風香溼露。寂寞滿庭紅雨。催得春歸去。那堪鶉鴉聲聲苦。

留春令 鐵線蓮

葉纖翦翠。莖柔縈紫。娟娟堪愛。圓苞淺碧。宛如蓮。偏宜傍珠鈿戴。籬眼盤旋。嬌不礙。看倚風情態。花開雖久。惜無香。但留得春常在。

玉交枝 葡萄

異種攜從博望侯。五官題品更誰儔。濃陰滿架宜夏復宜秋。馬乳晶明珠莫比。龍

鬢繚繞翠還流。釀成佳醞。留取博涼州。

菩薩蠻 楸花

長楸走馬長安陌。小園欣見楸花發。野色與村香。送春也自忙。杜韓題詠在。莫道無人愛。留葉待新秋。盈盈簪滿頭。

阮郎歸 桑椹

南風送暖麥齊腰。桑疇椹正饒。翠朱三變畫難描。纍纍珠滿苞。蠶事畢。養新條。羅敷閒更嬌。鳴鳩兩兩扈交交。雙飛鬪影高。

山花子 芍藥

高會誰曾聚萬花。瑞呈金帶最堪誇。宜與特開婪尾宴。悵春賒。謝客翻階詩絕雋。鄭風相贈語尤葩。遙話豐臺烟景麗。望京華。

臨江仙

人道洛陽花最好。我來恰已三年。灌園學圃舊因緣。有花真富貴。無事小神仙。塵境題爲花世界。吟將百詠成篇。新聲初出客爭傳。遽能誇紙貴。端不愧詞顛。

詞味

隼

齋

蓮影




周濟（乾隆四六——道光一九）

字保緒。江蘇荆溪人。嘉慶十年進士。官淮安府學教授。少有遠志。工騎射擊刺。通兵法。習經世之學。與包世臣齊名。既蘊蓄不得展。乃翻然悔改。閉戶讀書。前後如二人。所著晉略八十卷。論者謂借史事自抒猷畫。非徒考據而已。

自序

詞之爲技。小矣。然考之於昔。南北分宗。徵之於今。江浙別派。是亦有故焉。吾郡自皋文子居。兩先生開闢榛莽。以國風離騷之悵趣。鑄溫韋周辛之面目。一時作者競出。晉卿集其成。余與晉卿議論。或合或否。要其指歸。各有正鵠。倘亦知人論世者所取資也。既刻詩。乃并平時所爲詞刻之。兩先生往矣。聊以質之晉卿。道光癸未仲冬。介存居士自敘。



味雋齋詞

荆溪周濟止庵

菩薩蠻

嬌愁未識相思苦。盈盈漫捉風前絮。春去繡簾閒。黛痕輕上山。殘棋拋更著。女伴驕難約。特地唾絨窗。爲添晴晝長。

浪淘沙

遲日照房櫺。春太冥蒙。簾旌輕漾棟花風。一架醅釀香似雪。何處殘紅。迴枕曲屏空。纖甲重重。睡情比勝酒情濃。多少流鶯催得起。夢又怱怱。

虞美人

昨宵枕上驚春雨。簾外無尋處。離人何計得消愁。約到平山山下泛輕舟。梅花信逐東風遠。蝶夢誰能遣。不須把酒倚闌干。纔放春晴都不記春寒。

洞仙歌 落梅

低飄亂灑。被東風輕餞。二月餘寒未歸燕。任多情、翦紙東閣招來。飛不到、當日含章宮殿。春酣能幾許。穠李天桃。一例斜陽下深院。喚起倚樓人。橫笛孤吹。還贏得、啼痕如霰。待綠葉成陰。覓殘紅、笑指向枝頭。嫩黃初見。

菩薩蠻

殘雲和雨風吹度。深深小閣疏簾暮。落盡刺桐花。綠陰簾外斜。影娥池上見。風定蟾光徧。徒倚若爲情。弄波愁月明。

卜算子

山遠樹橫煙。雲淨波涵鏡。萬字闌干八字橋。坐久衣裳冷。乘月卻歸來。小院人初靜。漠漠簾波淡淡風。過了梧桐影。

虞美人

曉涼和雨醒殘醉。綠卷簾波碎。牽牛花淡兔葵濃。那更惜花雙眼到烏榕。人間不種紅蒲草。夢也無心好。暈潮枉記夜來痕。留住花枝。留住不住花魂。

長亭怨慢 新竹

正堆砌、飄紅無數。綠意誰教，一叢如許。楚楚娟娟，料應先是舊風度。隔牆初見，恰帶着、星星露。有客到門來，都不管、何人爲主。姑住。拂春衫似雪，算只極天飛絮。青鸞尙小，休便要、倚風歸去。作道是、褪粉留痕，也難覓、生香銷處。待綺月紛紛，卻臥橫窗殘暑。

疏影 風竹

亭亭裏裏，料碧痕一餉，無此風調。日莫天寒，翠袖人來，無端卻恨秋早。紅衣褪盡蓮房冷，問那憶、侵肌涼好。但隔簾、看取玲瓏，便爾爲伊傾倒。幾許花須柳眼，一生儘付與、煙散雲渺。吹入秋心，依舊蕭疏，不管羣芳如掃。朱幡莫向人間借，算此意、少兒應曉。廿四番、仍要催春，孤負年年芳草。

南浦 晴竹

山角正封雲，最憐他、都要分些晴意。淺碧閒羣芳，依然作、秋雨秋風心事。籠煙鎖霧。

留將好夢渾無計。莫卷重簾親切看。消盡韶華流水。玉簫吹徹丹山。料重來不記。人間何世。小築遼幽泉。巡三徑。剩得霜痕雪漬。江南路好。無人同住。梅花裏。千萬莫愁時節換。璧月還來石底。

高陽臺 雨竹

潤氣生衣。翠陰沈樹。不應畫得秋真。小別天涯。聽愁又替何人。斑痕不照湘潭水。怕淋浪。醉也無因。但銷凝。一片雲幃。一片苔茵。故山歸去呼猿鶴。放春波千頃。流盡斜曛。儘夜舒蕉。分他一半酸辛。相思不爲相逢斷。爲難消。十丈緇塵。更誰知。近了殘秋。遠了殘春。

青門引

逝水無人管。催送一年春短。征帆莫更滯斜陽。碧雲深處。悵望繡簾卷。燈前勸盡玻璃盃。璧月何時滿。笛聲但怨遙夜。可堪夢向天涯轉。

蘇幕遮

莫山遮。春水映。紅袖人遙。綠袖人還並。如此丁寧如此聽。懊惱征帆。越是東風勁。
怯花愁。憐酒病。欲飲還辭。欲去何曾竟。月滿江樓良夜靚。紈扇團圓。不是菱花鏡。

蘭陵王 申江追別圖爲祁生賦

浪花蹙。搖動愁珠萬斛。休回首。無數斷霞。剩把鞞紅襯嬌綠。尊前擁比玉。頻屬流芳散馥。靨旣展。眉影鬢絲。都占當筵定場曲。紅蕉掛蝙蝠。更戀蝶春衫。飛燕華屋。斑駁忍換連江舳。況判袂離席。握手南浦。丁寧未語恨太促。但望斷橫目。修竹漫棖觸。正樹遠斜陽。風冷樺燭。分攜一樣傷幽獨。怕粉本同看。綺緣重續。歸途如此。爭掛得布帆足。

疏影 仙蝶圖爲祁生賦

離情未了。又倩雲把夢。扶向瓊島。喚醒春魂。不爲花枝。風前自倚嬌小。秦宮未肯花間活。儘凍折寒簧清管。恁鳳車。故故飛飛。似惜落紅依草。休問裁霞傅粉。有誰從扇底。悟得秋早。住慣羅浮。雨合風離。只伴梅英霜曉。如今縱悔驚塵錯。已誤卻。韶光

多少。恐畫圖、難畫歸心。一任翠衣人老。

永遇樂 題祁生洞庭緣院本

流盡年光。何時真翦寒碧千頃。水佩風裳。儘銷庸福。往事難重省。靈旗寥雨。輕綃護玉。還訪橘根仙井。算人間、花嬌柳寵。再來祇認波影。蓬萊路遠。馮仙風吹去。空笑浮萍漂梗。徐市新來。不堪重記。燒劫秦灰冷。巴陵山色。爲誰窈窕。只令共浮魚艇。休橫篋。眠珠正穩。莫將喚醒。

湘春夜月 滄州道中見女子粥伎

恁天涯。幾人煙水浮查。不信霧鬢風鬟。都付與楊花。亂蹴秋千紅影。隔淥波青粉。柳外誰家。算吹簫那是。珠簾十里。煙暝香斜。扁舟倦客。安排清淚。重賦琵琶。值得沈瀾。渾未要、迴燈喚酒。低訴年華。明宵何處。料相隨、祇有昏鴉。向淡月、祝眉痕兩點。依他纖影。休被雲遮。

菩薩蠻 秋蟬寄劍樓侍御

涼風初定。纖雲聚。蕭條已是愁如許。知道一聲難。夕陽天際山。露光連月白。容易
黃花節。真箇不禁秋。軸簾人倚樓。
一溪夜雨。痕如綫。枯形病翼羞歸燕。莫更訴西風。斷霞零碎紅。有人憐鬢影。真爲
清宵冷。難忘是斜橋。綠楊千萬條。

阮郎歸 秋海棠

露蟲和月弔清妍。秋痕都化煙。只聞腸斷惜華年。斷腸誰解憐。疏雨後。夕陽前。砌
蛩吟正喧。輕紅一例委霜天。輸他聞杜鵑。

霜天曉角 和晉卿

別路人間。記曾扶袂看。消得疏林遮住。怕特地。望長安。綺霞飛又殘。莫雲浮亂山。
添取一分黃葉。渾不是。見時難。

永遇樂 紅葉同良卿賦

過了啼鵑。恁恁真箇。人比花瘦。烏白門前。一番秋信。消得重回首。斜陽明滅。輕雲零

亂不是釀春時候。應愁絕。新來夢蝶。怕禁明月清漏。緇塵浣罷。江南舊路。還共停車呼酒。聽雨深樓。延秋別館。約記年時否。不成都作。新來離緒。冷倚半江衰柳。渾輸與、驕紅一院。曾垂素手。

湘春夜月 答枳村見贈同訪申耆卽送別之京口作

太匆匆。共君如此相逢。正恁菊短籬疏。憔悴伴西風。撲盡軟紅塵土。向妒花霜葉。且泛孤篷。奈瀟瀟暮雨。懷人又見。梁燕泥空。江城夜午。分攜早趁。蕭寺傳鐘。北固山橫。何處有。荻洲千頃。留待冥鴻。吹將鐵篴。怕低飛。便過遙峯。認舊侶。爲齊煙九點。雲臺東畔。親問珠宮。

相見驩 采蓮

湖光不浸山容。翠陰重。許擲桂枝雙槳。到花叢。文鴛睡。游魚戲。語才通。莫載滿船明月。又相逢。

波心魚夢初圓。觸輕舷。遮莫滿身涼雨。溼如煙。秋風別。紅衣惜。又淒然。采得空房

歸去動經年。

又 題紫雲出浴圖

晶簾不漾微風。露光融。薄薄淡羅衫子映肌紅。梅花落。瓊簫閣。夢無蹤。化作梨雲何處認玲瓏。

森森鳳尾垂陰。倚闌尋。尋到月涼雲轉夜深深。羅紈小。流螢巧。恨空心。莫是芳魂銷得到而今。

齊天樂 蠹食册成蝶寄形虛空搏埴爲器當其無有器之用聊爲賦之

綠茸不記尋春路。濛濛世留纖影。玳管輕捎。烏闌細寫。生被銀魚驚醒。燈花燄冷。照一片愁痕。倩誰重省。欹枕商量。化伊還怯夜風警。羅浮休便去也。有神仙恰待。圓月如鏡。織就雲衣。調殘露屑。爭又前身虛並。芝田萬頃。任竹榻蕉窗。箇人消領。翦紙招來。費細梅半餅。

菩薩蠻 七夕分詠得蜘蛛秋蕙

味雋齋詞

秋心約得如絲瘦。還將鈿合輕輕扣。得巧莫言多。迴文挑幾梭。釵頭親驗取。笑避穿窬侶。恐是誤飛來。鏡奩朝不開。

湘江更比銀河遠。有誰紉佩臨清淺。欲采閒芙蓉。亂霞深萬重。垂垂仍合蒂。不爲秋憔悴。生小別穠春。卷簾雙玉人。

臨江仙 陸丹山工墨梅索詞賦贈

手種春英過尺五。年年誤卻花期。越羅初試月生衣。畫眉窗下。香屑散霏微。化蝶還憐瑀玉骨。纖纖又見橫枝。曉風吹面酒醒時。一雙翠羽。無處寄相思。

暗香 扇上梅花

露華似水。想夜來伴着。秋英都碎。幾陣緒風。老盡羣芳。臙濃翠。江北江南路。杳人漸遠。垂鞭摻袂。但暗記。一角春山。寒玉響環珮。蕉萃碧雲外。又倩得。笛聲喚醒殘醉。綠珠未墜。依約春疔幾分在。祇恐齊紈易擲。空驗取。班姬清淚。甚日向。煙浪裏。雪蕤共載。

氏州第一 大明湖醉歸

風定晨鐘。月暗夜柝。蕭蕭旋起秋思。謝了芙蓉。扁舟過處。空剩一湖煙水。誰遣菱歌送落日。餘霞凝紫。淺醉歸來。馮闌望久。亂蛩盈耳。不似荆溪溪畔路。尙贏得、舊遊聯袂。遠雁蘆邊。疏螢竹外。動是人千里。隔紅牆、銀漢杳相思。句難馮錦字。玉笛誰家。譜涼州、高樓莫倚。

虞美人影

一燈秋夜。疏星共。照破銀屏幽夢。又是隙風微動。簾押文犀重。紅鴛小譜琵琶弄。碎玉丁當遙送。顫落鈿釵金鳳。酒醒脂痕凍。

應天長慢

疏風透枕。殘月下牀。依稀酒醒時節。砌畔絮蛩。饒把離情訴寒石。苔紋縵。芳事歇。念萬里。素光虛積。但消受、草露盈盈。清淚霑臍。誰遣不眠人。坐燼蘭釭。細數漏聲滴。社燕去巢。泥墮空梁。點瑤席。琴心冷。彈未徹。倩絡緯。暗催刀尺。奈征雁、只管南飛。衣

到何日。

念奴嬌 別止齋中丞

當歌對酒。問人生、何苦年年離別。一領征衫塵未澣。又早驪駒催發。落葉黏衣。輕風卷幔。去住馮誰說。那堪歸雁。數聲驚起長笛。空記小語丁寧。金尊同醉。明夜中秋月。月。月。縱多情能照我。還怕浮雲重疊。使得清光團圓如鏡。坐我瑤華闕。也難忘卻。酒闌人散時節。

一萼紅

漏聲沈。想寒蟾一點。依約度疏林。隱臂妝殘。扶頭酒淺。離思空復盈襟。記初見、柔荑未握。試絃索、嬌語囀春禽。錦幄藏花。繡鞍衝雪。都是情深。才得畫羅親解。甚輕分鴛帶。翦卻同心。舞絮樓臺。吹香院宇。羞向夢裏重尋。念惟有、窗前玉蝶。坼紅萼、芳意不勝簪。那更歸遲。任伊閒伴瑤琴。

拜星月慢 寄申耆

豔委雅鬢。澗生梨頰。淺笑輕顰雙絕。愁裏逢伊。又霜寒如織。問眉顰。可是章臺帶雨
初見。楊柳青青時節。半晌偎人。背銀釭低說。絮因風。萬點紅香滅。萍隨水。一片烟
波隔。那更繞樹啼鶯。向晨星淒咽。恨羅裙。路同顏色。琵琶語。怎展丁香結。但祝取、
夜夜姮娥。照天空海碧。

憶舊遊 夾竹桃花早開晚落歷城小寓此樹嫣然歸途追憶舊蹤不禁淒斷
聊成此闕以寄遠懷

甚相逢草草。一縷秋風。吹散行雲。記掩雙蟬鬢。映纖蛾廣額。露靨微醺。惜花太解
憔悴。寬盡綠羅裙。況鳳竹蕭疏。緗桃綽約。同倚斜曛。慙慙追憶處。待江上。夫容重見
文君。猶帶當時怨。是遙山莫靄。寒翠繽紛。不知恨取何事。孤雁入高雲。縱寄得愁來。
揚州明月才二分。

木蘭花慢

駐馬還貰酒。問卓女。可當壚。正朔雪凝空。塞鴻失侶。弔影相呼。瓊酥頓驚瘦損。怕重

來恨跡斂春蕪。爭似鷗夷共載。故山剛倚平湖。金吾任喚作狂夫。蟹舍老菰蒲。有
蕉仗深交。蟻封巧散。莫笑投珠。檣烏練痕乍卷。颺紅旌。玉手試提枹。彈入箜篌慢引。
歸舟天際雲孤。

六醜 楊花

向濃陰翠幄。漾嫋嫋。春魂如雪。畫闌獨馮。飛英鴛鴦溼。正恁愁絕。又對斜陽院。亂絲
空裏。換一番憐惜。南園誤了雙蝴蝶。草際輕黏。簾前漫瞥。纖纖映蛾眉月。卻難尋瘦
影。幽恨重疊。東風搖曳。謾低回恨蹟。灞岸鳴嘶騎。情暗切。柔條幾度攀折。縱天涯
覓徧。買春榆莢。祇惆悵。衆芳都歇。算誰共。委豔香泥壘。向杏楣春帖。還消受。半枕寒
怯。更睡絨。點綴茸窗底。嬌紅一捻。

雨零鈴 刺蘼

斜陽闌曲。照深深院宇。翦濃綠。瓊苞未展芳蕊。馮誰說與。金鈴休觸。幾許風懷。漫寄
向。凝淚樺燭。算只有。仙蝶雙棲。醉倚香痕夢堪續。佳人最惜瑤釵玉。笑拈來。剛趁

紅巾蹙。晶簾欲語明鏡。雲半委。回眸低矚似水華年。祇會東流。幽恨難足。那更聽深
掩重簾。夜雨吹橫竹。

生查子

花房曉露涼。似有廉纖雨。新夢覺來輕。欹枕翻無語。嬌娃十四五。臨鏡貪眉撫。不
憶畫眉人。自把遙山譜。

齊天樂 四春錢

臨春閣上宜春佩。網絲乍縈驚蝶。鏡殿前因。仙盤舊恨。化作銖衣輕疊。雙棲意愜。笑
繡出鴛鴦。未諳風月。慊慊春梁。數來堪否歎工絕。燕支魂斷露井。買韶光又趁。綠
暗紅隙。障錦斜遮。蹄瑩戲賭。拚與填將塵埽。驕嘶汗血。怕碎卻連環。更難重覓。漫向
人間。問金甌圓缺。

祝英臺近 瓶中蠟梅

篆煙微。沈水歇。孤館夢初醒。似有香來。脈脈逗春影。額黃消得宮梅。檀心深注。問可

許翠禽相並。畫簾迴。況是別久書遲。何人寄芳冷。繡戶黏雞。後約怕重省。凍瓶還抱雙枝。馮伊憔悴。料隔隴。未諳幽境。

綺羅香 甲戌花朝山左同人小集分賦

月拂星弧。霜融畫角。淺醉馮銷春夜。卻憶山中此日。野梅剛謝。趁小橋、澗水微波。攜俊侶、落英同把。鎮相看。桃李無言。最憐鶯燕妒嬌娃。閒雲辭岫未返。還被東風作弄。青鞵紅亞。緩鞞輕衫。次第綠楊嘶馬。問芊緜、芳草初生。怎掩映、夕陽西下。倩重簾、好護幽香。漫將濃恨惹。

點絳脣

隱隱巖城。金蟾乍上繁星杳。花枝春裏。纖影橫衿巧。一樣冰輪。膽小看來小。玉孫草。空房閉蚤。夢向清暉繞。

浣溪沙 初歸見綠萼梅正盛

風約歌珠顆顆圓。雪香春蕊泛湖煙。客懷蕭散是今年。三日輕舸浮醉醒。一枝疏

影立嬋娟。這番真到玉人邊。

風入松 將移家維揚留別小院海棠

西風料峭過牆東。寒勒海棠紅。人如社燕歸來乍。花應是、憐我飄蓬。留取瓊苞未坼，待他暖日徐烘。芳尊浮蟻幾巡空。醉臉倚嬌慵。馮闌攜手深深訴。年年別、花裏怱怱。從此雙飛雙宿，故園寂寞春濃。

八歸 送彥聞赴都

江流鎖平疇。煙接蘆荻斜隱客棹。怱怱百五飛紅斷。贏得故園消息。青梅酸老。綠遍天涯。迷去馬。剗不盡、重重芳草。但祝取、桃李陰成。三徑黛痕繞。無計買他雲岫。腰鎌芟棘。暗遣十年懷抱。幾人彈鋏。幾人市骨。一例長安西笑。怕素琴碎後。燕筑難傳。別時調。儘魂繫翠旌邊柳。著甚相逢。歸來應更好。

洞仙歌 和彥聞新月

瑤華斂盡。奈寒芒難約。依舊纖纖畫樓角。散餘霞漸暝。返照無痕。蛾黛染眉樣。遠山

如削。繁星爭耀彩。綠樹陰陰。幾許南枝。誤飛鵲。小拜露階涼。金闕深局。訴密意。桂娥應覺。待三五。清光正團圓。怕吹裂瓊簫。霧屏煙幙。

少年遊 桃溪遊湖上。喟然曰。此間堪老。惜少美人與明月耳。詞以調之。

風荷轉午。良蝸散韻。竹院試煎茶。舊雨停雲。故人今日。千里共浮查。陰陰樹色。連隋苑。何處認宮斜。明月陰多。美人夢短。可惜好年華。

蝶戀花

萬柄風荷搖不定。照灼紅裝。面面凌波靚。催送殘陽煙又暝。驪珠欲喚眠難醒。歸櫂愔愔愁路永。怨笛哀箏。都約秋心冷。一夜水仙收綠淨。亭亭獨鶯窺晨鏡。

木蘭花

鶯花斷送春歸去。櫻筍堆盤。難下箸。年年此日慣傷離。何意翻成。懽會處。新縑舊素都無據。蟬鬢翠眉。誰付與。按歌剛罷。月剛圓。自欲矜持。天不許。

浪淘沙

落日倚孤篷。歸櫂愔愔。怨歌齊女綠楊中。訴盡飄零何限恨。萍水無蹤。酒醒一燈紅。愁聚眉峯。別時情比見時濃。留取衫襟痕數點。好與重逢。

浣溪沙

絡緯蕭蕭夾岸啼。流螢如雨各東西。新秋行客試單衣。轉憶花前惆悵事。賦歸人卻贈將離。那能重見不依依。

憶舊遊

信東風別舸。兩岸遙山。處處顰眉。乍解臨皋佩。又盈盈脈脈。擬託良媒。映燈試翦秋淚。呼得夜珠來。感密意深緘。微波暗溯。都在停盃。迷離驚倩女。墮夢影梨雲。香暖春回。奈被霜鐘妒。壓鴛衾未起。紅淚先垂。釀愁最苦。江水流不到長淮。待親見崔娘。鏡中蛾綠重細措。

念奴嬌 疏簾

畫檐深窅。隔分明心性。悵他煙縷。似恐春痕山易學。掩卻盈盈眉顰。燕啄泥融。絮黏

香墜一桁前宵雨。綠波平漲。織愁人在何許。贏得把卷慵來。拋書隱几。睨睨聽絳羽。火活松釵縈碧篆。細憶酒邊情緒。月樣鉤斜。鵝兒旌短。密意渾輸與。甚時輕卷倚闌晴對瓊宇。

木蘭花慢

看歸帆向盡。漸風力。接荒烟。賸落日紅低。斷山翠冷。作弄遙天。梅邊數聲怨笛。喚湘靈、萬壘和哀弦。遮莫蘆寒散雪。還疑柳嫩搓絛。裁箋待與訴嬋娟。初月未成圓。況雁塞雲高。雞精星眼。并入玄篇。陶然便拚醉也。奈中山、醉日止盈千。多謝江頭伴侶。尋他海上神仙。

水調歌頭

浮海欲何向。無乃向咸池。樽桑葉大于屋。其上有天雞。忽發一聲咿喔。喚起千門萬戶。藹藹散春暉。拍手御風去。舟楫快相隨。君不見。列禦寇。骨成灰。童男卯女。頭白徐福竟安歸。縹渺黃金宮外。搖蕩青銅鏡裏。慧想總緣癡。一點漢槎石。天女要支機。

八聲甘州

嘆天衣無縫。要天成、人間織來難。漫顛箴倒綫。翻花鬪葉。舞鳳翔鸞。多少金閨妙手。淺笑倚闌干。誰遣蓬窗女。苦耐更殘。剛道鴛鴦繡出。又東風窺幕。舞蝶成團。待添將半臂。珍重護春寒。盼玉勒、驕嘶甚處。但垂楊、綠比海天寬。和淚親緘畫篋。留與重看。

摸魚兒

待拚將、一聲離別。離情還更重疊。蘭香不合人間降。轉眼鬢雲凝雪。芳草歇。忍怨向、春殘花老頻啼鴉。恁般哽咽。是暗裏流光。雨催風送。含淚共君說。朱弦澀。雁柱斜行又折。家山黯澹風月。石城舊擬垂綸處。頓遣莫愁愁絕。愁未徹。況著箇、琵琶老大曾相識。唾壺漫缺。要合玦成環。鏤冰作鏡。萬古意難決。

賀新郎

夢斷江聲裏。擁重衾、一燈寒燄。欲眠還起。搔首推篷看落月。衰柳荒蘆如薺。漸四野、

雞鳴不已。釀雪雲生。星沈彩料。明朝風力還相擬。應凍合玉樓矣。歸塗不昃。論千里。奈年來酒懷詩興。消磨餘幾。剛問南朝棲隱處。又恐鷓鴣難比。渾不辨。枝頭葉底。如此江山誰拚得。賸蓴絲長共鱸魚美。只少箇季鷹耳。

長亭怨慢

乍拋卻。枝頭春信。悶倚危檣。看翻雅陳。風急雲寒。鶴鵝無主倩誰認。一冬祈雪。空作了。江天恨。待說與東皇。又只恐。年華愁問。瘦盡念亭亭此樹。可是舊時風韻。禁他幾度。怕皴裂。霜皮盈寸。便祝取。蚤蚤春回。一例把紅羅香搵。向甚處吟看。東閣當年何遜。

水調歌頭

江上浪如雪。幾箇白鷗閒。稻梁不及蒲稗。天地本來寬。其奈郎家北渚。使妾飄零南浦。古月向人圓。弱腕擁雙楫。制淚赴驚湍。舟萬斛。帆百尺。勢移山。一生祇辨風信。安穩作長年。那管星移物換。何況潮來汐去。都只等閒看。含笑問桃葉。汝度若爲難。

揚州慢

雪澤虛占。雲陰漸散。江干依舊斜陽。向淡煙籠處。待曳逗春光。怕紅萼、禁寒乍勒。碧城仙侶。倦繞迴廊。隔深深、簾幙從教。密意難將。似曾相識。便判年、還倚新裝。儘玉照空明。紅羅旖旎。翠羽低昂。一種橫斜疏影。深宵月。不似銀黃。算誰家籬落。堪尋前度幽香。

望海潮

惜惜高柳。娟娟新月。平池靜夜涵空。榆莢亂翻。荷錢暗疊。春歸誤認殘紅。人在畫樓中。料玉鉤掛起。簾幕重重。擬倩瓊簫。寄將離思訴東風。東風奈又怱怱。被噴鴛妒。燕惱盡嬌慵。屏掩斷山。琴留逝水。尋來處處無蹤。愁到甚時濃。看睡花石上。冰翠都融。可惜香衾。但催殘夢向疏鐘。

菩薩蠻 偶種芍藥數本。招同人爲婪尾之讌。衆賓既去。慨然賦之。

飄香遠在清波外。當年只共芳蘭采。別貯漢宮嬌。醉魂飛燕銷。翻階教作婢。誰解

東皇意珍重。記春殘。豔深開更難。

醱醑雪落青條瘦。荷錢亂帖波心皺。寂寞向園林。夢春無夢尋。

瓊臺僊侶集。香霧

漫空溼。笙冷月明中。暗催花氣濃。

燕王墓冷。豐臺窄。霓裳擗碎宮牆笛。十載臥青樓。杜郎愁未愁。

年年湖上路。廿四

橋邊去。若遣鬪芳菲。頗輸金帶圍。

誰憐園客栽香草。飛瓊遺下蓬萊島。歸去海霞紅。看人斜照中。

綠蕪山萬折。胡蝶

飛成雪。夜久燭光沈。露涼知慣禁。

大酺

向綠陰沈。華燈謝。蒼莽飛來圓鏡。荷錢青尙小。任垂楊空際。弄他纖影。宿鳥驚翻。游魚暗上。贏得欺花剛定。殘英知何處。但苔痕掩翠。露光流瑩。算留篆香銷。倚闌人倦。乍尋幽境。清歌珠又迸。爲瓊闕。僊桂成孤映。問甚日。紅牙同按。紫玉雙調。起慊慊。慢扶重聽。試共冰輪約。渾不辨。素娥心性。怕容易。秋風勁。青女相對。蕭瑟西窗吹病。

故園就荒三徑。

蝶戀花 道光十有一年歲在辛卯五月三日燕子磯阻風讀史感賦
落日胭脂紅漸褪。新月如鉤。掛起天涯恨。一箇閒鷗眠不穩。投林只見鴉成陣。 祝
向餘霞休散盡。月似銀黃。卻比黃銀嫩。剛被遙山銜一寸。浮雲片片誇輕俊。
宛轉黃龍星彩異。斗柄西斜。露氣連江墜。嘯夜魚長人卻避。煙波勢飲無天地。 萬
古消沈當此際。石燕嗟峨。空有凌霄意。獨上危亭還獨倚。北風吹冷承睚淚。
老淚無端東北灑。誰遣銀河。直向西南寫。萬斛愁珠相激射。此生漫共漁樵話。 買
得青山休說價。疊嶂重巒。一幅屏中畫。添箇山翁騎瞎馬。柴門歸去昏燈炮。
燕子來時逢戊己。泥墜空梁。幕卷生生翠。軟語輕拊魂欲碎。沈沈畫閣人酣醉。 林
木營巢成底事。曲突焦頭。說向馮誰記。夢裏春風還暗起。吹殘幾樹瓊花蕊。
釵玉泥椒芳靄集。論斛徵螢。光散雷塘碧。萬柄風荷搖欲折。白花雪豔紅花血。 蟬
鬢迴舟羅袂溼。花自雙頭。佩自瓊瓊玦。香徑當年真誤識。蘇臺鹿去留遺蹟。

獨枕黃門排闥語。底事王孫。羞共將軍伍。奉璽功高清渭路。漢陵一片瀟瀟雨。伯
玉伴。酣情更苦。烈烈南風。吹夢迷陳舞。掩卷推篷天欲曙。勞人聽盡津頭鼓。

六么令 銷夏灣荷花

露濃煙重。玳瑁愁珠碎。一枝兩枝紅豔。點出淩波翠。應是吳宮人去。萬古留憔悴。鷺
衰相對。晚蟬咽處。賸有漁歌伴殘醉。我是江湖倦客。浪蹟沙鷗外。著箇魚婢樵青。
小艇剛同載。幕地看花心苦。暗墮鴟夷淚。佳人難再。問他玉骨。可向西風卸環佩。

相思兒令 憶荷花

一葉一花教見。零落儘西風。可惜綠波明月。相映小池中。銷夏記泛孤篷。徧青山、
難覓吳宮。歸來夢繞煙蘿。漫愁響屨廊空。

浪淘沙慢

聽緜嶺、瑤笙乍杳。喚起長笛。斜日餘霞漸隱。西風過雁又急。望十二、瓊樓無信息。倩
青鳥、飛度蒼茫。但弱水浮山最深處。文鸞見孤立。還憶當年誤注僊籍。待散髮扁

舟隨流去。星帶羊裘客。奈舊盟都寄。瀉波鷺雪。易抽獨繭。怕釣絲。暗惹珊瑚枝格。
歸路遙。秋林雲掩。歸心尚。倚紅盼碧。試吹向。柯亭應更惜。甚春草。萬里芊絲。只一夜。
輕霜作盡蕭條色。

西地錦

足遣秋陰如醉。替海棠冰淚。空階夜漏。寒蟲細語。便無愁爭睡。何況燈昏簾內。又
月明簾外。疏枝瘦影。橫斜徧地。寫秋風無賴。

壽樓春 登翠微亭同叔安作

風蕭條吹衣。又危亭共陟。寅餞斜暉。橫黛低環江表。秀餐蛾眉。紅蓼綻。鱸魚肥。喚綠
蓑。歸來歸來。恨暗浦沈潮。疏黃委竹。荒過釣人磯。西南月空依依。算何時爲我。光
滿瑤臺。可奈朝雲輕散。暮煙橫飛。孤眠醒。塞羅幃。望露盤。高寒先知。歎病渴文園。東
封箸書留待誰。

浣溪紗慢 別鵠寥天忽焉經歲團圓共集弔影獨悲情不自勝遂成臨樂之

歎

玉骨瘦一把。明月圓三五。杜郎夢醒。早見秋如許。叢桂試花。禁盡連宵雨。天上人閒苦。星影隔銀河。海山遙。青鸞倦羽。移家去。誰挽鮑宣車。便香橙送酒。脩竹倚雲。遠黛橫眉。總普斷腸人。畫傷心譜。莫聽傷心語。剗地起西風。共秋光。都無問處。

水調歌頭 題趙野航懷人圖

千載數人耳。況復要同時。天涯何幸相識。相識又天涯。時節非秋非夜。光景無風無雨。那便不相思。可奈翠梧葉。飛墮最高枝。山陽路。倚樓笛。怨長離。幾番斷續。嗚咽孤響喚雲低。贏得江湖逋客。獨對香銷燈燼。舊夢是邪非。絳闕在何許。明月向樓西。

好事近 有贈

桐露欲霑衣。香綻滿園金粟。病起要肢無力。看新來裝束。中秋過也。月仍圓。天然孕珠綠。更向桂娥深拜。有誰開私祝。

又 代答

寶鏡隔宵圓。剛破遠山愁綠。敢道不勝羅綺。奈夜來新浴。紅窗女伴見還憐。相攜
畫闌曲。共報宜秋兩字。是東君親祝。

引駕行 中秋無月

縣縣恨雨。垂垂困柳。吹不斷少男風。皺池面。魚跳落蕊香中。冥濛。姮娥耐寡。青天自
遠。招不向畫樓東。繡簾底。佳人冰望都空。無蹤。曾萬家簫鼓。亂催燈火。互霄紅。奈
事往難尋。卅載遣。青鬢成翁。如虹。珠光劍彩。贖付粉本郵筒。問甚時瓊宇。淨洗碧
海一鏡孤融。秋濃。聽井梧枝上。涼颼成陣。送歸鴻。算近來。花漏漸永。怎禁到晨鐘。

聲聲慢 十六夜有月

鐘坡散紫。幕府縈青。今番漸成秋霽。玉鏡仍圓。偏帶桂娥愁思。紅窗暗驚袖冷。是淒
風。連宵留在。九萬里。要人人都向。畫屏無睡。香篆普尋幽素。任湘簾八幅。深掩濃
翠。脈脈盈盈。爭遣露闌長倚。金徒漫投箭響。正蓬瀛。胡天胡帝。怕怨篋。喚驪龍。還又
夜起。

木蘭花慢 十七夜素庵叔安過飲待月不見別後月出已復雲陰慨然有作
燦閒庭桂粟。眞盼得故人來。任雨雨風風。朝朝暮暮。總付深盃。空階。坐看暗竹。送疏
螢。數點傍人飛。定是涼蟾未透。不成霧幃難開。樓臺。倒影落君懷。依舊鎖清輝。又
歸去。恁恁孤吟剩我。踏徧蒼苔。剛才倚闌望極。甚冰輪。便碾玉塵回。單照人閒恨別。
只應長似蛾眉。

向殘更冷露。雲乍起。素蛾愁。便地角天涯。故情閒恨。總上心頭。悲秋。怪他宋玉。甚高
唐。尙解賦溫柔。碧海青天易老。玉尊檀板應休。重樓。換燭下簾鉤。不夜是瀛州。怕
弱水迴瀾。神鼇戲舞。仙袂難留。蓮舟。醉眠太乙。泛銀潢。貫與斷槎浮。誰道成都賣卜。
還知飲渚牽牛。

風入松

西風不管雁行斜。吹送極天涯。丁寧莫向南樓畔。有無眠、人掩窗紗。剛被一庭疏雨。
喚回愁夢些些。沈思淚臉溼梨花。征戍未還家。分明雁過無消息。定龍堆、不慣風

沙。有幾封侯夫婿。可應輕問仙槎。

金縷曲

蹴跋黃塵下。記當年、輕衫窄袖，居然游冶。笑向鸞毼飛觥玉，紅燭冰臚相射。任一斛、驪珠傾瀉。忽聽雞鳴投盃起。正霜稜、蝟磔鴛鴦瓦。還縛袴，再加把。急裝拚得真長訝。問何如、車中閉置。綠鬢紅姘，射虎封侯尋常事。醉尉逢時遭罵。漸英氣、都消磨也。一劍猶存堅難拔。料龜文、繡損千金價。且傍我、素琴掛。

長亭怨慢

見千丈、游絲飛裏。拂柳黏花，繫春多少。普得春愁，又扶春困，惜春老。一聲啼鴉，都換卻、池塘草。只管背人歸。定不管、拋人爭好。還道是、而今去也。畢竟爲伊重到。青梅煮酒，容易盼、綠蕞收釣。作弄出、萬種秋聲，漸催向、寒天霜曉。但化石枯松，斜倚蒼崖一笑。

風流子 金鳳

味雋齋詞

妖婢太呈嬌。黃花晚。又值楚蘭彫。向瑤砌路邊。裁霞前雪。玉容釵畔。帖鬢黏翹。可憐
許。穠歡彈指盡。薄媚轉頭消。驚蝶亂飛。那尋春夢。夜蛩孤語。還溼冰綃。佳人冰眸
處。蒼苔冷。可奈恨種愁苗。誰在九成臺上。相並吹簫。況新乾竹粉。難拈碎粒。漸稀梧
葉。祇剩空條。回首仙霞關外。雲雨迢迢。

破陣子

昨夜綠窗幽夢。分明春在枝頭。仙翠動香雙弄羽。橫吹捎雲共倚樓。不知庭院秋。
好月看成破鏡。空江咽作寒流。池上袖痕風自展。砌下蟲聲雨未休。幾家砧杵愁。

鳳銜盃

瀟瀟料在五更前。乍醒人。聽向愁邊。不是暗風斜雨。一年年。人不老。月長圓。霜侵
鬢。夜如煙。望潮來。潮信頻遷。只恐綠楊城郭更纏綿。怎不放歸船。

定風波

爲有書來說見期。便愁桂粟下高枝。昨夜雨聲寒透枕。愁甚。是秋風。要落花時。侵

曉索香來石畔。初見星星水面任魚吹。再有三朝并五夜。都謝。這番須遣路開遲。

壽樓春 呼鷹叔安以驅鷹詞見示譜此答之

高臺歌何年。帶長林蔓草。都化秋煙。巉峭初開晴宇。斷雲還連。盤馬向渾河邊。叫餓鴟。蜚鴻驚弦。甚點鬢吳霜。圍要漢柳。顛顛近尊前。英雄記。空陳編。任澆伊萬瑣。難醉重泉。一翅青冥去也。望中淒然。于闐鶻。江淮焉。到恁時。支公猶憐。怕喚得青骹。梁園但爭狐兔妍。

滿路花

缺月臨清曉。便向花叢繞。一夜和衣睡。醒來早。細看池面。減卻香多少。剛待伊來到。待得伊來。爲伊添恨添惱。尋常百種。落去還顛倒。況是香勝色。來雲表。乍開時節。玉露金風了。那見春光好。教見春光。不辭人共花老。

門百花

欲住西風還急。欲去東君還惜。池上石邊情味。月下星前蹤迹。蓼澗蘋洲。都來換卻

秋容一例碎紅零碧。七寶圍冰雪。清影只共十二闌干露滴。聞道素娥，霓裳早傳橫笛。底事人間，年年待掩輕羅，卻問散香消息。

月上海棠 蟋蟀

商音不共檐鈴語。壯懷驚昨夜夜深雨。劍澀花寒。一聲聲喚聞雞舞。天生俊合上凌煙畫譜。將軍鐵甲皆黃土。漫尋他秋壑半閒處。磬辨絲哀。乍沈吟舜階干羽。休空恁。謝向天涯倦旅。

碧牡丹

不恨殘香少。不恨金風掃。只恨閒窗。獨自些兒懷抱。雁帛輕傳。將箇人愁老。而今書也無了。望難別。弱水蓬萊島。人間恁般遼渺。步上危亭。可惜江山重繞。缺月如弓。收露痕清曉。蛾眉仍在天表。

江城梅花引

芳塘報道有夫容。淺深叢。繡重重。節近重陽。疏雨最惺忪。人要憐花天未許。蘭棹去。

楚雲歸十二峯。柳隄又聞嘶玉驄。與乍逢。清鏡中。伯勞燕子。無消息。各自西東。試問新來。愁碧爲誰濃。一寸眉心都皺了。魂斷向。晚霞邊。夕照紅。

醜奴兒慢

尋春倦也。春恨都成秋瘦。向濃靄遙期仙侶。更與尋秋。一片楓林。縱無黃葉也颼颼。誰家籬落。相邀細語。淺碧香甌。繞盡亂峯。恰當歧路。斜照紅收。怕依舊。青驪歸去。誤了重樓。寂靜黃昏。箇人燈下。枉冰眸。芙蓉空把。瑤京自遠。莫莫休休。

三字令

催夜雨。遣沈雷。奈秋懷。紅蠟燭。繡羅帷。正涼天。剛永漏。泣瓊瑰。簷溜急。砌蟲哀。爾何爲。教白露。點蒼苔。一般都。霜下老。略遲迴。

新荷葉

可惜梧桐。不曾眞作秋聲。一夜飄殘。疏黃到地還輕。濃陰似幄。記晚涼。新月初生。碧羅衫薄。倚它玉立亭亭。頓遣彫零。重陽風雨江城。耐久紅薇。數枝偏繫離情。湘簾

漫押待深宵。訴與秋聽。只愁青女等閒不駐雲駟。

掃花游

減秋一半。是布地黃金。亂霏香屑。怕留恨迹。要連絲細雨。灑伊空碧。顧兔全銷。萬里
祇餘暗魄。謾相惜。試吹淨遠山。還更愁絕。瀛海望未極。歎絳羽翻輪。素霓嬰節。蜃
樓易結。便怱怱換了。廣寒瑤席。地久天長。剩與姮娥舊識。共嗚咽。夜龍吟。數聲驚裂。

迷神引 落葉

賴有清池當墜處。減一半秋聲去。西風便劣。應念飄零苦。已辭枝。還吹送。向何許。背
面總天涯。休寄與。只恁點蒼苔。亂砧杵。漆室宵來。獨倚南榮柱。盼絳樓高。銀河阻。
字痕深齧。歎空檢。題紅譜。待不關心。爭禁得。隕如雨。曾向落花前。驚見汝。嬌綠上宮
衣。稱金縷。

度江雲 聽雨

沈陰欺落日。西南望極。何處是蛾眉。暮煙吹不散。卻趁斜風。化作雨絲絲。雲窗倦掩。

奈瀟瀟直透重帷。秋夜長。黃昏拚便。聽到五更雞。披衣。金蟲澀燄。寶鴨銷溫。怕中宵不起。但暗惜。湛盧繡滿。晉鄭難揮。玉關未出。傭書老。便封侯。骨相都非。青嶂好。紅藤扶我歸來。

霓裳中序第一 夫容

魂銷昨夜雨。岸柳池荷添恨譜。山遠愁濃黛。無。襯膩臉斜紅。枕痕如縷。寶奩嬌自語。盼不到。魚沈雁阻。亭亭在。畫闌左側。獨立甚情緒。淒楚。湘靈危柱。調入霜天驚素。女。籬菊難尋廢圃。但淺倚晨暉。漸成遲暮。解裝臨漢浦。怕未抵。明珠翠羽。惜惜向。九華帳裏。豔影醉仙侶。

木蘭花

癡雲自向天邊住。錯道遮將明月去。倚闌無語立多時。臉上淚痕衣上露。情深不怕秋宵曙。要翦沈陰還太素。倚天長劍縱荒唐。風是并刀雲是絮。


鶯啼序 餞秋

征鴻去程漸遠。覺高樓夜永。暮雲便、都逐風消。麗天惟見參井。綺窗外、輕聞墜葉。枉教瘦了梧桐影。問何時、扶起冰輪。桂香重影。九十秋光。佳染過卻。半煙昏雨。暝破愁寂。黃菊丹楓。近來都助淒哽。淥痕浸、亭亭豔骨。戲魚不上芙蓉冷。問何時、捎與紅蘭。佩纓重整。尋芳鬥草。辟暑浮瓜。把俊游漫省。可奈被、蹴花鶯燕。斷送春歸。翳葉蝸蟻。頓催涼醒。如今縱向疏林慘黛。些些留得容光住。怕嫦娥、後夜妨孤迥。清霜暗約。萋迷換了天涯。故國尙盼萍梗。懷人夢短。蓄艾年徂。鎮爲誰瘦瘠。怎不念、枕霞山閣。靜對雲松。濯髮溪橋。臥浮煙艇。猿啼鶴怨。多應知得。瓊英不貫重簾護。早春池、釀出波千頃。南枝先覺檀心。密蒂幽窗。共誰細領。

臨江仙 家人有賦殘菊者臥榻口占

未擬傲霜先著雨。鈴謁斜倚籬東。老夫貪病看還慵。漫扶藤杖。酒止玉杯空。差喜兒曹相料檢。殘香吟和重重。淒清聲斷北來鴻。明將瘦影。寫入素屏中。

黃葉半林。黃菊半籬。裝點秋如許。莽西風、千里卷平蕪。乍登臨、江山吳楚。問西塞煙波、東山裙屐。幾曾留得南朝住。回首廣陵濤。年年只背蕪城斜日歸去。帶邗溝、流恨滿江湖。共酹客、愁心亂檣烏。爛錦韶華。海蜃樓臺。畫屏歌舞。呼痛飲、張翰生前杯。酒澆黃土。休落龍山帽。金城楊柳誰賦。待飄泊蘭成。家山重到。也難寫出關河暮。天際雁行斜。知他暝宿荒蘆。叢荻何處。漸鳴榔、聲斷野煙鋪。賸一點、漁燈伴星孤。月初弦、輕雲低護。柴門歸便深掩。無賴是庭梧。蕭蕭只管打窗。綵砌。不管離人離緒。閒牀倦枕漫支吾。怕重陽、滿城風雨。



詞齋物論齋

蓮影



董士錫（乾隆四七——）

字晉卿。一字損甫。江蘇武進人。副貢生。家貧。客遊公卿間。南河總督黎世埏聘修續行水金鑑。懷遠令某聘修縣志。皆見稱於時。少從舅氏張惠言遊。經學及詩古文詞皆得其傳。著有齊物論齋集。

齊物論齋詞

武進董士錫晉卿

菩薩蠻 擬溫飛卿

綺羅香透煙光薄。綠雲低護深深幕。蘭蕊又開時。多情春滿枝。玉簫花下弄。引起雙么鳳。翠羽影翩翹。錦屏瓊佩連。

柳絲飄拂珍叢碧。簾旌不卷垂朝夕。鎮日綠陰中。未妨情緒濃。池邊人比玉。照水

鴛鴦綠。覆地繡羅裙。從今別樣新。

流鶯喚夢人初覺。畫簷朱樹新飛掠。蓮漏不聞聲。曉天星半明。可憐春晝永。春思

惓惓靜。寂寞繡簾開。雙雙燕子來。

一庭月影玲瓏白。游絲飛過渾無迹。纖縷拂柔枝。撩人故冒衣。蒼苔風定處。點點

浮零露。不覺暗愁生。春寒特地輕。

春風盡日敲簷馬。金鈴聲小枝低亞。始信別離難。淚花雙袖寒。山頭雲似雪。眼底

人如月。門外碧波連。畫橈飛鏡天。
鸞篋夜冷。停清曲。鳳珠一寸銷銀燭。梁上月流明。悠悠蝶夢輕。
闌邊空佇立。露氣
霑衣溼。此度見梅花。懷人天一涯。

河傳 簾

湘竹搖綠。一絲絲。風漾波移故遲。雨中隔煙看轉迷。年時。卷簾春未歸。
銀蒜沈沈
深押夜階下拜。新月如鉤掛。燕穿櫺。櫺外聲。半明。綠窗人夢驚。

南浦 秋燕同金朗甫作

棲香正穩。早霜花。點點到重門。好夢和愁都醒。別恨又紛紛。消得淒涼多少。便判他、
一度一傷神。只憐伊岑寂。湘簾深押。獨自倚黃昏。容易芳春催暖。向天涯。煙月問
王孫。怎奈朝風暮雨。處處鎖愁魂。此去舞衣飄盡。怕重來。憔悴不勝春。算斑斑淚溼。
雙襟猶染舊啼痕。

破陣子

落日層雲半擁。晚霞高樹全黏。時候恰看殘雪地。花信方逢正月天。未挑紅杏帘。
薄醉好扶人困。峭寒還帶風尖。卷起芙蓉雙綺幔。放得嬋娟滿畫簾。夜深香自添。

水龍吟 送春

東風夢裏歸來。醒時已是春將晚。芳菲吹盡。年華只似。水流雲卷。點點深苔。芊芊細
草。望中都滿。便多情縱有。游絲千縷。綰不住。殘春轉。送得殘春去也。鎖淒清。廢池
空館。爲伊消瘦。可還知道。者番愁怨。爲語空枝。黏將飛絮。留春一綫。莫教他多少柔
情。都付與。閒庭院。

蝶戀花 蝶

風漾簾旌閒不卷。胡蝶飛飛。隨意游芳苑。又是一年春過半。鷓鴣啼徧垂楊岸。不
住游蜂春意亂。花底紛紛。攪盡斜陽院。好夢醒時都不管。怪來小徑香塵滿。
嫩綠嬌紅隄上路。瘦損腰肢。可被愁牽住。生就輕盈誰與護。無端消盡枝頭露。簾
外飛花牆外絮。底事韶華。容易怱怱去。芳草天涯情萬縷。從今化作相思句。

六州歌頭 秋荷

西洲風起。霞鎖綠波閒。東君去。留餘意。未闌珊。尙爭妍。仿佛年時地。芳草外。垂楊下。濃煙裏。青萍上。鬪嬋娟。只是金商信早。南塘路。秋水濺濺。算三更風露。夜夜到川前。顛顛容顏。竟誰憐。昔相逢處。清溪岸。朱橋畔。傍闌干。凝笑靨。舒愁黛。兩嫣然。恁今年。往事難重憶。香零亂。不堪看。容易醒。相思夢。恨連綿。錦浪鴛鴦。卅六溫柔意。不到伊邊。漸高樓望斷。愁思又黏天。漠漠輕寒。

木蘭花慢 武林歸舟中作

看斜陽一縷。剛送得。片帆歸。正岸繞孤城。波回野渡。月暗閒堤。依稀是誰相憶。但輕魂。如夢逐煙飛。贏得雙雙淚眼。從教浣盡羅衣。江南幾日。又天涯。誰與寄相思。悵夜夜霜花。空林開徧。也只儂知。安排十分秋色。便芳菲。總是別離時。惟有醉將醺醪。任他柔櫓輕移。

賀新郎 喜梅花開賦

細雨飄芳徑。借東君、一天風味。將春喚醒。花信廿番從頭數。報道梅英又迸。怪簾外、浮來香冷。漸向空枝輕輕吐。是霜華、銷臙玲瓏影。綽約致、帶煙暝。無聲明月遙相映。照中庭、池塘小小。團圓雙鏡。千疊瓊雲春搖漾。夢徹燕梁桃井。風過也、驚魂未定。金屋安排知何處。但回頭、六曲闌干靜。綢繆意、有誰省。

醜奴兒慢 春雨

晶簾不卷。鎖日濛濛飛漾。把一片惜花心事。深鎖寒窗。試問春魂。愁來可似雨絲長。何曾言語。惟將紅淚灑徧迴廊。點點落英。阿誰是主。零亂池塘。恁容易、三春未過。負了年光。莫怪飄流。若爲洗去近時妝。東風無賴。頻吹暗溼。助我淒涼。

摸魚兒

射蟬紗、幾樺紅日。芳魂何處狼籍。天涯識得春如縷。牽到相思千尺。情脈脈。似寶篆、煙絲香裊渾無力。夢回細覓。還在心頭。舊愁新恨。歷亂不堪憶。淚霑臆。閒向銀牀欹側。樓高佇望消息。而今爾許纏綿意。都是代伊珍惜。春寂寂。算知道春心一樣。

情無極。莫教虛擲。恰過了春分。良辰三五。取次又寒食。

正良宵。愔愔又別。柔情都對誰說。殷勤一疊相憐意。併做者番嗚咽。心鬱結。但立盡斜陽。望斷遙天闊。離懷騷屑。更絮影絲痕。和將香霧。送我恨千疊。簫聲徹。已近清明時節。尊前誰慰淒切。東風解得相思苦。不到落花如雪。憂未歇。只裊裊幽魂。長共春飛越。倚闌愁絕。索下了簾旌。曲屏深處。坐待舊時月。

綠意

晚風籬落。正扇紈掩映。殘妝新浴。惟有春心。比似儂心。早又滿庭穠綠。銷魂一霎。殷勤淚。便看做明珠千斛。薔薇謝了多時。不解伴君幽獨。芳草從今難問。儘惆悵倦倚。黃昏修竹。人也無眠。月也無眠。影透夜涼簾箔。柔情半縷來還去。暗繞徧屏山六曲。但憑教。坐徹清宵。片片白雲如玉。

哨徧

春雨絲絲。秋月絲絲。都爲離人瘦。甚情緒。簾影又絲絲。一樣來。做儂永晝。燕譜恨聲。

鶯歌哀曲好夢還依舊。早繞遍園亭。籬前門外。多少新蒲細柳。待倚闌、默與訴相思。
奈花工、漂泊天涯久。莫憶前生。半年零落。已難消受。漫說道、東君去後。芳草今如
繡。遊絲隔斷楊花飛散。空回首。縱有朱旛。便教護取。也被西風吹透。者榴枝絳蕊。蓮
根紅藕。到千番、清露與殘煙。算賸得、傷心時候。吁嗟往事休論。分付小齋杯酒。閒情
無賴。復添僂僂。總是暗愁頻逗。向斜陽、灑徧啼痕。倩誰邀、封姨相守。

霓裳中序第一 己未秋感事

長條手自折。綰作同心金縷結。欲寄斜陽天末。恰霧冷風晴。素空難接。幽魂飛越。百
曲玲瓏到瑤闕。淒涼也。前身應是一片玉樓月。休說。舊懷騷屑。算都來、夢中輕別。
篆香簾影重疊。掠削春雲。嬌鬢如葉。寶奩花似雪。又惱亂、雙雙蛺蝶。江南好、橫塘十
里。回首正愁絕。

湘春夜月 秋海棠

傍苔階、脂痕底。蹙紅霞。只者幾縷幽魂。芳思正交加。怎又風風雨雨。算儂家度了。惆

悵年華。更霜侵遙夜。烟籠秋晚。別是天涯。淒涼無那人歸荒逕。雁去平沙。休問花工。便留得、三春夢影難繫。香車新來顛顛。較當時、一樣堪嗟。消受損、鎮闌干獨倚。玉樓何處。水隔山遮。

鎖閒庭。數行粉暈交侵。恰恨翠冷香消。無處問秋心。多謝斜陽一縷。把連宵芳信約住花陰。是相思紅淚飄零衰草。往日羅衿。金鈴勤護。從教付與小院深沈。明月簾前。纔蕩得、枝枝瘦影。到了而今。西風過也。更知他、幾度難禁。細看取、算還應比似。湘江斑竹。點染空林。

南鄉子

香霧溼冥濛。吹透青山百萬重。都道新來花事好。春容一例輕陰薄雨中。斜日又聞鐘。飛絮樓頭帶落紅。滿地殘英深不掃。簾櫳燕子歸時夜夜風。

浣溪沙

細雨催人卻下簾。瓶花瘦損共厭厭。繡羅衫子懶教添。雙鬢已迷鸞鏡影。一春都

隔鳳鞋尖。此情耐可爲開匿。

粉蝶兒

記昔時。長自來。小園凝坐。亂紛紛。雨堆雲。彈拂花梢。猛聽得。玉釵飛墮。卻回頭。春色二分纔過。知何時。又贏得。夢裏愁鎖。但從他。醉眠閒臥。是秋心。都一例。把愁揉和。更聲。杜宇。夢兒驚破。

一翦梅

昨夜春魂度玉關。風也無端。雨也無端。砧聲催起舞衣閒。簾底生寒。袖底生寒。花信愔愔半已殘。秋入眉山。愁入眉山。餘情還待五更看。月滿闌干。淚滿闌干。

菩薩蠻

多時不入閒庭院。隔花記取年時見。春色到人間。杜鵑紅滿山。一衾寒夢覺。碎聽東西玉。憶起別離情。柳風吹曉星。

陌頭楊柳迎朱戶。護花人合花閒住。小院月如銀。輸他枝上春。刀頭刀未折。山外

山空碧。將淚置香裾。一雙明月珠。

長亭怨慢 感逝有作

又催動、傷離情緒。逝水年華。暗教輕誤。莫憶天涯。長空回首。欲飄絮。海棠開早。待不到、斜陽暮。多少落花風。珍重也、相思一縷。何據。算憑闌悵望。願有新愁無主。蹋青春晚。更休說、鳳鞋歸路。千萬點、細雨聲中。好分付、飛紅來去。只落得、綠陰深裏。烏啼樹樹。

金縷曲 桓大司馬曰昔年移柳依依漢南今看搖落淒愴江潭樹猶如此人何以堪予有感焉

夢斷東風緊。怎消他、深晴淺雨。幾番芳信。惆悵人生歡會少。空有相思難問。試看取、落英殘粉。宛轉嬌紅辭林去。算傷心、無奈黃昏近。蜂與蝶、又相趁。天涯漂泊休重論。但恩恩、年時別意。訴將難盡。記得蒼苔攜手處。一樣屐痕低印。還自把、花枝細認。花解憐儂今顛顛。更何人、知我三春恨。憑燕子、逞輕俊。

菩薩蠻

瑤臺十二仙山界。碧雲舒卷琉璃夜。三月浪花高。惜餐青玉桃。
靈飛殿。侍女董雙成。吹簫王子登。
無端種就相思子。芙蓉泣露葳蕤死。急雨暗人間。瓊樓盡日閒。
絳河長隔絕。鳳輦辭金闕。惜別暗傷神。幾回天上春。
水晶簾卷珍珠絡。烟蘿卻入仙人屋。無事買花鈿。春風自在年。
博山紅燼小。鎮日絲痕裊。金縷繡鴛鴦。開匳步步雙。
生成只合山中住。山頭昨夜飛輕霧。七寶鈿花車。春遊到處家。
綠閨閒佇立。簾底疏風入。吹散午塵空。軟香零亂紅。
安期海上調雙鳳。天涯一覺牽情夢。銀漢碧波遙。還來盪畫橈。
寶釵鸞鏡影。回首分明省。洞口月明多。年年堆綠蘿。

阮郎歸 胡蝶次惲兼塘韻

齊物論齋詞

前身合是楚宮腰。織痕葉底描。花房月榭任招搖。經過春思饒。楊柳外、聽鶯簫。紅

英剗地飄。無端風雨更朝朝。驚魂幾縷消。

尋芳伴侶太嬌憨。花閒過兩三。生綃團扇六銖蠶。撲來珠露甘。香草恨、且教含。應

憐人畫探。影兒偏許傍燈龕。一牀清夢酣。

疏枝爭耐五更風。非關顛顛儂。天涯回首暮雲空。雙雙飛絮中。曾記取、舊遊蹤。薔

薇滿院紅。花心不與釀春容。儂心若箇同。

紫衣隊裏鬪風鬢。輕颺綽約寒。輸他梁燕語刀環。相將憶海山。嬌舞罷、意方闌。憐

伊繡翼單。羅浮幾日夢魂閒。好乘風露還。

紅樓高與白雲齊。笙歌一片迷。彎環閒繞鳳城西。斜陽處處低。聊閃閃、故飛飛。春

人看已稀。黃衫寶馬錦障泥。少年遊冶歸。

隋堤堤上草青青。多應化了螢。阿儂癡小愛潛停。他時見幾星。雲作幔、石爲屏。新

秋耐可經。看花一例付金鈴。約儂來歲聽。

相見歡

西風夜入層城。做秋聲。幾日爲花惆悵到三更。江南路。淒霏雨。最關情。卻是天涯芳草一時生。

花驄踢徧香街。錦鞵斜。笑向吳姬沽酒拔金釵。芙蓉面。羅紈扇。總堪誇。慣唱秋風疏柳更誰家。

暗香 庭中桂華盛開因憶往歲偕亡友江安甫吳山之游感而賦此

廣寒舊影。想故人去後。秋山塵冷。滿地綠陰。暗憶招涼步芳徑。前度題襟未遠。空回首。相思誰省。早付與、酒醒黃昏。和月帶烟暝。夜永正寂靜。算只有亂蛩。還共淒詠。風簾露井。飛入疏香伴清境。無奈華年似水。殘夢斷。金波千頃。便取次、開徧也。舊游難證。

疏影 前題

香林映月。有黃英數樹。金粟重疊。見說亭皋。斜倚晴空。依稀此地離別。西風一夜窗

前度乍變了。霜痕葉葉。是耶非。吹到空山。已誤再來時節。堪笑年年顛頓。鬢絲換幾縷。長共愁絕。自是花工。解釋秋情。染就千枝絳雪。明朝試與簪花去。怕滿鏡。星星華髮。莫等閒。消受黃昏。斷送玉顏香骨。

暗香 題莊達甫先生攝山采藥第一圖

江山佳處。正月明萬壑。幽人曾住。拂散緇塵。暫託長生作仙侶。誰問巖前小草。還迷了。玉驄歸路。算只有。石鼎香鋤。閒伴雅遊去。羈旅。慢延佇。任白首松雲。高臥煙雨。黃精未老。劇盡青苗總無數。長恨商山會遠。空回首。采芝前度。但彷彿。棲隱事有人記取。

高陽臺 舟行淮陰道中作

雪冷春沙。風飄夜雨。天涯消受孤征。細草平堤。片帆又去高城。相思望斷長淮路。漸清愁。和月俱生。那堪他。酒入離腸。水帶離聲。傷心暗數年時。恨早輕拋別緒。款賦柔情。夢裏依依。幾番吹蕩心旌。金閨自是多惆悵。到而今。一例無憑。但蕭然。遠樹千

重寒柝三更。

鶯啼序 爲劉芙初賦事

枝頭數聲鶯語。記濃春未晚。歲華好、多少柔情。付與來去雙燕。柳棉繞、斜陽渡口。晴絲隔樹玲瓏現。怎知他、芳草天涯。翠紅零亂。花落蠶叢。暮靄凝紫。又離愁不展。掩羅幃、淚粉偷彈。子規啼徹幽怨。最無端、風僝雨愁。都做箇、魂消腸斷。漸秋聲、吹入銀塘。彩鴛驚散。沈沈夜月。隱隱紅樓。畫簾正半卷。細憶起、舊時珠幌。往日羅衣。綺陌垂西。小庭深院。飄零似此。家山何處。黃昏瘦影依稀在。更休看、鏡裏芙蓉面。相思千疊。空江萬里。和煙帶露。冷透釵鈿。香車過也。挽住吟魂。有風亭月案。鎮幾度、哀懷難訴。說向誰家。剩粉餘香。墨痕點點。年時人倦。三生恨。杏征衫一樣。傷心淚。奈春歸。不得長相見。游絲裊。篝燈慘淡。誰知夢中路遠。

南浦 聞雁

征鴻嘹唳。聽相呼、暮靄九秋邊。攪碎銀箏幽怨。哀響落高天。萬里龍堆何處。正蘆花、

漠漠夕陽寒。怎西風不管。飛霜做雨。顛顛舊關山。休問天涯伴侶。誤他時、燕子送春還。往事瀟湘記否。經歲復經年。恨殺相思兩字。待重來、惆悵又依然。念殘氈擁雪。寄書人在。泣荒煙。

鳳棲梧

袖壓春風鬢壓霧。釵玉聲中。一片嬌鸞舞。雙臉斷霞紅欲度。鴛鴦枕上屏山路。好夢乍迷驚燕語。小立花前。記取香隨步。待得月來攀繡戶。爲誰移過牆邊去。

滿庭芳 送周籟雲出都

霧海塵消。花宮月定。愁雲點上明河。驚殘小夢。憔悴看星娥。到耳丁當碎玉。認鈴聲、風外經過。重回首。銀鑪報雪。雪意爲君多。橫波容易識。堂空紫燕。草逐青羸。任三千花界。栽徧圓荷。擬向仙人招手。問花房、多少煙蘿。相逢日。還應道我。惆悵近如何。

又 寄題莊達甫先生攝山采藥第二圖

石母胎花。松龍臥雪。馬啼踏處生香。芝英羅列。入手自芬芳。訝是都雲仙使。馭豐隆、

種得成行。誰相識。青驄去後。一度一難忘。江鄉煙水外。游塵十里。寵綠驕黃。想青
精白飯。幾箇曾嘗。任說餐梨鳳閣。笑李侯。歸老何妨。無人到。山中日月。桃李兩茫茫。

又 題莊傳永印譜

石鼓文殘。云亭字滅。洪鑪幻出青銅。移金換玉。瘦骨也玲瓏。何處春雲一朵。花溪上。
細印芙蓉。憑誰問。中書漸老。燈火夜簾櫳。遺蹤。休更憶。沈沙折角。猶說英雄。只瑤
華無恙。兩道鈴紅。鑄就長戈快戟。問將軍。本是雕蟲。翻然笑。何應投筆。爲謝紫泥封。

又 夢江安甫

鷓鴣歌殘。琵琶響斷。三年一樣傷神。不勝清夢。夢裏更逢君。苦恨無情花柳。江南路。
惹徧春痕。東風外。落紅如海。何處與招魂。重門。簾幙靜。還聽夜雨。共把離尊。甚閒
愁千斛。都隔香塵。擬想來時宮闕。相將見。細覓前因。樓頭月。算教長好。消受幾黃昏。

水龍吟 寒食

年年一度秋心。今年移向東風裏。雨絲侵曉。雲光弄晚。幾般情味。裊裊青衫。亭亭玉

骨便拚憔悴。只江南小夢。都隨流水。更不許愁人記。誰賞鳳城寒食。鎖香廚、禁煙天氣。踢青去也。青青何在。玉人歸未。竹葉初添。金猊半冷。昨宵沈醉。算朝來、誤了花時。又惹得雙雙淚。

又 清明

長安一樣清明。更無人問花多少。相思獨憶。故園紅杏。夢中開到。屈指春風。等閒桃柳。不如卿好。把花期暗數。謝時容易。又恨殺開時早。是處吹寒送暖。隔天涯。幾重煙島。低歌曼舞。嬌鶯弱絮。爲春顛倒。我有愁心。寄將明月。卻隨芳草。怕雙雙燕子歸來。但怪得春人老。

又 瓶中桃花

嫣然笑入簾來。不知春色誰高下。西園折去。南樓移到。粉痕初卸。往日朱門。俊遊何處。曲池芳榭。想玉顏無恙。幾番臨鏡。空憶起春寒夜。回首桃源舊夢。爲仙郎不教花謝。天台路杳。而今剩取。一枝低亞。好倩紅雲。和將素月。十分相射。恐黃昏冷到銀

屏容易得看春罷。

又 門上柳枝

尋常巷陌人家。東君不肯將春共。荆扉密揜。銅鑲半扣。又過春仲。只有楊枝。年時看取。雨梳煙籠。是何人知道。傷春情緒。便折得。和春送。張緒而今漸老。想靈和、夜深愁動。橫波盼斷。依稀林下。笛聲誰弄。染徧青青。雙衿淚。儘教珍重。要憑他、一縷柔腸。喚醒了。江南夢。

齊天樂 燈花

花開花落無人記。年華恁般輕過。入夜垂葩。當筵結蕊。絕勝鬢梢殘朵。芳叢半禪。正懶剔金羊。困酣無那。怕是怱怱。小山春去尙朝臥。歸期問郎何日。只羅衾未冷。長自愁坐。燕語初迷。鶯魂倦舞。夢也不教重做。眉痕又鎖。向鏡裏迴看。更憐婀娜。喜殺今宵。怎還雙淚墮。

又 鏡屏

芙蓉十二江邊老。秋江一痕寒透。青入琉璃。綠搖翡翠。端正欲窺簾繡。未堪回首。怕暗裏青銅。鬢絲輕逗。舞罷雙鸞。誤伊消息向紅袖。離魂倩女何在。想夜闌風雨。和影都瘦。華屋歸來。瞥見羅衣。還記月臺攜手。前身是否。怪春過三分。醉顏如舊。相對依依。莫教聞折柳。

又 摺疊扇

羅裙日日憐芳草。腰閒褶痕寬盡。竹冷江南。銀銷河北。蕩起落紅千陣。相思一寸。記削就筠絲。疊成箋粉。不到春歸。夜涼玉骨也誰問。芭蕉心緒未展。只金泥小帖。堪訴愁恨。到耳秋聲。關情暮雨。腸斷一年芳信。風前細認。更纖手慵拈。袷衣全褪。描取花魂。畫中應瘦損。

又 斑竹書架

春山一片玲瓏影。招來滿身花雨。亂拂苔痕。斜侵荔葉。攜出楚天風露。瀟湘此去。認雲母堆窗。珊瑚架樹。一响恩恩。未曾寄語慰遲暮。江妃紅淚難浣。只當年襟袖。依

約如故。字裏神仙。書中青鳥。到得蓬萊幾度。斑斑看取。又玉版橫箱。冰紋壓柱。料得青寧。那知心更苦。

風流子

柳棉飛不住。東風起。春在白雲鄉。更鳥去鳥來。幾叢綠樹。花開花謝。一帶紅牆。江南路。亂山迎落日。流水送斜陽。碧海無蹤。絳霄何處。鸞音偏杳。鳳吹空長。神仙情太苦。向牟尼索笑。解悟心香。只繡拈花素手。不繡鴛鴦。怎經年別後。上階胡蝶。當門菡萏。也是雙雙。卻爲無端憔悴。惹得難忘。

滿庭芳

減盡寒英。吹殘弱絮。幾處流水孤雲。乍來消瘦。料得也傷神。底事青山無語。難相慰。腸斷黃昏。斜陽裏。雨蕭蕭下。不是一般春。殷勤爲看取。傍人花朵。只共銷魂。儘倩徧天涯。怎賦啼痕。何日鴛鴦袖底。都拋卻。別淚紛紛。江南客。杜鵑聲老。知得幾回聞。

八聲甘州 送劉芙初陸祁生歸里

問年來、心事苦低徊。不如水東流。聽紫簫聲斷。魂銷畫舫。夢逐紅騶。胡蝶飛飛千里。風卷綠羅秋。認得江南路。怕說溫柔。燕子歸期未卜。只塵鸞壓鏡。釵鳳當頭。摘櫻桃人遠。縹緲玉山愁。恨茫茫。一簾明月。被海雲。扶上最高樓。空回首。萬花叢外。香冷銀篝。

漢宮春 茗柯先生輓詞

三五年時向紫蘿深處。小住荆關。碧雲叢裏。看盡花信番番。曾栽瑤草。一枝枝、開徧空山。憑誰問、重來燕子。偏經此度春寒。別樣玲瓏長記取。親裁寶錦。巧製花旛。殷勤護教風雨。好駐春還。春歸未久。有殘紅、飄墮人間。生怕是、臺荒逕老。空餘點點苔斑。

風入松 感逝

碧林風樹夜爭鳴。離緒最先驚。分明付與人腸斷。爲秋聲、怕聽春聲。卻是清商送我。誰人解道愁生。莫須收汝淚縱橫。餘恨更難平。斷魂化作蛛絲去。向簷前、黏住紅英。怎祝東風一夜。和他塵夢吹醒。

四園竹 前題

游絲弱絮。三月足輕狂。簾前怨紫。檻外愁紅。也學春忙。鶯鳩鳴。春緒冷。留春一掃。悔教深負年光。鎖斜陽。憑將一縷西風。消他幾寸迴腸。怎奈新來夢短。不似當時。易說淒涼。多少事。較往日。相思恨轉長。

高陽臺 前題

花裏端陽。柳邊寒食。兩年伴我天涯。慘雨驚風。無端夜颭靈旗。如何結就同功縷。卻輸他。續命單絲。更休題。燭淚殘宵。酒暈征衣。當年恨殺長安苦。只經旬小別。偏說相思。誰道離情。一番春去纔知。年時春好年時夢。便而今。不看花枝。儘拚將。目斷煙沙。腸斷參差。

青門引

一片黃昏影。連理夢兒無定。闌干曲曲逕斜斜。輕雲薄霧。都入暮寒暝。春痕淡淡春聲靜。蝶夢來相並。月明卻到深院。花魂寂寂。燕支冷。

木蘭花

一秋涼夢催離別。好與鴛鴦池畔說。落紅愁對鏡中鸞。拾翠記分釵上蝶。柳絲不作同心結。風雨連宵都未歇。玉階何事最銷魂。羅襪沈沈壓新月。

金縷曲 偕黃古愚遊虞山飲中賦贈

極目層峯際。倦登臨、崔巍傑閣。飲酣同倚。灑徧神州多情淚。又到此山山底。卻不道、英雄如是。曲曲長川如帶在。奈人生、半作東流水。況又是、斜陽裏。與君拂拭空同氣。擬相逢、曉霞初上。浮雲四霽。滄海未應愁日暮。管取蛟龍不起。但試引、玉杯須醉。秋草已肥邊馬壯。爲將軍、且說封侯事。名山業、吾能理。

翠樓吟

雲揜羅帷。涼侵竹簟。蕭疏井梧陰暮。闌干空悵望。被多少、青山遮住。倦魂何處。甚月不分明。花難解語。屏山路。風香露屑。喚醒詩句。攜到雙袖鴛鴦。問幾時、口上淺陰深雨。不勝秋夢短。況千里、秋風無主。年華記取。算織恨千絲。牽情一縷。相思侶。閒階

絡緯替儂吟苦。

疏影 題劉簡田故山紅樹圖

析城佳客。算幾時載酒。綠漲初撥。試與披圖。指點煙嵐。依稀遙認鄉國。輕寒漠漠。吳天晚。帶一片太行山月。恨昨宵、艇子湖頭。夢裏未曾留得。我亦天涯遊倦。卜居便有約。何事愁絕。憶殺看花。問紫尋紅。空贖滿林霜葉。秋風自是憐儂甚。怕從此、更無顏色。待他年、醉擁漁蓑。同探畫中消息。

南浦 題錢獻之歸漁圖

江國夢初回。過三秋。雨雨風風都聽。新月又如鉤。簾波外。只有游絲無定。霜篁裊裊。羨他掠徧寒濤影。何必貂裘工換酒。且伴綠蓑閒暝。長安會理歸槎。便垂竿好泛。洞庭煙艇。更莫近蘆花。花似雪。捲起一天晴冷。還牽病柳。錦鱗憐殺蕭蕭綆。回首亭邊看問字。輸共白鷗眠醒。

水龍吟 題黃心菴來禽館填詞圖

柳棉榆莢紛紛卷簾。不放幽香起。銀牙綵筆。低吟淺拍。一般情思。閒殺鴛鴦。驚迴胡蝶。夢醒花醉。更深深院落。都無人處。春只在濃陰裏。回首林檎熟候。鎖風庭。那堪重記。夜涼無奈。草心紅透。月華成紫。試擘鸞箋。還調錦瑟。淚如鉛水。算畫梁雙燕歸來。應識得相思字。

木蘭花慢 寒夜甚雨有作

如絲天上雨。翦不斷。做成愁。漸滴碎霜鐘。飄殘風柝。點暗塵篝。銷魂那堪重記。記連宵、華月鎮當頭。惟有軟紅簾子。憐儂日日凝眸。花天絮海舊登樓。餘恨倩誰收。但黏著香泥。飛將不起。一樣驚秋。新來夢都無準。算停辛、佇苦幾時休。好挽流光住也。付他醉裏清謳。

八六子 寒衾

漏將沈。羅衾自拂。暗愁飛上雙襟。正宿雨簷前未斷。驚風戶外初侵。那堪醉吟。玉鑪芳思難尋。怕擁五更寒鐵。閒思百疊明金。想灑徧。燕支去年紅淚。模糊印取。暖香

猶在耐他破夢昏燈短。窺簾涼月深深。說春心。春心漸灰到今。

鳳簫吟 題樂蓮裳繡鳳圖

倚朱樓。美人初見翠綳。鳳羽低迷。一般能續命。銀鍼采綫。長記拂金衣。如今棲便穩。到他時。更怕雙飛。渾忘卻。簾兒下了。又下羅幃。深閨應倦繡。天吳刺罷。顛倒花枝。幾番香夢裏。把冷紅寒碧。都鑄相思。新來魂易斷。但休將。比翼簫吹。算只是。雲情月性。不分儂知。

霜天曉角 湖上送別

顛顛西風。更難尋斷紅。尚有昏鴉一點。須留著。送歸鴻。山翠落孤篷。湖光似酒濃。莫問湖心深淺。禁不起。恨重重。

菩薩蠻 前題

西風日日吹空樹。一林霜葉渾無主。山色接湖光。離情自此長。離情隨綠草。綠徧江南道。他日望君來。相思又綠苔。

誰家玉勒玲瓏步。驕行嘶過湖邊路。簾外是天涯。暗風吹白沙。天涯寒日短。春隔

梅花遠。何處問佳期。銀鑪煙縷微。

空林人莫棲。烏定。月痕如水侵枝冷。雪意爲君添。階前祝玉蟾。玉蟾疑帶溼。別淚

何時歇。持鏡作君心。清愁相對深。

壽樓春 題何夢華壽華樓圖

春風何時歸。記尋香縹緲。留夢依稀。況是朝陰冉冉。午晴遲遲。沈水燼。雙煙微。有燕兒。簾前交飛。又弱絮輕絲。斜黏悄。胃珍重。賦羅衣。高樓迴。層簷垂。更山容細繞。雲影低圍。消受明移星。靨淡舒蛾眉。教卷起。鴛鴦幃。怕隔將。人閒芳菲。問淺紫深紅。閒情幾多。知不知。

山花子 葉小鸞眉子研

斲就鸞環巧樣宜。會緘清恨寫清詞。忽憶初三初四夜。月痕知。銷贖香煙還拂几。墮餘花雨漸盈池。何事月兒圓不得。爲啼眉。

好認餘香祝返生。斷魂寥落太無情。況是小樓簾不卷。過清明。照水尙矚前度翠。
當窗空識舊時青。併作一番惆悵意。倚新聲。

揚州慢 有贈

白雪連雲黃雲帶草。當年萬里秋心。揖青山歸去。寶馬共驕吟。問何事、閒愁易長。一
管畫角吹送離音。記烏孫宵獵。頻番沙月生陰。刀環曾賦。訝新來、哀響都沈。但看
劍挑燈。驚殘壯志。我更難禁。門外土花成碧。斜陽裏、別樣春深。便天荒地老。消他恨
到如今。

金縷曲 題張晴厓聽香圖

細麝籠煙碧。染霜豪、枕芸佳處。好披琅笈。十二龍賓堪作友。況有雲英侍側。微揜起、
紅羅袖窄。別樣幽情聽不見。被香心、黏住如何識。渾費盡、春風力。從戎舊紀書生
績。說常年、行閒屢草。墨花蕭瑟。盾鼻輕磨牙帳冷。帳外玉驄驕立。正千紙、龍蛇猶溼。
今日引杯還看劍。想名姬、駿馬須同癖。無限意、教珍惜。

洞仙歌 贈徐生

江山如此。怪君還憔悴。暢好風光伴幽思。有新詞、化作恨蝶癡蜂。都向我、撩亂舊愁無際。哀絲調豔曲。消受當筵。紅袖殷勤搵濃淚。底事暗銷魂。楊柳湖頭、征衫薄、西風又起。君且向、樽前莫沈吟。是一樣、羈人定來同醉。

齊天樂 送人之處州

括蒼山裏孤城下。溶溶白雲如水。磴曲藏輿。苔深飲屐。有客欲探山翠。西湖被袂。正柳外斜陽。拂人殘醉。帳飲愔愔。蘭橈相喚暮煙起。弓衣研篋無恙。算歸來遊倦。一樣情味。莫笑書生。還攜霜缺。擬向空同更倚。海天宵霽。見風暖帆青。潮平月紫。待斬長鯨。看魚龍穩睡。

長亭怨慢 和周保緒四首 新竹

看籬畔、籜龍初嘯。嫩葉輕篔。數枝偏早。拂石侵衣。花閒戍削。趁嬌小。青青如此。會比得、苔痕好。柳絮莫飛來。還不解、隨風顛倒。難道新涼端正後。便是一林寒篠。牆頭

倚久第一怕。極天衰草。更休到、翠袖佞時。禁受起、西風殘照。怎祝與他年。容得鳳凰棲老。

疏影 風竹

深深庭院。又涼颺乍起。飄動簾幔。困絮欺絲。卷水流雲。蕭蕭響到叢箭。篔簹萬箇。風前舞。怪掠削。翹翼低見。更憐伊。牆角橫捎。界破翠陰千片。回首清明昨夜。露華似細雨。花外零亂。底事狂飈。略趁嬌陽。便已燕殘鶯嬾。今朝修竹依然好看。滿地落英如霰。慰中宵。瘦影孤搖。唯有月明遙伴。

南浦 晴竹

樓角送微涼。霽雲開、滿徑琅玕堆積。莫有舊游人。林深處、映著朝霞須覓。招來嵇阮。爲君細數平生節。嘆息幽尋渾未辦。只賸一叢寒碧。無多華旭當空。籠瑤枝又見。晚煙浮白。勁葉亂敲風。斜陽裏、還共綠葵欹側。葵心自好。多情無奈長天黑。籠柳嬌桃從讓與。日日弄晴南陌。

高陽臺 雨竹

重壓青泥溼拖紅楯。修篁不隔層陰。記得年時香塵蹴到而今。湘妃夜挽春江水。放如鉛。淚雨成霖。要消他、一丈飛沙。淨洗煙林。比鄰十里原頭草。怕涼秋野火。然到空心。有淚難澆。珊瑚碧海無音。斑痕憶煞浪浪雨。不忘它、入骨恩深。更難忘、徑老蹊荒。日炙風侵。

江城子 里中作

寒風相送出層城。曉霜凝。畫輪輕。牆內烏啼。牆外少人行。折盡垂楊千萬縷。留不住。此時情。紅橋獨上數春星。月華生。水天平。鏡裏夫容。應向臉邊明。金雁一雙飛過也。空月斷。遠山青。

風入松 題畫

赤龍鱗甲動蒼煙。人坐蔚藍天。綠陰料理眠琴罷。撫高松、著意盤桓。爲有長風相答。那消急管繁絃。披裘人在白雲邊。分是憶成連。爛柯山裏歸來早。聽焦桐、一癖忘

言。遮莫移詩就夢。問伊今日何年。

相見歡 立秋

飄殘幾樹紅榴。溼花眸。誰道深深庭院不知秋。
金尊掩。朱顏斂。怕登樓。何日斜陽東去水西流。

點絳脣

遙夜如年。月明飛出瑠璃海。美人何在。夢裏花期改。
小別怱怱萬頃秋。生被西江。水。楚天應醉。中有相思淚。

虞美人

韶華爭肯假人住。已是滔滔去。西風無賴過江來。歷盡千山萬水幾時回。
秋聲帶葉蕭蕭落。莫響城頭角。浮雲遮月不分明。誰挽長江一洗放天青。

惜紅衣

岸雨霏霏山風渺渺。晚波吹碧。十頃紅衣。秋容漸狼籍。弓彎菡萏。怕不共、齊紈都擲。

江國燈燼夢殘。有相思凝積。珠鈿繡鳥。祕閣啼箏。前遊付長憶。無情潮水。朝夕自南北。贏得兩眸清淚。屈指一番春色。聽謝娘門外。終日馬嘶無力。

解連環

夢魂漂泊。隨江流不到。舊家池閣。看謝了、千頃芙蓉。過多少歲華。蜂狂蝶惡。露滿中庭。漸涼透、繡簾羅幙。只空階悵望。小徑女蘿。裊裊枝弱。秋蟲又鳴籬角。和丁冬玉漏。都做離索。漫說三五年時。有攜手心期。訴與紅萼。暗柳搖星。但夜永、天風亂落。空沈吟、一輪璧月。等閒拋卻。

大酺 秋雨

正碧蕉長。紅蓮老。瀟灑宜聽秋韻。山腰飛雨合。看跳珠千斛。亂飄清冷。暗送新涼。全消殘暑。衾薄惟愁更永。滄江蒹葭裏。有南來塞雁。夜寒聲警。念湘浦霓旌。漢皋瑤佩。信音難準。西風喧夢醒。記良會。明月如圓鏡。更不是、而今拋卻。下九初三。怕句留、去年離病。苦恨斜陽短。判隔了、畫簾藻井。怎雲掩嬋娟也。知甚時節。還又陰晴無定。

對牀一燈弄影。

南歌子 新霽

短港三篙水。遙天百尺虹。夕陽吹墮一江紅。幾許燕支濃淚與君同。暗葦啼秋雁。
寒階泣夜蛩。輕雲亂卷四山風。不管多情皓月在當中。

浪淘沙慢 江樓晚望

晚霞落天垂近野。岸隱高浪。江浦危樓十丈。登臨倦眼試放。記水面、琵琶留怨唱。鎖
煙柳、畫舸誰蕩。況鐵甲、凋戈舊吳楚。遺蹤難再訪。無恙。六朝景色蒼莽。但北指千
山橫雲處。萬點寒樹響。漸土暈苔花。秋滿平壤。待休極望。還不堪、禁受清宵惆悵。
蕭瑟西風搖虛幌。初殘月、紙窗半上。怒濤起、翻空聲正壯。又城堞、鼓角迢遙。侵客枕。
三更白髮星星長。

綠意 題僧彌本小綠天菴圖

乍舒還卷。看翠陰十畝。簾外鋪徧。錄畫敲詩。月地雲天。拈豪僧在春院。無多一霎閒。

風雨便葉葉。龍蛇都滿。憶舊時手種千株。是否後身今見。惆悵江南居士。誅茅渾未辦。早是遊倦。青鬢蕭疏。冑到霜痕。那記年華輕換。琵琶絃上聽淒唱。怕不似、蕉心宛轉。儘輸他、草聖書顛。慢把綠雲斜展。

六州歌頭 平山堂送貴仲符北行用宋韓无咎韻

蕪城帳飲。離思滿霜枝。秋色膩人扶醉。啓晴扉。送行時。綠漲平橋面。蘼蕪岸。隨隄畔。征衫暖。牙檣轉。路東西。無奈蘭舟。那更垂楊下。寶馬驚嘶。對山眉。開笑口。棹撥寒脂。陌上休窺。怕依依。舊遊賞處。樓縈霧。霞隨步。漏聲遲。豪彩損。當筵問。月華知。蠟珠垂。多少蓬瀛事。如煙散。逐雲飛。人未老。秋還好。望佳期。且住驪歌。痛飲西風裏。不須悲。只丹楓影外。清唱渺邗溪。此會應追。

揚州慢 題周崑生印譜

紅葉飄殘。紫騮嘶斷。西風夜雨蕪城。對蘆簾短短。檠火一痕青。問誰向、霜期報後。唾花飛處。壺玉齊傾。有周郎未老。高吟不許愁生。銀繩妙體。訝坡圖、鳥字分明。是琢

就蛟螭。盤將劍戟。金石前盟。印到斜封三道。渾消受、茗椀縱橫。算詩囊影裏。年年伴得孤征。

百字令 題阮梅叔珠湖漁隱圖

釣絲裊裊。正珠湖春半。扁舟解艤。別是神仙棲隱處。指點煙波影裏。月浪搖天。雲鱗拂水。空碧來千里。綠蓑青笠。更饒一片寒翠。只傍有意鴛鴦。無心鷗鷺。好夢何曾記。隄上新楊都萬縷。不許閒愁輕繫。試把虹竿。還探鯨海。共買昇平醉。驪龍眠穩。遲君良夜中起。

洞仙歌 焦里堂得石名之曰勁雪爲圖索題

雲房月砌。伴詩懷幽獨。砌下稜稜一株玉。是何時、吹上古雪紛紛。摩挲處。到手真珠難掬。中宵風露冷。姑射仙人。應是冰肌起寒粟。化石意如何。似海年光。東風外。亂紅搖目。看取次、飛花委香泥。使開徧千春。比儂怱促。

憶舊遊 暮春感懷

記衫痕暈酒。燈影穿簾。花氣侵門。眉月同看夜。笑畫蛾深淺。鏡裏愁春。春風亂拂人面。醉醒兩傷神。但夢雨蕭蕭。覺來依舊。桂魄如銀。殷勤寄消息。有漢苑星霜。京洛風塵。幾許悲歡事。便天涯一樣。難共酸辛。斷腸古陌芳草。千里盡如茵。又廿四橋邊。楊花如雪。迷盡畫輪。

金縷曲 雪霽夜寒挑燈感賦

好夢隨流水。映殘燈、軟紅簾外。雪天初霽。底事眉痕開又鎖。試道衫痕溼未。還只恐啼痕暗漬。三五華年三五月。恨花時、容易花前醉。都負卻、纏綿意。玉簫按罷涼生指。擁寒衾、尋消計息。梅花迢遞。圓缺陰晴。渾見慣。那抵人間離思。算付與、清宵無寐。陶令閒情還賦否。憶春風、苦費相思淚。況省到、華胥事。

蝶戀花 記夢

六曲屏山愁倚徧。碧海歸來。不分紅塵見。鬢雨釵風還撲面。兩眉那記痕深淺。笑整羅衣橫寶鈿。籠到齊紈。乍憶圓圓扇。忽訝一聲花影滿。車輪自此禁千轉。

明月簾櫳垂夜永。雪後花前。瘦盡春風影。說與神方煩記省。愁人怕是還兼病。雨透芙蓉霜透鏡。紅袖扶來。歷亂鮫珠冷。細語喚春春未醒。一叢涼葉敲金井。山翠模糊融睡雪。未忍多看。那更分明別。滿眼柔情攜手說。花閒苦認纖纖月。鈿閣沈沈蚪水咽。綠縷紅芽。幾度芳菲節。枝上暖風吹露屑。嬌慵不解丁香結。

金縷曲 題天女散花圖

歷亂閒花片。是誰能、尊前扶定。寶釵風軟。一霎春波三月雨。瘦了畫樓人面。有礙馬、情絲宛轉。空外明霞飄不墮。只天光、海色搖銀扇。羨殺是、玉皇案。香雲拂處鴉雲顫。鬪雙紅、分明記取。暈潮深淺。多病維摩拈得否。笑口欲開還嬾。休悵望、清霄路遠。小夢遊仙除結習。怕瓊簫、譜入天涯怨。會此意、圖初展。

綠意 題清尊翠袖圖

碧泓如玉。向花前化作。雙翦秋淥。瑤珮聲微。特地風來。幽香暗送醞醖。荷心坼盡蕉心卷。剛買得、珍珠一掬。問綠楊何事。撩人。爲有情絲牽觸。倚徧芳園修竹。憑畫取、

不畫鴛鴦獨宿。喜字書空。濃笑相看。可比鏡中嬌目。重來儘有韋郎約。應絕勝、臂環緣續。念階前、積翠深深。立損砑羅裙幅。

摸魚兒 題袁蘭村倉山月話圖

儘依依、入簾螺翠。六朝煙景非故。多情最近當頭月。偏會照人情語。君莫誤。道萬里嬋娟、圓缺渾難數。幽懷誰訴。有娥影隨身。青嵐一角。已化夢遊句。西州墅。何況謝公吟處。名山今付君主。平泉樹石都無恙。零落酒龍詩虎。君記取。只布襪青鞋。占斷江天古。他年能否。對涼玉侵肌。舊歡重續。添我畫中住。

浣溪紗

秋雨秋風日日陰。風吹不冷是芳心。欲譜滋味向瑤琴。料得有誰憐宋玉。當時一顧已知音。早判腸斷到而今。
蠟淚尊前惜鬢鴉。蟲聲籬角訴年華。秋深庭戶掩重紗。一夜蝶魂驚不定。曉來何苦又看花。飄裊落溷兩堪嗟。

齊天樂 題袁蘭村續倉山月話圖

佳辰自古稱難再。多君舊遊仍續。暢好家山。六朝天淨。消受滿園穠綠。漫憐幽獨。有勝友重來。甕春初熟。無限句留。尊前頻翦夜遊燭。清歡況偕仙侶。說嬋娟無恙。倚徧修竹。誰道天涯。秋人有箇。同看一規涼玉。喜聯芳躅。又雲散星沈。別懷偏促。他日遲君。共尋霜後菊。

又 題王菱江閒看兒童捉柳花圖

東風那管行人恨。吹來徧身晴雪。畫舸迷雲。香車碾玉。長記蹋青時節。舊情淒絕。甚到眼天涯。又成輕別。描取狂蹤。肯教容易趁啼鳩。王喬仙路非遠也。暗嗟漂泊。愁緒頻說。入水還生。沾泥不起。幾度看他親切。兒童漫擷。者捲地兜羅。滿懷騷屑。我更魂消。曲中枝怕折。

踏莎行 題王菱江種紙圖

碧洗階除。涼侵枕簟。綠陰陰處秋雲掩。墨池漲滿起龍蛇。蕉心不比秋心斂。漏腳

斂痕長刀快劍。書顛消得書仙豔。洛陽新價未曾知。憑教鳳尾殷勤染。

憶舊遊 題清風驛壁

憶繁華茂苑。金粉秦淮。歌吹揚州。歷亂江南夢。被年來做盡。幻影都休。狂蹤十載燕市。誰共看吳鉤。歎多病文園。遊梁倦也。漫續前遊。扁舟五湖去。趁早換荷衫。已是殘秋。那更緇塵滿。算酒痕襟底。空證離愁。舊時夾道疏翠。今日萬株稠。者顛頓天涯。西風但解催白頭。

臨江仙 題富莊驛壁用壁閒元韻

夾路平林涼似水。秋情一片中央。半程疏雨共斜陽。馬頭青到眼。齊魯暮山蒼。回首豐臺花下醉。怱怱更憶遊梁。離懷還比客途長。五更殘夢醒。愁緒起茫茫。

更漏子 題仕女圖

燕斂風。蟬鬢雨。簾卷倚樓人去。羅帳曉。繡屏空。畫中如鏡中。鏡中面。修眉見。如月莫如紈扇。情了了。夢悠悠。春痕滿地愁。

惜紅衣 吳伶何桂畫秋海棠

明月前生不圖金粟。卻圖紅粉。可惜名園。秋來惹儂恨。綠蕪荒瓷。要添上。兩行鞋印。誰認。姑射化身。儘誇他風韻。尋歡對酒。腸斷芳姿。判教翠尊盡。嫣紅過雨。雙臉淺霞暈。應是怕拋珠淚。悄向牆陰低搵。便移將春苑。肯共萬花爭信。

醜奴兒慢 何桂畫芍藥

是耶非也。一鏡曉妝紅透。乍向那水精簾下。翦破新秋。多謝花奴。替儂描取舊揚州。無端逗起。十年塵夢。卻上心頭。二十四橋。杜郎俊賞。三五佳遊。撚金帶。單衫笑比。別樣風流。幾度看花。春風綠葉。賸清謳。如今又對一枝倩影。黯黯生愁。

金縷曲 韓蕃畫戲嬰仕女

嚶嚶鶯聲溜。正銷魂、珠迴玉轉。繞梁時候。誰把丹青傳采筆。綽約美人圖就。想心底、玲瓏似藕。一朵芙蓉初拂水。況十三、年紀吟紅豆。令滿座、低徊久。沈腰端爲悲秋瘦。但清愁、連環不斷。暫無還又。說到天涯淪落感。展卷欲添僂僂。長願得、千杯在手。

卿是雛齡儂漸老。只壺中、天地能相守。酒醒後、都烏有。
滿院芭蕉吐。晚天遙、水風吹散。半林殘暑。照我一奩紅袖影。惹起懊儂情緒。空回首。
浣紗前度。綠葉成陰芳意歇。認桃花、靨面君應誤。絨宿恨、那堪訴。珠纈綺閣深深。
護。記當年、露臺春曉。帳鸞初舞。淺碧烟鬟睡玉。早被買脂人妒。還未溼、踢青金縷。
今日秋娘悲老大。浣香塵、可惜凌波步。思往事、淚如雨。

憶舊遊

寄題落花人獨立微雨燕雙飛卷子

悵韶華逝水。萬點胭脂。零亂成堆。花面非人面。早片泥送冷。獨下空階。燕兒似惜花
落。雙影尙徘徊。又暗雨如絲。和愁織徧。淒絕池臺。蕭齋怨離阻。盼舊侶歸時。與訴
春懷。淚眼無晴日。有當年笑口。知爲誰開。買歡贖買腸斷。從此怕銜杯。算好夢偏遙。
東風慣帶幽恨來。

望海潮 送春

柔枝低亞。穠妝掩映。東風作意翻新。千里月圓。三生夢好。不知元是花身。寶篆正氣

氲。有香心一縷。相對消魂。柳鞦桃肥。暗將芳思逐輕塵。迢迢遠水層雲。想紅偎別騎。碧帶征輪。梅雨困鶯。泥滯燕淚。花空染羅巾。誰共倒清尊。只幾番花謝。老了春人。怕是明年。又飄殘粉照啼痕。

燭影搖紅 憶春

何處雲車。暗分春色來仙島。滿天絲雨不聞聲。儘爲春顛倒。佳約笙歌散早。叩花情。除花知道。珠簾半卷。燕翦拋時。空階自掃。著意尋芳。而今只見離離草。名花端合喚無雙。腸斷花期杳。闌外海棠紅小。乍驚秋。又傷懷抱。不如飛絮。亂點征衫。也知春好。

疏影

月戲拈東坡三部樂首句作起

美人如月。怎不如人意。圓了還缺。缺了還生。未到重圓。依依蟾影初活。去來天上歸何處。也不與、倚樓人說。枉教他、夜夜相望。愁殺鬢絲成雪。鎮日癡雲行倦。露華早淨洗。玉宇瓊闕。待過團圓。能幾中宵。又是下弦時節。年年十二番頻換。換多少、淒涼

炎熱。可憐伊、長自西飛。不駐流光一瞥。

更漏子 題畫

鬢堆鴉。肌勝雪。見了那教輕別。人自遠。豆猶紅。相思同不同。相思意。還相似。只畫一邊憔悴。簾內影。鏡中姿。斷腸知不知。

摸魚兒 秋萍

但茫茫、一天涼意。望來江上初暝。浦南畫槳斜分處。中有白鷗眠醒。秋水靜。比嫩綠池塘、約略添淒景。曲闌閒憑。又誰向枝頭、殷勤細覓。吹墮舊時影。滄波老、剩有鯉魚風冷。飄流漫指蓬梗。相看等是無根活。絮果未來難定。還記省。道改盡秋顏、未改纏綿性。不堪臨鏡。忍觸起當年、鬢絲風裏、歷亂糝青徑。

最難忘、飄棉時節。萬花齊落如霰。相思一夜隨流水。剪了又還難斷。波力軟。流不盡、人間花命三分短。嫣紅零亂。併化作青青。一池碎影。細逐曉風展。耶溪路、十里荷衣香滿。亭亭翠袖扶偏。芳心欲抱芙蓉死。怕惹惜花人見。春夢遠。又不道秋來、慣襯

閒花片。洞庭煙晚。莫喚起魚龍。做他風雨。吹徹楚天怨。

八聲甘州 題胡韞山援琴佇涼月圖

聽天邊、爽籟發金商。萬山響西風。是離亭墜葉、空階疏杵。送了殘紅。獨有惜惜綠綺。彈取和清鐘。頷略深宵意。冷月當中。端正眉痕才畫。早團圓鏡影。照別愔愔。想人閒天上。悲喜定難同。怕癡雲、留連不去。又吹將、白雪滿天封。贏得聲聲哀怨。訴與征鴻。

三姝媚 感興寄方彥聞

桃枝嬌映面。是朱扉初開。窺來曾見。細路重尋。訝相逢不似。暈潮痕淺。十日輕陰。才釀出、雨晴煙暖。已過清明。更有誰知護花風軟。學繡東鄰女伴。早巧笑招迎。綠窗春舊。幾度憐伊。對燭拋紅淚。柳凝青眼。看到鴛鴦。還記否。寒閨針綫。怪底屏山六曲。渾如天遠。

探春慢 楊花

吐絮團雲。飄棉屑玉。一樣枝頭開謝。倚戶含情。因風寄想。襟上淚痕誰惹。歎無人收拾。等燕子、銜歸春社。恁知不做花看。看時春已闌也。便把紅塵淡了。悵夢裏池萍。忍教輕化。誤殺春三。浮朱浪碧。恨少明波同瀉。耐得兒童戲。渾不入、深深簾罅。璧月來遲。空庭自消清夜。

蘭陵王 江行

水聲咽。中夜蘭橈暗發。殘春在、催暖送晴。九十韶光去偏急。垂楊手漫折。難結。輕帆一葉離亭遠。歸路漸迷。千里滄波楚天闊。餘寒乍消歇。賸霧鎖花魂。風砭詩骨。茫茫江草連雲溼。悵綠樹鶯老。碧闌蜂瘦。空留檣燕似訴別。向人共愁絕。重疊。浪堆雪。坐縹緲浮槎。煙外飛越。銜山一寸眉彎月。照枉渚疑鏡。亂峯如髮。扁舟獨自記舊夢。忍細說。


祭天神 雨夜泊荻港

向舊曾經地。扁舟住聽江干。疊鼓悲笳傳夜雨。幢幢一炷殘膏。相對憐孤旅。寫荒寒。

萬里長天迷雲樹。念遠道、分吳楚。故園柳、飄盡春城絮。傷離早、佳約晚、蕭瑟江關。句想滄波、又添新水。日夜東流、冉冉征途。那不成、衰暮。

鶯啼序 對雨

牆腰碧蘿鋪繡。似蒼崖半矗。共暮靄、一色陰陰。化作空際高綠。和不斷、瓶笙入夢。簾簌簌、鳴飛瀑。正無慘、枕簟閒欹。衣帶慵束。整理佳遊。解珮換酒。瀉清愁、萬斛。怎到耳、無限瀟瀟。筠籠久閉春服。便贏他、酡顏一笑。已消受、別眉雙蹙。比前番、聽雨孤郵。客懷漸熟。滔滔孟夏。黯黯餘春。登臨阻、送目。但門外、鴨頭新漲。添了三篙。織徧溟濛。煙絲霧縠。短亭五里。長亭十里。青山夾岸人天上。過歸航、葉葉風颿速。天涯尺素。錦鱗容易商量。寄與細寫幽獨。相思俊侶。舊約看花。趁芳郊晴旭。鎖深院、莓苔行跡。一一將平遠。夢模糊。懽期未卜。修篁好在。當年倚處。鉛霜淨洗。千竿翠。想天寒、尚有人如玉。淒涼情緒。只應畫與伊看。淋浪滿幅。



心
日
齋
詞

四
種

運
筆



周之琦（乾隆四七——同治一）

字稚圭。號退庵。河南祥符人。嘉慶十三年進士。官廣西巡撫。詞學元張翥託體至高。黃燮清評之曰。渾融深厚。語語藏鋒。北宋瓣香於斯未墜。譚獻稱其截斷衆流。金鍼度輿。雖未及皋文保緒之陳義甚高。要亦倚聲家疏鑿手也。又有心日齋十六家詞選。頗精審。

心日齋詞

禪符周之琦撰

金梁夢月詞

四字令

吟香綺櫺。傳詩翠筒。玉梅纔識春容。釀春光未濃。
虹梁半空。魚波萬重。舊時月色
相逢。話家山夢中。

阮郎歸 二首

昨宵同賦冶春詞。芳襟暗共期。今朝卻是送春時。紅螺懶更持。
涼花一枝。哀箏彈損遠山眉。此情金雁知。
朝來春色媚檐牙。晴暉散曙霞。晚來秋影到窗紗。新眉試月華。
羅帳倚。繡簾斜。催
歸夢未差。紅燈開作可憐花。今宵真到家。

青玉案

心日齋詞

西山顏色仍依舊。只添了、眉痕皺。小院珠簾垂永晝。吟箋半摺。畫闌孤倚。長憶分襟後。閒中記曲拈紅豆。風雨還驚夜來驟。曾問南園芳事否。鶯如人懶。花如人醉。春也如人瘦。

一翦梅 春水和李賓石

一鏡煙痕望裏收。咫尺回橋。綠輦香柔。有人扶上木蘭舟。載了春心。蕩了春愁。冶葉傳情恨未休。照影嬋娟。那處妝樓。小紅闌外是西洲。今日東風。明日東流。

蝶戀花

門外垂楊千萬縷。不繫春光。只繫春愁住。文杏巢空雙燕去。紫簫聲裏屏山暮。恨別江郎渾懶賦。一抹煙痕。舊約無尋處。五里東風三里雨。蘼蕪吹冷天涯路。

瑞鶴仙 屠琴隲舊寓米市胡同雙藤老屋諸同志時時觴詠其閒距今三載

矣嘉慶壬申春杪琴隲真州書來重話疇曩因賦此闕爾時同集者劉芙初董琴南朱勳楣謝向亭錢衍石賀耦庚琴隲及余爲八人皆戊辰同年友也

素天分雁軫。話夢影、揚州月痕初暈。情波寄蘭訊。又魚箋、手擘麝煤心印。琴歌興引。且漫說、游蹤未準。但怱怱、側帽吟來。輸與舊時青鬢。還問雙藤在否。絡架扶牆。幾番紅褪。交枝翠隱。蒼蘚路、有誰認。怕幽禽忘了。花魂清瘦。卻道棲香正穩。倚黃昏、闌角尖風峭。寒自忍。

一枝春 白芍藥

婪尾杯深。殿羣芳、付與伶俜花影。嬌姿澹掃。不許綺羅人並。薔薇臥晚。記曾共、曲闌閒凭。空自把、情淚偷含。夢入瑣窗煙冷。湔裙素波低映。漸韶華過卻。將離折贈。東風倦眼。到得粉融酥凝。濃春未了。問誰見、玉奴妝靚。還更怕、殘月揚州。杜鵑喚醒。

西湖月 題孤山放鶴圖

巢居不鎖仙心。弄遠影、褊襪絳霄風穩。素裳綺袂。激湖十里。翠峯千仞。圓吭清響遞。更兩兩瑤笙松吹引。儘戀著、嶺畔梅花。肯說玉京飛近。軟紅我尙淹留。歎蕙帳塵空。怨懷誰訊。故園秋矣。襜褕瘦。不堪重認。芝田歸有路。但倦羽商量。期未準。枉回

首、夢裏青山白雲無盡。

陌上花 七夕

雙星寄語紅羅亭上。舊香誰采。麗句南唐。吹冷半空仙籟。當時恨與東流去。容易朱顏催改。慶長生唱出。鳳簫一曲。悶持羅帶。話前因夢裏。填橋烏鵲。那見纖雲飛蓋。片石支機。還是聘錢難貸。占絲鈿合空相約。孤負西樓人待。但清秋認取。梧桐深院。賦情猶在。

念奴嬌 陶然亭懷芙初

江亭送客。話西風、一笛清游曾記。已是離愁消未盡。禁得危闌重倚。別浦凝陰。回塘弄晚。搖漾滄洲意。前番衰柳。向人還又憔悴。長恨千里關山。南雲不見。見蒼煙無際。帽影緇塵江上路。多分霜絲難理。潮落秋生。水涼夢遠。休喚眠鷗起。相思何許。白蘋紅蓼鄉裏。

解連環 雪意

畫檐岑寂。送寥空倦眼。亂鴉飛急。護凍雲、戲玉猶慳。任翦取鳳翎，不成拋擲。睡起癡龍。但小試、殘年風色。照銀燈點點，絮粉淚痕，何處相識。幽尋灞橋路隔。對薰鑪篆縷。清夢難覓。做幾番、酒醒天寒。喚山寺夜鐘。水樓長笛。萬里蒼茫，倩誰問、飛瓊消息。折梅花，故人故里，寄愁未得。

金縷曲 芙初殘臘抵京況味寂寥次韻賦贈

玉罌春風暖。儘宵深、鑪香飄盡。燭花燒短。店月橋霜經行處。縷縷夢魂誰管。向竹裏、今番重款。別淚青衫痕猶凝。料琵琶、聽徹歌聲軟。閒細數、雁程緩。征塵寫入江南。怨自沈吟、紫簫非舊。翠衾空展。燕麥玄都無人問。況是素絃聲斷。更休訴、京華游倦。鷗鷺江湖還漂泊。甚閒雲、容易隨舒卷。回首處、晉陵遠。

又 夜坐疊前韻

畫鴨香心暖。倚黃昏、歲殘時序。漏長檠短。官閣梅花開猶未。吹破一枝羌管。念獨夜、清尊誰款。彈指春光天街近。漸東風、颺得紅塵軟。吟擁鼻、數聲緩。金梁此夕啼鴉。

怨黯消凝。舊山圖畫。不堪重展。煙夢淒迷。無尋處。多事彩雲吹斷。算顧曲、心情都倦。
喚起青鸞歸飛去。看樊樓、十二珠簾卷。千里外、寄愁遠。

三姝媚 櫻桃

垂檐紅半。彈漸錫簫吹殘。荼蘼開過。乍啓脣朱。趁小腰蠻舞。玉顏初破。禁苑偷銜。憐
蘸羽。鶯黃微澹。記憶妝樓。閒折嬌春。粉香千朵。還對珍叢婀娜。問露液承盤。爲誰
輕墮。翠籠分攜。送錦鞍歸去。悶拈珠顆。寄遠年年。將恨與、鮫綃俱裹。怕說杯停婪尾。
繁陰夢鎖。

聲聲慢 偕邵季若自窰臺步至江亭菰蒲蕭蕭殊有濠濮閒意

鉤藤礙屐。帶草牽衣。循途恰轉回塘。鏡曲幽尋。疏磬漸引雲房。儻然半郊半郭。浣塵
纓。慣詠滄浪。聽醉語。只山僧一笑。識我清狂。回首前游幾日。又西風、吹換石冷苔
荒。倦柳依依。猶戀澹薄秋光。沙鷗漫留後約。怕重來、老卻斜陽。歸未得。但憑高、還睨
舊鄉。

解連環 癸酉秋奉使并門行次恆山驛晉豫分道處也太行山翠紛來邀客

隔河南望鄉思黯然賦寄伯兄次珩

驛塵三輔向郵亭繫馬晚鐘敲雨看荒垣幾日清秋恰疏柳當門鎮牽離緒半枕黃
梁問短夢今宵何處任吟箋唾溼畫燭淚深歸思難賦滹沱去程記否料重尋往
跡爪印非故儘思量南走邯鄲盼漳水銅臺舊鄉雲樹喚客山靈又相約明朝西去
寄愁心雁飛雁落夜長自語

好事近 輿中雜書所見得四闕

杭葦岸纔登行入亂峯層碧十里平沙淺渚又渡頭人立
笳將搖夢上輕舟舟尾浪花溼恰好烏篷小小載一肩秋色自獲鹿至井陘日三四間渡

詩句夕陽山扇底故人會說好是固關西去看萬山紅葉
翠蛟潭上認題名屐齒

爲君折驀地薜花濃處出一雙胡蝶陳受笙畫扇贈行題詩有好山都在固關西之句
峻坂怯肩輿引綆兩行猶弱幾日牽船岸上只蒲帆難著
一聲碧月大隄頭舊夢

定誰託。何似春風天半。挽秋千紅索。入太行道中。與前以索挽之。

引手摘星辰。雲氣撲衣如溼。前望翠屏無路。忽天門中闕。等閒雞犬下方聽。人住半山側。行踢千家檐宇。看炊煙斜出。南天門尤陡峻。人多鑿窰而居。

丁香結 雙柏堂偶述用周美成韻

屋角煙疏井闌人寂。纖影月蛾低隕。歎流光輕迅。玩素景、路指苔階蒼潤。倦懷曾見否。新寒試、袖薄更忍。天涯凝想。粉淚定逐。鑪香飄盡。秋引。正暗葉吟商。夢覺南雲雁陣。鈿尺閒拋。紋衾靜倚。一燈初暈。憑寄歸羽信息。送喜箋盈寸。聯萸屏清詠。猶及霜紅未損。

踢莎行

勸客清尊催詩畫鼓。酒痕不管衣襟污。玉笙誰與唱消魂。醉中只想薔騰去。綺席頻邀高軒慣駐。悶來卻覓棲鴉語。城頭一角晉陽山。怪他青到無人處。

浪淘沙 擬游晉祠不果

雉堞幾憑闌。拄笏空看叢祠依舊鎖雲關。如此嵐光渾不識。羞渡桑乾。碧玉瀉潺湲。流水生寒。一聲涼雁最無端。桐葉西風多少恨。留與青山。

南樓令 歸次壽陽驛霜氣寒甚

候館閉殘釭。淒淒夜已霜。擁青綾、一昔雲涼。多事西風吹恨去。隨冷月、度回廊。秋夢惱疏狂。征衣惜舊香。有閒心、休著思量。憔悴銀屏山幾疊。渾不耐、漏聲長。

醜奴兒慢 九月十九日望都縣城外書事

輕塵倦馬。酒醒今宵何處。最愁說瓊簫花外。半壁儲胥。恨入初程。劍歌聲悄壯心孤。圍棋乘興。遲回命屐。一著先輸。鼓吹未聞。淒涼官燭。憔悴軍符。更誰向平原飛騎。笑挽雕弧。廢壘秋笳。怨吟曾到帳中無。傷心休問。遼空唳鶴。殘月鳴狐。

高陽臺 客有談衛源近事者感賦此調

鳩羽驚媒。虬音感悅。愔愔芳訊偷傳。一紙相思。怨紅啼溼銀箋。連波別有牽魂處。甚回文倦眼曾看。枉猜他。珠腕閒題。粉淚輕彈。無情河水東流去。打空城寂寞。螢火

飛殘埋玉誰家。秦簫吹冷荒煙。人間多少傷心事。誤南柯、淺醉酣眠。又爭知、孔雀徘徊。還到郎邊。

玉漏遲

耦庚席上賦葛仙米

紺珠塵未掃。綠鸚銜後。黛螺痕小。一捻圓勻。春出玉山香稻。雋味青精漫擬。待糝入、羹湯還好。春又早。紅鹽碧醞。者時情抱。相看句漏雲封。只乞米長安。甌塵閒笑。旅食年年。依舊石田荒了。儘把丹砂寄與。怕夢裏、黃梁人老。鄉信杳。知他雁鴻多少。聞豫中苦飢

喜遷鶯

過米市胡同作

翻階紅藥。尙作意弄晴。雕闌西角。金谷春迷。蕪城天遠。都把俊游拋卻。悶思去年花發。愁惹今年花落。燕飛盡。問悠悠何處。橋邊朱雀。疏箔還更啓。閒拂暗塵。夢短憑誰覺。蠟淚黏螢衣。香化蝶。不記那回行樂。舊歡斷魂人往。新侶探芳人約。賞心事。又從頭聽取。柔奴絃索。

月華清 賦得團扇復團扇

小影兜香圓規倚月。未秋已自惆悵。憔悴回看。幾日乍縈蛛網。記同心、有約相攜。問半面、爲誰羞障。烏巷負僧彌玉潤。繡奩偎傍。戲蝶游蹤暗想。枉鏡彩重重。細描宮樣。宛轉聲中。禁得倩魂搖颺。掩花容、新恨仍迷。聽絮語、舊情難忘。低唱付秦淮渡口。那時雙槳。

又 初夏

燕乳飛遲。蠶眠香老。一番婪尾吟後。怕檢羅衫。還怯曉寒襟袖。蘸簾影、綠蔭方重。尋履跡、豔陽難又。孤負聽鷓鴣花外。那回攜手。伴侶停鍼話久。但強啓窗紗。悶添晴晝。梔子同心。忍見素紈描就。悔拋卻、吹絮光陰。任閒到、熟梅時候。依舊試榴紅裙衩。爲伊消瘦。

絳都春 綠陰

煙絲邃館。乍約住翠雲。回廊遮徧。做暝弄晴。沾惹離愁。愁無限。淒香滯粉閒凝眄。更

誰識殘紅幽怨。杜鵑何許。怱怱儘把豔陽催晚。空戀簪花俊賞。是幾度鏡裏朱顏偷換。問取倩魂。那信飛鶯吹還轉。啼妝枉隔春風面。顰黛色。眉痕猶見。悄然青子枝頭。恨長夢短。

蝶戀花 送芙初南歸二解

簾底斜陽紅一線。怕近黃昏。不放銀鉤卷。燭影西堂看又短。金尊只訝宵來淺。賦罷離情魂欲斷。砧杵誰家。喚起征人怨。冷到秋心秋不管。芙蓉卻在江南岸。往日題襟同客邸。一樹垂楊。兩兩吟匏寄。小巷城南三五里。等閒化作盈盈水。天上秋雲吹易碎。送得君歸。卻問歸何計。燕子樓臺斜日裏。江南也是消魂地。天

高陽臺 仙露菴宋宮人餞汪水雲處

白雁聲殘。青蛾淚盡。燕臺別路重分。供奉琴歌。不堪彈入離尊。興亡夢短黃冠老。掩金觴。翠袖含顰。歎西湖。卅六離宮。何處長門。當年環佩空歸去。任花旛戀雨。佛火愁人。賸水殘山。依然鈴語黃昏。紅兜那覓南朝寺。話滄桑。舊額猶存。泣銅仙。承露盤

傾一樣消魂。

又長椿寺明田妃畫像慈聖李后像並藏寺中

葉落秋槐。花零素柰。驚鴻省識啼妝。月影揚州。禁他燕館清霜。九蓮寂寞閒房共黯
殘僧黃帕司香。儘關心小閣承乾。前度昭陽。霓裳未破哀蟬誅。指環妃葬地。金盃
銀牀。天壽幽宮。珠旒翻託明璫。相從好奏西陵伎。比人間。椒殿春長。漫魂歸一幀芝
龕。冷話興亡。

玲瓏玉 都人夏日賣冰者以兩銅盞相戛作響漁洋詩所謂櫻桃已過茶香

減銅盃聲喚賣冰者也

蓉闕櫻殘。早添得韻事京華。玻璃沁盃喚來紫陌雙叉。妙手玎璫弄巧。勝肩頭鼓打。
小擔聲譁。停車裁油雲。隔住玉沙。暗想槐薰倦午。正窗閒雪藕。鼎怯煎茶。碎響玲
瓏。問驚回好夢誰家。屏閒珠喉輕和。有多少鈴圓磬徹。低唱消他。晚香冷伴清吟。深
巷賣花。兒童買晚香玉聲亦可聽

又 瓦噴壺

清暑簾陰。晚風送、枕簟瀟瀟。陶家製出。買春不是詩巢。幾陣階前遞響。早千絲玉濺。一白珠跳。涼宵。還相催、金井桔槔。未擬官哥樣好。但瓶長較頸。鼓細量腰。貯腹泉甘。尙虧他、淺潤堂坳。壺公僊蹤曾託。更休把、冰清心跡。瓦合輕嘲。雨來也。掃煩襟、如意漫敲。

望海潮 送勳楣出守瓊州

銀瀧飛蓋。油幢濺雪。春風乍到南天。閩嶠句題。君時取道福州羊城路指羅浮青入雙鬢。烟靄護旌旂。早滄溟咫尺。催渡樓船。竹馬人來。幾聲銅鼓唱喧闐。吟心臥閣清閒。想桃榔未老。胡蝶猶仙。蜚雨弄晴。蠻花醉曉。珊瑚十萬瓊田。一酌試廉泉。問深沈合浦。可有珠還。掃盡樓臺。蜃氣吹笛海門山。

瑣窗寒 紫泉孝廉李寶石余再從姊婿也病樹不春曇花遽萎煢煢縉緯其

可哀已

聽雨沾春。題花卜夜。勝游曾幾。書傳雁羽。有約玉簫同倚。闢松陰。依然斷腸素絃。一昔牙琴碎。過招提倦旅。當時燈暈。尙飄紅穗。誰寄相思意。但絮影埋香。酒痕吹水。秋墳怨語。悽入女嬃砧裏。話傷心。孤雛未將。紙錢那覓空燕壘。判今生。塵面西風。爲君持淚洗。

齊天樂 寒雲

沈寥千里寒空色。誰教玉龍輕占。望裏仍飛。愁邊又聚。不許梨花香汎。陽臺恨斂。漫提起巫峯。那回春感。夢雨蒼涼。楚腰羞向近來減。探梅曾約舊崦。鶴衣尋徑處。幽賞空念。澹欲黏天。濃應釀雪。贏得今番淒黯。山螺翠掩。更隱約疏林。墨痕低染。界破冥濛。冷鴉三四點。

又 寒月

廣寒已是消魂地。西風況禁悽惻。鷺嶺初升。鴛樓乍映。依約圓冰飛出。澄輝似昔。只酒罷春溶。夢孤秋碧。漫憶前身。水精簾下又今夕。青天重訴怨抑。素蟾流影外。難

寄消息。悄倚蛾妝。閒拋羿藥。一杵玄霜空惜。瑤笙夜寂。鬪青女嬋娟。誤他嬌魄。淚點金波。任教菱鏡溼。

又 寒燈

瑣窗閒絮。欹蟲語。盈盈倩魂無定。盞側星孤。盤敲豆小。爭忍挑來還暈。瑤街漏緊。待添了銅荷。玉膏猶凝。夜飲誰家。九蓮花底喚春醒。蘭房幽意自省。背人茸帳倚。金鷗都燼。半翦難勝。雙心暗怯。長盼天涯芳信。歡期未準。任碧悴紅迷。怨蛾相映。繡被霜濃。一枝空照影。

又 寒柝

暮天吹角。譙門斷。淒音乍聞飄渺。響接砧疏。傳隨箭急。還帶提鈴聲小。嚴城靜悄。作清漏銅壺。幾番昏曉。逝水年華。爲誰消領舊懷抱。空街敲恨未了。鐵衣來往處。霜信偏早。鷺堠迷烟。雞籌喚月。那更春光不到。離情暗惱。問挑盡殘燈。送愁多少。帳底驚魂。夜長人易老。

又 寒鴉

晚霜天外歸飛急。淒淒噤寒無語。水驛橋稀。河隄樹老。羞說垂楊終古。酸風聽取。問積霰平林。舊巢安否。黯澹叢祠。陣雲吹送楚江暮。蘇臺前事暗數。醉歌人未散。銀箭催曙。叫月聲孤。棲烟夢冷。重憶昭陽何處。蕭條倦羽。悵子夜啼殘。白頭還苦。鬢影相看。玉顏空淚雨。

又 寒雀

故枝驚說平林盡。霜天幾回飄泊。畫舫煙迷。朱橋日暮。多少荒涼村落。空倉去卻。歎
廷尉門前。苦飢誰託。化蛤餘生。水雲何處夢難著。枋榆重問舊約。燕泥凋粉壁。一
樣蕭索。廢壘閒尋。疏梅乍放。且喜幽香堪啗。雕檐半角。更休憶華堂。那時行樂。翠羽
清啼。近來風信惡。

聲聲慢 晨起蹋雪詣向亭

街長帽側。徑滑筇扶。斜風乍見飛絲。款竹門深。還更一笑相看。朝來玉樓凍合。怪尖

又、瘦聳吟肩。閒趣好。但塵襟泥酒。醉墨塗箋。容易煙雲過也。甚鴻泥爪印。倦旅依然。冷落詩囊。誰念歲晚長安。冰霜待尋伴侶。只孤琴。消得清寒。似夢裏。又梅花。開了故山。

新雁過妝樓 琴研是寶石所贈

暈墨凝香。詩魂化。猶依片玉琳瑯。半規蕉葉。涼信暗翦秋霜。淚眼研愁書懶寄。更無夢約紫泉莊。黯情傷。廣平似石。特地迴腸。紅絲當時共炙。借錦箋鏤筆。怨寫宮商。斷紋何許。年少慣倚疏狂。而今賞音漫索。但目送。西風歸雁行。相思處。在翠蟾鉛水。盈盈一方。

又 冰簪

漏咽銅籤。飛瓊過。瑤笄誤落雕檐。峭風寒翦。新意幻出纖纖。鏤雪鑄霜簾影下。鏡臺未怯曉晴占。溜痕添。悄移鳳蠟。珠顆教銜。犀椎敲來尙惜。襯綺疏翠幌。碧潤偷拈。弄妝呵手。春恨暗觸晶匳。鬢雲更誰試插。但著指。防他清淚淹。芳魂去。待化成嬌玉。

花香一窰。

訴衷情 二首

芳徑。人靜。簾外影。曉朦朧。花信早。顛倒。任春工。鶯語隔房櫺。怱怱。畫樓今夜風。是殘紅。
錦幔斜卷。春意懶。篆香微。人去後。楊柳又如絲。無語對花枝。依依。小園胡蝶兒。恨來時。

思佳客 四首

檢點嬌紅瘦幾分。含情重問可憐春。誰教南浦愁中絮。卻化西樓夢裏雲。吟翠管。
步香塵。小闌花影易黃昏。從來怕見初弦月。纔學蛾眉便學顰。
帕上新題閒舊題。苦無佳句比紅兒。生憐桃萼初開日。那信楊花有定時。人悄悄。
晝遲遲。殷勤好夢託蛛絲。繡幃金鴨薰香坐。說與春寒總未知。
寂寞湘簾下玉鉤。一春清景似殘秋。粉消蕙帳情空寄。花褪蘭釭恨未休。銀鑿落。

鈿篋篋。歡場那更問朱樓。雙蛾已是生來淺。禁得西窗此夜愁。
夢語惺忪記未真。起來還倚退紅茵。綠腰枉自翻新曲。藍尾誰能惜好春。
玉鑪薰。懶將纖手試寒溫。人間無著相思處。賸檢羅衣看淚痕。金翦歇。

尉遲杯

歡娛事。甚著眼。都作淒涼字。無聊漫寫雲箋。卻把春情喚起。紅牙妙譜。也儘許。歌喉
按新製。又爭知。鳳牒重看。俊游空付流水。餘香醉拍征衫。憐刀翦并州。蠹網長繫。
冷落花名人誰識。珠淚裏。烏闌半紙。如今縱。天河倒瀉。料難望。銀鉤墨暈洗。但從他。
試語初鶯。自尋牆外桃李。

月華清 丙子六月七日晨詣玉泉山凍雨初歇車行積潦中宛如舴艋小詩

呈李芝齡前輩並成此解

短策吟煙。驕驄踐淥。柔波十里如翦。一舸誰攜。卻好徑隨花轉。乍喚侶。垂柳門邊。更
覓路。曲闌橋畔。消遣。向菱灣。蓼溼。等閒尋徧。況是澄湖漲滿。傍岸觜沙唇。鏡匿初

展。銀漢盈盈。可許浣紗人見。帶空翠。半角山孤。蘸秋影。數重天遠。歸晚正冰縈索句。玉鞭須緩。

夢橫塘 荷花似雲香不斷白石句以慢詞寫之

液池擎豔。淥沼含馨。溼雲飛滿涼翠。千葉香心。蕩三十六灣秋意。倚蓋天長。浣衣人。杏。卷波無際。認珠盤冷浸。一抹橫塘。重重碧。重重水。嫣紅半落誰憐。但參差遠影。還蘸吟袂。鷺送鷗迎。料未許。夕陰吹碎。喚小艇。青匳搖夢。待覓風痕。過煙尾。甚日開門。藕花多處。約詞仙同醉。藕花多處別開門亦白石句

江城梅花引

一雙銀蒜暮丁冬。是東風。是西風。吹得疏疏。涼雨打梧桐。沈水半銷金鴨冷。人不見。夢依依。喚玉驄。玉驄。玉驄。無路通。步霜紅。霜更濃。過也過也。過不了。咫尺簾櫳。依舊相思。圍住畫闌中。推枕起來還欲睡。樓角外。又蕭條。聽斷鴻。

菩薩蠻 八首

心日齋詞

竹梧重疊交窗影。水紋簾卷冰花冷。燈穗墮空煙。夢回秋可憐。玉階人不見。絡緯啼成怨。銀漢信沈沈。碧雲深更深。門前簾幕垂垂護。出門待索銀蟾語。圓影可憐低。曉風吹又西。十三絃上意。箏柱還搖曳。聽到別情無。一聲金雁孤。映門衰柳無顏色。長條一夜西風急。人倚小紅樓。闌干天際愁。愁來天又暮。艇子衝波去。打槳問鴛鴦。鴛鴦秋夢長。朱闌半亞涼波淨。回風綠蘸煙蕪影。煙外幾人家。天涯卽水涯。蓮衣寒惻惻。蕙帶舉無力。到此合魂消。冷香黏畫橋。輕羅一翦情懷重。海棠冷落西川夢。掩映幾枝斜。瘦痕秋在花。蒼苔餘繾綣。履跡閒尋徧。無處問東風。亂鴉殘照中。金觴玉筯江淹句。當年南浦愁人處。衰草戀斜暉。王孫歸不歸。悽悽秋社語。梁燕仍羈旅。倦尾路雙叉。烏衣何處家。

芙蓉城上花憔悴。紫泉月冷重門閉。門外夜烏啼。傷心聞擣衣。團團爭忍見。畫簾愁無限。何處去年人。酒痕沾淚痕。

春城買盡麻姑酒。醉來繫馬城邊柳。漂泊十年閒。離情山上山。秣陵書懶寄。舊約空彈指。泉路斷腸時。人閒誰復知。

思佳客 德勝門外兩閒房茶肆題壁一詩自敘漂泊楚楚可憐款署雲閒小倩不知何許人也賦小詞紀之並邀芝齡前輩同作

塵壁憑誰護絳紗。西風涼處見秋花。知音渺渺憐人世。薄命依依念歲華。吟蕙草。怨匏瓜。吳淞飛絮又天涯。一春夢雨傷心事。休問江南燕子家。

洞仙歌 賓石曩主鍾仰山侍講家最久偶訪舊館愴然黃墟之思用玉田觀花外集有感韻

燕歸何處。過烏衣門第。一帶輕煙隔秋水。歎衫痕暈酒。琴語絃詩。三十載。塵世賞音無此。吟魂猶在否。幾葉雲箋。澹墨重尋舊題字。夢蝶不歸來。鏡裏芙蓉。翦霜影。一

枝紅碎。有鄰笛、依依故人心。問蠟炬成灰、夜臺知未。

相見歡 二首

鑪香冷了金猊。鏡臺攜。不信生來、長見翠眉低。
春夢斷。畫闌畔。舊情迷。剛是曉鴉啼後、子規啼。

一絲秋入雕梁。燕雙雙。驀地庭梧、已做十分涼。
楚竹簾。越羅扇。漫思量。咫尺畫闌西畔、是斜陽。

浪淘沙 秋蟬和衍石

涼思又銅盤。琴外聲殘。一庭愁碧鎮相憐。冷入秋心飛不去、衰柳年年。何處說荒寒。落葉長安。西風休更倚闌干。弱羽翛翛真似我、鬢影羞看。

清平樂 憶梅

尋尋覓覓。竹外人孤立。研粉銀箋題又溼。冷卻翠禽消息。舊時芳訊依然。而今幽恨年年。一笛綺窗歸夢。故山無奈春寒。

揚州慢 琴鵑抵京數日奉諱南去賦此代東

銀管拈愁玉箋封淚。十年人老。藤花趁飛鳧小影。又斂翼京華。認當日題名醉墨。翠
陰深處。重拂窗紗。話風流裙屐。多時香散蜂衙。舊游過眼。漫低回。身世搏沙。歎候
館淒燈。歸艎倦枕。殘夢誰家。喚起二分明月。蕪城怨。寫入啼鴉。但潮生潮落。秋聲容
易天涯。

憶舊游 題畫

向生綃託興。縹緲襟期。刊落塵緣。異境無人到。望瑤岑。蠹筍玉井開蓮。冷光半溼幽
翠。煙影散虛壇。想萬壑松風。珠庭近接。渺矣高寒。靈源。竟何許。有幾片桃花。流出
雲間。漫說丹邱隔。便移家好住。誰耐清閒。石牀自寫琴意。空外揖羣仙。待月白千峯。
相攜跨鶴天際看。

天香 水仙花

水豔吟香。花情眷夢。湘皋記共游冶。盞側塗金。簪橫削玉。霧帶碧痕低亞。通詞試託。

問甚日、仙魂初化。翠羽明珠不見。依然冷雲凝夜。銀釭舊愁自寫。倚冰斂、薄寒吹麝。一掬茜窗清淚。粉妝慵卸。還恐春風喚起。又暗憶、扁舟古祠下。素機無聲。凌波去也。

綠意 冬蕉

牆陰翠擢。記綠天深處。題翰曾約。黯黯吟魂。惻惻寒宵。禁他瘦倚闌角。多生已苦秋窗雨。況夢影、華凋落。儘故人、書葉留看。早是怨懷難託。誰倩瑤函寄語。寸箋料未許。春信偷覺。一束相思。可奈伶俜。慣與西風梳掠。緘愁緘恨。還緘淚。任蠟燭、芳心拋卻。待雪殘、重結清游。好覓輞川池閣。

摸魚子 長至前夕偕芙初琴南飲衍石齋中偶述

浣冰毫、擘箋題句。宵分絳蠟重翦。玉珂風外閒身在。卻趁翠尊寒淺。梅信緩。問半萼吹香、瘦影供誰眷。天涯念遠。但蘭佩浮湘。向亭桐圭訪古。耦庚長記故人面。新聲倚。換羽移宮難慣。旗亭按拍都倦。宣南坊裏聯吟處。只有盍簪堪戀。塵夢短。算買得

鶯鄰何必論鄉縣。荷衣儻換。駕一葉沙棠。吳根越角。要結鷺鷥伴。

夢芙蓉

集賢院有舊井清。澈可鑿。余往來兩年中。未見有挹取者。豈以地多

陂澤無事汲深耶

芳游迷豔綺。認頽垣古甃。蔓蘿交曳。書闌回首。零落舊題字。斷魂煙雨裏。綠珠門小。應閉。半角西山。知顰蛾怨曉。會否黛痕洗。好句屯田漫擬。一酌清冷。識曲今誰是。鬢絲風影。人與露桃悴。素波渾不起。鹿盧修綆空繫。夢隔仙源。但銀瓶信杳。難問絳河水。

摸魚子

讀元遺山芳華怨樂府漫題

黯消魂。故宮遺事。金源舊恨重數。鷓鴣絃上芳名認。一片冷雲吹雨。都尉府。憶阿海香闈。近接東華路。承恩未許。但破鏡光中。小車油壁。還送燕歸去。娃兒曲。枉了巫峯朝暮。銀紅休按花譜。花開花落天難問。莫爲綠鬢深訴。君記取。只幾日。青城寂寞春無主。人間最苦。算杜宇聲聲。摩訶院裏。纔是斷腸處。

望湘人 石龕庭同年以畫蘭索題戲拈此調

記幽坊喚酒。佳節試燈。翠屏新曲曾顧。冶葉柔情。媚香妙譜。小影華年偷訴。皓腕清襟。楚騷遺韻。仙裳休妒。正石家、金谷留看。底事花隨春去。愁思江南路阻。歎淩波步遠。襪塵難駐。問解佩吳宮。可似夢雲湘浦。靈根種恨。風條傳語。那識題箋。心苦。不忍見、一紙芳魂。化作橫塘煙雨。

澡蘭香 重午用夢窗韻

閒情鬪草。雅戲牽鉤。節序被人喚覺。銀瀾蕩槳。鏡曲分箋。長是夢游空約。盼飛鼻、音信難憑。相思榴紅破萼。小簟涼痕。困倚汀蒲洲蕩。重話河橋往事。細葛風前。暗消吟魄。塵梁去燕。彩箠招蠅。枉卻紺紗帷幕。試蘭湯、新浴還慵。誰伴芳尊共酌。但認取、艾葉朱符。餘香襟角。

高陽臺 七姬權厝志吳巢松編修屬題七姬皆淮張時左丞潘元紹側室志

爲張來儀文宋仲溫書平江貝氏千墨菴重刻

黃葉風多。青苔篆蝕。殘碑尙認啼痕。怨魄歸來。愁他蛺蝶羅裙。一絃一柱哀琴。語打羣鶯。枝上消魂。最無端。玉骨淒涼。娟袂難分。娃宮誰問。傷心史。只潘花小字。猶紀貞珉。妙墨重鐫。依然金盃千春。埋香那覓三興土。掩嬰蛾。灰冷齊雲。但從今。墓草年年。休長情根。

滿庭芳 遼后洗妝樓

眠柳梳煙。荒池洗月。翠簾不卷春愁。暗塵珠絡。芳豔未全休。飛燕新詞漫擬。簪花格。墨妙誰偷。憑闌處。鞦韆金帕。玉腸斷。舊風流。凝眸佳麗地。脂函鏡匣。鄉冷溫柔。但捺鉢當時。諫草還留。可惜琵琶調苦。回心院。枉費綢繆。焚椒恨。天書練影。三十六宮秋。

綺羅香 車帷

繡幙圍香。文裯藉玉。一夕屏星催換。怯試秋心。恰好夢深寒淺。認闌密。犀押勻排。愛絨唾。蝶衣新翦。問流蘇。四角低垂。越娥網住。定誰見。驕聽佳約未準。剛是蝦鬚替卻。圓晶雙綰。雲母輕盈。藏得幾分春怨。似相看。帳裏花枝。漫暗憶。鏡中人面。盼悵悵。

油壁歸來。畫簾風外卷。

瑣窗寒 風窗

翠箔欺寒。瓊鉤掛月。一番風緊。疏櫺半掩。隔斷滿階秋影。蘸銀箋。油花暗滋。午妝粉指新留印。怕重來燕子。小門深閉。舊巢難認。方鏡。頗黎襯。更玉墜低懸。獸環相並。朱繩細綰。比似井闌斜引。玳梁深。輕籠篆煙。繡幃窺處。還易暝。未愁他。畫燭屏前。下簾紅袖冷。

又 集賢院連雨

潤逼窗紗。涼侵簾竹。頻添憔悴。將徐乍緊。做出幾分秋意。對銀屏。幽懷暗牽。素衾清夢。誰料理。最憐他。此日紋疏靜掩。袂衣初試。空指前游地。又冑石苔滋。井闌愁倚。回波漲晚。翠點一池萍碎。帶蒼煙。歸鴉倦飛。暝陰未破。雲更起。但虛空。冷蕩柔絲。遠天都是水。

采桑子 兄子汝笏娶婦張氏同年潤夫農部女結褵三日婦忽感疾旬餘竟

逝時丁丑七月十三日也汝笏將其遺蛻歸里爲賦懊惱詞三首送之

人間誰是消魂者。昨日鸞琴。今日霜砧。三日離愁海樣深。鬱金香冷知何處。悵望春陰。頷略秋心。綠蠟前頭淚不禁。

十三數到哀箏柱。憔悴牽牛。鵲駕難留。銀漢橋邊一夜愁。從今怕說黃姑渡。短夢

悠悠。舊事回頭。但見秋光莫上樓。

紙灰飛徧關山路。山也重重。水也重重。滴盡珍珠酒不濃。雙棲漫譜雕梁曲。花也

恹恹。月也恹恹。燕子歸來似夢中。

喜遷鶯令 二首

綠飛絲。紅退萼。芳景故淒迷。不堪花信到將離。剛是斷腸時。金雁箏。鈿雀扇。爭似

舊時曾見。情絲牽斷。夢魂中。枉自費東風。

夢纏絲。魂怨抑。前事漫思量。朱樓高處見垂楊。那信是他鄉。鶯自憐。花自惜。此意

甚人知得。縷金鸚鵡繡羅襦。曾有淚痕無。

風蝶令 二首

睡碧凝痕重。流黃照影遲。姮娥依舊弄清輝。我自不曾真見月圓時。蝶戀前宵粉。蛛牽後夜絲。酒邊心事問伊誰。除下鏡光燈影少人知。琴語回瑤軫。簾波暗玉鉤。芳心一寸鎮難留。消得三分病與七分愁。藥裹拋仍在。苔箋卷未收。薄寒無賴倚羅櫺。可是禁愁禁病又禁秋。

浣溪沙 八首

誰築閒園倚近垆。小山叢木帶回汀。等閒水石費經營。珍館幾時迷舊跡。綺樓無地著春情。蛛絲塵網可憐生。

紺瓦雕甍想像閒。薄陰吹冷土花斑。幾人指點舊平泉。橋水暗敲珠錯落。巖雲低映玉孱顏。當時祇認是家山。

竹石三分水二分。水邊蜂蝶易消魂。不堪重憶舊時春。可有青苔黏畫屣。似聞芳草鬪羅裙。丁香花謝不關門。

護玉籠香翠閣幽。名花對影看梳頭。此中人說是迷樓。夾幕暗通箏阮語。重簾分
管燕鶯愁。紫雲何處恨悠悠。

車馬如雲待漏遲。未明天已玉驄嘶。綠波橋上漫依依。過眼綺羅猶昨日。傷心冠
蓋似當時。無因說與白鷗知。

鞭影恩恩指落霞。輕衾涼簟定誰家。不辭小立倚汀沙。但有藤蘿皆映帶。更無藻
荇不橫斜。生憐消瘦到秋花。

扇底風痕弄夕涼。酒醒人試藕絲裳。新蟾鉤樣照橫塘。蟬雀有時還獨語。鳧鷖何
必定同行。澹煙清夢怕思量。

白鶴憑誰信手招。銀瀾對影轉無聊。悶來何計覓雙橈。秋思可堪人寂寂。仙源依
舊路迢迢。微波原自不通潮。

鷓鴣仙 龍鬚席

桃枝遜滑。藤根讓潔。八尺風漪鋪水。象牀誰與問遺簪。有幾點、瑤池清淚。龍鬚草一

名王母簪。冰絲細裊。花紋巧織。還似鮫宮新製。任人舒卷。總無心。不化作。淒涼雲氣。

高陽臺 用碧山韻答衍石潞河舟次之作兼懷琴南

帆角鼓煙。船唇墜葉。一番涼雨。澌澌。惜別山容。城尖仍倚愁眉。潘河門掩珠巢冷。問紫駟。可記當時。鎮無聊。醉醒厭厭。還倒金卮。燈窗待寫懷人句。寄垂虹南北。兩地相思。綺夜清霜。夢魂依舊來遲。來時定折寒梅贈。道此情。惟有花知。但悽然。鬢影緇塵。青鏡成絲。

摸魚子 去歲長至夜飲衍石齋中。余有浣冰毫之作。今一載矣。琴南衍石皆

以憂去。天寒多雪。索居趺歡。復次舊韻成闋。並索芙初同賦。

送歸人。去帆兩兩。平蕪千里如翦。分襟憶到題襟日。又早蠟梅香淺。魚素緩。空領略。淮河津口魂雙眷。八月得衍石天津書。十月得琴南袁浦書。天長水遠。怕星飯填愁。塵衫浣淚。難認舊時面。東華客。十日閉門都慣。相如今更游倦。鴛湖鶴市空中想。

翻是他鄉情戀。吟興短。漫贏得。秋來夢不離江縣。吹葭節換。試問訊劉郎。深林雪屋。燈影牘誰伴。

又 和潘吾亭同年再疊前韻

倚香篝。小樓聽雨。春衫誰與裁翦。潞河橋下波千尺。比似別情還淺。腰帶緩。更海燕傳書。碎語增悽眷。瓊枝恨遠。恁夜舫牽文。垂髫斷影。長隔鏡中面。君時有金瓠之感
城南路。烏帽黃塵行慣。新詩水部吟倦。西湖西子頻牽夢。未信朝簪猶戀。生計短。只地上栽花。那是君家縣。思鄉酒換。牘玉雪佳兒。芸編問字。燈火紙窗伴。

又 戊寅三月二十一日宿香山三山菴次日循菴後小徑登龍王堂眺覽久

之喬松百尺泉聲冷泠然東牆玉蘭二株已半謝矣

野橋西。霽嵐千疊。攀蘿待訪深隱。鐘魚記否曾來處。一衲故吾堪認。蓮漏緊。任小夢眠雲。也覺巖棲穩。芒鞋晚趁。道咫尺龍堂。山靈喚客。一徑入秋蚓。還惆悵。早是瓊苞香褪。瑤臺空墮珠粉。看花眼冷春明路。花裏翠禽知恨。泉更引。照鏡底青螺。懶說

仙源近。催歸未忍料。倚杖哦松。題箋選石。後約總無準。

又 暮春徧游近郊。諸蘭若。覺生寺。大鐘萬壽寺。白皮松。尤勝賞也。

散幽襟。近郊春晚。香臺游屐爭試。半幡風外。招尋慣。吟思塔鈴遙墜。陰滿地。望不斷。霜皮雪幹。松煙翠。鐘樓倦倚。待磨洗。前朝鯨魚篆刻。梵夾幾行字。僧寮話。花影竹房深閉。落花更掃階砌。杏壇管領春風帚。我亦官閒如此。清磬裏。渾未識。禪心宦味都相似。誅茆便擬。指蒼蘆。林西斜陽一綫。山在冷雲背。

三姝媚 海淀集賢院有水石花柳之勝。余歲或數十。信宿戊寅。春暮獨遊池。

畔。寓物賦情。弁陽翁所謂薄酒孤吟者也。

交枝紅在眼。蕩簾波香深。鏡瀾痕淺。費盡春工。占勝遊。惟許等閒鶯燕。步履廊迴。盈退粉。蛛絲偷冑。小影玲嫻。冷到梨雲。便成秋苑。容易題襟。催散。又酒逐花迷。夢將天遠。繫馬垂楊。但翠眉還識。舊時人面。暗數韶華。空笑我。櫻桃三見。牘有盈盈胡蝶。西窗弄晚。

又 馬湘蘭小研爲程春海同年賦

蟾蜍清淚灑。暈脂痕猶新。粉香初研。翠斲妝樓。想鏡中眉樣。半蛾偷借。鬪葉閒情。借象管。鸞箋消夜。悄炙紅絲。沈水濃薰。棗花簾下。髣髴冰姿妍雅。背鵲小像。恰手撚蘭枝。練裙歌罷。舊匣空尋。甚石橋新月。尙矜聲價。過眼雲煙。隨夢影。銅臺飄瓦。認取南朝遺墨。青溪恨惹。

催雪 衍石抵京招同吾亭水部陳友石農部錢味根孝廉消寒小集同雲如

幕雪意垂垂坐客各有新句余亦繼聲

簾罨重陰。燈暈半花。密坐貪依屏背。話冷宦心情。竹深門閉。客似寒鴉瘦影。慣倦羽。相偎銀雲底。琴邊試問。清宵款語。冶遊知未。燕市十年矣。是幾度分襟。幾番攀袂。又朔雪關山。歲華如此。儘覓紅螺換酒。釀不到。鱗鴛鴦水。料只有。藤角吟箋。猶認月波題字。

丁香結 燈花和衍石

窺幙蛾輕。綴窗螢小。煙影玉荷低襯。是幾番風信。恰喚起、細朵盈盈紅暈。似華還似
萼。妝臺倚笑。鬢未穩。無端三點兩點。慣向晶奩偷印。憑認。比蟾子垂絲。好夢飛來
定準。麝炷分香。魚膏蘸碧。暗催春近。良夜鴛枕睡覺。早與傳芳訊。重丁寧佳約。休待
槩腰瘦損。

瑤花 吾亭偶談汴中春覺菜之美余不嘗此味亦十載矣

雪殘近陌。壓擔泥香。記腰鎌親覓。鮮芽破冷。新翠翦。幾縷冰痕。猶溼。廚娘好語。道一
信。花風先識。伴鬪袍。公子尊前。恰認穉春顏色。銅街餞臘頻番。枉十度春來。芳訊
長寂。愁春未醒。惟是有、海燕曾傳消息。庾郎清瘦。況雋味。鄉園空隔。但五辛盤底年
年。夢繞玉津萋碧。

眞珠簾 春影

豔陽畫出三春景。漾空濛、幾縷春魂猶凝。搖曳絮飛時。弄瑣窗煙冷。一桁輕絲吹不
斷。被燕翦、捎來難定。幽境。儘看朱成碧。玉闌閒凭。何處笑倚娉婷。有娥池省識。東

風妝靚。半面倩誰描。更柳遮花映。偷眼蜻蜓未窺足。似鏡裏、燈前曾並。人靜奈簾波
緩蕩。碧雲催暝。

瑞龍吟 擬周美成

吟香路。重認淚點娟筠。唾痕芳樹。依然咫尺天涯。斷魂絮影。知他甚處。信音竚。還
是墜蛛塵網。半捎窗戶。無聊強摺紅箋。醉來試倩。流鶯寄語。惆悵雕闌猶在。晚花
羞眇。垂楊慵舞。應想舊時堂前。巢燕非故。琴心贈別。顛倒閒詞句。何曾見。珠幃衣悄。
銀屏微步。佩解人歸去。帕羅尙綰。愁絲怨緒。簾底波千縷。空負我。西窗秋衾涼雨。話
殘夢裏。一燈誰絮。

念奴嬌 己卯五月十四日集賢院池上憶壬申丙子與琴南兩度游此用白

石韻

荷池載酒。話閒雲、會約同舟仙侶。一葉浮香人不見。還對冷紅無數。此際江南。娟筠
小簾。坐穩橫塘雨。相思賦就。畫屏多少新句。笑我塵鬢絲絲。回瀾照影。花裏頻來

去。半枕圓波鷗外夢。空到沙汀煙浦。釣綫垂風。吟鞦倚月。誰解留人住。微茫雉堞。柳邊愁認歸路。

高陽臺

鵲語偷傳。烏棲暗警。宵分又駐鸞車。七載重看。秋期彈指無差。瑤階擁帚知何事。勸鳳翎、休掃閒花。話仙都、小劫怱怱。愁裏年華。巫雲漫逐西風去。聽黃雞怨曲。往事空嗟。酒冷芳尊。可堪殘醉消他。盈盈儘隔牽牛渚。問情波、流恨誰家。但思量、咫尺銀灣。不是天涯。

惜秋華

耦庚繼室鄭宜人哀辭

賦筆催妝。映宮袍秀色。鸞釵相倚。春枕正酣。驚心杜鵑啼起。前番淚溼湘筠。賴夢好、揚州重締。嬌香更怱怱。褪卻蕃釐仙蕊。悵悵畫屏底。歎明珠乍剖。枉懸嬌幌。鏡臺近。繡褙認。幾回凝睇。人閒過眼空花。但錦裯、倩魂猶繫。愁悴問他年。左芬知未。

摸魚子

疊前韻爲衍石賦雁影菴時將移居玉河橋

卜幽居石橋西。堍衡茆蔕。蔕催翦。恩恩過影。還留影。恰照玉河清淺。筆柱綏。倚繡闌。雙聲一例。神仙眷。香心寄遠。比舊日。踰躓。羅浮粉翅。長印鏡。瀾面。君舊居曰太常仙蝶所止齋。隨緣好。傳舍年來。棲慣。何愁素羽飛倦。分明桑下。曾三宿。也似碧潭痕。戀歸夢短。又誰道。等閒衾枕。非鄉縣。鬢漁譜換。算小字吟秋。涼音喚侶。我亦水雲伴。

又 衍石遷居未果重拈前韻爲雁影菴問

認巢痕。一枝初定。禁他客燕雙翦。玉河最好。嬉晴淥。偏是詩人緣淺。新句緩。枉付與。春波橋下。鷗情眷。會心未遠。且回首。吾廬江亭咫尺。繞舍水三面。君知否。雁影澄潭。留慣銜蘆。到此應倦。菰蒲葉葉幽尋。近料也。雪泥還戀。塵袂短。又何必。衡雲定覓。湘南縣。歸飛羽換。但寄意。潘郎箋。傳素翼。莫忘舊吟伴。吾亭時將乞歸

金盞子

彩筆休拈。錦字慵題。病餘無力。又墜葉吟秋。疏櫺外。閒了翠雲消息。懶聽桂苑啼鳥。引瓊簫。悽惻。西風淚。花冷素蟾偏是。廣寒人隻。倦燕忽如客。待歸去。蒼煙暗故國。

沈沈繡簾易隔。宵來夢比似曲屏還窄。看取小扇塵生。嗟空箱拋擲。消魂處。愁縷恨絲機聲催織。

三姝媚 己卯中秋

澄輝看漸展。數圓期禁他。絳霄人盼。盼到良宵。又露華啼溼。一規珠汗。鏡彩分明。憶路隔銀橋曾見。竟夕相思。青嶂魂迷。玉樓吟倦。何處霓裳歌按。但藥杵聲停。粉匿妝換。困倚天香。賦舊情爭被。曉風吹斷。破斧誰攜。空暗結。吳郎秋怨。望裏山河小影。輪孤夢短。

金縷曲 次日見吾亭詞倚調和之

桂苑悽芳訊。黯消魂、亭亭鏡影。做成眉暈。碧海青天依然在。偏是圓規難認。漫重溯、春前幽恨。兩度傷心秋更苦。料嫦娥、淚也金波隕。千里夢、幾曾準。清游但說良宵近。望嬋娟、瑤臺笛裏。舊情休問。羽蓋霓旌經行處。天路閒愁無盡。待傳語、織阿紵。軫露腳斜飛銀兔。悄絳霄長誰寄人閒信。燈炷落。漏聲緊。

應天長

鶯花近甸。鴻雪去程。依稀夢境堪覓。記否那回攜手。汀波戀餘碧。垂虹影。還自直。有幾許。倩魂消得。畫眉冷。走馬人來。鷗鷺曾識。回念別離時。陌上香泥。羅帶爲誰拭。怕說繡鞵行處。鞭絲墮秋色。前蹤認如過翼。儘喚起。暮愁千尺。斷橋外。細雨慳慳。重問村驛。

陌上花 題仙山圖

神山望裏。分明幻出。玉樓珠榭。碧晃金迷。攬取幾多姚冶。仙源近接長生路。髣髴紫蘭人下。眷游情不是。閨風玄圃。等閒圖畫。漫相看夢影。雕甍倚處。月斧雲斤無價。鳳管吹空。一曲綺筵歌罷。天錢辛苦誰贏得。卻向黃姑親借。但沈吟。怕說冰夷飛蓋。翠瀾生也。

解連環 九日登香山北麓宋普慶禪師塔院

晚秋西郭。趁車塵路隔。勝游初約。步靜窈。幾折雲林。早嶺接梵宮。澗橫經閣。片碣招

尋道舍利當年曾託。歎滄桑過眼。古井斷垣。還見歸鶴。風鈴甚時喚覺。話南朝舊事。幾度花落。向定裏。佳節重看。又積蘚暗封。柳邊門鑰。未冷禪心。爲白雁。飛來愁著。任恁。恁。載詩載酒。翠屏半角。

浪淘沙慢

梓桑路。沙屯廢館。浪擁荒驛。空約傳書素翼。鄉心萬縷似織。任極望。南雲天咫尺。遠山外。煙影難覓。斷夢倚斜陽黯無語。虛堂自愁入。悽憶漲痕舊隱拋擲。傍岸柳依依。凝眸處。淚雨都暗滴。嗟歲晏哀鴻。零亂誰宅。繡衣畫戟。知甚時。驄馬相逢人跡。菱鏡光銷。腰圍窄。年華晚。坐看箭激。料應比。湍波流更疾。恨歸去。不附星查。十二載。塵衫冷透長安陌。

綺羅香 香篝

薰炷藏春。湘筠借暖。曾說秦宮遺製。金屋攜來。有約鏡邊簾底。描一幅。象篋疏花。護幾片。鵲鑪沈水。向煙絲。認取檀痕。斷魂誰與篆心字。蘭缸紅穗未滅。想見都梁乍

燕銀屏無睡。犀蝶雙雙。解了又還重倚。好商量、坐久添衣。自消頰、夜闌假被。儘從他、畫鴨燒殘。繡幃慵更啓。

慶春宮 去臘衍石贈水仙數本花事既畢久置牆角雪窗偶一檢視抽葉已

寸許矣用碧山韻成詠

瑤瑟春愁。銅盤鉛淚。寸緘冷護殘雪。冰縷方凝。塵封初啓。玉簪小翠堪捻。襪羅歸去。鎮回想、飛瓊話別。相思天上。鵝管淒涼。爲伊吹徹。漢皋佩杳誰憐。翦葉移根。幾番悽絕。悄夢禁寒。微波寫影。應是香心猶結。曲屏吟繞。怪詩屐。宵來漸折。仙魂凝盼。出水亭亭。半眉新月。

東風第一枝 十二月廿一日立春時快雪三日矣

帖翦宜春。詩吟餞臘。重陰偏滯檐角。篆煙金鴨。仍含豔情。翠禽未覺。韶華喚醒。似夢裏。東君曾約。甚曉來、賞柳評花。還是凍雲迷著。風乍起。綵旛易落。寒更峭。麝篝漫卻。俊游擬拂銀鬚。倩魂尙假繡幙。天邊絮粉。且休問、陽梢紅萼。待畫鼓。敲出雙聲。聽

取試燈妝開。

更漏子 庚辰元夕同陳小雲二解

錦街燈。燈市雪。還是消魂時節。羅幌底。繡屏中。春寒四面風。蘭釭地。春明話。一十
二回元夜。今昔恨。去來時。去年人未知。
酒邊心。心上事。信杳故園千里。心易醉。酒難醒。夜闌燈暈生。欣相見。愁相盼。明月
今宵恨滿。君鏡水。我金梁。夢來誰短長。

芳草渡

朝非雨。暮非雲。雲如絮。雨如塵。百花時節閉重門。花有約。春有恨。最愁人。訴春怨。
春又半。裏裏晴絲一綫。憐春瘦。爲花顰。花一片。飄得斷。是春魂。

浣溪沙 四首

瀉地銀河到海遲。橫波脈脈信來稀。夢回吟得水鄉詞。繁塔又添垂釣處。夷門恰
有喚船時。斷腸風景定誰知。

帶水何心說故鄉。隋隄秋色夜傳觴。可堪衰柳玩秋霜。仙手有人拋月斧。通眉無句覓詩囊。禁他冶葉不淒涼。

冰雪河梁不見春。欲迴星漢問迷津。此中何限未招魂。尙有燕鶯爭暖樹。可憐蜂蟻是微塵。等閒天氣判寒溫。

倦眼淒迷望轉賒。悔將夢語託星槎。春明門外似天涯。烏鰂書成遠易滅。青鸞信好未應差。一年春事又桃花。

好事近 紙鳶

片羽又青雲。搖颺半天春色。莫羨兒童牽引。怕東風無力。微茫纖綆繫虛空。遠影定誰識。偏是綠楊煙外。有流鶯窺得。

絳都春 秦敦夫前輩出所藏冒辟疆姬人金珙美人蕉畫冊索詞

風光幾信。儘描出雉皋當年花韻。自翦翠綃。點筆曾看。敲蟬鬢。碧腴乍展痕猶嫩。似人影。單衫紅襯。染香亭上。憑誰遞與。畫闌芳訊。吟穩。蕉窗秀句。問名字尙見。金明

玉潤。素月半規。小篆盈盈。芳心印。螺青寫葉春來恨。認水繪、淒涼眉暈。任教重覓秦
淮。舊時豔粉。

荷葉杯 二首

忘了梅花憔悴。鄉思。休更託微波。翠禽枝上好音多。無奈客愁何。聞道章臺人去。
飛絮。風影太天斜。亂紅門徑鬧蜂衙。門外是誰家。

釀得春光如醉。清淚。無賴溼愁紅。爲誰香閣掩芙蓉。山枕倚重重。迤邐清明時候。
依舊。煙雨暗芳辰。曉窗天色近黃昏。同是夢中人。

南鄉子 宜子孫洗

璧月巧摹形。土暈銅花別樣青。研北何人頻拂拭。輕輕。滌盡霜毫句未成。小篆認
分明。芳草宜男偶得名。一例螽斯聞好語。盈盈。水拍銀盤弄化生。

又 和小雲立秋之作

扇影尙依依。秋到梧桐第幾枝。天上西風憑問訊。來遲。且爲清陰立少時。筠管強

裁詩可有微涼入鬢絲。昨日情懷今夕夢。尋思。悶裏閒中各自知。

玲瓏四犯 虎邱春汎圖爲張初白題

煙柳回塘。颺畫槳聲中。斂翠低展。客與香迷。一舸鏡瀾徐轉。鶯語燕語難分。但醉倚、好花人面。數舊游。彭蠡舟繫。忘了小姑偷眼。四愁平子吳歎遣。漫沈吟。玉樓歌按。越娥佩響從歸去。春共橫波遠。空付媚粉暗塵。蕩冶葉。倡條零亂。問半眉山色。船唇篷背。黛痕誰見。

喜遷鶯 珠巢街新居古藤交枝冷翠欲滴詞以賞之余在都門凡四移居矣

六街塵外。喚蠟屐問春。春應還待。蛾月迎門。娟枝窺戶。吟破一庭蒼靄。簾紋乍移。苔點闌角斜牽。蘿帶寄情處。倚新聲多幸。鶯鄰堪買。衍石居最近。空怪槐巷裏。燈暈夢回。早是圓陰改。客與琴孤。家如舟汎。秋影幾絲同載。試將凍蜂催醒。有約濃花須再。倦游讌。念雙藤舊侶。題襟誰在。

瑣窗寒 衍石贈詩賦此奉答君時復將卜居玉河橋故後半及之

掃葉門深。衝泥巷淺。雪殘猶疑。清言佇久。依約夕陰吹暝。怪衙參、催歸太遲。忍寒負卻黃花等。對藤枝絡架。晚來還是。凍禽聲靜。萍梗終無定。正話到城南者。番鄰並河橋舊約。又說玉虹腰冷。占新巢。誰家畫梁。笑人忙劇春燕影。問何年、三塔吟鶯喚教鄉夢醒。

溱蘭香 蝶繭和小雲韻

羅浮舊侶。仙跡曾棲。一翦洞雲溜碧。花迷試夢。橘蠹淹秋。恰好舞衣藏得。問怱怱、粉怨香愁。情絲因誰暗織。壁鏡分明。可念春來消息。看取團圓樣巧。中有柔奴。玉腰纖魄。翾飛小影。閱到枯形。密緒尙憐敲側。付蘭閨、揜手親繾。卻恐蠶娘未識。臙幾片、芳草宮斜。羅裙空憶。

東風第一枝 辛巳人日齋宿翰苑燭花燦然爲拈此解

眼纈迷煙。脣朱綴蠟。依稀光透簾幕。乍疑錦羽銜來。未許紺紗障卻。嬌春穉蕊。有歸院、金蓮人約。向夜闌、小簇疏紅。恰認半簪梅萼。官梅幾許紅萼。未宜簪白石翁。人日

詞語也。試照影、一枝暗託。待破冷、數椒尙弱。任他芳信天街，二十四番喚覺。陽和未準，但背倚銀屏斜角。儘化作粉翅雙蛾，飛趁玉堂鈴索。

六醜 早春晴暖落燈後風雪淒然藤蔓欺寒花事殊寂寂也

喚幽禽夢醒。問急響、花鈴誰掣。試晴扇香。香心如倦蝶。弱翅猶怯。暗想西園事。鏡中孤影。歎好春難折。淒風夜半吹還徹。細糝游塵。斜迎舞雪。長條凍添冰縷。又因循錯過燈市佳節。寒宵情切。按清歌乍闕。待向朱闌底。尋步履。而今怕理吟篋。任紅暈露萼。綠拋煙莢。探芳景、俊游空說。都則把、豔冶年光付與。恨眉啼睫。金觴御、已是愁結。那更堪、聽取銀雲外、嬌娥弔月。

一枝春

珂里新晴。試清游、過卻惜惜芳陌。歡期暗數。豔景易成陳跡。旗亭喚酒。倩評跋、好春顏色。吟徧了、紫曲塵香。惟是燕鶯曾識。幽蘭素芬堪摘。怕東風認作尋常標格。琴心倦倚。夢裏水波空碧。何人寄語。但花外、玉簫知得。重看取、小字銀鈎。冷綃翠拭。

解連環 和片玉韻

寸箋休託。訴幽襟、忍見賦情絲邈。耐晝永、閒拂蛛塵。但錦羽、夢孤翠綃緣薄。似水春陰。總化作、殘秋蕭索。對厭厭病枕、悶損鏡妝、誰寄靈藥。芳尊自開下若。帶顰蛾酒量。猶倚闌角。枉盼斷、淮上青山。渺天際、黛痕等閒迷卻。浪跡依然。把柳絮、看成桃萼。勸清游、半晴半雨。趁花未落。

喜遷鶯 崇效寺看牡丹時余外轉西川脂車有日矣

祇園春霽。借春豔釀成。天然羅綺。鈴語微聞。衣香初染。幾度竹房聯袂。瑞蟬又兼金蝶。一樣新來梳洗。話京洛。任尋芳年少。胭脂留醉。凝睇經院悄。疏箔翠油。誰與相料理。花雨輕沾。珠林低護。還是玉闌愁倚。靚妝漢宮空賞。歸夢瑤臺仍寄。露華冷。贈東風。但有相思紅淚。

瑞鶴仙 四月六日出都小憩蘆溝橋偶述

柳絲征袂。綰試錦羽。初程玉聽猶戀。銅街佩聲遠。向天邊回首。故人如面。藤陰翠晚。

但怪得、琴尊夢短。有游蜂、知我心期。剛是褪紅曾見。還看珠巢題字，墨暈初乾。酒痕微泫。晴雲乍展。春已在、驛橋畔。問柔波一樣。仙源流下，爲底人閒較淺。要重尋京邑。麈香素襟漫浣。

懷夢詞

青山溼徧

道光己丑夏五余有騎省之戚偶效納蘭容若詞爲此雖非宋賢

遺譜音節有可述者

瑤簪墮也。誰知此恨。只在今生。怕說香心易折。又爭堪、燼落殘燈。憶兼旬、病枕慣嘗。騰看宵來、一樣懨懨睡。尙猜他、夢去還醒。淚急翻嫌錯莫。魂消直恐分明。回首並禽棲處。書帷鏡檻。憐我憐卿。暫別常憂道遠。況悽然、泉路深局。有銀箋、愁寫瘞花銘。漫商量、身在情長在。縱無身、那便忘情。最苦梅霖夜怨。虛窗遞入秋聲。

西湖月 高已生爲余作尺牘云賤日牛衣之淚尙贖濟痕春風鶻血之枝竟

摧病果讀竟輒喚奈何

雙魚訴盡愁腸。又誅筆贏來。謝莊新句。爲君棖觸。殘春夢影。少年心緒。何哉。今好在。問記否。牽蘿人最苦。但賸得。錦瑟哀辭。題到淚珠圓處。相看紫誥。恩恩反輸。與鴻妻。白頭荆布。槿花開也。韶光一剎。等閒朝暮。長貧長有恨。更忍聽。冤禽枝上語。儘消受。燕寢凝香。舊情空負。

玉漏遲 重示已生

舊絃摧怨軫。十年前事。翠凋紅隕。幻影分明。憶得鏡奩香潤。當日啼鶯夢遠。更此日。啼鶯聲近。愁緒引。與君原是一般長恨。繡帷髻鬢塵凝。歎錦字誰傳。彩鸞芳信。病枕丁寧。有約再生重認。待說韋郎絮果。又怕見。潘郎絲鬢。清淚忍。安排半衾眠穩。

沁園春 題亡室沈淑人遺照

描出傷心。月悴煙憔悴。迴腸恁支。憶香消玉腕。愁停針綫。病淹珠唾。怯試槍旗。命薄難留。魂柔易斷。當日歡場已早知。良工筆。爲傳神箇裏。欲下還遲。離箱粉縞空思。賸

青衫。幽夢一痕。看相。阿那重拈恨蕊。吳淞宛轉。未了情絲。緩緩花開。真真酒暖。

環佩歸來可有期。無眠夜。禮金僊。繡像記否年時。

又 雨夜疊前韻

如此清宵。雨雨風風。更長自支。想雲波漲曉。寒侵素襪。花魂泣夜。怨入靈旗。闋苑煙涼。瑤臺玉瘦。莫道人閒總不知。淋鈴苦。悵燈前坐久。帳裏來遲。相逢待訴相思。但跨鶴。仙山袖便攜。奈杭州衫色。空沾酒暈。河陽帽影。尙戀愁絲。絳蠟雙心。紅霞一口。君問歸期未有期。知何日。是香盟證處。好夢圓時。

又

沈三華齡自常熟買舟來問姊病人天悵。隔悒快遂歸賦此爲別。

歸也悽然。迤邐垂虹。孤帆夜深。問怱怱草草。伊人何許。生生死死。此恨焉任。盧橘年華。黃梅節物。但著思量總不禁。離筵曲。有檀郎怨笛。嬖女荒砧。鳴珂舊里。重尋漫忘卻。東陽費苦吟。歎樓頭跨鳳。難追彤管。門前立鵠。猶滯青衿。往事誰提。先芬好念。月姊當時一片心。還知否。自春明話別。盼到而今。

又 重贈沈三弟

彈指秋來已矣。荀香蘭房罷薰。恨官齋寄榻。三春藥裏。貧家賃廡。廿載飄輪。翟芴空埋。牛衣宛在。至竟黔婁是恨人。重回首。話淒涼舊事。夢去無痕。依然華屋生存。恰近隔山邱。只一塵。看流光過眼。何今何古。搏沙放手。誰幻誰真。末路榮華。他鄉骨肉。自閉重泉杳不聞。傷心語。但人生到此。天道休論。

陌上花 往歲在都中曾有七夕之詠余與南唐李重光同以是日生樂府小令又嘗瓣香李氏曩詞實寓竊比之意而語多怨抑似爲傷逝而發者此豈識邪纖雲弄巧觸摠舊懷重拈前韻

燒槽斷後。來遲醉舞。麗情空采。舊譜新聲。同是夢中虛籟。誄詞淒絕。家山破。何止雕闌春改。趁星期慣見。薰鑪烟影。絳河斜帶。黯銀屏未冷。西風吹處。怨入蓉裳荷蓋。半玦濟痕。卻倚翠眉先貸。憑肩已自傷心煞。那復而今能待。問黃姑。看取穿鍼樓下。袖羅誰在。

野艇搖煙。生衣蘸綠。鏡波圓折湖菱翠。貼最苦。新涼猶怯。話離愁。恨在秋風。三
蕊淒步屨。漸嬌雲墮砌。芳魂冉冉。暗窺窗月。柔鄉戀否。枉薦菊泉荒。冷香棲蝶。三
生淨業。試與長眠人說。算年來。紅塵倦游。好山畫裏緣再結。黯消凝。又早蘆灣夢落
秋半雪。

浣溪沙 七月十二日移沈淑人遺櫬於蘇公祠卻歸過寶祐橋回望孤山黯

然久之

路近西陵易愴神。一袈裟地許平分。玉棺好伴魏城君。風月有緣成錯莫。湖山如
夢斷知聞。燭灰香冷自溫存。

桂殿秋

生死路。去來身。一杯還酌畫中春。人間大有忘情處。長日慊慊我共君。

柳梢青 三首

夢了華胥。屏閒翡翠。佩杏珊瑚。野徑雙灣。秋祠十笏。門掩菰蒲。汴河衰柳啼烏。歎

舊業、梁園半蕪。瘞玉梅根。眠香桂蕊。好箇西湖。
喚侶鷗鳧。者番贏得塵外嬉娛。越女開簾。黃妃禮塔。織袂風扶。
想像、明璫翠襦。峯約仙眉。波平佛面。好箇西湖。
酒債詩逋。三年蠟屐。一篷蘋漁。風景依然。橋將魂斷。山擬人孤。
煙波渺渺愁余。且
休問、今吾故吾。萍梗家鄉。梅花眷屬。好箇西湖。

翠樓吟

篋冷脂函。窗閒粉拂。簾鉤靜搖霏霧。金鷗鏘翠竹。是誰在、虛廊微步。芳蹤偷溯。認暖
玉欵牀。橫波窺戶。依然誤。剪刀聲裏。喚人鸚鵡。幾度風外吟香。攪斷魂飄落。一簫
花絮。嬌啼驚夢覺。碎珊瑚。愁紅千縷。斂蟲垂處。盼曉月吹來。僊裙留住。離情訴。錦屏
深掩。不教飛去。

花心動

芳信冬閨。粉梅梢、年時倦懷曾託。絮雪乍飄。葭管閒吹。剛是病腰如削。畫中疏影人

同碎。但長日、秦篝偃著。倒纖指、因循誤了。試燈妝閣。九九光陰似。昨空小筆花枝。泥他屏角。麝炷淚淹。猩點脂融。孤負曉窗梳掠。釀寒消盡。春心死。枉冰蕊、描成紅萼。杏香冷、低回燕鶯舊約。

夢芙蓉 蘇祠水榭晚荷用夢窗韻

方塘餘恨綺。借微波占住。水仙鄉里。畫船雙槳。來去錦雲外。鬧紅秋易醉。多情穩護。鴛被正好幽棲。嗟冰蜨霧掩。香冷又驚起。指點回闌近底。佳約重尋。那處湘皋佩。露珠嬌臉。依舊淚痕洗。鏡瀾空晚翠。吳歛誰解人意。困倚殘妝。但盈盈望遠。腸斷影娥水。影娥川在常熟之虞山

霜葉飛

佛天空訴姑恩曲。青閨遺恨重譜。幾回箴管聽雞鳴。傍翠屏微步。怪一榻、纏絲絮語。催歸頻指西來路。向夜月幽房。早卸卻、銜珠臂飾。慘黛偷聚。人靜繡幙低垂。纖裳手挽。暗怯猩點濡縷。枉將心事祝靈香。奈返魂無據。看掩抑、啼妝最苦。人閒真有癡

兒女染淚痕。闌干外。認取明年。杜鵑紅處。
記長男婦封臂事。婦沈氏。余妻弟峻甫大
使女也。

倒犯 中元

漏點聽。嚴城漸移。翠林烟裏。香花縹緲。圓鈴唱。夢魂驚覺。瑤臺上步。秋影綃衣。歸來
好。歎驚嶺。尖風月冷空相照。饌伊蒲。幾人到。簫鼓畫船。黯黯湖隄。迴腸還自繞。路
轉背雉堞。兔華落。羊燈悄。念宋玉。愁多少。待殷勤。題箋傳遠道。奈舊約參差。一夜蘭
盆倒。紙錢飛去了。

金菊對芙蓉

山淥棲烟。城陰臥水。半湖冷畫秋容。奈湖波清淺。不似愁濃。多情風信天邊下。問故
人何處芳蹤。佩聲依約。知他見否。月桂香中。追念往事朦朧。早齊紈淚翫。并翦塵
封。過虛堂悄悄。履跡誰同。思君只有蘭衾夢。但夢來未抵相逢。向無眠夜。金徽怨曲。

洞仙歌 聖因寺僧餽飯

齋廚食品乍分來。蓮座小舫清芬。浪花破。歎留賓事往。解菜心孤。渾不管。幾日芳卮塵鎖。宣南人好在。緩款玫砧。雋味頻煩玉纖和。一箸冷吳羹。雀瞳鱸亭。但悶裏秋光虛過。問書信。麻姑近。誰傳料。脯擘仙麟。未應忘我。

金縷曲 湖上得王壻沆書

倦枕荒祠託展。苔箋羊車叔寶。寄情繇邈。讀罷西冷烟波冷。頓爾衣寬帶索。忍重溯芳儀鍾郝。白奈簪霜驚秋早。惹吳娘。淚爲天孫落。人去也。曉風惡。前期簫鳳悲京洛。最堪憐。嬌花穉蕊。等閒飄泊。麥飯棠梨城南寺。一樣優曇夢覺。更休問。中年哀樂。地久天長無時盡。判傷心。與汝今生各。鸞鑑影。儘拋卻。

浣溪沙 題吳興奚虛白所藏溪樓延月圖湯君雨生筆也樓爲鮑氏故居厲樊榭徵君迎月上於此三首

話到歡場倍黯然。湖雲溪樹碧于煙。不堪雙槳憶從前。無語可憐秋易瘦。有情難

得月長圓。傷心何必杜樊川。

玉茗香名識面遲。爲誰傳出畫中詩。白蘋紅蓼繫人思。翠被可禁虛後夜。疏簾真

復見明姿。無因寫到返魂時。

紙上依稀見淚痕。等閒棖觸到黃門。殯宮芳草又斜曛。詞客樓頭空憶夢。水仙祠

畔各消魂。斷橋西去更無人。

清平樂

曲瓊風細。寂寞簾垂地。消得西堂烟一穗。隨分閒眠淺醉。象牀羅篋關情。梧桐葉
葉秋聲。還向人閒惆悵。不知幾日浮生。

二郎神 以亡室所禮水月大士像施聖因寺

紺紗幔卷。尙拂面、穗烟輕颺。記錦軸薰香。圓儀窺粉。不許蛛絲罨網。丈室天花成何
事。但做盡、人閒惆悵。憐玉骨漸消。金經猶誦。雪衣空葬。凝想西湖去後。月輪無恙。
問幻劫愆愆。相思鉛水。可似銅仙露掌。夕磬聽殘。曉鐘敲罷。誰見妙蓮曾放。霜鏡展。

賸有淩波翠履。夜深來往。

花犯 杭署古梅數株已看花三度矣。頃有桂藩之移買舟將發。樹若有情。當

爲我悵惘也。

古牆陰。苔枝臥晚。年華迅彈指。倦懷誰寄。憐伴我多情。姑射仙袂。鑑池畫舫尋常繫。珠塵印步綺。任領略、一庭香雪。闌干花外倚。而今問春去何之。無端又灑上、天涯別淚。春去遠。空贏得、翠禽憔悴。停橈待、倩魂未醒。人事與、韶光俱逝水。付半枕、玉蟾霜影。羅浮清夢裏。署有鑑池及小畫舫齋。

慶春宮 余將去杭屬安之弟率兒子送淑人柩歸里前夕宿湖上作

虛閣留仙。孤檠銜夢。舊歡忍問槐柯。寥落羈魂。踟躇遙夜。半輪初汎金波。未圓先缺。最愁見、亭亭素娥。殘霞吹盡。南北高峯。依約雙螺。秋衾信宿烟蘿。已蛻吳蠶。猶戀脩蛾。天際含顰。雲中飛佩。更堪此日離歌。砌蛩吟苦。替人喚、尊前奈何。相憐無計。看取青衫。泣下誰多。

多麗 八月十三日北新關道中

古錢唐。翻成此日淒涼。雍歌中、灰飛紙蝶。蹣跚吹上牙樁。峭帆風、迎來柳絮。離筵語、遞入椒漿。綠蠟凝愁。素帷辜怨。更無人影到船窗。歎吾谷、舊山雲樹。歸計苦參商。經行過、女墳湖水。淚灑吳閭。問從今、關河萬里。可堪重著思量。鮑家詩、繁臺夜雨。江淹恨、嶺嶠秋霜。西去啼烏。南征哀雁。斷魂容易便分行。願留取、鏡盟釵約。心字各焚香。塵緣了、與君攜手。片月金梁。

祝英臺近 十首

綰蘭襟。拏蕙帶。春事問湘畹。一葉帆收。寒信落燈淺。怪他宴罷遨頭。杯停婪尾。纔穩宿玳梁雙燕。夢緣短。彈指廿七年華。怱怱去如箭。依約前歡。人共楚雲遠。仲姬小字親題。金相玉潤。恁忘得、那回初見。

裏朱絲。纏翠縷。巧篆儷花葉。結就同心。釵股鬢蟬貼。自從弄玉簫吹。經旬雙笑。早一

潤梅黃。襪羅歸去。又剛是、溼蘭時節。

典荆釵。搜盡篋。排悶苦無計。袖薄欺寒。脩竹暮長倚。便教紅地蘭釭。相憐相惜。暖不到。籠鴛秋被。桂香裏。親解半臂。吳綾迴身爲郎繫。染柳宮袍。珍重總輸爾。舊箱金縷空存。此情記否。枉贏得、一襟清淚。

舞長沙。迴短袖。清節一錢賸。黃竹箱攜。絮雪貯秋影。定知挽鹿偕歸。篋屏學繡。恰映月。囊螢相稱。素心耿。無奈翠履銀璫。青閨倦持贈。女伴偷看。椎髻齒空冷。更禁嫌到籠鸚。吠來仙犬。生做就、茜窗人病。

掖垣深。鄉信阻。宮漏幾昏曉。緩緩行雲。天際忽飛到。兩年怨綠啼紅。銜悲飲恨。算客邸。何曾知道。語聲悄。還認再世相逢。愁多減歡笑。炊玉光陰。但說鳳城好。爲伊閒整湘裙。重量腰衩。更持比、舊時寬了。

掩金觴。橫玉筍。生怕別離又。聽到驪駒。還是絮飛驟。慣消車轂牽魂。鞭絲搖夢。對殘月。曉風楊柳。斷腸後。憑問此度分襟。重泉尙知否。飄警靈衣。天半枉回首。早知權

豔無多。便應日日向紙閣。蘆簾廝守。

舞山香。翻水調檀板。爲誰拍。小譜親題。會倩畫眉筆。幾回月上雕闌。停鍼倦繡。閒聽我。梅邊吹笛。粉匳側。當日藤角裁箋。脂痕尙沾溼。紅豆重拈。樂事總陳迹。待憑曲裏哀蟬。仙山飛去。替說與酒醒今夕。

劍江雲。犀浦雨。長日藥鑪近。侍疾維摩。燈背峭寒忍。夜闌細檢刀圭。偷祈瓦卦。都不。是等閒情分。蜀鵲恨。顛倒瓶鉢依然。人先散花隕。瞥眼榮枯。天意杳難問。那回準擬相如。茂陵遺草。待訪取。遠山眉暈。

雀鑲孤鸞鏡冷。心事竟誰託。乞與檀奴。跳脫手親著。淚痕點點斑斑。憑君認取。想猶記。並肩曾約。信音邈。還是翠袖分攜。圓規鑄成錯。釵合盟言。縹緲碧天閣。任教贈恨羊權。腕闌雙繫。闌不住。江南花落。

淨絃香。靈隱願。瘦骨不勝把。梅蕊消寒。看到藥闌卸。可憐娥月西頽。清光就缺。又紫玉烟痕驚化。病深也。那更窈窕繁懷。瓊瑰漬羅帕。幾日相迎。雙影素鸞跨。竟牀長

簾淒涼。孤眠賸我。反輸爾。夜臺情話。

長女阿錢適蒲城王氏。踰歲夭。歿淑人。嗚呼傷。

悼病益不支
最高樓

微吟罷。我亦去錢唐。宦海路茫茫。春寒容易吳蠶死。秋風依舊越禽忙。酒鱗邊。燈影背。細思量。且莫說。長安蘿補屋。更莫憶。長沙人倚玉。塵世事。總堪傷。孤衾不暖殘年夢。征衣空疊舊時香。算前途。須忍淚。過瀟湘。

十拍子 重過湖上

缺月閒尋昨夢。圓波錯認吾鄉。萬點漚珠參佛果。一瞬天花作道場。清鐘聲未忘。錦鷓浮生忍託。哀蟬冷句重商。見說殘秋如過客。從此高樓傍夕陽。歸人歸路長。

十六字令 三首

天。畢竟無情。只自圓。誰傳語。花月要相憐。
天。多事蟾鉤。要上弦。從何缺。只爲有團圓。

天慣把情緣作幻緣。無人會。生死苦纏絲。

鴻雪詞

臨江仙

一架藤陰留不得。珠巢無處尋蹤。繡衣著了抗塵容。向來殊落落。此別轉怱怱。十載長安多勝侶。頻番酒綠燈紅。而今心事更誰同。秋懷紈扇月。春夢玉珂風。

瑞鶴仙

憶京寓藤花作

曉寒欺繡幕。過啼鳩光陰。離愁蕭索。新詞寄歸鶴。奈書傳閬苑。信音遼邈。纖枝翠絡。料此際。垂垂綻萼。儘飄零。客燕天涯。長憶紫茸檐角。蘭杓浮紅。泛綠。摘豔吟香。與花同酌。華胥夢覺。賞心事。忍拋卻。想閒庭多少。遊蜂戲蝶。未肯襟期漫託。但年年。吹冷東風。自開自落。

永遇樂

成都武侯祠

天設巖疆。井蛙亡後。形勝誰據。半壁經營。兩朝開濟。再世生伊呂。炎靈邈矣。謳思未

沫長誦大名千古。任辛毗軍門仗節。笑他畏蜀如虎。星芒驟落。降箋草草。拱手河山輸與。鄴下稱尊。江東並列。史筆吾無取。錦官城外。雲車風馬。想像翠華來處。憑君看。荒陵咫尺。尙留漢土。

又 成都貢院僞蜀故宮也壬午從事秋闈作

棘院風清。桂輪香滿。仙馭初駐。射策人來。翹材館啓。舊是朝天路。南軒史筆。東陽詩草。主試張君岳崧沈君魏皆恰在紫雲深處。話興亡。煎茶漏永。待添畫燭重賦。王顛孟蹶。輕塵短晷。夢影相看何許。城上芙蓉。宮中花蕊。不管人西顧。宣華小苑。摩訶芳徑。多少斷垣荒礎。今猶幸。文昌朗耀。粉廊快覩。

木蘭花慢 支機石

筍輿尋勝賞。訝神物。寄煙寰。想槎客攜歸。星娥贈與。仙骨珊瑚。爛斑。豔稱蜀錦。問七襄。何似五雲端。幻跡誰云可轉。靈心好在無言。禪關尙識。屏顏清露溼。翠屏閒。但悵望吹笙。遲迴弄杼。夢冷銀灣。相看絳霄路迴。歎紅塵淪謫。幾時還。回首珠宮玉宇。

淒涼天上人間。

陌上花 薛濤井

高唐夢後朝雲留下。楚臺遺韻。一曲琴心容易翠翹偷近。玉蟬金雀嬉遊處。千古風流無盡。賦閒情況有。巴箋十色待題幽恨。向迴闌更倚。瓶沈信杳。且喜銀牀堪認。照影嬋娟。誰似掃眉人俊。枇杷花落。閒門閉。冶思空傳蘭訊。錦江春。付與樓陰修竹。幾堆香粉。

玉漏遲 夜話尹竹農同年署齋

夜寒蓮漏悄。紋疏靜掩。銅荷低照。迅羽光陰。心事漫傳青鳥。夢裏長安片月。更愁裏。天涯芳草。還自惱。雲窗霧閣。庾塵誰掃。何處喚酒銀缸。聽小管清聲。素絃淒調。豔冶追尋。爭似寸箋吟好。計日東風破冷。又相對春山一笑。芳信早。梅花幾枝開了。

又 秋夜對月偶憶少陵斫卻月中桂清光應更多之語因寫其意

碧空圓鏡展。無端幻出。交柯零亂。望裏陰陰。占卻廣寒庭院。自倚閣浮樹影。怎禁得。

吳郎偷眼。塵霧卷。丁丁玉斧等閒飄散。遙睇露腳斜飛。似墜葉霜林。峭風輕翦。喚作天香。終是藥娥愁見。記否王孫去久。且歸詠淮南。秋怨清漏轉。霓裳舊歌重按。

霜葉飛

伯兄之戚已更歲矣。笏姪自粵歸。汴由汴來。蜀泫然賦此。

素冠銜涕重相見。傷心塵面憔悴。去年輕趁片帆風。送箭波長逝。甚浹月、珠江戾止。無端啼溼春鵲淚。但愛日庭前。且幸得孤雛侍側。馨膳聊慰。追念妙墨淵雲。香名早飲。共說平步千里。盛筵燒尾。只須臾。奈鏡蓉空萎。歎寂寂鄉園夢裏。郊祁忍更論前事。聽雁聲。哀絃外。隻影天涯。斷魂誰倚。

祝英臺近

浣花祠以陸放翁配食。少陵往歲程春海侍講持衡遊此。謂當以

韋端己易放翁因陸非流寓而韋以浣花名集也。乙酉初春偕吳梅梁學使

尹竹農桂燕山兩觀察問梅草堂偶憶春海語率成此解

選佳辰。攜俊侶。重問草堂路。紅萼無言。春色已如許。相看蘿幌低垂。蕙烟輕颺。忽省憶。皇華人語。浣花句。同是淪落天涯。應教侍尊俎。團扇家家。不少瓣香處。須令翠

羽聲中寒泉一盞但遙指城南韋杜。

鷓鴣天 綿州道中

五見櫻桃夢欲闌。蠶叢容易片雲還。飛鳧已覺天衢近。歸騎安知蜀道難。涼意淡。露痕乾。不辭侵曉跨征鞍。輕衫小扇綿州路。瓦鼓聽歌豆子山。

夜半樂 夜趨劍關中途大雷雨侵晨始抵宿處

暮天畏景將下。輕陰城郭。催喚雕鞍去。到萬笏尖峯。晚涼佳處。壞雲漸展。狂飈驟發。片時丹嶂冥迷。絳河傾注。更迎面。砰轟震雷鼓。關中磴道曲折。蟻磨驚旋。馬蹄愁誤。怕小小。籃輿山靈留住。亂流趨壑。崩崖轉石。一肩穩載吟魂。等閒偷度。曉鐘外。羊腸忍回顧。臥想今夕。犯險虛勞。快心終阻。行不得空慚鷓鴣語。耐炎曦。休恨汗溼。齊紈縷。還僂指。幾日消煩暑。邵平瓜買青門路。

天香 留侯祠在紫柏山下泉皆穿地而出盤花旋竹泠泠有聲秦棧中佳境也

石罅跳珠。牆陰漱玉。虛堂半枕湍瀨。倦客棲遲。征途熱惱。頓覺涼生襟帶。螺鬢秀倚。想上有餐霞人在。幾陣天風。細響吹將鳳笙仙籟。留封舊遊未改。寄冥鴻。渺然塵外。來往赤松棲處。片雲無礙。好約他年借榻。待盡啓軒窗面蒼靄。萬疊烟嵐。芝英試採。

高陽臺 漢茂陵

宛馬吟愁。粵雞啼恨。流虹休問猗蘭。丹鼎龍歸。一邱空指蒼烟。蒲輪正好賢良聚。奈
褰裳海上仙山。甚蓬萊。誤了阿房。重誤甘泉。神君帳裏知何語。但返魂香燼。枉賦
哀蟬。五柞鶻聲。負他桃熟千年。誰論朱鳥窗中事。剩初明。淚灑通天。最難禁。玉梳淒
涼。宛在人間。

又 灞河阻漲

雪浪翻空。銀濤拍岸。柳陰不解蘭舟。顧影驕驄。幾回腕足臨流。倦懷桑下貪三宿。況
關心。麗玉笙篴。慰離情。一水盈盈。多幸天留。尋詩待赴旗亭約。奈黃梅暗雨。懶試

清遊。香潤紅綃。從看執扇都收。消魂橋上西風早。怕明朝、吹換涼秋。望京華、芳草天涯。何處高樓。

月華清 驪山溫泉

椒殿含春。蘭湯試暖。華清鸞馭曾遊。一掬鴛波。還見粉雲吹麝。倚丹臺、金屋裝成。漱靈液、仙源流下。羅帕待凝脂淨。拭翠蛾重畫。妙舞霓裳未罷。甚咫尺、延秋夜烏啼乍。水上黃虬。容易倩魂驚化。訪前塵、香澤仍留。訴長恨、哀湍空瀉。愁惹付宮花紅處。白頭閒話。

探芳信

茶憩敷水驛。香山詩所謂上得籃輿未能去春風敷水店門前者也。曉鶯喚似陌上柔桑。秦箏彈怨。想畫樓初日。芳魂定餘戀。素波不照嬋娟影。遺恨天涯遠。遺羈秋豔質難留。好山還見。依約翠眉展。尙髣髴城南。那時人面。秀倚東風。露華映黛痕淺。玉蓮花色春如笑。任著帽頭看。店門前。怪底籃輿去緩。

夏初臨 雨行蒲州道中有憶

潤。衰。鞭。絲。冷。侵。衣。袂。條。山。吹。雨。冥。冥。纔。過。梅。黃。千。林。點。滴。秋。聲。客。懷。已。是。淒。清。況。征。途。流。潦。縱。橫。風。陵。回。首。蓮。峯。翠。鬢。猶。隱。雲。屏。飛。蓬。自。去。倚。竹。仍。留。小。窗。絮。語。燈。火。青。熒。荷。花。桂。子。人。間。何。處。西。冷。短。堠。長。亭。數。郵。籤。聽。徹。蘭。更。淚。痕。凝。錢。江。到。時。看。取。吳。綾。

望海潮 韓信嶺

行山迴合。汾河縈帶。遺基尙說韓侯。衰柳將壇。閒花戰壘。千年姓字長留。陽夏事悠悠。歎黥彭一例。鐘室埋愁。震主功高。鼎分空憶。蒯通謀。征途訪古停輶。望靈風。天半英氣。凌秋傳檄。片言藏弓。末路榮枯。總付東流。祠宇倚津樓。想巫絃社鼓。夜夜神遊。看取長陵。斷碣誰與。酌荒邱。

高陽臺 平定州妒女祠事與劉伯玉妻妒婦津相類戲拈此解

借隱曾傳。潛淵妄託。休猜綿上娉婷。十笏荒祠。凝塵誰掃。朱樞春松秋菊。東阿賦。問必妃。甚事干卿。枉思量。羅襪凌波。翠羽揚靈。千年夢雨空飄瓦。怪胥濤遺恨。歷劫

難平。喚渡蛾眉。等閒風浪還生。茂宏九錫徒相笑。怕短轅。到此須驚。賽村巫。一勺椒漿。好薦鷓鴣。

還京樂 丙戌小住都門。恩恩脂轄。悵然有作。

鳳城路。習見依依巷陌。如故里。趁絮泥消盡。任教日訪。琴尊歡事。望舊巢天際。金蓮對燭光生蕊。禁漏短。爭許袖惹蓬萊雲氣。向槐堂裏。又朋簪清話依然。樹色浮空。人影在地。芳蹤夢蝶重尋。幸秦源暗通塵世。倚征鞍。嗟倦羽飛回。游驄喚起。好屬盧溝月。須令佳會常繼。

探芳信 都門友朋之樂無異疇昔。而五年來。劉芙初宮辛楣。錢金粟謝向亭。四同年已先後下世。黍夢光陰可哀也。

絳霄近。借寸晷餘閒。遊蹤重認。向紫雲深處。陶然翠觴引。上清判袂。仙緣在。尚有餐芝分。倚賞屏。酒暈香凝。月輪心印。歡極淚還忍。念舊侶星稀。逝波空迅。夢冷江花。

且爾時。夜臺眼。百年身。世尊。灑影。懶更箋天問。楚魂招。枉付牙琴怨。慘。

揚州慢 維揚晚泊

白紵人歸。玉簫聲換。短篷誰按紅牙。漸邗溝月影。又透入窗紗。聽一杵、清鐘喚夢。鬢絲禪榻。休問烟花。正羈愁、撩亂可堪。尊酒消他。錦帆在否。算垂楊、曾見繁華。歎畫鷁春波。流螢故苑。何處人家。殿腳翠螺拋盡。西風外、冷落宮斜。話興亡遺事。傷心空付棲鴉。

念奴嬌 舟過吳門賀耦庚方伯邀同吳藹人學士董琴南太守小集白公祠

因詣藹人所居在虎邱山塘極遊觀之勝余欲結鄰而未能賦此寄興

翠尊芳約。盡西清、當日鳴珂仙侶。五載分張。今更合、宛爾柯亭聯步。語燕催程。閒鷗喚客。便好拏舟去。湖樓遙指。小欄紅溼疏雨。堪羨崑閩歸來。橫塘卜築。妙得滄浪趣。穉柳嬌鶯門巷接。最是金閨佳處。波軟風柔。酒濃歌脆。準擬從君住。明朝相望。片帆空隔烟浦。

夜合花 藹人有看花之約余乘風便已解維矣

洛水明珠。巫峯仙佩。未如越網千絲。綠慳願曲。輸君暖玉。偷攜青纜解。畫船移。怪津亭折柬來遲。向虹橋去。簫吹夜月。誰唱新詞。西湖西子歸時。長記細裙染翰。羅帕題詩。吟香試茗。依然悶倚空巖。紅袖冷。翠眉低。甚好風。偏妒芳期。倩盧家燕。閒將此恨。說與教知。謾人屬意者歸自杭州攜餉新茗謾人集蘇句若把西湖比西子由來佳茗似佳人書聯贈之

二郎神 晚泊吳江風景清曠燈下漫填此闕卻寄吳董賀三同年

亂鴉送日。傍暮靄。片帆初卸。正小閣銜杯。紋窗翦燭。好句雲箋共寫。暗裏吳波催人去。早夢落。松陵橋下。憐酒暈未消。吟邊猶記。夜闌情話。瀟灑。楓江騁望。水天如畫。認素襪明璫。詞仙遊處。還見秋容澹雅。葭浦烟涼。蓼汀風細。娥月漸窺篷罅。憑過雁。爲說寒山此際。晚鐘敲罷。

月中桂 吳淞舟中

思夢吳天。坐空明翠微。穩泛秋色。柔波蕩晚。漸白蘋風細。輕寒吹入。小紅今在否。記

夜舫新歌按拍。迤邐垂虹路。清簫雅韻。鷗鷺定曾識。沈吟季鷹當日戀菰鱸。味好歸權重。覓溪山畫裏。算錦屏深處。何人消得。扣舷招隱士。倩相送。長橋過客。黯黯南雲去。宵來爲君鄉夢積。

巫山一段雲 西湖花神廟僅餘塑像二側倚敗壁間而神采奕奕如生命僧移置樓下并紀以詞

夢雨荒祠暗。穠華往事空。小樓珍重避西風。好與護芳容。春色應無價。情緣儻再逢。欲求粉本邈驚鴻。看取曲欄中。

眼兒媚

南朝駐蹕愛杭州。直爲聖湖留。十三門外。十三樓畔。占盡風流。一聲白雁繁華去。往事總悠悠。劉家娘子。楊家妹子。無限春愁。

小船平底曲闌干。人在畫圖間。雨湖也好。晴湖也好。消得身閒。淨慈靈隱三天竺。重疊獻珠旛。千燈萬佛。蓮臺高處。長是無言。

惜紅衣 訪姜白石葬處

漢渚羈愁。茗溪浪跡。野雲誰識。舊說西陵。吟魂寄幽宅。斜陽蔓草。空悵望、春風詞筆。
悽憶。香暗影疏。掩梅花仙魄。漂零楚客。抔土長留。湖山恣遊歷。繁華夢去。故國已
無覓。好屬小紅珠淚。莫向冷楓啼溼。怕洞簫清怨。吹咽六陵秋色。

一落索

山色空濛初過雨。畫船幾許。倚闌人影不分明。兩槳掠柔波去。回首六橋烟樹。依
依日暮。更教誰與覓詞仙。蕩一點春心處。

夜遊宮 偕董琴南費新橋兩同年泛舟西湖時琴南赴雲南任新橋亦將入

都

一櫂停雲乍合。況勝賞、韶春時節。有約逋梅須共折。鶴巢邊、冷清清、千片雪。綠醕
蘭言接。勝尺素、遙傳天末。去燕來鴻休悵別。指心期、但相看、湖上月。

空翠分烟。秋痕蘸水。蘆灣篷背低亞。照影盟心。恰好鏡瀾堪借。向迴汀、驀地尋來倚。柔艣。悄然歌罷。吟社喚香山玉局。紫鸞飛下。我亦幽懷暗寫。聽靈苑清鐘。舊歡都謝。修竹祠荒。爭得澹妝人迓。待安排、畫鷁閒身。儘消領、冷鷗情話。休暇。奈文書遮眼。漏沈遙夜。

歸國謠

仙境阻。洞口桃花風又雨。可惜阮郎遊處。看花無伴侶。幾日翠陰庭戶。留春春不住。零亂十三箏柱。懶聽金雁語。殘夢續。浪蕊浮花看未足。容易曉鴉聲促。淚痕銷絳燭。缸面酒鱗吹綠。醉來歌一曲。何事近窗修竹。不教丹鳳宿。

轉應曲

無寐。無寐。賺得愁人如醉。夜深珠箔誰開。悵望青鸞未來。來未。來未。心在紫蘭香裏。臨江仙慢。潘吾亭同年以上海觀察乞歸。余贈以詩。有世人嗜官味盡同。

一止侯鯖不淹箸。翛然君遠矣。之句吾亭謂不著。題戲拈此解。

漱石枕流計。湖光綠處。山翠濃時。庾塵外。從教靜掩柴扉。幽棲爲門前柳。籬邊菊。賦得歸期。江南路。儘蒹蘆。勸客竹馬牽衣。還思探梅舊崦。終勝東閣追隨。便尋常猿鶴。料也忘機。相攜話鄂君。被湘娥。瑟怨抑誰知。孤山去。且春陰就夢。冷語尋詩。余嘗晨過巢居閣。偶得翠禽冷語春未覺。玄鶴亂飛山自孤。二語君亟稱之。

唐多令 垂虹舟夜

汀柳晚蕭蕭。烟波十四橋。迥西風、一葉舟搖。秋意也如人意苦。渾瘦盡。玉虹腰。淚點黦冰綃。香心冷翠翹。怨芳魂、楚些難招。長簾竟牀燈燼落。誰念我。可憐宵。

聲聲慢 己丑重過吳門。藹人墓已宿草。撫今感昔。且傷新橋之逝。舟夜漫譜此曲。儻付雙鬢。按拍必當淚落連珠也。

汀蒲換色。岸柳欺寒。征帆又落吳閫。僂指萍蹤。西冷草草三霜。翩然夢回半枕。把歡遊。付與斜陽。紫霄遠。想霓裳詠罷。月斧攜將。幾度傷懷舊雨。況鄰人怨笛吹冷錢。

江。兩地離愁。知他仙珮何方。蓉城倩誰寄語。道塵寰有客相望。雁去也。秋風
斷腸。

碧牡丹 自錫山卻返武林朋輩招邀勉留十日勞歌未已重賦短章

乍送輕帆去。卻趁迴波住。小別經旬。早是秋光催暮。醉擷霜莢。憐斷紅非故。傷心江
上尊俎。瘴鄉路。黯黯情味苦。歡場可堪追溯。怨綠眉峯。應念天涯風絮。甚日重來。
尋唾絨窗戶。一痕清淚彈處。

玉漏遲 高已生錢充泉王遠聞同舟相送信宿別去嚴陵道中卻寄

片帆人萬里。琴歌興在。仍摹吟袂。過雨秋容。侵曉越娥妝洗。漫擬西湖鏡影。也休認、
南屏烟翠。還信未。桐江一路。好山如此。三載慣約清游。歎飲淥題花。頓成前事。醉
拍征衫。空惜酒痕紅漬。舊壘芹泥。換盡。更誰識。歸舟天際。蘭橈倚。魂消畫眉聲裏。

應天長 章江雨泊

綠波南浦離情賦。爭信生離情未苦。玉飄烟。風泊絮。纔是世間腸斷處。粉箋書羅

襪步。目送武林人去。消受鬢絲千縷。短篷眠夜雨。

解珮令 分宜中山缸戲作

蘆溪翹望。萍鄉翹望。但宜春、已如天上。陸地舟行，全不用、蒲帆蘭槳。儘船舷、石棱相抗。林巒無恙。書堂無恙。累篙師、殷勤指向。幾首青詞，便做得、丁家鶴相。晒鈴山、十年清況。

喜遷鶯 全州迤南古松夾道連屬百餘里蒼雲滿天玄鶴欲下此行爲不負矣

灘江行近。訝涼繖萬重。陰連無盡。黛色浮空。樛枝拂地。幽賞驛程徐引。悄然翠烟霏處。乍覺塵襟清潤。晚風峭。恍鸞吟吹下。瑤天笙韻。曾問來雁否。衡岳片雲。不許南飛趁。何意征人。身輕一羽。卻向玉簪留印。望中五釵承蓋。定有仙靈棲穩。上元字。但眠蠶誰寄。悠悠芳訊。

玉冷空枝。香殘褪萼。尺素緘情隔天角。西樓未忘掩扇語。東郊枉負瀟裙約。畫堂春
綠。窗月儘拋卻。依舊寫愁銀翰弱。依舊忍寒羅衾薄。錦瑟塵絃恨誰託。青陵怨長
從化蝶。丹山夢遠無歸鶴。任悠悠。小欄外。楊花落。

更漏子

憶前歡。思往事。一穗玉爐烟細。羅幕下。繡簾垂。春寒能幾時。春欲暮。愁仍住。眼冷
故鄉何處。憑夢去。寄書回。衡陽無雁來。
趁墟來。歸峒去。幾陣綠榕絲雨。敲社鼓。唱巫歌。陰風生薜蘿。行不得。炎方客。江上
越禽聲急。雲慘淡。樹模糊。征帆天外孤。

天仙子

屋角紅蕉花未吐。南風吹過飛鸞去。桄榔陰裏重行行。山棗路。黃沙渡。莫信澤家烟
外語。飛鸞橋名

凍雨宵分聲不定。湘源漲起波千頃。扁舟泛泛水中鳧。斜又整。烏竿影。直過零陵人

未醒。

一曲浯溪涼翠滴。維舟更訪前賢宅。窠尊石鏡儘留連。休去覓。涪翁筆。點點雲根蒼
蘚積。

前歲南行冬日好。望衡九面清湘繞。輕舟下瀨又今年。烟浪渺。麻陽舟名小。七十二
峯如過鳥。

怪底朝來橋燕喜。盈川相遇盈盈水。一甌茶罷便分攜。情未已。行還止。終勝天涯書
一紙。舟遇楊竹園廉訪

潑口逆流流漸澀。水車車水無涓滴。一車纔過一車來。沙岸逼。風輪激。跬步萍川天
樣隔。

水調歌頭 滕王閣

彭蠡匯東澤。章貢繞西城。江湖左右襟帶。高閣峙峻嶒。佩玉清歌散後。畫棟朝雲開
處。小隊駐雙旌。帝子渺何許。長嘯倚青冥。神奇事。風借力。快揚舲。綿律當日題字。

墨彩尙飛騰。不見才人江上。空有沙鷗別浦。一舸待尋盟。冷眼落霞外。天水碧無情。
閣上楹聯依然極浦。遙山想見閣中。帝子安得長風巨浪。送來江上才人。宋牧仲先生句也。

踏莎行 癸巳秋仲建昌縣道中

驛騎勤催。郵籤緩遞。橫波阻住青絲轡。沙邊喚得檝頭船。勞人恰好閒身寄。臥柳霜凋。野棠風細。燕歸無復營巢地。傷心休問去年時。盈盈水是哀鴻淚。

定風波 潛山驛寄答佟艾生方伯

颺鞭絲。幾陣西風。人烟小市吹暝。古驛延秋。虛堂款客。暫得羈魂定。翠雲深。玉沙淨。恰好灣廬秀眉映。幽興負松喬舊約。攜琴羅徑。素襟漫整。任緇塵黯澹殘痕凝。向銀箋拂處。寒香袖裏。歲晚心期訂。倚清吟。背窗影。縹暈燈搖半花冷。還省。一聲新雁。江南誰聽。

又 宿州行館再得艾生書卻寄

瘴雲陰。卯飲杯停。驪歌柳岸催發。冷落孤蹤。淒迷影事。夢杳莊生蝶。庾樓風。皖江楫。帶水盈盈。限秦越。情切。到而今。翻羨羈禽天末。翠箋半摺。向郵亭。兩度音徽接。正相思。吟苦。來鴻片羽。飄墮空廊葉。妙香凝。古歡結。洛誦蘭言。總心折。行篋。一編常對。激懷秋月。

瑣窗寒 賦得依依墟里烟途中書所見也

澹拂樓陰。輕籠木末。暗催秋暮。將開又合。只傍夕陽村墅。任長空。片雲自飛。等閒肯逐西風去。向水亭山館。千絲搖颺。爲誰留住。何處。鄉園路。但斷梗飄蓬。易牽離緒。年光過眼。消得幾番炊黍。賦郊居。塵鞅未閒。耦耕舊約人在否。忍相看。數點霜楓。冷紅鴉外舞。

滿江紅 重過粉坊琉璃街故居

屋角高槐。閒問訊。宣南坊陌。記此地。琴尊跌宕。幾年棲息。半刺相忘磨滅後。一家正好團圓日。任旁人。錯比子雲居。喧塵隔。離聚苦。無終極。生死恨。難拋擲。但天台重

到淒涼岑寂。芳草廊空。蝴蝶化。茜紗窗冷。蠹蝨織。歎烏衣巷口燕歸來。今成客。

又 都中戲答人問

萬古雲霄。問一羽。何人當得。但隨分。南州承乏。油幢畫戟。假節文從炎漢仿。借緋句。亦香山覓。儘翩翩。斜壓帽簷。敲螭坳立。曾待漏。金門夕。曾視草。鑿坡側。卻翻疑定遠。功成投筆。麋鹿方慚簪紱繫。貂蟬那自兜鍪出。是虎賁。還是蔡中郎。君須識。

又 吳竹泉同年欲以戊辰同譜繪爲一圖命其姪季文農部將畫師來爲余寫照而不似戲拈此詞寄眎竹泉當爲捧腹也

小別廬山。惜真面。忘攜粉本。費半日。東塗西抹。徒供一哂。有客同來吳季子。平生最識周公瑾。儘從旁。指示頰三毫。心難印。嘶騎發。裝池進。蹤跡遠。鬚眉近。怕丹青見慣。因疑成信。他日重飛天上鳥。諸君但索圖中駭。卻翻猜。扇外放翁誰。驚相問。

又 過新城縣買得白梁米憶亡友李寶石孝廉同寓地藏菴舊事感賦 寶石

新城人

一磬僧房。記月下、人來款竹。還遠致、秋塍珠寶。纍纍盈斛。紅豆分拈花裏句。胡麻共飽山中粥。更無須、乞米似平原。書成幅。蒿里唱、當年曲。萍梗繫、誰家屋。望子猷門徑。淒涼心目。過眼雲烟朋輩少。打頭風雪官程促。問勞勞、塵夢定何時。黃梁熟。

又 途中與客說家鄉肉

旅食怱怱。話前事、齒芬猶結。忘不了、銜齋近局。消寒時節。餽歲相攜春釀早。佐餐雅稱冬春潔。未輸他、松火玉纖薰。桐嚴檝。吾舊里、樊江涉。今小築、夷門接。甚杭州風味。尊前貪說。三載身慚東道主。片帆夢冷西湖月。但溪山、好處卽家鄉。休分別。

感皇恩 王莊阻雪二闋

膝六太顛狂。搓綿攪絮。巾月霏霏困歸羽。泥深沒踝。已是津梁迷誤。候人還爲說、冰橫路。茅屋短垣。荒村且住。潑水衾裯曠寒護。營騰一枕。只見玉龍飛舞。斷魂尋不到、章門渡。

留滯意如何。天公休問。慣遣飛雲上愁鬢。望雲心事。爭得落霞紅趁。遠遊應爲我、縈

方寸。玉戲未閒。珠杓空迅。餞臘杯傳。歲將盡。魚沈雁杳。料是清寒難忍。旅窗誰與遞春來信。

永遇樂 風雪渡江宿九江通遠驛

退鷁風顛。吐鯨浪涌。帆葉掀舞。宦海沈浮。迷津指點。漫唱公無渡。涼秋暗雨。殘冬密雪。荏苒歲華成故。想山中。匡君笑客。往來浪跡良苦。郵亭夢裏。烟波東望。忍見寒潮生處。簾幙輕陰。琴歌歡意。聊共燈唇語。悠悠絮影。依依蘭膳。且喜早梅香吐。歸期近。庭前定有。鵲聲報午。

珠簾卷

東堂畔。曉風吹。輕胭澹粉迷離。垂柳搖搖無緒。閒扶牆外枝。遠路春光晚晚。殘宵夢語依稀。爭唱渡頭桃葉。渾不解。寄相思。

聲聲慢 偶檢舊篋得劉芙初詞箋有云更天際闌干斷無人處撩上幾絲柳爲之索歎

香殘鏤管。淚涴瓊箋。無端夢醒槐柯。少別千年。怱怱歲月飛梭。柳絲斷魂在否。漫淒涼、擁鼻吟哦。凝望久。只闌干天際。遙隔雲波。憶昔東華遊倦。幾留歡絳蠟。買醉紅螺。恨入騷辭。依然蘭畹愁多。而今玉樓賦就。比人間、哀樂如何。子夜曲。但揮絃。彈作怨歌。

漢宮春 藥洲訪石圖爲翁二銘學使題

花藥激湖。乍英光舊跡。輝映庭隅。天教化工在手。璧合星樞。蓮亭志喜。勝蘇齋、殘榻臨摹。大興翁閣學在粵時。僅獲榻本。憑證取題名掌上。當年陳九仙書。邂逅章門持節。幾留賓下榻。訪古停輿。新攜換鵝妙墨。一笑披圖。山陰繭紙。比炎洲。片石何如。羨使者。憐才似此。人間誰歎遺珠。君昨按試信州。購得右軍墨跡數十字。

絳都春 擬吳夢窗

鴛鍼繡倦。又珊枕夢回。青禽低喚。喚起絮雲。咫尺天涯。愁無限。迴廊步履成新怨。況別母。啼妝猶戀。斷腸空指。靈芸靶上。淚痕紅絃。凝眄。盈盈帶水。片帆趁燕影。風柔

波軟。佩解漢皋。那信花開歸來緩。圓冰寫翠。秋容換。認娥月。西窗人面。紫簫吹入吳
歛。桂香夜暖。

喜遷鶯 紅梅

羅浮仙侶也。閒趁好春。脂痕勻注。豔魄還丹。冰肌暈酒。依約絳脣初吐。翠禽爲誰啼
醒。卻向朱門留住。問名字。記吹簫低唱。松陵前度。偷覷窗外影。嶮雪萬重。夢冷來
時路。倚竹新妝。巡檐淺笑。不管縞衣人妒。十分出塵香韻。一例凡花輸與。擬標格。算
人間只有秦郎詞句。淮海詞如紅梅作花能以韻勝樓敬思語也

又 同人小集螺墩花事已過矣賦此以續李重光恨來遲曲

晴烟吹絮。對嘉樹秀筠。闌干閒拊。屐齒香痕。裙腰草色。多事曉鶯爭訴。好花倩魂空
往。佳約芳期終阻。鳳絃曲。但臨觴休按。紅鹽新譜。南浦離恨遠。清淺半灣。不是仙
源路。流水三生。碧雲千里。錦字懶傳幽素。黯然一江風浪。歸櫂還催人去。楚天暝。想
輕寒已到。馴鷗眠處。

浣溪紗 乙未冬偶過北蘭寺

舊隱西陂跡已陳。尙留詩屋寄雲門。梵鐘聲裏幾晨昏。
物外山含無盡意。定中僧笑儻來人。烟波何處問迷津。

鷓鴣天

臘雪春霖報歲豐。等閒歡意少人同。湘簾燕子雙雙翦。別院桃花陣陣風。
浮鑿落。唱玲瓏。臨歧不惜醉顏紅。搏沙聚散尋常事。只當相逢是夢中。
江國陰陰水拍隄。五年三見澤鴻飛。可堪社鼓嬉春日。卻是征衫上路時。
人不見。夢還疑。此情爭得片雲知。從容坐嘯吾何敢。看取吳霜鬢幾絲。

又 琵琶亭

一曲琵琶酒半酣。當時何苦淚痕淹。生來泛梗原無著。聽徹哀絲亦未嫌。
人欲去。句重拈。清詞閒寫望江南。憐他老大商人婦。只唱新聲昔昔鹽。

謁金門 未至楓香十餘里山水驟發借宿村舍

行不得。何處笙篴喚客。圻岸崩沙天易黑。荒村聊寄跡。

此際蘭釭頻剔。夢裏關山。

惜分飛

烟外游絲風裏絮。幾日分飛又聚。西笑長安路。故人杳隔雲深處。樂事潘輿天付與。還向楓香喚渡。今夜舒城住。夢魂已過江南去。

大酺

輿行蘄黃山中紆迴深秀。大似蜀道風景。江楚少陸行者。特爲拈此。

又玉沙清。瑤林映。佳景欣逢山驛。行行青不斷。訝脩眉天際。黛痕如拭。棧閣曾經。巫峯恍遇。應有幽禽相識。萍蹤依然在。但愁拈客鬢。歲華非昔。況吟屐重尋。宋賢芳躅。倍添悽惻。雞鳴還暗惜。最惆悵。烟縷詞人筆。儘殿上新歌傳唱。諫疏長留。總綰沈。茂陵宣室。異代襟情接。憑夢約。竹樓今夕。到黃鶴。征塵息。仙侶何處。嵐氣沾衣。猶溼。望中翠雲咫尺。

西河 夏口詠古

心日齋詞

江上路。踐田往事重溯。婆婆舊是握椒人。夢迷鷺羽。霸圖天授。復何言。羈魂長隔鄉土。孔儀罪誰更數。蜺顏尙繫簪組。公卿戲相諫。書存殞身最苦。等閒忠佞判升沈。空令遺恨千古。少西禍水自媚嫵。又桑中。虜悅偷許。一舸悄然歸去。耐淒涼。剩有桃花祠宇。飄落春紅愁無語。

玉蝴蝶 鄂署在胭脂山半最後小樓尤高下視江漢交流如在襟鳥間

賦得送春詩了。一邱一壑。且住爲佳。燕寢依然。何況秀倚丹霞。午陰深。餘芳戀蝶。空翠溼。曲徑盤蝸。儘消他。滄波東去。冷照西斜。天涯。憑高忍見。風帆沙鳥。烟柳晴花。望眼低迷。可容飛夢到京華。楚山孤。休吟香草。仙路遠。懶憶胡麻。惱林鴉。小闌干外。歌管誰家。

又 含暉堂偶述

乍雨乍晴天氣。烟綃霧縠。織就春光。送暖簫聲。吟思暗繞迴廊。紫茸茸。階翻嫩藥。青嫋嫋。砌引初篁。試新妝。傳紅寫翠。人在蘭房。思量。南州此日。琴閒玉軫。杯冷瓊漿。

似翦風斜。小桃花外燕飛忙。判消除。綺羅殘夢。重檢點。襟袖餘香。意難忘。舊藏鴉處。一樹垂楊。

留客住 歲暮留朱旭輪明經

君休去看駿駸。年光如箭。轉眼桃符。紅入繡簾朱戶。不是江城冷寂。定勝鄉縣。但恐川途無盡。臘候將殘。迎春權歌空賦。請君住。算楚水吳波。誰非萍絮。歸也消魂。玉戲終妨烟艣。此地風亭月榭。秀筠芳樹。去好何似留更好。且吟趁。早梅翠羽啼處。

又 再贈旭輪

留春令。借新詞。將人留下。宛爾韶春消息。與人偕訂。一片蒲帆卷雪。待去還住。賴有歌翻清夜。曲按迴波。牙琴素心堪證。小闌凭。問緩款東風。憑誰題贈。春好仍遲。卻要人將春等。且看金泥帖換。味辛盤釘。翠管佳句吟未了。把新燕早鶯。喚起香徑。

又 往年都門與吾亭賦春覺菜衍石以未諳此味不肯下筆今客汴中再逢
餞臘計已飽嘗戲成此解以代逋券

東風菜。歎多時。拋殘鄉味。枉了隋隄春色。繡畦相待。欲問樊樓淺酌。舊夢何處。剩有承筐新翠。壓擔餘寒。相思市橋吟賣。賞心再負。綺語潘郎。春明詞債。纖手青絲。莫任年華催改。此際晶鹽一筋。賦才無礙。句好應寄南雁影。指鶯脰水邊。按譜人在。香亭僑居嘉禾。

桂枝香 署中叢桂數十株交柯接蔭百年物也今秋著花尤盛詞以賞之

虛廊縱目。又露溼晚秋。庭院如沐。還見雲根秀倚。霧綃凝綠。西風不管青腰守。任吹開萬枝金粟。客衣塵冷。依稀猶染。小山餘馥。念傳舍。光陰轉轂。尚吟翫珠英。情寄三宿。一例茵憑自許。賞心人獨。天香正好披襟處。更佳音。仙蕊初擢。故園此際。霓裳應聽。廣寒新曲。是日聞汝筠鄉試捷音。

洞仙歌 李石梧觀察以梧笙館聯吟圖卷索題小病久置案頭及石梧悼亡

始成此闕

春風梧苑。慣柔毫閒弄。況有蘭闈玉人共。向金臺鬪韻。珠海分箋。全不數。當日秦娥

簫鳳。梁園飛絮早。綠繡空囊。豈意韶華遽相送。銀子掩孤嘯。一卷哀辭。歎我已潘絲霜重。算香散、蘅蕪十年餘。又根觸西湖。那時殘夢。

南鄉子

吳子晉乞題蘆雁圖卽送襄陽之遊。余以嘉慶乙丑館於洛陽縣署。

子晉季文兄弟皆從余學。今季文下世。圖爲憶弟而作。

孤影又南翔。歲晏何心問稻梁。卯色天低秋水闊。茫茫。忍說他鄉勝故鄉。燈火記書窗。錦樣脩翎正著行。三十五年纔一夢。淒涼。卻向襄陽話洛陽。

朝中措

自題山水小景

吳綃尺幅寫幽襟。寸碧倚瑤岑。地僻更無人問。山虛不在雲深。圓波澄鏡方流。折玉佳趣堪尋。一穗白蘋烟影。等閒涼到秋心。

齊天樂

過金梁橋

十年一覺春明夢。魚梁尙留殘照。片月牽魂。新詞按譜。爲爾羈懷縈繞。塵襟淨掃。儘曲記流珠。句拈香草。倦枕低回。旅窗紅暈一燈小。荒灣依舊斷板。素蟾涼影外。幽

境重到。岸柳輕陰。烟莎澹碧。幾日西風吹老。歸來自好。只袖底銀箋。賞音人少。付與清吟。晚蟬秋樹杪。

好事近

冷落七陵烟。秋在玉津園側。三載金梁月底。住天涯。羈客。侯家岡樹望中迷。來去總銜恤。忍說瀟瀟風雨。作他鄉寒食。招隱故人書。孤負錦箋盈篋。拈出中仙詞句。但擁門黃葉。玉觴無味已多時。懷抱向誰說。惆悵燕鶯聲裏。賦曉風殘月。一權柳園津。還擬汴隄遊歷。珍重陌頭烟縷。付登樓人憶。秋花驛路尚多情。塵外似相識。錯向淒紅冷蕊。認春風顏色。

謁金門

愁脈脈。還是飄蓬蹤跡。水遠山長音信隔。秋衾殘夢積。燕子欲飛無力。何處人家坊陌。如此光陰如此客。相思留不得。

巫山一段雲 庚子秋仲廩延道中

野色侵衣袂。秋痕惱鬢絲。碧雲無盡鳥飛遲。心事定誰知。憶別空餘夢，言歸未有期。斜陽冉冉柳依依。長記出門時。

漢宮春 湯陰岳鄂王祠

已矣金牌。歎黃龍痛飲，此志終乖。誰令兩河盡棄，并棄江淮。機危禍慘，問蒼蒼、何意生才。空慟惜、風波獄底，英魂毅魄長埋。當日精忠賜字，幸小朝氣振，康構心開。長驅背危勁旅，敵燄應摧。權奸賣國，任中原、板蕩興哀。僥倖煞、強鄰酌酒，免教膽落飛來。

又 鄴下

漳水名都，被濁流淘盡，霸業當塗。銅臺那時片瓦，一例榛蕪。直茅建國，逞雄心、炎運將徂。渾未省、當歌對酒，人生朝露無殊。還是閨房眷戀，笑分香賣履，遺令區區。知他畫眉未畢，鬼妾誰娛。殘魂餒矣，更何人、上食朝晡。君不見、西陵廢壘，年年衰柳啼

鳥。

剔銀燈

磁州數十里間。清流夾道。蒲稻彌望。北轅所僅見也。

一路緇塵惱客。恰有磁州今日。滑笏圓波。迴環淺淥。彷彿舊遊曾歷。勞勞行役。只此處、煩襟消得。芳草誰家蘭澤。想像漁莊鷗國。柳影綠隄。菰香吹水。點出倪迂小筆。輕舟儻覓。勝吟倚、一鞭秋色。

氏州第一

泥塗困憊。道旁金山寺僧廬甚潔。因就宿焉。寺在趙州南二十里。

斜日山銜。高岸路阻。愁看漲潦千頃。暮色冥迷。脩途困頓。爭得羸驂再整。彈指青蓮乍現出。招提幽境。遠客心孤。虛寮夜寂。妙香淒冷。對語枯禪。渾未省。梵吟外。自尋清詠。細字銀箋。秋燈翦處。說倦遊萍梗。卷羅雲。窗送曉。沾泥絮。依然不定。壁上重題。任長留。空花小影。

天香

太僕寺署在東城根。積水迷漫。清曠可悅。間日一詣茶話。外寂然無事。

足當仕隱之目矣。邀斌梅舫同賦。

衰柳敲烟。虛堂面郭。微波照影清泚。路隔平沙。門橫淺渚。大好寄鷗閒地。參差雉堞。送暝色。涼生襟袂。只少西山拄笏。分他絳霄雲氣。餐霞勝遊漫擬。但招攜。玉珂蘭契。一榻六街塵外。簾紋如水。商略庭陰半畝。要秀竹疏槐翠相倚。待約明年。春禽喚起。

掃花游

鐵仁山總憲招遊城西某氏園

粉垣帶郭。是舊日朱門。賞心佳處。翠箋喚侶。惜閒園半角。勝游星聚。倦客幽尋。過眼韶華試數。悄回顧。問選石蒔花。人更何許。蘭錡今在否。但豔槿漚珠。暗隨春去。燕歸自語。歎高樓似昔。杏梁誰主。臥柳敲橋。總被羣鷗占取。小山句。爲王孫。桂叢吟苦。

慶清朝

晚登陶然亭寄懷衍石汴中

野水彎環。空烟澹薄。孤亭尙戀斜暉。游驄散後。幽尋塵外。偏宜暗想南湖雁影。翩然衝雪獨吟時。蕭閒境。冷懷高韻。襟抱誰知。今我瘦藤倦倚。對女牆西畔。隱約山眉。虛廊墜葉。從前爪印都迷。換盡蘆灣細柳。一枝不借暝鴉棲。夷門路。悶拈新句。遙寄

相思。雁影菴行石齋名。

望海潮 京寓對雪

重陰垂幕。長空卷絮。粉鋪萬頃瓊田。魚夢乍占。鯨波未息。南雲尙駐戎旃。風勁鐵衣單。想營屯千帳。清角吹寒。勝事園林。漫將尊酒賦華筵。家家臘鼓騰歡。待功成洗甲。慶入新年。銀海浪平。天花陣舞。從教淨掃蠻烟。一白虎門山。看櫓槍夜落。旌旆春閒。料得紅旗送喜。早晚到長安。

探春慢 辛丑都門元夕二首

紫陌春回。禁城夜暖。瓊簫燈市吹起。漠漠烟痕。溶溶月色。掩映曲坊珠翠。嗟念文園老。漸羞趁。落梅穠李。玉荷滴盡蘭膏。不堪纖梗猶繫。重溯槐街舊侶。曾幾度擘箋。同賦藍尾。二十年來。游仙一枕。消得光陰彈指。親友凋零甚。更休問。貞元朝士。笑語誰家。聽殘蓮漏聲裏。

彩筆愁拈。畫屏倦倚。良辰誰共游冶。小篆香消。微波簾卷。還又夕陽西下。曾說金錢

買信一刻春宵無價。舊時月色依然。酒邊心事慵寫。此際鄉城漏永。應掃盡碧雲。庭院瀟灑。暗卜油花。頻挑烟蕊。遙憶長安今夜。相對團圞影。儘腸斷。吳蘭詞靶。夢約教尋。從他燈穗紅地。

惜秋華

借許演生少農斌梅舫罔卿宿萬壽寺

秀挹庭陰。破烟霏放出。林間山影。茶話未闌。侵尋竹房催暝。相攜半榻閒身。到世外。棲鴉纔定。清聽。又廊腰暗落風邊涼聲。前事枉重省。歎衣珠無覓。鬢絲塵凝。新侶舊歡。依然素心堪證。看花待約芳期。問何日。翠嬌紅靚。松徑。且明朝。玉闌同凭。

喜遷鶯 紅袖添香夜讀圖爲王蓉洲孝廉題蓉洲余僚壻今皆作玉溪生久

矣

蘭缸紅綻。更假倚畫中。春風人面。斂影橫窗。書聲出屋。恰和小鶯低囀。篆紋薰鑪輕。鼻。冶思梨雲相亂。可人語。問芸編何似。柔鄉堪戀。眉案還記取。簫鳳謝庭。一例神仙眷。好夢難留。濟痕宛在。憔悴玉京重見。絳河舊情空溯。珠樹才名爭羨。稱心事待。

濃薰祕省宮袍催換。

又 陶鳧薊同年爲覓教場胡同宅丁香二株可愛急欲移居而不得賦此解

嘲

頻番胥宇似春燕乍來偷窺簾戶。萍梗孤蹤。蘭言一諾。剛被玳梁留住。廣庭十弓猶欠瓊尊雙身先覩。勝情引小書堂恰在花陰深處。空誤前度客。三匝故枝欲去仍回顧。事逐烟涼人如舟繫。偏託石尤風阻。幾時素塵閒掃。著我琴尊容與。粉香裏。試清吟好約。柴桑仙侶。

又 三官廟海棠高花簇錦陰如槐幄。或言是富陽董文恭師手植

春情寥寞。又緩款信風吹開仙萼。柳外鞭搖。城隅路轉。閒赴紫綿芳約。宿醒太真初醒。悄倚瑤臺珠箔。泥人處。弄嬌姿還勝。翻階紅藥。犀杓休更舉。重溯夢華。酒味渾忘卻。一日歡游。百年遺恨。誰會此時哀樂。舊山富春空冷。餘蔭香林猶託。便歸好。怕西州清淚。彈將花落。

齊天樂 閩九誦芬圖爲吳紅生閣讀題紅生尊甫薌亭先生官楚日曾於便
面繪閩重陽雅集圖賦詩倡和紅生昆仲壬辰九秋遇閩述其事也

武昌官柳依依處。詩翁舊游曾說。嘯侶身閒。哦秋句好。未信風流消歇。桐陰翠疊。爲
重續前盟。乍添新葉。扇底清芬。賦情應許漢皋接。香名傳徧畫省。況金昆墨妙。吟
社同結。事往題襟。人來落帽。肯負莢紅時節。披圖意愜。見一角螺雲。半灣蘆雪。又觸
相思。剡溪今夜月。令兄崧少今出守越中

鷓鴣天

慚愧雲亭半載留。又銜恩命向炎州。遄征有幸騎官馬。樂事無因戀爽鳩。尋故步。
話離愁。觚稜天半夢悠悠。十年前後三持節。蒿蔚餘生已白頭。

燕歸梁 汲縣與家人別

烟柳淒迷夕照沈。離思難禁。無根風絮苦商參。岐路外。兩分心。仲春相見殘春別。
新悵望。更從今。竹雞啼處瘴雲深。且休向。夢中尋。

宴清都 從弟耕腴俟我於管城同行至許昌辭歸里門憮然有作

翠羽東風便郵程隔始知家近天遠看雲念久連牀夢熟快心重見題襟怕說分襟
況舊隱仍孤望眼試問取老圃閒花橫枝暗葉誰翦 恩恩半載京華塵勞自省羈
思空亂繁臺夜月隋隄細柳一番春換相攜步履吟眺勝路逐衡湘去雁待長成新
種丹榴歸來未晚

又 雨宿漢鎮金殿珊侍御過我夜話

候館駢驂駐苔岑合夜闌前事重數晨星半落閒雲獨往乍欣萍聚長安片月迴看
奈過眼徒驚迅羽枉羨憶紫陌吟身年華駟隙空度南來第一消魂淒涼況指江
上鸚鵡春暉寸草秋風斷梗此情誰語陵阪絳蓴餘恨更忍問循陔舊處但與君翦
燭同聽西窗暗雨門下士今惟買亮儕張綱堂徐松龔周竹溪趙印浦崔東軒在仕籍
可謂晨星落落矣

素波箭激。新漲隘平舟。艤烟浦。道左殘碑。題字不堪重撫。寂寂江天如夢。
水無今古。悼貞魂。但懷沙事往。九歌悽苦。憶澤畔行吟。憔悴漁父難招。詹尹空訴。
怨偶椒蘭。爭念美人遲暮。魚腹長憐。埋恨日。蛾眉豈有容身處。近端陽。聽迎神。數聲
簫鼓。

阮郎歸 余以嘉慶癸亥就婚於長沙郡署。閱今三十九年。舊遊重歷。距先室
之歿一星終矣。

片帆當日溯湘波。春光媚綺羅。一鞭今日再經過。騷辭怨女蘿。雲黯澹。路盤陀。行
行山更多。鷓鴣聲入越巫歌。征人可奈何。

澡蘭香 長沙重午用夢窗韻

秦簫舊侶。楚佩餘情。一枕薜華夢覺。前蹤好在。令節依然。枉說茜窗人約。裊斂符續
命無憑。魂消幽蘭半萼。採艾吟心。怨入離披汀蕝。想像庭扉掩處。淚點湘筠。尙棲
仙魄。花源權檝。橘社書傳。忍問墜蛛塵幕。儘相看。露井銀瓶。誰摘梅黃。勸酌步倩影。

月夜歸來三芝欄角。長沙郡署舊有三芝亭。

念奴嬌 湘衡間淫雨積日山水漲發流潦載途郵傳所經半成巨浸時復瓜

皮一葉以代征軺漫成此詞亦勞者之歌其事也

五湖空約爲迷津。翻學鴟夷生計。釣艇漁舟頻喚取。替卻駢駢征騎。蕙帶徐褰。蓀櫂緩蕩。萬頃玻璃碎。青溪幾折。晚風吹夢無際。當日跨鳳偕歸。玉尊雙飲。笑語篷窗倚。一綠鴛波依舊好。誰念羈禽身世。帝子貞筠。靈均香草。況是埋憂地。楚騷歌罷。水天何限秋思。

踏莎行 風勁小舟可危倩鄉民導行山中三十餘里暮宿衡嶽道院

路阻橫波。人來仙館。迷途巧借東風便。當時九面望湘帆。誰知靈境尋常見。楚竹烟迷。越禽聲喚。榕湖計日征塵浣。舊遊風景記分明。無因說與衡陽雁。

醉蓬萊 全州古松余嘗有詞紀之十年再至存者無幾俯仰今昔殆難爲懷

又衝雲過盡咫尺湘源舊遊重到。望裏平林。怪翠烟如掃。鳳葉凋香。虬枝翦玉。任摧

殘多少。一曲薰風等閒翻入。怨琴淒調。金谷杯傳。繡箋吟倚。帳燭檐花。祇供清嘯。大好靈蹤。付亂鴉殘照。物自無言。樹猶如此。更何人。不老。兩度驂鸞。千年歸鶴。夢回空惱。

惜秋華 復砧課讀圖爲王少鶴農部題

舊業青箱。誦先芬幸託。煢煢月姊。珠樹俊才。名成擣衣聲裏。冰綃細寫前塵。照燈影。柴門深閉。誰記。有元龍省識。當時情事。宮錦豔珂里。是寒砧疊就。香羅文綺。霜杵淚痕。悽紅尙沾。摻指。扁舟畫省歸來。勝清沔。相望天際。迎侍。趁明年。一帆春水。清沔用姜白石事元龍謂桂舫也

齊天樂 櫻桃和張詩舫方伯

珍叢分得安陵種。垂檐幾絲風裊。翠葆懸餘。筠籠贈處。量取圓珠多少。羈魂暗繞。問寒食東田。甚時重到。此日嘗新。轉蓬空自繫愁抱。柴車雙泊路引。指繁星密綴。千樹紅小。薦筍光陰。秉苜節物。長憶家園春好。韶華誤了。但錦字書沈。玉簪人老。夢裏

松楸。近年誰爲掃。櫻桃以吾鄉鄖陵爲最。余家先塋在焉。雙泊水名。

浪淘沙 題黃杏帘廣文灘江歸權圖卽送還里

一權許灣春。舊里情親。金萱花下綵衣新。空阻陡門三十六。無計留賓。蕙帳隔吟身。鶴怨頻聞。北山原有去來雲。明日片帆江漢上。我亦歸人。

酒泉子

染黛天低。搖颺東風雲一縷。乍疑晴。還欲雨。兩迷離。麝薰消盡羅衾薄。涼意襲人。人未覺。紫徘徊。紅躑躅。喚春歸。往事尋思。倦枕閒。假屏半掩。月明殘。燈燼暗。曉星移。採香慣向幽叢趁。怨粉愁紅。誰與問。蝶無情。花有恨。各分飛。綠暗紅稀。昨日東風今日客。繡窰空。珠履隔。昔遊非。曲房幽徑無人處。卻是閒花。偏解語。白雲編。黃石墓。有誰知。

早春簾戶。良宵風月。懶近芳卮。凝珠蠟鳳。銜花綵燕。長憶少年時。寒梅香信。窗外幽夢誰知。苔箋自倚。蘭釭頻剔。留待曉鴉啼。

江城子 年來同城僚屬。自方伯觀察以及桂林臨桂守令相繼殂謝。南中氣候殊異。賈生所以賦鵬也。感歎而作。

嶺南西路夢悠悠。聽蠻謳。叫鉤輈。長向刺桐花底賦離憂。勾漏丹砂無覓處。春易盡。水空流。幾回丹旆送歸舟。憶同游。影仍留。一綫斜陽。猶戀竹棚頭。老去文淵重曳足。南雁外。怕登樓。

漁家傲 末疾艱於步履。疏請開缺。交篆後書寄汝筠。時在丙午七月。

六十五年嗟老矣。衰殘那更朝衫繫。人說歸來陶令擬。和也末。鄉園風景而今異。浩劫連番瓜蔓水。嗷鴻中澤餘生寄。寒故淒涼書一紙。蓬戶底。相看可有相憐計。

摸魚兒 索陳桂舫孝廉寫村居圖扇

古咸平數椽小築。鄉村風物堪溯。柳隄槐巷尋常景。幽意也傳毫素。君儻許。爲點染。

來青粉本甌香譜。閒雲貌取。更六枳籬邊。鄰翁三兩。倚杖話農圃。郊居好。消受竹
晨花午。漫嫌歸計遲暮。沈吟後約從君問。畫裏可能同住。清汴路。夢不到。綠榕紅豆
銜杯處。低回俊侶。對幾摺疏筠。相思未抵。官閣翦燈語。

又 發桂林日再贈桂舫時與之同舟而北

散蜂銜著春無處。寥寥塵夢今醒。青羅碧玉依然好。簪組那容衰病。遲暮景。空愧負、
嚶鳴麗句紛投贈。鷗盟未冷。待掃盡煩襟。攜將勝友。敲枕權歌聽。殘冬日。漫說滄
波路永。歲寒心事堪證。湘蘭楚竹遙相待。只要一帆風正。還自省。怕漢渚。隋隄。容易
分萍梗。停驂儻肯。爲點筆重描。金梁月底。新柳幾絲影。

倦尋芳 衡陽阻雪

佩蘭怨曲。啼竹澆痕。魂斷何許。弔古人來。還是凍雲愁聚。倦雁稀迎前度客。昏鴉冷
寄誰家樹。數歸程。但梨花夢隔。扣舷空阻。念幾日。湘南留滯。窗暝棲烟。燈暗吹絮。
望眼冥迷。不到夕陽紅處。拂檻徒誇羣玉見。推篷忍看飛瓊舞。倚新詞。待催將。權歌

聲去詞成。次日示桂舫。桂舫笑曰：「德雁一職，有股仲文、顧庭槐而歎神理。」

玲瓏四犯。載雪開行，餘寒殊勁。呵凍作此途中，聞賀蔗農侍御於數日前病歿。此吾三十年素心友也。雪阻不及一面，并以志恨。

欲霽仍遲，蘸淡墨雲痕，低護輕靄。溼粉疏窗，恰是碎瓊堪愛。休笑凍粟皴肌，儘夢倚、玉林瑤界。伴冷吟、姑射仙影，多幸短篷同載。賈生祠畔曾遊處，想探芳、慶湖人在。早梅暗逗春消息，容易風光改。爭奈怨入素琴，還淚灑、幽蘭絃外。軟輦紅塵裏，茶香酒綠，此情難再。

望湘人 丙午除夕泊舟洞庭湖鹿角書所見

又嬉春畫鼓，迎歲繡旛。半湖燈舫相倚。響竹驚鴉，素波泛蟻，草草辛盤風味。六博酣歌，判教忘了征途憔悴。任遠空、一抹烟痕，冷卻君山眉翠。乘興船窗更啓，待桃符句索，彩毫閒試。奈天角孤雲，尙隔故園千里。吟香舊館，玉箋誰寄。幾日新韶，彈指。囑好夢，今夜先歸。看取梅花開未。

長相思 岳州元日

雙槳催程。半帆借泊。危樓高倚層雲。風光自好。暮景仍斜。禁他簫鼓千門。窗隙流塵。但屠蘇送老。醺醪悽魂。波泛碧鱗鱗。有天涯、詩句懷人。念珠絡藏香。繡檀攜枕。歸舟曾繫蘭津。曇花空外影。總飄然、殘夢無痕。欲話前因。應恨斂、湘娥翠顰。掩孤篷、休教字寫宜春。

西子妝慢 長江順流緩蕩日可百餘里舟人懶於搖櫂稍值風逆輒喜打戲

人隨篷腳俯仰昏昏如病酒北客尤苦之然橫翔非能速進也

帆角低垂。船舷側轉。借得橫斜風勢。畫橈容易送輕航。問終朝、亂流何意。騎危漫擬。稱倦客、閒眠偃被。蕩吟魂、笑雨雲翻覆。浮生如寄。人間世、行止由天。鬪捷非吾事。巧心妍手任營營。但忘機、狎鷗久矣。烏竿誌喜。看綰羽、飄搖北指。勸長年、好去攤錢浪裏。

驀山溪 漢口三宿燈市喧闐殊有春意

晴川黃鶴。與我周旋久。天外一帆風。破餘寒、輕裝來又。簫聲吹暖。剛是上元時。青嶂月。錦街燈。夜色明于晝。劉郎重到。往事休回首。冷落舊巢痕。想依然、燕支紅透。桃花開早。何處媚芳春。迎過舫。送歸鞍。不及長亭柳。日再渡江。枉顧者、武昌郡丞李君一人而已。

最高樓

黃塵裏。村墅半榛蕪。且幸見吾廬。春風拂面餘寒在。晨星僂指故交疏。問家中猿與鶴。近何如。也不爲柴桑三徑菊。也不爲淇園千畝竹。衰病體。愧簪裾。坐忘只合匡牀倚。行吟仍怯短筇扶。且安心。重補讀。少時書。

退菴詞

醉花間 道光丁未二月朔抵家作

一葉扁舟初著岸。荷衣今始換。慚負素餐詩。忍飽田家飯。犂鋤身未慣。芻豆恩猶戀。玉京知近遠。隔河一十四郵亭。望東華。長在眼。

好事近

一榻寄吟身。燕子頻窺簾隙。欲問南村花柳，恨孤筇無力。等閒窗外雨疏疏。幽徑蘚痕溼。忍對濃春烟景，說西風消息。

一萼紅 衍石同年贈杏花二枝，賸以妙詞依調賦謝

浣征衣，歎緇塵滿眼，無處認芳菲。隔巷遙傳，迎門一笑，還似閨苑初移。展方絮、新聲自譜，賞心事，錫白粥香時。枚館清愁，蠡湖歸夢，此意誰知。曾是曲江開好，甚珍叢折取，怨別瓊枝。斐几藏春，銀瓶寄豔，深護金屋嬌姿。算猶勝、封姨暗翦，掩紅淚、輕逐燕鶯飛。舊日名園倚處，莫寄相思。

子夜歌 自辛巳至丁未舟車南北時有紀程之作，公牘餘閒間亦弄筆積久

漸多家居輯而存之，命曰鴻雪詞，廿七年官跡聊資尋夢云。

刻溪箋，一編行記，荏苒歲華重省。寄情處，南船北馬，好句爲誰題贈。山館琴樽，河橋風月，那復傷萍梗。但相看、鴻爪餘痕，還是簡書周道，寸心堪證。試儂指天涯舊跡。

幾度雨昏烟暝。岷葛吳蕪。蠻花郢雪。過影仍留影。儘含宮囁。微侵尋霜鬢。吹冷倦羽。歸飛片帆。催卸纔始吟魂定。按新聲。小拍紅牙。喚教夢醒。

慶春宮 題仇實甫漢宮春曉圖卷

野雉亡來。哀蟬吟後。漢宮別樣春光。玉樹周阿。金釘銜壁。粉雲浮動花香。舞裙留住。趁殿角。西風未涼。班姬何許。空裂齊紈。掩袂情傷。繁華過眼滄桑。沙麓元城。妖讖難防。傳詔紛馳。持弓闌入。做成文母禎祥。仲卿書奏。累長信。輕拋淚行。誰移炎祚。休說當時。禍水昭陽。

浣溪紗

近市翛然晏子居。藥闌迴合。槿籬疏。慣看烏雀下階除。載酒斷無人問字。打門恰有吏催租。到家翻遣客懷孤。花落花開。鎮掩門。忘機不識繞街塵。寂無餘事稱閒身。梁燕依然同逆旅。鄰鶯爭解喚鄉人。悔將心跡託歸雲。

舊侶分張喚奈何。涼秋無夥到烟蘿。獨絃彈斷不成歌。

眼底曹蜍生氣少。耳邊莊

蝶寓言多。此情容易隔天河。

情話漫尋潘騎省。清芬誰

客有君房妙語言。揚州騎鶴興翩翩。傾身障籠總堪憐。

誦陸平原。悶思陳事一悽然。

酸棗河傾憶昔時。洪波吟得阮公詩。十年風景幾遷移。

暗草螢飛倉史墓。陰廊鬼

語信陵祠。等閒牲醴祀屠兒。

咫尺僧寮環塔址。兩三村

詞賦梁園久劫灰。遊人還問孝王臺。多因帝子解憐才。

舍傍城隈。已無餘地館鄒枚。

輭繡天街舊有名。九君傳序費經營。至今猶說宋東京。

一穗冷烟春錦閣。半灣流

水翠芳亭。上河圖畫不勝情。

玉樹瓊枝感舊因。教坊歌罷暗傷神。不堪洗面藉澆痕。

青蓋辭吳猶愴惻。華亭入

洛尙酸辛。重瞳那作汴州民。

金字心經施上方。澄心遺蹟付滄桑。累他嬪御祝空王。春水東流如夢寐。秋風西

塔剩淒涼。一花垂淚佛前香。

三黜何勞賦謫居。芝蘭香冷寸心孤。鷄鳴草草歲云徂。勇退漫思綿上隱。生存休

問茂陵書。紫垣還記舊人無。

樂府東都迴出塵。小山以後數清真。風流秦賀足消魂。橋柱枉逢題字客。旗亭無

復按歌人。嬾邀明月認前身。

十載宣南夢裏家。珠巢彈指卽天涯。可知宮樹不棲鴉。一榻沈吟淇上竹。數枝惟

悴洛陽花。冷筇閒倚望京華。

女冠子

蛺蝶珠箔。咫尺五雲樓閣。望參差。蓬島千齡藥。華陽十賚辭。傳情金帶枕。倚醉玉

交卮。不是鸚哥語。有誰知。

蝶戀花

心日齋詞

禱雨靈壇烟篆細。甘露金瓶。幾滴耕夫淚。眠夢阿香醒也未。焦原渴望雷車至。蜥蜴曾無窺管智。一紙官符。入甕難迴避。繡閣丹砂需點臂。蟲蟲管甚閒公事。

減字木蘭花 涼棚

杉竿幾柱。細篾疏筠相綰住。小簾微涼。不許西樓到夕陽。輕陰夏五。底事梅炎偏易雨。雨亦堪聽。畫舫江南憶此聲。

太常引

塵沙拂面阻清遊。長日下簾鉤。誰倚鈿箜篌。儘彈出、新愁舊愁。朋尊冷落。詩懷潦倒。排悶強登樓。風柳一枝秋。認當日、烟花汴州。

燭影搖紅 己酉元夕

三五良宵。乞漿且喜年逢酉。祇今無復萬枝燈。也自游驄驟。迤邐瑤街左右。鬧蛾兒、盈盈茜袖。玉梅香暖。爆竹烟深。聽殘蓮漏。春日春盤。翠尊不用清歌侑。等閒留住。月嬋娟。相伴啼鴉後。屈指韶光暗逗。儘安排、尋花問柳。鳳簫聲裏。願得年年。歡娛依

舊。

鬪百草 荼蘼作花甚盛詞以賞之

薄暖庭階漸長天氣韶光老。閨苑移根。翠陰壓架。千朵粉雲細裊。認幽姿、恰淨洗鉛華。天然娟妙。更嫩蕊含風。濃芬裊露。伴人清曉。還是尋香蝶趁。摘豔蜂忙。那說一年花事了。梨夢酣餘。柳綿飄盡。宴飛英、芳尊自倒。淵明語得稱心時。固爲好。漫相惱。任西園、杜鵑喚早。

錦堂春慢 庚戌春仲小住都門適俞壻香屏在京候禮部試三年之別相見

甚慰惜余過歸在卽不及留待榜發因填此解

葵藿孤生。菰蘆槁項。十年重踏京塵。幸天涯萍梗。握手情親。往事傾談未盡。清愁別袂仍分。算虹橋路迴。鶴蓋陰濃。難著閒身。鏡蓉佳識應準。但驪駒催喚。欲住無因。望切泥金好語。早寄衡門。射策君宜上第。看花我愧陳人。問新鶯隊裏。舊曲誰知。山抹微雲。

曲游春 道旁短垣中。緋桃餘花數朵。妍媚可悅。如使移植都門。必當忙煞。遊春車矣。

一水疏籬映。見小桃朱朵。牆角低亞。麗質天生。甚芳根偏寄。冷烟茅舍。休問量珠價。夢不到。玉樓瓊榭。儘露華。啼溼東風。肯學杏紅偷嫁。妍雅幽懷暗寫。似空谷佳人。塵外瀟灑。可惜啼鶻。喚仙山歸去。倩妝輕卸。嘶騎閒門下。更誰記。乞漿餘話。無奈燕麥玄都爲伊恨惹。

木蘭花慢 詠柏鄉店舍柳

怪當門細柳。見行客似依依。記檀板徵歌。金尊喚酒。翠繞香圍。芳菲舞腰倦倚。正三眠。三起泥人時。消得天涯別恨。渭城一曲新詞。淒其花月舊情。非烟穗。只低垂。歎尋春年少。何人解憶。當日顰眉。禁持峭風暗翦。便章臺瘦盡。有誰知。指點黃昏院落。暝鴉飛上空枝。

徵招 今春恩遽赴都衍石過我敝別辭色慘然有異疇昔心竊訝之未幾余

歸而君竟以病歿。素心人往。誰與數晨夕者。悽矣。

北山偶爾停雲出。愔愔暫分吟袂。話別未移時。早嚶鳴人逝。舊盟今剩幾。忍重溯紫垣遺事。四十三年。澹烟清夢。暗飄燈穗。棄置竟何心。江鄉路。難尋狎鷗閒地。千卷史公書。儘周南留滯。卜居辭漫擬。已零落。蕙纈蘭佩。廣陵散。一曲哀彈。歎古音誰嗣。

雙雙燕 嘲燕

柳塘杏苑。認當日輕盈。漢宮姝麗。斜風一翦。弄影愛尋羅綺。久住芹泥舊壘。又貪說。烏衣門第。終朝絮語呢喃。那識投懷深意。前事。吾廬曾寄。待小院開簾。更將春至。翩翩何許。慣向玉樓凝睇。王謝雕梁任倚。但秋社。光陰能幾。從他錦字傳箋。空惹故人清淚。

滿江紅

甚矣吾衰。七十載。光陰虛擲。曾幾度。春來秋去。曦輪已仄。脈脈徒懷塵外想。悠悠終是人間客。憶東塗。西抹少年時。嗟何及。雞與鶩。從爭食。蚌與鷗。從誇力。但相看。

笑馬牛風隔。長慶詩筒餘。昨夢永和禊。飲成陳跡。歎曹劉、沈謝盡消亡。今誰識。

河傳

錦浦佳處。浣花祠宇。梅柳成行。掃眉人去。還見金井叢篁。繞迴廊。勝遊爭免天涯。

感衣香減。羞說緇塵染。輸他仙侶。依舊蓮燭分光。賦長楊。

湖上烟浪搖搖。畫槳事逐春移。蘭閨扶病。心緒花落鵲啼。弄妝遲。六橋風景成虛。

擲青鸞翼。一去無消息。水仙鄉裏。迴首玉局荒祠。斷腸時。

滕閣帆落。烟光澹泊。山色空濛。烏鹽一曲。新譜催唱玲瓏。醉魂中。落霞孤鶩年光。

換蘋沙岸。寂寞閒鷗伴。庾塵不到。何事腰扇。恩恩障西風。

黃鶴城郭。笛聲依約。吹盡寒梅。東君有意。還許輕燕飛來。繡簾開。箇中心事沈吟。

久。曾知否。夢冷鴉啼後。萍漂一葉。閒倚江上樓臺。暫徘徊。

嶺外誰在。湍流水帶。峭立山簷。家園春色。空倩幽夢重尋。瘴雲深。漫拈遷客傷心。

句。蠻江渡。幾見人歸去。秦郎已矣。留得子夜哀吟。古藤陰。

又 祝九宗伯枉過戲贈

十弓地小。遣吟情種得。尋常花草。吠影吠聲。那禁羣兒相告。說平泉無此好。長安
貴客心傾倒。來便窺園。寓目翻成笑。鳩拙一枝。誰向宮鶯傳報。誤煞人。秦吉了。

聲聲慢 風雨通宵籬菊損敗感歎成詠

亭亭素豔。惻惻孤芳。禁他風雨摧殘。老圃秋容。爭信晚節艱難。東籬慣招舊隱。記金
英。簪鬢曾看。尋步屨。甚啼蜚壞壁。怨語更闌。還是題糕人在。奈子安序冷。元亮吟
慳。夢遠湘皋。誰念楚些哀彈。重陰望中未解。寄清愁。何處南山。松徑裏。願香心。同保
歲寒。

漢宮春 汝筠率孫輩頻年督勇剿賊今以韶關解圍均獲遷秩感恩述事賦

此寄筠

嶺上梅枝。送春風芳訊。直抵吾廬。陵江一軍獨進。淨掃萑苻。鳴琴未幾。便承恩。五馬
前驅。比當日。東山折屐。老懷欣幸奚殊。恨恨潢池盜弄。奈衰齡蹇足。空守鄉閭。行

間代余宣力。賴爾諸雛。角巾私第。待他年、鳩杖歸扶。還試問、元侯經訓。何如黃石公書。

甘草子 題畫三闋

歸去。一葉扁舟。卻問歸何處。衰柳不成行。冷落蒹葭浦。風利漫歌公無渡。便萍梗、有時須住。莫向南村素心侶。話五湖烟雨。柯丹邱風雨歸舟

留春令

小山疏樹。墨痕輕染。幾重烟翠。石徑縈回。一亭孤倩。傳出幽人意。彷彿前遊如夢裏。尙漁舟閒繫。曲港斜通。武陵溪。問曾見、桃花未。倪雲林溪亭山色

卜算子

白石蘚紋滋。綠竹烟痕淨。何似崇岡百尺梧。一碧凝秋影。認是雅琴材。古調無人省。儘有高枝待鳳皇。惻惻天風冷。王孟端高梧竹石

杏花天影 大雨後戲作

官衙潦水頻頻厚。似天半、銀河漉注。道南人在下流居。最苦小茅廬。避甚處。門前路。迴汀枉渚。儘濡足。依然窘步。等閒思約故人來。浪語便無風也。斷渡。

卜算子慢 畫簾微雨。追往悼。今率成此解。時咸豐丁巳仲秋六日也。

庭陰墜葉。樓外斷鴻。根觸武林前事。七載離鸞。夢冷薰爐烟細。凝睇。枉思量。月沒教星替。奈過眼韶華。一瞬依然。春到藍尾。草草人間世。歎兩度傷心。百年彈指。倚瑟雙聲。信杏碧城十二。愁悴掩孤嘯。閒寫銀箋字。待喚取。仙山翠羽。怕深情難寄。

山花子

聞說張星本在天。何因解珮向人間。長記維舟南浦望。月娟娟。短夢乍酣春枕畔。情魂無定夜燈前。懊恨霓裳三十八。數華年。

謁金門

一葉落。寂寂西堂簾幙。桐樹心孤生意薄。非關風信惡。後夜重尋夢約。褪盡燈花半萼。斗帳香囊垂四角。春情無處著。

裙袂窄。何意飛龍骨出。秋社光陰歸燕急。錦衾人似客。未到中秋十日。月姊也應
悽惻。宛轉玉鉤清露溼。欲圓圓不得。

鄉夢促。花草長洲路熟。還是烽烟驚比屋。心傷千里目。幾日藍田採玉。幾日秦樓
吹竹。消得齊奴珠一斛。華年如轉燭。

妝鏡側。那見卷衣人立。撩眼亂紅春一色。爭教鶯語澀。道是上清淪謫。誰問青鸞
消息。帽底霜絲空自惜。玉簫難再得。

蘭畹曲。贏得淒涼滿幅。苦句今生吟已足。他生休更卜。指點山邱華屋。迅羽輕塵
相逐。蠟炬成灰鐘漏促。斷無殘夢續。

鶯啼序 用夢窗韻

鴛幃麝熏頓冷。忍重窺牖戶。夢緣短、花落鶉啼。坐惜長簾催暮。弄紅豆、何人記曲。迴
腸宛轉相思樹。甚蘭房、翻似離亭。淡烟飛絮。屈指頻年。故里道梗。尙南天掩霧。話
前事、娥月含嚙。眼穿江上魚素。耿無眠、深更漏咽。靶羅溼、愁絲千縷。枉丁寧、蓮舫同

遊錦涇鷺。萍蹤暗想。片葉天涯。幾回趁雁旅。鶴去遠。笛樓吹罷。夏口。遘歸。又添扁舟。陡河聽雨。鸞驂信杳。蜂衙香散。翩然春水。淩波襪。喚歸禽。柳色甘棠渡。從看倚竹。牽蘿半萼。青燈澹泊。肯厭鄉土。安居自適。履跡閒園。待藝麻。漚苧。奈幾載。悲笳傳恨。病骨敲牀。浣淚單衫。退紅羞舞。中秋近也。靈丹無驗。優曇開好。還易萎。動哀吟。華表誰家柱。他時青鳥飛回。鬢雪韋郎。倩魂記否。

愁倚闌令

憐花好。惜花殘。倚闌干。長向仇英圖畫裏。認家山。年來瘦損朱顏。芳心冷。鸞鏡羞看。禁得杏梁雙燕子。說春寒。鴛鍼歇。畫屏閒。病經年。可惜天孫雲錦樣。倩誰傳。羅囊舊繡依然。無聊賴。塵壁空懸。爭忍看他珠絡索。翠連娟。

河滿子

栽得幽花數種。小庭雨膩烟濃。春自天台移到。人如閬苑相逢。今日人將春去。露珠

啼碎香紅。

憶昔蒲觴飲後。驚心風鶴來時。多少朱門繡轂。怱怱絮影分飛。爭似吾家絡秀。瑣窗閒賭圍棋。

雅戲閨中裁製。春工幻作春人。粉壁空留翦綵。玉墀已掩香塵。莫向紫姑說與。紅箋應也銷魂。

醉垂鞭

莫唱望江南。娃宮柳。沈吟久。烟外影鬢鬢。清霜知未堪。魂歸應戀此。虛廊倚。舊香沾。悄試藕絲衫。防他珠淚淹。

惜雙雙

梁燕依依成伴侶。誰遣把、離愁深訴。江海漫惜歸去。隔年春社還相遇。獨有巫峯天外路。無計使、行雲留住。三點四點更鼓。畫簾聽盡瀟瀟雨。

水龍吟

丁巳冬仲俞壻自南康返浙道出汴城信宿別去悒快累日賦此以

遣悶懷

病餘心事闌珊。英英潤玉欣來至。奚奴傳報。馬嘶門外。鵲喧檐際。茸帽衝寒。塵襟浣雪。頓寬離思。奈停觴語促。倚闌望久。欲留也。渾無計。枉說燈花太喜。被春風等閒吹碎。春如有約。人應依舊。關河千里。短燭心灰。歸鞍目送。斷魂潮尾。但摧頽一老。殷勤執手。灑臨歧淚。

石州慢 落花

欲雨還晴。春色正妍。遊興方引。綵旛幕地。飄搖多事。曉風吹緊。東君薄倖。空負燕約鶯期。無端輕送韶華盡。仙子玉峯來。又催迴蘭軫。愁損蜀箋題字。吳舫傳杯。少年青鬢。已是淒涼。那更翠凋紅隕。冬郎好句。留下千古傷心。人間易得芳時恨。忍見葬花人。掃苔階香粉。

摸魚兒 丁煦洲先生索題某司馬湖莊福隱圖

占幽居。六橋東畔。天然柳港花鵑。書樓掩映。窗三面。咫尺翠屏雲聚。攜勝侶。算福地。

仙鄉最好詩人住。吟情漫與。怕竹馬迎來。金魚挽定。未放使君去。空中想指點劉郎前度。盟鷗今在何許。卅年影事。怱怱過。誰訪綠苔題句。清夢阻。更那得片帆吹到江南路。披圖認取。但欄角聽鶯。船唇載鶴。尋我舊遊處。

阮郎歸

綠雲鬢倚小桃枝。盈盈把袂時。玉簫吹作鳳雙飛。春光無盡期。仙夢短。俗情迷。翩然一鶴歸。人民城郭是耶非。傷心丁令威。東風吹冷碧桃花。塵心枉自嗟。合歡袞外卽天涯。誰教歸興賒。尋故步。趁丹霞。仙山路未差。願持鴉觜種胡麻。從今休憶家。

采桑子

暮笳吹送江南怨。遠信模糊。噩夢踟躕。烽火連天照海虞。舊家門館知何似。斷柳啼烏。破瓦奔狐。留得東陽子姓無。檀郎歌管淒涼曲。歎息清門。月冷烟昏。一霎昆明劫後塵。世間何限傷心事。漫說

眞眞。早歲離魂。免得思家積淚痕。

左芬書問經年斷。南雁飄零。又說吳興。日夜風傳唳鶴聲。昔年避亂棲湖漚。烟水淒清。今日伶仃。可許荒灣寄此生。

更漏子

庚申歲杪密雪經旬中庭積厚四五尺平生所未見也

篆烟沈燈炷落。愁掩夜寒簾幙。天黯澹。路冥迷。征人何日歸。喚春回。春未醒。誰念玉梅香冷。殘歲逼。暮雲深。休聽玄鶴吟。

金縷曲

賣宅

燕子聞長歎。甚怱怱。廿年安宅。夢緣能短。曾是翠尊遊息地。苦被啼鶯催散。且休說。仙源深淺。洞口雲來迷處所。悔當時。只作尋常看。枉回首。畫欄畔。嫣紅姹紫閒栽。徧。到而今。亭臺易主。舊歡空戀。從此春風無路入。那見小桃人面。更誰與。金荃歌按。可惜好花如好婢。向人家。看賣牙郎絹。重爲汝。淚痕濺。

水調歌頭

辛酉三月廿七日移居文殊寺巷所謂蝸角蚊睫又足相容者也

卷以文殊名然止有清眞寺並無文殊寺

往事過駒隙。末路寄蝸廬。不知簞食瓢飲。陋巷較何如。小植紅桃綠柳。閒縛茅籬竹。柵。幽夢蝶蘧蘧。朱紱者誰子。門外已迴車。鄴侯井。徐穉楊子雲居。翩然捨去。聊可著論擬潛夫。昔日天花彈指。今日緇塵滿眼。香界久榛蕪。我有數椽庇。猶足傲文殊。

鷓鴣天 病中夢一人鶴骨嶠然自稱王聖與來問余疾余方驚起醒然已寤
平生傾倒中仙或許把臂入林耶。率拈小詞記異

仙侶何因證舊歡。素屏涼影有無間。三生石泐情長在。半萼燈孤夜未闌。蛩語寂。
鶴聲閒。片雲從此謝塵寰。憑誰訪我棲眞地。黃葉蕭蕭玉笥山。

種芸仙館詞

三種

運彰



馮登府（乾隆四八——道光二一）

字柳東。號雲伯。又號勺園。浙江嘉興人。嘉慶庚辰進士。以庶常改授江西將樂縣知縣。因親病去官。服闋後。教授寧波。劬書媚學。著述甚多。阮元徐士芬等爲之付刻。工詩詞雜文。有石經閣集。

種芸仙館詞

嘉興馮登府雲伯

花墩琴雅

憶舊遊 京口渡江

忽帆移岸走。濤挾山奔。萬里長風。一舸頻呼渡。如驚沙篠下。亂蹴晴空。三山遠排天外。七十二芙蓉。正日浴黿鼉。雲翔鶴鶴。笛吼魚龍。冥濛迴望處。笑一霎江行。樹失千重。便欲乘槎去。認南朝烟綠。東海霞紅。江山尊俎非昔。秋色又相逢。漸酒醒潮平。前津已落瓜步鐘。

金縷曲 夏曉同蔡甥圃孫甃社湖觀荷

何處涼風散。墮微茫。一痕殘月。銀塘清淺。秋影如奩清無縫。曉鏡四圍鋪徧。儘付與閒湖句綰。七十二陂鷗睡熟。望江南。鄉夢都搖亂。悵水遠。更山遠。明璫翠羽愁無限。剩多少。寺門斷柳。雨疏烟懶。沙嶼花汀隨處有。難得拏芳作伴。也不用玉簫金管。

露坐鬧紅單舸裏。勸荷筩。幾曲菱歌緩。唱酒滿。復花滿。

點絳脣 和李篁園澧詠小

楊柳腰身。錢塘門外鄉親是。無多眉子。錯認喬家姊。
憐也橫陳。嬌也偏纖細。芳名記。青溪年紀。有箇郎還未。

沁園春 題李上舍壽昌知己圖

大抵人生。心之難同。如其面焉。任眉間毫相。是形是影。髻中光現。非佛非仙。李白成
三。東坡凡百。月底波心總一緣。幾生矣。認修羅身量。鏡裏頭圓。閒情且自周旋。願
莫被。蜉蝣身世牽。喜悟來秋水。魚還樂也。醒時春夢。蝶亦遽然。酒聖茶顛。石兄竹弟。
知己從今不計年。君能否。約爾沮我溺。共種山田。

疏影 題稔園看鞠圖

白雲隴首。恰歸來千里。正作重九。時甫從秦郵歸。蛩歇空山。蝶冷香衣。吟情真替花
瘦。一簾寒影來尋夢。對籬落。西風依舊。訪秋根。陶徑初開。欣共故人攜手。老屋數

椽粗就藥罇。經卷外。琴史都有。古瓦斜陽。落葉新霜。那不相逢。杯酒百年香草。今蕪矣。且來認。灌園人後。稔園爲秋錦。族裔畫柴桑。門枕青溪。家近補黃村口。

滿江紅 崑山謁劉龍洲墓

斷碣山阿。嘆故國。可憐天水。想魂銷紅拍。名驚青兕。蘆葉江寒風雨夜。金杯酒盡悲歌地。看狂來。氣岸巖辛陳。無餘子。二頃業。何須計。千金散。渾閒事。且斲肩羊腎。高歌而已。大布衣能謀一戰。小朝廷。竟容奇士。臥清風。埋插近梅花。君何死。

摸魚子 詠蓴

冒江南。幾痕烟嫩。鳧根百頃千頃。春風勾起秋風怨。碎葉不成圓鏡。呼小艇。早雉尾香囊。種比西湖勝。引來愁影。只斂股敲殘。鈿波劃破。絲雨鬢邊映。山廚供。配取羹羹滑凝。吳娘素手嫌冷。同心錦帶誰牽斷。舊夢白鷗難省。多少恨。歎流水年華。身世飄萍梗。相思猶賸。且採入。蕢洲。漁歌唱罷。涼月滿身浸。

惜餘春慢 夕陽

淡抹嵐頭微明沙尾。蕭瑟楚天將暮。半痕欲斷。幾點才斜。露出秋城疏樹。不盡千山萬山。一片殘暉。亂雅馱去。趁征人馬背。鞭絲影裏。倦扶歸路。蚤又見。腰笛吹殘。荷鋤話晚。指點荒村何處。古寺紅牆。江亭白舫。都爲酒人留住。莫問銅駝故宮。金粉飄零。六朝誰主。正寒烟衰草。淒迷凝遠。倚樓無語。

疏影 燭淚

相思一把。卻愁人對坐。悄翦燈夜。側滿銅荷。開落金錢。含辛幾穗花燧。西窗重話。巴山別。奈窗外。雨聲齊下。滴離心。鳳蠟千行。還道不思量者。苦憶十年擁髻。淒然無睡裏。背影鉛瀉。照不分明。縱使成灰。點點何曾乾也。半生慣受風簷恨。便玉玢珠拋拚罷。替誰人。垂到天明。莫染舊時裙袂。

聲聲慢 闌干和郭頻伽塵

藥闌遠近。花館參差。妝成彙曲偏長。卍字分明。更看亞字分行。依稀那家院子。露紅

涼月暗花疏。忍教獨倚。思量愁腸幾回斷後。恨無聲拍遍。斂梁凝望久。想吟魂還在畫廊。

臺城路 香篆和頻伽

駝鉤不放霏霏影。依條結就雲字。貝葉斜翻。迴文細裊。宛轉看來如意。白蓮葉底。怕鷓母催成。同心燒未。懶撥殘爐。簾波浸溼。悄垂地。柔腸替伊寫出。恐被風吹斷。翦雲難寄。半炷才完。一絲又上。迷了薄金窗紙。紅篝倦倚。記如夢如烟。背燈愁裏。枕畔蘅蕪。冷灰飛不起。

轆轤金井 瓜燈

冰園雨黑。映瓊瑤。逗出一痕秋影。製就團圓。滿瓊壺紅暈。清輝四迸。正蘚井寒漿消盡。字破分明。光浮細碎。半丸涼凝。茅庵一星遠近。趁豆棚閒挂。相對商茗。蠟淚拋殘。怕華樓夜冷。西風細認。願雙照。秋期須準。夢醒青門。重挑夜話。月斜烟暝。

祝英臺近 和張堯民昌衡詠蝶

玉腰奴金鬪羽。溼了一身雨。便到春來。卻被春陰誤。相思花枕餘香。化成癡夢。奈連
夢也無尋處。銜芳絮。休問綠草南園。雙飛更雙舞。伴著鶯魂。游倦睡芳圃。只留百
簇猩裙。裙猶褪樣。又何況。裙隨仙去。

漢宮春 長生無極瓦硯

六百鴛鴦。是何年分散。一片魂香。休問生生世世。長樂毋忘。西風殿角。正人間。秋枕
淒涼。君不見。銅仙去後。幾堆荒草斜陽。仿佛金簾玉帳。伴未央宮裏。歌舞歡場。只
願高王妃子。地久天長。相思鑄錯。認團圓。字字回腸。歎照盡。漢家明月。蟾蜍汨落千
行。

苦相思 詠琵琶美人

霜落潯陽楓葉醉。熟鷗夢。烟和水。聽一曲。琵琶弦乍理。彈出也。聲聲淚。彈罷也。聲聲
淚。翠袖青衫都老矣。只各自。思鄉里。問送客。江邊何處去。秋正在。蘆花裏。人正在。

蘆花裏。

齊天樂 江南道中賦秋聲用樊榭韻

風刀割斷揚州夢。江城一夜催發。雨碎蕉心，霜噴笛孔，併入沙汀蘆葉。聲聲遠接。悵倦客登樓，青山一髮。啼盡寒烏。江南千里人初別。蕭條不禁旅鬢，郎當風鐸裏，相和鈴鐵。烟浦鴻歸，寒江潮打，無限南朝悲咽。欲聽又怯。正中酒心，餒秋時節。起覓疏林，滿身涼浸月。

鳳凰臺上憶吹簫 秋夜有感

修病情懷，悲秋世界，淒涼忽送檐鈴。悵冷眠獨夜，落葉門扃。孤枕西風樓角，忍敲殘六曲湘屏。思量甚，窗眉月黑，帳額燈青。飄零。翦刀聲裏，想未寄緜衣，玉指難停。梅癡有九月，緜衣還未寄，指環肯放翦刀寒句。慣累佗夜雨，不要多聽。一自楓根臥後，芳魂斷，百喚無醒。重尋夢，十年難記，記也零星。

又 題梅卿倚梅圖遺影

就雪吞香，和雲討夢，苔冰冷透鞋鞮。愛修簫伴侶，落月參橫。不枉孤山夫婿，人間世、

來證前生天寒也。牽蘿補屋。翠袖飄輕。卿卿花身冷靠。爲想到空山。獨立凝神。自
題有雪影。壓殘烏夢。月痕冷。靠花身句。奈仙雲易散。花落無聲。彷彿吟魂。淒現生綃
裏。頻喚眞眞。淚重疊。春風一年。哭盡流鶯。

臺城路 秋草

池塘夢綠。西風裏。詩情者番多少。翠影偎蛩。紅心怨蝶。昨夜江南秋到。踢春路杳。記
暮雨清明。酒澆蘇小。隴笛聲中。吹成牛背夕陽照。淒迷烟冷一片。認六朝金鬪。舊
恨都掃。野火空山。殘螢身世。無限荒堆寒峭。天涯客老。悵頭白王孫。幾時歸了。莫唱
蘼蕪。斷魂仍遠道。

浣溪紗 楊花

雪暖江南愁煞人。綠楊晴絮滿金城。東風如夢了殘春。流水難消輕薄怨。落花同
是別離身。畫闌飛遍總無聲。

沁園春 泥美人

彼美人兮。霧鬢雲鬟。何爲泥中。想雪花裝出。半稜眉翠。裙沙搓就。六幅羅紅。妒婦津頭。望夫山下。俊眼風塵若箇逢。殷勤護。恐風飄雨泊。消損芳容。憐它碧玉惺忪。只一點。靈犀不解通。恨慣沾飛絮。愁腸難浣。倩馱細馬。醉態偏工。濁水因緣。蓮花身世。一跌須防色相空。儂家住。指曹王古廟。武阜西東。

滿庭芳 金銀花和頻伽

鄭芍分香。蜀葵割錦。榆錢賒斷東風。纖條半架。低冑翠庭中。偏是山家照眼。短籬根。斂股惺忪。仙珠綴。桐君細錄。採入藥花籠。討春春盡矣。小園買夏。風露初濃。問誰家池館。香夢朦朧。幾尺鷺絲藤底。涼月浸。影絡重重。蒸芳液。滴殘銅淚。夜火竹爐紅。

惜餘春慢 綠陰

一片冥濛。數村遠近。家在江南何處。采蘭渡口。賣杏樓前。忘記來時花路。但見山邊水邊。幾陣溫風。幾絲穀雨。想心情兒女。者回夢溼。舊紅拋去。又早是。蝶後蟬前。梅肥筍瘦。商略桐陰涼語。鶯身偏穩。燕尾能抄。只恨闌干遮住。不斷長亭短亭。隔著相

思暮雲千樹。話吳娘蠶市。斜陽梯影。聲聲桑斧。

疏影 帆影

天涯一片。指飄揚渺渺。峭影如點。淡曳江烟。暗逐江雲。波心半幅推滿。船窗似畫看山好。鷦恰被夕陽遮斷。過橋陰。卸了篷竿。白鳥明邊又見。難寫迷離客緒。渡頭佇望裏。千里凝遠。欲落猶斜。乍隱潛移。細雨誤人歸晚。最憐十丈高懸處。全不怕。西風吹轉。趁晚潮。蘆荻蟲聲。帶月野塘飛遍。

又 螢影

藕花庭院。訝星星瞥墜。織尾零亂。牆角拖青。草腳分紅。秋宵幾點吹散。溼痕界破蕉衫上。惹拂袖。重重尋遍。向畫闌。小扇輕兜。剛被西風吹轉。隱隱殘根低露。新涼纔逗處。掠水偏遠。暗月池塘。冷屋琴書。仿佛離魂。淒現餘輝。一縷拖烟去。又滅沒。樹頭飄斷。歎隋宮。夢裏荒臺。千古照成幽怨。

又 花影和吳螟巢展成

疊陰細路。愛吹笙畫靜。槐日當午。碧玉惺忪。翠鳥迷藏。臨風不定低舞。分明遮向闌干曲。記小別、深深前度。浸苔衣、壓住春愁。篩滿一簾紅雨。篆籀重重交映。淡烟輕曳後。又遍窗戶。漫想橫陳。解唱玲瓏。幾度尋思偏誤。朦朧照破微雲夢。曾窺見、那人眉嫵。待半丸、月轉牆腰。留與蝶魂棲住。

城頭月 題亡婦梅卿南柯子詞後

唐詩一卷曾親授。紅豆雙聲就。簫局偃寒。紡車絮雨。夢也休回首。蘆簾十載爲新婦。草草分離驟。寫韻樓空。修簫月冷。總是斷腸候。婦有隨月樓殘稿其寒夜南柯子云細點瓜蠶譜間栽蠶草花三年爲婦償貧家且喜蘆簾紙闌手同又獸火溫蕭局蛾燈罷紡車戲他小女縮雙丫嬾放蠶針今夜較寒些

一枝春 洋畫扇

一握桃枝。問玲瓏、誰向東瀛攜到。落魂橋畔。想像蠹窗製巧。疏媒渲染。認金粉、樓臺瓊島。對咫尺、萬里蒼茫。搖漾海天懷抱。匆匆梵字題了。拂門鏤樹底。秋風涼峭。梅

花九子。別有歡斯新稿。唐船遠販。指天際。蠶帆歸早。試比似。畫苑南朝。輸他纖妙。落
魂橋九子梅。見日本碎語疏媒墨也。歡斯流求族姓。

水龍吟 江行見漁火

庫篷移過前灘。漁燈三兩稀疏見。荻叢缺處。蓼汀明外。雨催紅閃。斷激高低。江樓隱
翳。人家一片。指水西。那曲潮生風定。飄點點。蘆花亂。夜泊吳船已慣。對蒼茫。照成
悽怨。烏啼月落。冷楓橋寺。愁眼無伴。答答柴門。霜天歸晚。水村寒漸。隨殘星到曉。蟹
簾收盡。更無人管。

南浦 蘆花和屠梅西雲堯

秋雪一窩涼。繞荒汀。飛花飛絮遮斷。葉葉復梢梢。天涯望。惆悵伊人何限。寒沙影裏。
一繩忽下湘波雁。滄洲愁晚。任吹老西風。更無人管。江湖小泊蒼茫。正露曉霜濃。
高低漫捲。夜火蟹簾紅。釣船笛。吹過前灘聲遠。蕭蕭深處。幾家漁屋尋難見。鷗牀夢
徧。記兩岸蟲喧。半九月暗。

疏影 蠟梅用茶烟閣黃梅花詞韻

謝家庭院。逗蜜犀花訊。燭底休翦。冷怕香消。丸就相思。莫被蜂奴偷見。幾回索笑還教住。恐黏著、春心難展。對夕陽、半額塗黃。長憶漢宮人面。磬口偏開水口。嫩寒封不住。浮影清淺。月淡初昏。衫袖輕攏。豔入坡仙吟卷。素心細嚼寧無味。忽碎作、淚珠千點。製蠻箋、研取橫枝。卻勝海藤烘染。

金縷曲 題李太守宗傳海上釣鰲圖和穀人前輩韻

足踢芙蓉碎。著紅衣、三山獨立。天雞鳴矣。十二昂頭排陣出。不信一鉤能制。收風力、全身輕繫。碧海明霞珊瑚網。掣鯨波、別具瑤龍技。濠上樂、等如是。錦袍邀月前身李。趁東游、釣鰲磯畔。樓臺曼戲。時方樓篆嘉郡魚國不驚蛟石舞。一笑壺天共醉。算只有、神君能替。海岳胸懷蓬萊骨。拋漁竿、莫話秋江鱸。萬里客、正豪耳。

石湖仙 題王司寇述庵先生三泖漁莊遺冊卽和穀人前輩叶

青蘆秋翦。問古汝荒灣。門外潮淺。別是一漁家。尙認得、柳絲花片。鱸肥葦脆。記白髮、

紅衣歸晚。淒斷。咽冷波、身世流轉。百年遺書能守。捻香厨、烟銷霞浣。蕭復園林。一半拚償官券。春水來鷗。雪泥去雁。依然楓岸。琴書展。遠峯數到九點。

尾犯 筓

櫻桃新雨。驗翠胎早孕。犀株先露。昨宵一道。輕雷送便。脫絢無數。銜蟬狸玉。漸引到、鄰牆去。趁上番、燕子飛時。參差綠徧茶塢。最憶麥秋桐暑。滿筠籠。販水渚。看采桑梯畔。挑菜籬邊。泥香須護。好配花豬煮。記山寺。翦燈夜語。且休咒。半月南風。疏陰遮滿窗戶。

臺城路 新柳

永豐西角星纔曉。春光一絲先泄。淺不遮山。弱還離水。作暖弄陰時節。濛濛翠抹。指細雨江亭。斜陽烟堞。寒食明朝。桃花門巷聽吹笛。風情休憶年少。慶奴應老去。扇影淒絕。燕舞難禁。鴉棲未穩。幾度那堪攀折。東風一霎。又綠徧河橋。送人離別。眉子新翻。淡黃初見月。

卜算子 紫琅山中曉行

乍過水邊邨。已失烟中路。馬上霜濃月未沈。歷歷疏城樹。
秋盡尙聞鶯。林黑須防虎。亂水荒山不見人。盡日紅綿雨。

南樓令 題王徵君豫曲江圖和穀人前輩叶

鄉占白鷗寬。江光檻外看。作秋聲、蘆荻催寒。一面翠屏三面竹。結草閣、住方干。沽酒踏沙乾。漁家共往還。約樵青、烟語同參。留待他年春水漲。準舊夢、理雲帆。

徵招 瓜子追和王述菴先生

一丸沈綠寒漿盡。勻圓滿瓶深貯。已字喜排成。勝蓮房心苦。番番還鬥取。配茗戰、若娘風趣。碧盃分攜。玉纖細擘。儘消閒語。休負酒邊客。花前友。好供金蕉情緒。幾度卜秋期。慣背人暗數。吳兒頻乞與。笑阿囡、呼來休誤。莊門坐。炒豆香時。共橋西聽雨。

滿江紅 癸未四月十六日散館一等改官閩中留別都下諸同年

一枕蒼騰。驀催醒、春婆夢早。也莫問、得時歡喜。失時煩惱。風好已通蓬島路。水空忽

換霓裳調。想君恩、只許住三年。瀛洲渺。詩書債粗完了。功名事、渾難料。看策勛青鏡頭顱催老。仕本爲貧寧厭俗。祿猶逮養何嫌少。試今朝、騎馬作鹿官、由佗笑。

又 京口渡江

楊柳依依是送我。春風來路。驀換了、蘆花頭白。江干日暮。夜雨難忘京口酒。夕陽又喚瓜洲渡。指六朝、陳跡莽蕭蕭。山無數。也曾擊龍門鼓。也曾策鼉頭舞。恨仙山樓閣重來偏誤。漁笛不驚鷗鷺夢。釣竿欲拂珊瑚樹。問江潮、消長是何心。波無語。

百字令 七里瀧和樊榭韻

一星今古。向嚴江、遙認故人芳躅。四面畫眉啼不斷。祇在白雲叢竹。亂石穿沙。暗泉生雨。漁唱前汀續。此時高臥。閒鷗留住同宿。迴望夕照西臺。補脣晞髮。來伴風流。我亦清狂。還故態。欲借松門茅屋。波靜魚跳。月涼鶴語。著箇烟蓑綠。山靈無恙。仙鬢疑響空谷。

如此江山 江山船

春波不管人離別。一篷載將愁去。畫箔低遮。玻璃軟盞。祇共鶯歡鷓。勾留漫許。對柳黛山眉。水魂烟語。聽打蘭橈。嚴州不住。睦州住。回頭七里臺遠。學青山兩鬢。盡鏡偷注。翠隙傳杯。紅深度曲。都是曾聽伊處。萍圓絮聚。趁好夢輕帆。楊花暮雨。流盡相思。春江催杜宇。

滿江紅 劍溪舟中作

惡浪排空。挾怪石、掀天而舞。任終古、虬盤蛟橫。鼉噴龍怒。萬派神魚圓溜折。一篙風力收難住。疊愁波、是處劍鏗山。真危渡。打不得。回帆鼓。捲不盡。驚沙雨。但喧騰一擲。心顛魂簸。開鑿未完神鬼事。乾坤餘恨猶吞吐。借仙帆、引我舊蓬萊。茫無處。

百字令 松溪雨泊寄懷故園

春帆細雨。向白雲罨畫。孤舟初泊。兩岸竹雞啼不住。露出幾家村落。荔石橋低。松毛屋矮。莎徑通幽壑。漁郎唱櫓。一蓑烟影堆綠。爲想紫草荷田。白榆茶社。春晚江鄉樂。底是田園輕別去。甘受一官束縛。百二蓮灘。三千榕驛。枉自誇腰腳。草堂資辦得。

歸休笑猿鶴。

桂枝香 西施舌

暮潮初上。趁腥風。涎雨千絲結網。俊味柔鄉。想到捧心顰樣。一錢吳市空拋得。喜宵分、玉尖肯餉。纖紅細嚼。伴伊蝦菜。蠶湖烟漲。記當日、含香曾賞。任舞繡歌雲。三寸無恙。酥乳同呼。兜住春江錦浪。香螺五色。須分配。解清饑。苧蘿村釀。落花時節。蛋娘笑語。親調越榜。

慶清朝慢 謁白公祠

魚鳥句留。湖山管領。唐朝風月依然。舍人遺愛。行春五馬。年年儘自誇他仙吏。簿書攜上裏湖船。隔江有故人元九。結個詩禪。不數紅闌三百。記茶香酒釀。刺史花天。笙歌畫舫。何似楓葉江邊。可惜楊枝放了。春風飛盡六橋烟。沙隄外。新裙妙伎。來舞芭筵。

百字令 謁林和靖墓時重葺巢居閣

梅花無恙認西湖吟趣。往來芒屨。濃淡嵐光清淺水。只愛寒窩簾幕。一鶴能招孤亭不改。重見香茆縛。月明何處。泉聲自語幽壑。爲想簪玉難求。空山長往。小住巢雲閣。眷屬神仙標韻在。輸與全家栖託。牧笛風榛。柴門秋草。世外招尋樂。詩心定戀。夕陽紅到茶角。

柳含烟

絲雨連朝春事方謝。數門枯坐吟趣轉愜。

落花瘦。苦梅肥。一院惜惜愁倚。闌干閒煞上苔衣。蝶來稀。輕暖輕寒渾不准。又是
麥秋風信。阿誰亭角悄尋詩。沒人知。

齊天樂 西湖初夏

一湖涼翠蛙喧雨。惜惜梅丸肥候。芍藥田荒。櫻桃夢杳。憶到采香人瘦。段家渡口。趁水暖眠瀉。橋低覆柳。聽唱瀟瀟。遠峯眉黛鏡邊皺。樓臺渲碧已換。冷波荒汊外。俊賞都負。鶴老亭空。鶯啼寺遠。付與綠陰間書。畫闌記否。但茶角尋烟。荷心喚酒。送盡游船。棟花開落後。

琵琶仙 三潭放生池舊有德生堂飛沫亭故址久湮帥中丞承瀛林觀晉則
徐前輩謀於杭士爲復其跡石闌百折紅亭四圍水風不波新蘆自語悠然
有濠濮間想余以四月十六日薄暝櫂舟湖心月出如金盆潭翠欲飛老魚
起儼四山盪碧恍照見水晶宮闕摺笛臨風不覺冰壺濯魄也

縱有千金誰解買一片湖心明月。又況月印空潭。潭潭月不缺。祇容我扁舟來載。冷
雲外羣峯翠合。一鶴橫江。萬星墮水。漁唱爭發。憶曾住玉宇高寒。恁舊夢霓裳早
銷歇。流照江湖身世。祇閒鷗能說。把酒問蟾蜍幽怨。問甚時換此仙骨。無奈颯颯天
風吹成華髮。

高陽臺 吳山西道院同鍊霞上人雨話

潑墨嵐濃。拖雲笳瘦。石闌倚遍陰晴。無數湖山。蛾眉一半遮城。棟花風替楊花雪。帶
殘春。雨淡烟輕。又隔江。一陣絲絲薄暝催成。十年俊侶多萍散。記盟苔招鶴。選樹
留鶯。別夢輕拋。竹房藥院都生。老僧爲話茶天錄。掃風鐺。松韻俱清。約重來。花影仙

境著我吹笙。

夏初臨 梅陰肥雨青苔上階。一榻蕭然扣扉無客不勝杜老舊雨今雨之感。鷗國跳珠魚天潑墨。梅陰風信初譜。幾陣瀟瀟。今番騎月愁占。西窗闌一重簾。又一重。山翠濃添。苔綠留人。蘋香壓酒。款竹清酣。賜櫻闥苑采藥豐臺。六街俊侶並馬春衫。那回聽雨。棗花樓閣廉纖。歸隱溪南。懶心情。只似眠蠶釣江潭。宮衣無用。蓑笠休嫌。

臺城路 儼厲西湖塵緣都屏尋南山諸勝岩瘦欲削竹香微吹攀蘿搜石時得幽境自笑年來風塵汗腳久負山諾青鬢遂初得相羊於寬鞋短策間欣然有歸隱之思

幽禽喚起尋山屐。烟邊一筇孤引。石罅泉噴。峯圍寺抱。蘚路夕陽細認。溪山無盡。愛松翠招涼。竹香送韻。冷淡衿懷。算除猿鶴有誰問。浮榮身世休論。匆匆塵夢過。都欠憑準。魚買西湖。酒賒東浦。自喜平生疏俊。山貲肯贈。便縛個團焦。招雲偕隱。要傍

梅花。段家橋遠近。

一萼紅 西湖梅雨乍過荷衣縫碧烟影一絲嵐翠四合同憶澄懷園風景在
白根觸前塵不自知身世之感也賦此寄許滇生洗馬乃普田子高編修 嵩

年兩同年

乍田田。換一番新淥。葉葉冒螺天。翠不藏魚。青纔戲鴨。出水初見勻圓。數幾點、荒波
斷汊。那禁打、驟雨寺門前。楊柳橋樁。菰蒲烟岸。早橫吳船。曾記澄懷結夏。坐露闌
風檻。四月聞蟬。賜藕光陰。烟波故事。共話幾輩詞仙。算如我、山衣早製。滄江外、不似
鬧紅年。爲問當時鷗侶。憶否歌筵。

浪淘沙近 余以三月薄游西湖春事滿眼塵緣率率匆促言歸初夏重至餘

花不留綠陰作幄流光似水白日奔忙感成此令依子京體

湖平莎淺。綠疏紅軟。蝶衣隊裏裹芳伴。小句留、記得酒半花半春半。梅陰替了香
風暖。鶯傷燕倦。一年常恨三春短。沒心情、一任雨懶烟懶人懶。

柳含烟 絲雨閣晴溼雲沈暝。西湖水漲漁扉半沒。偶呼烟舸。仿佛張子同西。

寒風景

瓜蔓水瀉花鄉。撩理雨蓑烟榜。柳陰一片透湖光。忽斜陽。四面雲奔峯不定。月額放晴難準。知添幾尺綠波涼。釣竿量。


邁陂塘 小暑日馬小麋邀同郭頻伽丹叔鳳集五千卷室食橋李聯句余史

依竹翁韻賦此調

壓卑枝。唐梯早摘。來禽雙眼偷注。勻圓密葉繁星綴。數到梅炎桐暑。遺種古記茶話。僧廬俊味曾憐汝。根蟠仙渚。認舊國春風。荒亭腐草。打遍越江雨。城南路。陵迥尙剩幾樹。風人鄭重投與。紅雲五月三山夢。只有離支配取。差可許。伴鰕菜晶盤。載箇鷓夷去。鄉園小住。驗纖爪麻姑。一痕輕搯。豔說苧村女。

桂枝香 芭蕉扇

綠天小院。試割取團雲翠痕一片。搖動紫蕉衫底。勻圓纔翦。箇儂記得西窗話。手頻



又 寄蔣上舍楷

問江鄉、紅鹽黑蝶。而今作者凡幾。羨君才調金荃擅。傳遍露華井水。差可喜。算結客五陵、未盡英雄氣。茶天酒地。聽白傅山邊、清江宅畔。玉笛早吹起。草堂好、多少沈陳歎侶。蓮鴻小令能記。盟苔款竹開三徑。念我年來憔悴。歸隱未。只花影調笙、少箇人雙鬢。游蹤倦矣。待桐月招秋。瓜燈選夢。來話竹山裏。

又 淳齋書來知勺園將次落成既作圖記并賦詩志喜歸有期矣再填此解
正惜惜、醪醖夢裏。江鄉忽動歸信。小園買斷楊憑屋。乍闢柳倚蘿徑。僮約定。好趁雨移花。三尺籬邊引。吳帆抽近。想晚筍過牆。綠陰覆戶。到及喜分茗。無官好。漫說紅衣青鬢。三年早罷朝請。林居總愛南垞路。況有松岩竹磴。猿鶴問。費辛苦。山錢買夏聊安頓。此中高詠。便桐錄茶原。硯箋畫繼。樂志許同論。

釣船笛譜

臺城路 牽牛花

何時滴下天孫淚。年年柔條幽吐。細顫桐心。低捎竹尾。徑縮秋蛇爭舞。早涼庭宇。趁籬豆風疏。石蕉雪聚。香夢惺鬆。惜花催起。月過午。最怕驕陽當戶。纔舒還易捲。恨蕊偏嫵。蟲歇莎根。星稀河角。付與人間兒女。輕綃試譜。卻翠織蛛絲。碧分釵股。悵望秋期。罨船聽盡雨。

沁園春 腰

舞則纖兮。一捻無多。酥娘擅名。怪春寒酸透。做成病態。晝長槌罷。扶起花身。欲折偏羞。頻伸還懶。悄立風前。擺更輕。踏青去。望裙邊芳草。目斷鈿塵。小蠻生小。盈盈比楊柳。柔條乍鬥春。慣任郎轉側。關心較瘦。宜男歡喜。帶眼差羸。願劈香羅。替他束素。弄月飄烟過一生。秋千倦。向紅闌斜靠。回抱俄驚。

又 眉

鈿扇纔開。滿鏡生憐。玉纖掃餘。望翠添螺黛。替傳私語。紅生眼纈。喜展郎書。愁去偏關心。來欲縹。費盡黃金。總爲渠。偷描樣。慣低聲悄問。可入時無。含顰脈脈。垂珠比

十幅宮圖也未如。想夕陽樓角。遠山淡抹。春深簾底。倦鳥催呼。小病差濃。新離較瘦。淺妬偏逢卓女爐。休相避。卻回頭一笑。月子彎初。

又手

纖也。卷然微露春芽。柔真似蕙。記被池溫護。背燈替枕。畫闌笑捻。甚日同歸。教字慵書。脩眉懶畫。幾度閒。又無語時。探懷裏。卻噓寒借暖。忍凍誰知。殷勤紅袖低垂。看小撥爐烟一縷飛。慣霜簾添線。剪刀頻放。月窗擡笛。玉筍排齊。鬥草甘輸。湔裙怕繭。愛抱箏琶不肯離。花奴喚。待尊前記曲。小拍煩伊。

又足

鈿尺裁量。才裏春雲。凌波悄然。問何人躡去。襪塵不動。聽伊來了。花徑斜穿。小坐低翹。臨行重理。兜轉紅跟一點纖。娘心苦。替阿茶早纏。學步須憐。宵娘舞罷愁添。拓掌上。應同沙鷺拳。看簾衣纔展。偷窺月樣。裙梢全露。生怕風顛。嬌便思扶。軟還頻熨。幾度呼他不肯前。蒼苔冷。訝箇儂早起。來印弓尖。

邁陂塘 題嚴宜園詞隱圖

傍青墩。香茅小築。此中相與雲嘯。商量秋水滄浪近。詩境軟塵都掃。應打料。愛紅袖烏絲。本事知多少。琴言頻挑。羨花影都官。微雲女壻。吟鬢未容老。芙蓉浦。涼信早來蘋杪。月華間照孤峭。偶然圖幅生綃看。認取滄江泥爪。還自笑。算舊隱南湖。除是誰同調。尋君來了。便嬾窟脩簫。小山邀笛。烟話共清曉。宜園爲王竹嶼壻。

西江月 詠四

子美詩中花滿。吳儂鄉裏橋長。寄書莫問謝三娘。但數琵琶絃上。錦瑟量來衫袖。玉蛾拍徧箏牀。分明小字在中央。記得雙雙兩兩。

金縷曲 嚴瀨舟次題文文山與百五賢妹家書後

六百餘年紙。想倉黃當時舐筆。家山萬里。問訊大姚村裏妹。今日奈何而已。憑造物。安排一死。柳女環娘多未老。只傷心。骨肉飄零地。灑不盡。數行淚。北風塞草沙塵起。早飛上。江南白雁。羽書迢遞。百八十言三詩句。猶記小樓甲子。常留得。人間正氣。

攜向臺西晞髮讀。任高歌。竹石都敲碎。萋叔血。魯公字。

沁園春 移居古葭澗乃顧中村扶青閣舊宅也 辛未

彈缺歸乎。三徑雖荒。草堂去來。算長卿四壁。無多家具。杜陵三徙。不改高齋。亥市詭魚。寅庵醉竹。一笑窮愁何有哉。此間好。早移居圖就。十笏安排。水村上下葭澗。況閣外扶青山色開。話幾家燕子。烏衣舊巷。百年蝴蝶。黃葉殘堆。吳準菴李晴峯吳竹溪先後居此中村工繪蝶詩客飄然。小樓故在。留待先生掃綠苔。尋僮約。趁梅華千億。繞屋都栽。

綺羅香 題竹垞太史分書綺羅香並頭蓮花詞卽用原叶

茅屋詞人。野亭舊史。慣賦湘江騷體。碧玉駢頭。依約雲鬢煙髻。比蕙帶。並蒂交柯。共蘭砌。同心連理。並蒂蕙同心。蘭俱俱。曝書亭事。任平池。開謝秋風。蓮蓬人老。鏡波裏。莊窩半畝無恙。剩有汀莎岸草。鷗眠魚戲。一幅霞箋。猶認露華新洗。記聽雨。涼夢醒時。想擲笛。蕢花吹起。問江鄉。水調同翻。百年來有幾。

臺城路 詠宋女官徐仙靜之半截硯硯爲項子京所藏今歸勺園徐仙見后

山詩話及皇宋書錄

蓬萊小謫人間世。尙留碧城數字。謝客吟新。涪翁格瘦。輕試水晶墨史。昭華宮裏。供題竹箋梅。楊家妹子。磨盡麋丸。曉寒賦罷。寫眉翠。蕊珠環珮去杳。留南朝仙夢。尙說西里。一角山河。半池天水。多少蟾蜍舊淚。何年破碎。認天籟圖書。香銷粉墜。好伴書人。玉臺脩韻事。

菩薩蠻 七夕

中庭沒處穿針鼻。新涼枕簟知無睡。記得去年秋。人同月上樓。今年秋又到。秋比前年早。一把骨如瓜。教添半臂紗。銀查淡淡星無影。家家被角知秋信。涼思在今宵。西風五柳橋。兩頭織月管。偏是郎先見。何處渡秋河。夜深防露多。

洞仙歌 自題海嶠重遊圖圖爲張詩舫同年所作

澀灘百二。又重尋夢處。指點千山萬山樹。記種花、三月也忒匆匆。渾不省。榕葉秋風來路。紅雲開宴罷。只有離支飽啖。今年不虛度。手板便拋離。高擁書城。又過了、蘭風橘雨。望春草、衡門得歸時。算夜雪空江。抽帆漁浦。

行香子 贈歌者十九

欠字香邊。卍字窗前。小樓畔、輸與閒眠。小名替錄。過了瓜年。數張十十。李六六。董三三。暮雨漫天。秋夢如烟。鎮無聊、且伴歌筵。江南一曲。記得田田。要崔娘箏。吳娘笛。荀娘弦。

菩薩蠻

梅花一笛慵教理。入懷明月頻書几。小字怕人猜。應呼董夜來。伴羞心最細。手語須牢記。道是酒杯深。淺斟重又斟。采香蹋遍春陽陌。上頭又過天穿日。半月有何忙。繡針拋一牀。深愁更淺恨。心性渾無定。底事慣生憎。背人呼不應。

繡成羅帕無人見。做成詩句和香燻。拜月獨眠遲。愛他些子兒。房櫳深夜悄。蝙蝠尋難到。猶恐一燈知。隔幃儘力吹。門前種遍相思子。琴邊彈出相思字。昨夜夢長安。一山遮一山。唵書占不準。鏡語聽無信。記得別蕭郎。未開秋海棠。

湘月 福州西湖初濬林方伯則徐陸司馬我嵩方大令履義置酒湖舫時梅雨新霽陂塘已秋嵐影在水風蘆自語緣開化寺以湖望湖亭泊於梅柳橋取醉歡呼覺山鳥助歌老魚起舞此身如在六橋三竺間也用白石念奴嬌鬲指聲賦之

棟花雨過漲一湖瓜蔓陂塘秋候。艤子呼來約歡侶。撩理行廚歌酒。卅六沙灣。十三橋市。問渡尋梅柳。水晶宮闕。照人青鬢依舊。爲愛魚國天晴。葑田鏡淨。試垂綸身手。只欠逋仙亭畔鶴。添箇畫船溪口。選竹詩心。攜桐月底。此樂真無負。城頭殘照。晚涼歸騎休驟。

憶秦娥 秋海棠

西風裏。一年多少愁滋味。愁滋味。夜涼銀燭。照他無睡。
退紅衫薄慵初起。思量春夢渾無計。渾無計。玉階獨自斷腸人語。

青玉案 西湖薤菜花和海棠巢韻

一繩菱外香初繞。趁十里、停秋棹。隱約深蕘連淺藻。鷗知鷺見。雨縉露倒。涼朵銀盃小。年年開到荷衣老。道是無心沒人拗。寒甕不嫌釐譜少。三山市遠。半湖烟渺。采葦波掃。
薤菜一名無心菜一作靈出東夷古倫國見遜齋閒覽今園中有之

謁金門

花弄影。簾外柳昏烟暝。一晌憑闌妝不整。春來偏是病。紈扇乍拋涼訊。庭院西風偏準。耐得越羅衫袖冷。秋來偏是病。

眼兒媚 芙蓉花下作

翠寒庭院晝愔愔。顚顚費沉吟。二分夕照。三分烟水。一半秋陰。舊時好夢無尋處。

沉醉到而今。西風闌角。亂蛩殘月。只說秋深。

憶王孫

疏疏楊柳不藏秋。點點蘆花半覆洲。衰草黏天無盡頭。怕登樓。一片斜陽一段愁。

南鄉子 雨夜

春夢過紅櫻。三月東風慣作陰。夜雨催人眠得未。聲聲。滴到芭蕉總在心。舊事最關情。一曲瀟瀟唱與聽。聽得尊前頻報道。清明。開徧桃花不放晴。

又 秋江晚眺

烟際楚江秋。江遠潮平暮靄收。兩岸蘆花何處覓。扁舟。萬疊青山九曲流。欸乃聽漁謳。載得烟波不解愁。夕照明邊三四點。沙鷗。拍拍西風起蓼洲。

子夜歌 秋晚

闌干十二花遮影。玉階月上簾垂靜。一晌只貪眠。如何怯夜寒。羅衾涼早疊。推枕何曾著。庭院已秋風。夫容不肯紅。

浪淘沙 秋江

秋水淡明霞。一片圓沙。南來越雁信音賒。昨夜苔磯疏雨冷。開老蘋花。幾點數歸鴉。一半烟遮。笛聲隱隱釣船攆。認取暮蟬楊柳外。知是誰家。

更漏子 秋眺

斷霞長。衰草短。行盡江南南岸。楊柳暗。暮鴉栖。夕陽還在西。山河遠。水何遠。一舸漁舟歸晚。木葉脫。洞庭波。雁聲秋滿湖。

又 秋夜

鵲南飛。月東上。人倚薄寒虛幌。蛩語冷。雁聲涼。秋宵漸漸長。思往事。那堪記。夢也全無憑據。燈淡淡。夜厭厭。兜衾還不眠。

阮郎歸 春思

入春無奈倦腰肢。花開花落時。背人暗暗淚痕垂。不知心恨誰。愁脈脈。夢依依。日高起。慣遲歌臺未拆。儘留伊。晝長還賭棋。

行香子 九日泛舟半浦至赭山登高

落木蕭蕭。孤榜迢迢。約年年、此日登高。平林山遠，極浦烟消。恰又無風，又無雨，又無潮。柳外魚標，沙外蘭橈。喜忘機、鷗侶招邀。有田可買，結箇團焦。況有山莊，有水碓，有村橋。

賣花聲 感舊

一院碧愔愔。簾外春深。尊前舊曲記同聽。說著當時腸欲斷，何況而今。往事費沉吟。月淡花陰。十年早已悔初心。爲問舞衫歌扇伴，多半漂零。

南鄉子 秋晚

昨夜驗微霜。木末夫容滿院香。幾日江城風雨近，重陽。漸漸西風漸漸涼。換了薄羅裳。小病懨懨倦倚牀。廿四畫簾燈乍上，昏黃。月自迴廊人斷腸。

月湖秋瑟

醉太平 自桐江而下過嚴瀨出富陽昔戴勃所謂山水之極致也終日行柔

藍暖翠間兩崖巖木四合沙禽水鳥往來烟際灘聲潺潺下見魚影其居人多援厓結屋或臨江而漁山花自開自落不知時序風微波罷暮色倏至颯然知爲秋也漁唱忽起理舷和之遂成此段

高臺水長。扁舟客忙。亂帆飛過驚瀧。露青山一窗。灘光樹光。鷗鄉鷺鄉。數聲漁笛滄浪。正秋風滿江。

長相思

車斑斑。路環環。關樹沙雲畫不完。行人走盡山。水彎彎。石攢攢。逆浪回風夢未安。行人過盡灘。

霜天曉角 秋日行三衢道中新霜一抹橘奴乍黃水碓稻牀鷄豚烟散萍蓬飄泊不若爲農之樂也

如此秋涼。近蓴鱸故鄉。水碓無人自轉。話早稻。已堆場。斜陽山自蒼。晚楓吹滿江。昨夜新霜一抹。看一路橘林黃。

河傳 釣臺

峯轉。江遠。高臺平。落日潮生鳥鳴。畫眉四面山色青。秋晴。漁舟呼不應。晞髮西臺誰痛哭。天地窄。烟雨一蓑綠。鷓鴣灘。竹石寒。釣竿。故人去不還。

漢宮春

湯漁村總戎屢申台宕之約塵緣苦嬰俊遊多阻賦此以訂

子好遊乎。赤城霞天半。拍手羣呼。桃花千年一笑。中有仙廬。青鞋布襪。悔入山。作計多疏。待幾日。白雲涼後。東樓乘興寧無。思公巖扉開處。擁大旗熊虎。數騎秋蕪。山中胡麻飯熟。玉女邀予。洞天尊俎。認金松。影裏提壺。好借我。紅籐七尺。月明鶴背同扶。

百字令

道光丁亥重脩曝書亭落成并添置醜舫三楹用竹翁索曹次岳畫

竹垞圖詞韻

南垞無恙。歎竹孫風雨。幾經漂泊。矮屋數間。初買斷。料理圖書。栖托。酒庫春濃。釣坊魚美。略具花時樂。五朝三丙。者番差喜重落。亭築于康熙丙子。重建於嘉慶丙辰。今

脩于道光丙戌至丁亥告成

爲想子野亭荒。寅菴竹老。園券煩商酌。今日山貲償。

夙願添箇蠡窗雲幕。徑掃秋蛇。門臨繡鴨。眼見新林壑。明年燕候。貓頭應進籬角。

天香 一朵山房賦慶長三年日本紙

老繭抽黃。古苔捶碧。城頭白石遙寄。袖海新編。撒羹祕苑。十樣蠻箋堪擬。秦灰劫外。有鼎井前朝錄事。認取慶長歲月。一函鯉魚千里。雞林儘饒書市。趁星槎。唐船初至。九子梅香。一任傳紅寫翠。莫問相思花衛。賸幾幅。換心落魂字。好注蟲蝦。吾妻鏡史。

雪獅兒 姑嫂餅

蒸來十字。著意搓成。雙雙纖手。細點晶鹽。不用油葱。薤韭。釜頻揀後。愛共說。倚牀時候。試驗取粉融比潔。肌香嫌瘦。月樣團圓薄透。想歸來季子。爲伊炊就。親洗羹廚。那有工夫學繡。青溪渡口。問風味。紅綾勝否。垂涎久。好配峯糕重九。

齊天樂 嚴厚民貽羅浮蝶繭四枚小暑後盡出五色金粉大如花盃放之四

明窗畔飼以葵花旬餘猶栩栩也

一九柏葉成雙繭。遠攜海天瀛市。梅雨陰肥。桃風暑小。蛻出瓊姿如洗。神光旖旎。認裙褶麻姑。銖衣仙子。金粉幰幰。飼葵方法應須記。故山香夢萬里。鐵橋丹竈畔。千隊遊戲。綠草雲璫。朱霞洞錦。流落偏來村裏。天涯伴爾。任舞燕栖蛾。一生花底。驗取無須。垞南曾見幾。南垞曾有此種。

滿江紅 題石砧夫人秦良玉像

百戰河山。有幾箇。蛾眉燕額。撐半壁。夫人城在。風雲陣黑。白捍金戈傳檄地。明妝鐵騎朝天日。看丹青。先畫美人圖。弓鞋窄。青犢恨。雲陽厄。翠袖斷。綿州策。想豐容盛鬋。平臺顏色。玉帳夜談秦隴月。錦袍腥染狼河血。歎國殤。兒女盡英雄。紅蘭泣。紅蘭良玉之媵

八犯玉交枝 橫溪渡海濤雪欲飛蜃雨四合一炊黍魚帆百里東坡所謂茲遊奇絕也用仇山村招寶山觀月上韻

蜃市凝雲。蛟涎噴浪。繫纜莫尋沙渚。如雪濤頭天外上。已聽榜人喧語。微茫滄柱。指點夕照帆檣。蚶城隱隱迷寒霧。只有洞天七十。丹山堪數。遙想縫海皆山。環山盡海。乘風不辨何處。記舊夢、靈鯨曾步。但休問、荒唐秦女。變幻付、魚飛龍舞。會向蓬萊樓閣去。算清淺麻姑。幾時重話瀛洲雨。時志局在蓬萊山下

沁園春 詠心樊榭集有之更廣其意

扣扣誰知。無悶無言。瑤情獨舍。比紅蓮剝去。房空最苦。綠蕉抽盡。雨滴都酸。腸窄工愁。膽虛易怯。捧不分明目定憐。天邊月。指三星斜角。何日能圓。綢繆別恨偏牽。聽琴語。頻挑往復還。記十香院裏。回原非易。雙桃花下。結豈無緣。山換難移。犀通早覺。一寸相思在那邊。小名錄。數經繙般若。香字成烟。秦觀贈陶心兒詞天外一鉤殘月

照三星謂心字也換心山見日本碎語

又 樊榭取楊循吉詩買錫祭竈帝酌酒祀牀公句作祭竈祀牀二闋謂人生不過飽食安眠足稱快意。余年來諸念都廢。但求一枕黑甜百年粗糲而已。

爰爲繼聲以遣歲事云爾

茅屋迎寒土鼓催春神其醉之愛嬌須扶也媚原煩婦經還讀未跨每期兒借酒而塗踞觚以聽。戛釜聲中去莫遲。殷勤祝任杓長孟短歸矣無辭。家家利市誰司。算共曰同鍋漸不支。念空庖烟禁米呼童乞。殘年飯熟火待人炊。竹裏新開山鄰乍請。一笑官廚冷可知。從軍苦想冰天雪帳十萬防窺。時臺陽滋事

載寢載興無害無炎。殷勤祝公算百年分半牛衣曾泣。雙鬢坐並蠟燭添濃。朝罷人歸枕低金盞。一霎懵騰春夢中。求如願祇香衾老去燕玉須豐。橫陳七寶玲瓏。看蜜炬花餉此夕供。憶他鄉共對弟兄風雨。一房穩睡兒女青紅。官鼓愁聽山城懶起。鎖鼻安心仗爾功。吉祥臥喜折牀會上彌勒龕同。

高陽臺

辛卯仲冬三至蚺城重檢志事寓居等慈西寺佛火竹菴一爐無事

三五之夕海濤殷山谷星斗闌干明蟾在樹著屐蒼苔間呼童煨落葉煮酒倚笛而歌不知此身在萬山中也

天際峯多雲邊雁到。中央人在蓬萊。奇絕平生魚帆三度能來。一枝落葉扶筇健。冒秋風踏遍寒堆。最堪哀。西谷亭荒。東谷花摧。南田雞犬秦餘劫。任龍悲鋸洞。鶴老蒼苔。指點仙巖。虛無疑現樓臺。乾坤一粟容身世。坐江山。對此浮杯。且徘徊。烟外尋碑。竹外尋梅。

行香子 壬辰秋雜憶勺園風物

小雪初晴。落葉無聲。喜禾堂打稻齊聽。江湖好夢。分付蓴羹。配陶莊雀。馬榼蟹。鶴湖菱。歸隱漁耕。清福帷屏。試吳鞋。氈暖棉輕。勺園花事。檢點都新。正野梅白山椒紫。薺苗青。

買陂塘 憶勺園菊花

又江村柴桑酒熟。橙香新破。纖爪蟹寒已報黃花信。開遍洞天窈窕。園縱小。愛抱甃閒來。不學挈皋倒。低吟側帽。想落葉高窗。亂蛩疏雨。三徑無人拗。歸來賦。我比深明更早。有田種秫粗了。折腰依舊門前柳。一任西風吹老。君莫笑。勝開落年年籬下。

寄生草。有山可抱。數烟瘦。菰鄉。霜肥蟹。楫合眼。夢先到。

念奴嬌 仇山村故居在錢唐西城脚烟水一灣林扉無主山人猶呼仇家園

土獨宜。莧暇日訪之

暗門歸去。剩紫茄白莧。香茅曾縛。棋罷不知人世轉。自愛龜池棲託。一稜寒畦。半鉏荒水。種菜尋僮約。無弦琴杳。冷泠聲在秋壑。空自東野官微。南朝夢換。早西山聘卻。淳祐遺民。雙鬢老。莫笑故林猿鶴。見張翥詞芳草春殘桃花月改舊恨傳漂泊房山圖裏。何人聽雨樓角。高房山有山村圖無弦琴山村詞名也

買陂塘 擬築見山樓未果寄題勺園

憶年來。香茅一把。經營手幾曾斷。六峯遠近排青鬪。添个小樓四面。歸計倦。算買樹。臞菴。三萬錢尙欠。何時能辦。要明月東陽。淥波西瀼。突兀眼中見。平生志。位置燠房涼館。山池五畝居半。打頭先受漂搖恨。春雨昔邪都遍。差自遣。但贏得。菰田。蕘稜收未晚。柴門歲晏。喜早稻堆尖。秋桑酒老。日日醉村店。

高陽臺 冷齋詠雪寄香子和叔

晉雪圖開。唐花風峭。詩情吟到叉尖。縛帚呼童。無端鶴訝今年。闔童林鶴從未見雪。霏霏更比頭番大。料故園。壓遍檀欒。寫冰紈。燈借簾櫳。月借闌干。梁園賓客多家。落。算東勞西燕。鴻爪都殘。沽酒柴門。關河夢倦戎鞍。煮茶風味尋亭角。南垞有煮茶聽雪亭。有何人。共話椒盤。這禁寒。老我荒江。一箇漁竿。

霜天曉角 題少菴弟畫

剩渚平沙。挂吳帆半斜。雪客不知秋冷。拳一足。宿蘆花。餘霞天半遮。遠林歸暮鴉。山水一重一掩。但有水。有人家。

點絳脣 烟雨樓秋泛

細雨前汀。菱花開過蘋花斷。倚樓客倦。雨遠更烟遠。平底船輕。柳外漁歌緩。風吹散。鴛鴦飛遍。只是無人見。

霜天曉角 鄧山曉行

霜落籬根。斷西風客魂。點點曉鴉寒聚。烟影暖、有孤村。一尊村酒溫。趁墟人語喧。殘月疏林未墮。照野店、早開門。

洞仙歌 己丑在閩自刻近詞曰釣船笛少菴作圖

前灘聲遠。定老鷗喚醒。蟹火星星隔村認。便蘆花淺水。只任風吹。歸棹穩。不管鯉魚潮信。漁家家具少。笛几魚牀。醉脫青蓑便高枕。秋色滿垂虹。鰕菜忘歸。寧一領紅衣無分。且乘興、滄洲坐船唇。對江月初高。鶴南飛近。

滿庭芳 四明學舍山田一雙時課僮約雜蒔蔬果每當鶯前韭脆蟬後菘肥翠甲滿槃欣然命酌殊有菜肚老人風味作種菜圖

種豆棚低。饅瓜亭小。千古卻英雄。長鑊短柄。不數草堂風。漫說周妻何肉。清齋供菜肚都空。小園賦。寒畦一稜。春韭更秋菘。昨宵新雨足。丁寧阿段。好灌連筒。并桔槔無用。俯仰都慵。料理瓜壺經濟。頭銜換。老矣園公。休賒望。飛錢籬落。生計笑鄰翁。

買陂塘 紡車和種水頻伽

數江村攀枝花信。從來那識羅綺。紡磚拋去秋燈雪。只有田間生計。淨掃地。渾不省。蓬頭椎髻雞鳴起。木棉菴裏。但籬豆風疏。月明在戶。兒女話鄉里。車腸轉。且任此。流徙。饑寒入口堪倚。小姑今歲偏催嫁。繭盡紅閨。織指停也未。也儘許。霜晨露夕。論家計。閑情差礙。算米桶居妻。蒲鞋養母。愁緒一時寄。

紅情 東坡定惠院海棠詩墨蹟向藏覃溪學士後不知歸何處記在修門曾見之種水集有此作遂和之

燕宮絕筆。見王聖與詞。認胭脂。淚點雲藍猶溼。絕世仙姿。流落天涯好顏色。病裏敲門柱杖。記置酒。五年寒食。趁月下。偶逐東風。幾度照頭白。銷歇。此狂客。苦往事如花。欲歸未得。淒涼寺壁。何況東闌一枝雪。七百年來詩卷。倏過眼。驚蛇無跡。又豈料。萬里外。此生此夕。東坡在黃州自號狂副使

買陂塘 余家梅花溪楊柳隔岸菜蔬名橋中有勺園略具盤花還竹之趣訂漁樵之野局招白鷗而往來千石魚陂萬戶侯不易也少菴爲作水村歸隱

圖

笑狂來、白頭賀監。鑑湖誰繼高躅。水村肯爲錢郎畫。分與釣矸一曲。鄉夢促。有上下、葭洞。罨畫東西屋。此中避俗。喜竹裏開門。沙根繫艇。漁唱往來熟。江湖計。風浪愁心千斛。浮塵世網縛束。紅衣曾斫蓬瀛鱸。一箸鱸羹也足。鄰早卜。便讓我鷗間占斷。烟波福歸田話續。算種菜龜池。撈蝦鴛鴦。盡入水天錄。

高陽臺 自來四明塵事多屏歇。腳遠遊之堂。打頭獨冷之屋。以手送文將詩。

過日仙槎何學。使題其著書之齋曰求是。自署曰懶巢。

薑杏湯殘。豆羹店小。半巢冷到生涯。屋小如舟。一房直似無家。嬾窠嬾窟多隨分。懶心情。病葉寒花。學維摩。行便婆娑。坐便趺跏。玉堂春夢。憎騰過。已一邱。欲老。五十頻加。劍膽琴心。而今事事都差。文成諛墓工何益。笑滿車。只載壘瓜。且須誇。米送秦游。酒問侯芭。

賣花聲 殘雪乍霽。春風始吹。齋中盆梅二本。紅椒方破。疏香時通。回憶勺園。

老梅當垂垂。花矣題高適之草堂。懷羊權之舊夢。仙姿零落。對此有愧色也。鴉鶯手親移。一半山池。槎枒漸見過牆時。月色舊時人舊夢。只有花知。瘦鶴不曾離。守着南枝。故園雖好未能歸。惆悵草堂人日別。三度題詩。

夢橫塘 詠糧艘浣衣女郎和頻伽

烟檣排薺。雨纜牽堤。盪得玻璃春軟。喚渡秋娘。趁銜尾、吳帆齊捲。搗練霜淒。潏裙波。皺秋砧敲倦。念出關寒早。直北塵多。應憐取、淚痕染。阿儂鄉近。鴛鴦喜全家一舸。萍泛蓬轉。越紵湖棉。費纖手、一年針線。計風雪、丁沽歸夢。幾度郎衣篋中換。玉女盆傾。夕陽收了。向柁樓倚遍。

行香子 西湖早春寄汪小米嚴鷗盟

長短橋低。南北峯齊。潑新烟、草綠鉤衣。一年風景。濃淡都宜。記雨湖蕙。晴湖柳。雪湖梅。杭諺晴湖不如雨湖。雨湖不如月湖。月湖不如雪湖。隄外花催。竹外船迴。好江山。多付尊罍。賣燈門巷。知道春回。正鶯初語。鶴未放。燕纔來。

又 東坡生日懸笠履圖像祝之

騎鳳天涯磨蝸年華證心情聊欲趺跏百年身世萬里無家任黃州月潁州雪惠州
花白髮烏紗鐵版銅琶唱淵明歸去來耶一尊頓遞鄉味陳些有木魚筍花豬肉
密龍茶。

洞仙歌 題吳采鸞真書鍊丹訣今刻入玉臺名翰共七家我里徐蹇媛收藏

真跡也以柳如是葉小鸞附之壬辰夏上石

延祥院裏剩丹爐祕旨。幾葉雲藍太和紙。想繡襦甲帳寫韻軒開拚繭盡東海麻姑
纖指。神仙容易謫辛苦傭書。煮盡人間古愁字。月底任婆婆鶴唳霜濃。只可惜踏
歌身世問甚處。西山寄與伊約跨虎人歸伴他無睡。

又 題薛濤草書美女篇

碧雞坊畔認私書一紙。猶是情人手親製。想寫詩樓閣播翠箋紅低聲囑好好深藏
花底。白籐香一墮。蠶草題成贈與宮中舊才子。料得校書忙草草匆匆記小字曲

江賦裏方便寄。還伊夢迢迢。念門外枇杷。家山萬里。

又 題朱淑真真蹟

送春芳草。正午窗睡起。誰伴幽棲老居士。碧闌杆倚遍。睡月推烟。定寫到。一集斷腸花底。釵痕頻折股。九子香丸。小試升龍墨初洗。天壤有王郎。玉鏡愁中。認多少。傷心心事。抵一卷。迴文細看來。便化作雲飛。但餘清淚。

又 題管道昇楷書梅花賦

王孫眷屬。住棲賢山裏。竹掩朱門舊風味。愛梅花寫罷。移入宮看。署小款。不數南朝西里。平安書一卷。仔細娘封。持較洛神賦偏似。山月苦思歸。換了柔腸。定傾盡。鉛池天水。題就付。垂雲倒好嬉。認小印何人。替加籐尾。垂雲松雪妾

又 題柳如是書王建宮詞

鴛鴦湖畔。指垂楊垂柳。生小儂家姓名舊。奈桃花扇冷。紅豆香殘。靡蕪夢。莫向故宮回首。滄桑容易感。輸與眉樓。有分年年白頭守。訣絕早吟成。小字親題。算肯把。尙

書恩負。剩一片紅絲。曾窺來。試秋水。麋丸。病風纖手。

祝英臺近 題葉小鸞二王帖釋文

亂紅凋。清露溼。生小自無力。芳草年華。憔悴冷冰泣。只留眉子疏香。個人未嫁。空想見。遠山顏色。恨銷得。算來一晌多慵。只愛簪花筆。牘粉零星。費盡畫眉墨。最憐嶺調笙。月涼花淡。萬一有彩鸞消息。

菩薩蠻 橄欖

紅鹽青子紛紛落。花開二月當秋熟。九鯉記湖陰。斜陽間橘林。漿酸偏澀口。殘醉初銷後。兒讀夜停否。燈蟲綴滿頭。

太常引

落花一院雨絲絲。無計挽春歸。縱使挽春歸。已誤了、鶯期燕期。紅闌十二。畫簾廿四。長定是相思。何苦苦相思。翻悔了、當時見時。

洞仙歌

今年烟九。悵餘寒尙峭。何處天涯有芳草。正小樓一夜聽雨無眠。懊惱起。玉雪畫檐迷曉。重簾慵不捲。簾外梅花凍損十枝五枝了。春似不曾回。盼得春回。幾曾見。欄杆斜照。問那樹垂楊。近江南。待燕子歸來。更無信到。

瑞鶴仙 和葉小庚司馬元宵姚江舟中對月懷鄉之作

明蟾催上也。喚初三、初四扁舟重下。落潮帆纜卸。正柳梢葉動。玉梅花謝。金錢買夜。聽十棒春城鼓打。對一丸盪出玻璃。幾點漁燈蟹舍。愁惹九仙烟寺。七塔風鈴。三山春社。鄉心羅帕。知誰共酒邊話。任蛾兒歌緩。江兒水漲。容易香銷燭地。問何如。雪艇垂虹。小紅唱罷。初三初四。官二僕名見貴耳集。

又 元夕追感梅卿生忌

試燈風到乍。是第一淒涼。人間今夜。翠尊淚盈把。記舊時庭院。舊時裙袂。冰綃展畫。數生朝。箇人初嫁。最難忘。眉暈釵光照。盡銅荷鉛瀉。休罷。卯瓶酒醒。甲帳香殘。丁簾花謝。分柑羅帕。雙鬢影。十年話。歎玉蟾醒夢。明星密誓。無分真真來也。拚今生。碧

海青天。不思量者。

湘江靜 江珧柱

翠殼深含泉底露。趁新潮、沙明蠶聚。一杯分玳。雙卮截角。重疊排冰柱。海月恰圓初。腥風上、結埼烟渚。春寒雨細。明州酒樓。好付與、越娘煮。甲乍卸、羹早具。配雞兒、玉珂雪乳。食單試檢。梅童魚舅。算總難比數。俊味屬詩翁。且誦我、西江新句。還應沈醉。含香想到阿環私語。黃左田師江珧柱詩形模野廟一杯玳佐飲綺席雙角卮

浪淘沙 落葉

夜雨打林扉。露冷霜悽。白門秋柳漸疏稀。說與西風留一葉。尙有蟬栖。飄泊任高低。鶴怨鶻啼。斷腸人在小窗西。恨碧闌紅全不是。舊徑都迷。

柳梢青 春雨

甚日能晴。瀟瀟易暮。惻惻寒生。燕子歸時。櫻桃夢裏。只說春陰。小園花信難憑。數檐漏、空階自鳴。蕉葉甘來。竹心苦處。聽得分明。

又 春星

雨散雲銷。微明屋角。漸挂梅梢。殘月重門。繁燈一院。又是今宵。酒邊人去。須招。記昨夜。樓頭夢遙。照我江南。杏花影裏。來伴吹簫。

秋霽 題奚虛白溪樓。延月圖樓爲樊榭。納茗娘處。卽鮑氏南樓也。

翠閣橫梯。傍門外溪流。鏡約波活。圓魄投懷。明星密誓。想到定情時節。驚鴻飄忽。渡江雙槳。乘秋月。絮語說。最小。相逢白石重相惜。今日試問。三九梅邊。倚闌無人。花夢都缺。指城南。二分涼影。一分猶照舊時榻。老去相如頭滿雪。月遠人遠。只留淡淡山痕。疏疏簾子。迢迢清雪。

買陂塘 詠南宋宮人送汪水雲南歸事

望天山。雪花如席。黃冠早賜歸去。十年憔悴金臺客。回首滄桑塵土。行莫遽。且共醉穹廬。玉怨銜杯數。陽關調苦。想亡國新鶯。昭陽舊燕。別句正愁賦。南朝事。白髮青娥能語。霓裳天上何處。琴心一曲梅花恨。換了哀笳秋杵。朝復暮。應夢到孤舟。夜月

黃河渡。重來禾黍。歎水剩山殘。亂鴉啼遍。多少故宮樹。

雪獅兒

杭俗清明以粉餌作狗立夏食之云可祛疫呼爲清明狗頻迦有詞

和之

金鈴活脫。玉粉勻搓。膽娘纖手。比似鄜州。擗絮丸泥裝就。門前插柳。好靜護。禁烟時候。便看到。桃花春水。雪糜酥透。愛向曹王廟口。配雙雙黃胖。呼渠廝守。多病相如。長願拋離藥臼。郎書來否。已上冢。全家歸後。休搖首。冷食無花無酒。

齊天樂

江邊見杏花

嫩寒已過梅花雪。江南甚時歸也。官燭修書。畫闌坐影。催得枝頭紅亞。東風立馬。指水郭山村。酒旗低挂。牧笛聲中。醉扶人散夕陽社。春明俊遊年少。曲江宮宴裏。仙侶佳話。燕子愁來。鶯兒鬧後。舊恨忍看羅帕。小樓夢惹。任疏雨黃昏。幾番開謝。老去蘭臺。好詞和淚寫。用張蛻巖詞事

長亭怨慢

自題楊柳岸圖依白石中呂宮調按詞源道宮是「」字結聲若折

則帶尺一雙聲卽犯中呂宮。考白石詞旁譜換頭及尾結韻皆用一五而第一句用尺非韻也。玉田從之是矣。

又聽到、棲鴉時節。冷雨疏枝。秋聲來驟。送別年年。亂條攀盡。忍分手。銷魂短艇。早催度。河橋口。柳縱有青時。卻不管、離人消瘦。馬首。悵殘陽千里。倦向西風。沽酒。一絲影裏。已換了、暮蟬亭堠。問那處、夜笛樓頭。恐歸去、綠陰非舊。但月曉風尖。付與鶯鶯蝶。慙。

紅情 荷花用玉田叶玉田以疏影暗香爲紅情綠意圖譜另分二調堆絮園駁正之然不知爲玉田作沿樂府雅詞之誤也按二調乃白石自度仙呂宮用工字結聲旁譜起結皆用工五江國國字換頭卽用工五是韻無疑吳潛和作不叶非也山中白雲有七調並叶入聲無用上去者他人卽不盡然矣陳日湖每改上爲平蓋上入平皆可通去不可通耳秋風乍涼闌紅將退輒依玉田舊譜倚釣船笛和之

是香是色。是仙妃乍度。塵輕波密。一路青燉。老我山薌舊曾識。多少鴛鴦伴侶。鄉思遠。年時猶憶。憶采向、太液池頭。天上露猶溼。亭立翠柄側。有板橋畫船。曉風斜日。冷香夢裏。只認鷗波一亭碧。三十六陂秋遠。料單舸、鬧紅非昔。問甚日、歸去也。漁衫短笛。

綠意 荷葉用玉田叶

方塘瑩潔。乍幾枝貼水。田田清絕。么蓋藏魚。南北東西。不怕紅蕖吹熱。秋心未展。花心動。已早有、采香人說。繞門前、滿鏡勻圓。四面綠雲愁疊。慣向滄江那曲。秋衣縫線密。纖手重摺。驟雨翻來。萬點跳珠。打遍鷗牀涼雪。西風留與鴛鴦栖穩。怕一霎、蘆搖葦折。付老漁、菰飯青包。煮趁滿船新月。

秋霽 送人出雁門戍

雁度重門。望木葉墜西。一抹關樹。蕃帳封侯。霸陵射虎。壯懷頓教起舞。愁陰日暮。極天鳥道連句注。應記取。無限隴頭落月。笛聲苦。今日與子攜手滹沱。舉觴臨風。且

聽悲語。指層霄。三雲盡處。只餘一角塞城紫。數騎秋蕪從此去。千里萬里。但見瘦馬黃塵。阜雕積雪。亂山無主。

水調歌頭 題石梁觀瀑圖寄洪筠軒天台

木葉羣飛候。秋色滿烟巒。青天何處龍吼。白日祇高寒。上有磷磷之石。下有潺潺者水。玉洞響珊珊。獨坐抱瑤想。招手鶴來還。朱道士。丹邱子。去人間。采榮塵世休問。難得一身閒。攜我青琴三尺。中寫松風萬壑。坐石爲君彈。彈罷起看月。長嘯叩仙關。

齊天樂 徐問蘧所居秋聲館乃符聖基舊址也賦以奉懷時問蘧客吳門

老符已逐髯仙去。茅堂百年風雨。白燕新巢。黃花昨徑。中有藥房竹戶。酒香人語。便換得荒苔。亂蛩無主。替與詞人。開門踏月記尋處。武林舊事未遠。悵殘蟬身世。斷夢重作。換芋書多。種蕉窗靜。畫裏廬陵秋樹。倦遊閒阻。慣夜火寒山。冷楓吟苦。甚日歸來。翦燈愁共訴。

八寶妝 文文山松風琴爲張于田大令藏

朱鳥歌殘。天水換。海山飛起驚濤。淒涼家國。天半鶴怨難招。想得黃冠歸去後。小樓一榻雨瀟瀟。玉絲調。塵沙三尺。珠淚千條。青原蕭然無睡。對寺鐘佛火。獨坐愁宵。白雁空彈。一霎柯爛桐焦。龍吟鳳魄萬古。此中貯。松風弦外飄。試重理。聽壯懷猶說。君恩未消。

惜紅衣 夏五陪陳石士學使定香亭話雨并奉懷阮節相滇南

蘋檻移香。蕞波弄影。一池平碧。宛轉簾橋。橋心界魚國。么荷纔覆。已早透。鬧紅消息。幽寂。高樹晚涼。有蟬聲知得。狂歌青眼。越杖吳鞋。竹深好留客。沙邊柳外。秋思渺何極。回憶瀛舟話雨。舊曲江南曾識。問甚時再到。多恐閒鷗頭白。

玲瓏四犯 唐六如漁灘秋晚便面

捕蟹榾前。采菱缸外。漁帆三五堪數。忘機舟不繫。間夢鷗留住。一竿便成歸趣。任風吹。蓼汀蒼激。青笠元真。白頭老監。祇有此情許。生綃畫出秋句。正江空笛遠。回棹容與。潮來沙沒岸。月上雅翻樹。得魚沽酒。全家喜。聽喧到。柴門兒女。且醉脫蓑衣。伴

蘆中絮語。

賣花聲 偶於冷攤舊書中得詞箋題爲歲儉偶感末署款瘦鸞書極娟媚詞
有擁髻悽然之意蓋貧婦有才者爰和而著之亦無使其無傳也

翠羽共清寒。擁髻無言。貧來賣到嫁時田。只剩吳娘唐韻在。不記何年。一紙寫纔
完。香蠹蟲殘。支持家計倍辛酸。爲問機聲燈影裏。誰伴無眠。

生查子

秋到那家多。月向何人墮。記得昨宵無。早替吹燈火。心是共愁心。坐是同愁坐。長
定怯單衾。推枕和衣臥。

惜瓊花 越溪秋思

越溪碧。越女白。問苧蘿村裏。花隱仙宅。鸞絲飛破青山色。收釣人來。蓑雨猶溼。畫
船烟波六尺。轉前灘漸失。秋晚歸得。蘋花菱葉曾相識。欲采年年。愁思無力。

一朵山房餞秋樂府六首

齊天樂 蟋蟀用石帚韻

一痕月影花間上。思攜故人涼語。砌暗潛鳴。屐侵停響。爲覓聲聲何處。莎根絮訴。慣星曉霜初。織催寒杼。籬角柴門。籠燈記得舊情緒。王孫芳草歲暮。悵歌離弔夢。愁和疏杵。壑老堂間。泥澄盆古。中有秋魂無數。千金賭與。話夜雨長門。白頭宮女。禁得年年。甕天挑戰苦。

桂枝香 黃雀

霜前驚噪。指秋鳥村邊。幾羣纔到。千百羈雌。比似紇干差小。柴門秔稻齊黃候。野田飛暖。偎殘照。黏竿八月。張羅九月。西風木杪。數桑落。新籥釀好。看酥片披綿。陶莊風調。合配雞簔一色。根香同擣。醉鄉更憶松江鮓。付糟牀。泥封遠道。只愁寒晚。荒林無影。淮南歸早。

探春慢 綿

越紵嫌單。吳綾怕冷。秋衣薄處宜換。揉雪新裝。搓烟重疊。早是禁寒作暖。老去羊裘

重算只有一銖堪辦。商量曝背茅簷。任佗風虐霜犯。最憶語兒鄉裏。說今歲蠶豐。論價偏賤。繭剝兜圓。被翻池縵。多費臘娘針綫。十兩須添取。且過了。春寒才減。一度相思。箇人纖手同軟。相思綿名。

疏簾淡月 蟹齋

一繩界水。認魚國分來。岸脣汀嘴。小住漁家。草舍夜涼風細。寒潮乍落。燈紅上。試爬沙。玉琴聲起。緯蕭橋畔。我鄉有斷橋。渾疑蛟戶。織綃泉底。聽郭索。衝泥逐隊。漸仄行落落。瘦扶枯葦。露白霜濃。隔浦。缺瓜初穰。蘆簾半桁。江楓外。留纖爪。寒林畫意。鷗鄉占斷。湖租幾姓。馬家瞳裏。禾中馬斷。蟹最肥。美畫家有蟹爪樹。

掃花遊 落葉

酸風又到。奈一夜頽林。烏啼難住。天涯倦旅。送洞庭人遠。冷波先賦。采綠題紅。不記舊時院宇。正凝竚。想壓遍小園。月挂高樹。攜客間共步。喜全露秋峯。夕陽平楚。殘蟬老去。縱一枝尙戀。悽和蛩語。斷夢頻醒。添了疏疏碎雨。問何處。恐故山。漸迷樵路。

疏影 芋

霜田熟後。笑錯呼蘿蔔。肥餉秋九。踏趁薑塍。煨向圓觚。人歸小雪時候。書生富貴知無分。占錦里、租收幾畝。記斷畦、涼話荷邊。一霎西風寒驟。歲儉但思飽喫。農家兒女共。糠火茶臼。夜雨茅堂。客至欣然。好配柴桑新酒。一龕禪誦清齋裏。便換得、千頭儘有。只年年、親種傷心。愁向故山回首。用南史鮮于文宗事

臺城路 遼后洗妝樓追和容若韻

玉盆灣口無遺廟。層樓尙依瓊渚。蕃馬吹螺。駝尼簇翠。歷盡金鋪敗雨。承恩是處。記換枕攤衾。青娥分付。九帳燈紅。東樓妝罷早朝去。蛾麋忽遭秋妬。枉多才瑟瑟。舊恨千古。案證香詞。瓦殘蕭字。莫問回心眉譜。烟莎日暮。剩荷葉西頭。綠雲黃土。只有蒙哥。內家聞祕語。

浪淘沙 書所見

苦雨坐茅堂。聽喚鳩忙。一春幾日有斜陽。麥壠全蕪秧又沒。燕子田荒。十室九逃。

亡。雁戶淒涼。海潮漂盡舊村莊。一色菜花多上面。冷食他鄉。

點絳脣 秋桑

陌上人歸。瀟瀟又聽西風打。羅敷牆下。一稜豆花架。梯影鳩聲。曾記春遊冶。斜陽舍。石門秋社。酒熟田園話。

滿宮花

燕來遲。鶯語早。惆悵一春多少。一春幾日是春晴。到得春晴春老。西月東風常好。姹紫嫣紅休拗。今年人看去年花。花似今年人老。

滿江紅 楊椒山草書卷

一疏箋天恨不把。嵩傾岳轉。空剩取烟雲滿紙。雨馳風捲。鸞鏡霜摧。悲兔哭。驪龍珠走。驚蛇膽。想割筋。剜肉握拳。書開生面。侯城畫。枯松絹。蠻嶠正。天風硯。共孤臣遺跡。千秋飛電。透爪猶留刀杖血。陰雷長護江山翰。看朱衣。白馬降壇來。魂歸關。京師楊忠愍廟時有此書。

又 方正學畫松卷

大節凌雲認木末。虬枝玉軸。想當日。墨池風雨。蒼龍翻覆。名蹟羞收天水錄。孤心肯倚太師竹。鬱槎枒。不許燕兒栖。濤鳴谷。崛強志。寧低伏。霜雪貌。定難辱。陋大夫秦詔。麻鞋痛哭。十族已甘瓜蔓禍。諸孫可惜蛇鱗蹙。歎人間。正氣自常留。丹厓錄。款云洪武八年花朝日爲丹厓翁嵩壽姚廣孝王畫竹韓侂胄畫竹號太師竹

賣花聲 本事寄張夢廬

風絮慣沾泥。飄泊誰依。桃花扇底錯呼伊。恨不相攜吹笛去。整整同歸。靈藥可能醫。誤了將離。舊時月子夢都非。唱到柳兒惆悵曲。應悔來遲。整整用辛稼軒夢見清波雜誌柳兒張玉田事見山中白雲詞

疏影 賦得家在江南黃葉村寄懷六舟西湖及故園諸子

新霜乍掃。望疏林全露。一半殘照。有客停車。暮色蒼然。寒鴉幾點栖早。江南村裏扁舟在。便添个。釣車漁竈。認烟邊。紅樹無多。昨夜鱸魚信到。難忘五湖三畝。何時家

計遂來問瀉鳥。晒笠秋晴。山寺僧歸。料得鬢絲催老。張兄樂丈。經年別。悵此日。酒徒
稀少。任狂來。醉倒江楓。只有懷鄉詩好。

南樓令 月湖秋思

秋鬢又催殘。秋衣恁處寒。送秋歸、秋思年年。滿眼家山都不似。只明月、近江南。鶯
脰一湖烟。鴻飛九月天。聽漁歌、唱到門前。花嶼柳汀都不見。空冷落、賀家船。

又 秋晚寄題醞舫壁

風點半池萍。秋荒八月菱。認百年、杜甫南鄰。聞說紅蕖花老盡。再莫問、坐花人。冷
菊傍籬根。寒瓜落斷垣。問柴桑、三徑空存。只有上番成竹易。計明歲、筍應生。

沁園春 癸巳除夕寄都下故人即題宴歲團圞圖董文恪邦達爲勵衣園宗

萬畫題者陳匏廬邦彥裘文達曰修梁文莊詩正及雙清主人也乾隆十年

乙丑除夕所作余得之四明

袞袞諸公。十載名場。伊余獨嗟。念傷哉貧也。不遑將母。歲云莫矣。無以爲家。愁未能

除窮何須送。贏得風前兩鬢華。頽然意。漸齒神搖落。眼界麻茶。一官落度天涯。已壯志。消磨望總賒。算不因人熱。一寒至此。請從子隱。萬念非耶。識字兒嬌。扶牀孫小。爆竹聲中且自誇。關心事。付猿收松子。鶴守梅花。

掃花遊 題羅鏡泉瓊臺夢月圖

雙扉開半。指縹緲青霞。有人來款。金芝香染。奈石梁西去。鳥驚猿斷。咫尺樓臺。招手雲中君遠。桃花畔。悵綠鬢翠衣。人面都換。仙飯誰解勸。想環佩無聲。天風尋徧。蓬萊清淺。但月路荒唐。夢魂全倦。前度分明。跨虎空山曾伴。歸來緩。只涼蟾。一丸猶戀。

洞仙歌 落梅

翠禽夢外。悵餘香早歇。吹起東風一堆雪。望故園心眼。禁病愁陰。渾不似。舊日樓頭月色。玉兒應瘦損。歲晚山空。來伴年年苦幽寂。只管唱江南。縱訴飄零。問笛裏。何人知得。雨淡又煙輕。不多時。留葉底餘酸。愁鶯能說。

探春慢 送孫柳君歸苕溪

烏帽衝霜綠蓑支雨。扁舟問訊東下。賀監湖邊。王猷雪裏難得故人來也。同是江南客。十年夢。酒釺茶社。而今各自飄零。相看青鬢非乍。人世功名拚罷。贏賣賦金多。遊倦司馬。烟浦魚肥。汀洲柳老。歸去釣絲堪把。一片苕溪月。休忘了。剪燈今夜。準約鬢花。漁灣烟水同話。

齊天樂 長夏苦雨寄野橋

一聲小暑雷偏準。梅炎數了重數。竹暗雲生。蕉喧茶熟。盡日但供疏雨。愁陰易暮。任大芋高荷。只聽蛙語。一霎闌干。夕陽嫩約又成誤。蟬鳴六月稻熟。悵腰鎌陌畔。晴信無據。江岸篷低。山橋月黑。歸隱儘添漁具。故人間阻。念舊楊新苔。杜陵秋賦。驗取來朝。曉書占應否。

又 甲午仲夏假歸勺園招香子和叔文漁小飲

烟蘿不醒青猿夢。園中舊有青猿已化去。重來喜招鷗侶。留竹開窗。洗桐汲井。畫稿小園新補。綠陰滿戶。有芋稜瓜疇。商量秋圃。整話歸田。買溪錢足儘堪數。故鄉況

多老伴。小冠長帽外。相與論古。橋李林亭。榴花文獻。終勝江湖羈旅。提壺挈俎。且慰我頻年。官清詩苦。莫忘梅丸。翦燈聽盡雨。

唐多令 過梅溪老屋感賦

老屋罨溪東。積垣碎雨中。付誰家。燕子西風。一段斜陽深巷裏。但認得。版橋紅。攜火捉秋蟲。拋書趁晚鐘。卅年前。雙髻兒童。酒市漁扉都換過。祇白髮。有鄰翁。

徵招 甬江寄懷張夢廬依石帚黃鐘下徵調

烟篷雨笠漁灣客。幽栖肯尋梅里。絲鬢幾回看。各蕭蕭如此。青衫都老矣。慣搖落。江潭滋味。一路荷花。柳邊沙外。相思能寄。夢廬家近青燉用陳簡齋詞意須記越中山。剡中雪。匆匆便成歸計。底事不重來。負蕭娘一紙。二分涼。月子。但贏得。冷波清淚。花汀暮。說與鷗知也。儘添憔悴。謂逸雲

湘月 中秋甬江對月用白石念奴嬌兩指聲雙調

當頭幾見。算明州五度。長此清景。李白東遊應許我。老監湖邊乘興。酒醒潮來。江空

人遠。一掬冰壺冷。藕花深處。白鷗自照雙鏡。誰想老子南樓。胡牀坐對。送秋鴻一陣。尊俎賓朋且莫問。玉帳金燈佳勝。吹笛關山。踏歌兒女。早話藤蘿信。蕭蕭華髮。玉堂舊夢休省。

高陽臺 甬上清明春望

雪斷今朝。雨連客舍。天涯又是清明。夢醒梨雲。漸看綠葉陰成。全家上冢鄉山近。聽提壺。暮鳩初鶯。俯江樓。一片斜陽。還怕登臨。五年不踏松楸路。悵故人麥飯。宿草紅生。舊恨新離。那堪酒薄寒輕。杏花鬧後桃花暖。念柳圈兒女關心。望江南。燕子歸時。萬一來尋。

臺城路 蠶

紫荷草長。茶蘼夢。匆匆送春南畝。鴉嘴桑抽。馬頭祠賽。銀箔溫和時候。客來禁否。晝梯影斜陽。柴門晴晝。盡月無人。札山看火費心手。小姑璘藉分守。記房櫳辛苦。針帖慵繡。曉月眠遲。山棚上早。莫又雨傷風慙。幾番熟後。喜雪繭香吹。纜車聲驟。老我

心情一絲催不就。

掃花遊 綠陰用碧山韻

冥濛不斷望一抹參差碧痕新掃。綠藏鶯小。問水暗花侬。何人尋到。梯影鳩聲。行到江南邨好。向誰道。記羅帕題紅。舊事多少。清晝寒尙悄。認江岸陰晴。畫橋昏曉。遠山遮了。縱換得青青。荒苔都老。明日池塘。只恐采香路杳。寫愁抱。諒重來。誤他歸鳥。

綺羅香 夏日寄題醞舫池館并懷和叔

桐葉階疏。棗花簾密。一院綠陰如許。暢好陂塘。三十六鷗誰主。頽牆外。晚筍抽煙。慢水畔。么荷跳雨。料而今。門掩青苔。江南腸斷。賀郎句。山亭一笠無恙。剩有租收。薑稜園供茶戶。了烏窗深。記與故人涼語。應盼到。江上愁帆。定倚徧。斜陽那樹。待秋風。雙槳歸來。蘋洲同按譜。竹垞醞舫詩。分明了烏窗深閉。一片何緣到筆牀。

齊天樂 蟬

金貂已醒高槐夢。蕭蕭鬢影如許。古水琴心。空山磬韻。并入清商情緒。林塘一路。記

微月初三。人間風露。蛛網筠竿。癡情只有小兒女。西窗午枕喚起。誤柴門剝啄。倚杖聽處。碎雨頽垣。斜陽水寺。替得離人愁語。聲聲最苦。訝乍斷疏煙。又移秋樹。紅帕描成。冷綫飛不去。

水調歌頭 題郭天錫焦山看月日記

冷露三山夜。明月大江流。老僧夜半喚醒。同倚竹間樓。攜我洞庭玉笛。控以華陽丹鶴。來弄翠蓬秋。浩盪三萬頃。天地一沙鷗。水晶菴。松寥閣。小滄洲。焦公一去千載。月尚似前否。滾滾銀濤鐵甕。渺渺黃蘆苦竹。照盡古今愁。隔岸曉鐘動。樹色辨瓜州。